

لطائف خواجہ احمد رضاؒ علیہ رحمتہ اللہ علیہ

مطبوع و مشہور حکایاتہ ذیلہ نصفی درجہ سندہ غیر مطبوع حکیمانہ و عارفانہ برچوق
لطائف بر کز بد لرینی شاملدر



۱۰۰ ی متجاوز رسم و ۴۰۰ ی متجاوز لطیفہ فی حاویدر

صاحب و ناشری

اقبال کتب خانہ سی ساجی

حسین

[محمود بك مطبعہ سی]

لطائف خواجہ رضی اللہ عنہ رحمتہ علیہ

مطبوع و مشہور حکایات ذیل نصفی درجہ سندہ غیر مطبوع حکیمانہ
و عارفانہ بر جوق لطائف بر کزیدہ لریخی شاملدر .

دور دنجی طبع




ملت

مر

اخ

اولان





دوردنچی طبعك مقدمه سی

تاریخك دوربین تخمینی بیه ایریشه مهدیکی غایه الغایه اسکی زمانلردن بری هرملتك اولادی کندی خلق قیلاسیقلرندن حس ملی بی بر ایمان درجه سنده - غیر مشعور بر حالده - بطناً بعد بطن هر دوری کندی سلفندن اخذ و تلقی ایله مشدی . بالا آخره انسانلر مدنیت دوره سینه کیرنجه بوتون عوائد و مائر ملیه لرینی تلقینات سهاویه کچی مقدس بیلدیلر . بونلره امتثالی وجیهه دن عد ایله دیلر .


عصر حاضر مزده علم تربیه تدوین اولونجه عموم اقوامك اصول تربیه سی و خاصه هرملتك کندی عادت و تربیه سی حقنده نیجه کتابلر تدوین ایدلدی . بونلردن بعض مهم اثرلر اخیراً لسانمزده ترجمه ونشر اولوندی .

مسلمانلرك دنیوی سعادت حقیقه لرینی موجب هر نه اولورسه هر مسلمانك اوسعادتق استحصال ایله مه سنی اسلامیت امر و ترویج ایلدیکی جهته بودین جلیل ایله متدین هر قوم موجب شرف و سعادتق اولان کندی تربیه وعادتق محافظه ایله مکدن منع ایدله مشدر . بوسبيله عربلر ، عجملر ، تورکلر ، هندیلر ، سندیلر الخ بوقیل عادات ملیه لرینی محافظه ایده ککشر و هر قوم ؛ اونه دن بری کندی تربیه وعادات و اخلاق و ادبیات و حرثیه یاشایه ککشر . آنجاق بوقیل آثارك پك آزی جمع و تدوین ایدلش و پك چوقلری ضایع اولش و شتون حیات الجاسیله بزچوق اسکی شیر ترك ایدیلیب یرلرینه یکیلر قائم اولمشدر .

هرملت ؛ کندیسنه مخصوص مزیتی ده ، ردیلق ده کندی محیطندن آلیر . ملتك مرشد و مربیلری خاقی کندی مشواریه ، نصایحیه ، تألیفات و نشریاتیه مزیتلر جهته ترغیب ایلر ، ردیلتلردن منع ایدر . كذلك مدنیت ایلرله دكجه اختلاط حسیله جاهل ملتلر ؛ ایلری به کیشملر ملتلرك مشتهیات نفسانیه قبیلندن اولان ردیلتلرینه میل ورغت ایده کلدکلرندن ، بوجهته افراط ایسه برملتك

محو و اندراسنی موجب اوله جغندن ملت مربیلری ینه فعالیتیه کله رک ملتی اسباب
عدیله ایله ارشاد و فلا کتلردن انذار ایلمر .

تورکلرک پک چوق ملتزدن فضله مردلکی ، فداکارلنی ، وطن منفعتی
اوغرینه و یاخود رئیسک ، پیشواسنک ، افندیسنک ، باباسنک منفعتی اوغریله
کندی نفعنی ، ماملکنی ، حتی حیاتی فدا ایلمه سی ، غرور ملیسی ، اطاعت
مجرده سی ، علی الخصوص ایمانده کی خارق العاده متاتی هپ کندی طینتنده



خواجه نصرالدین تربه سنک طیشاریدن کورونشی

موجود اولان سجه نك محصولی اولدینی محققدر . سید بهال ، حمزه نامه ،
قان قلعه سی ، خیر قلعه سی کبی حماستی منقبه لردن باشقه فرهاد شیرین ، لیلی
مجنون ، عاشق کرم ، شاه اسماعیل الخ . مثللی صورتا طرز عاشقانه ده بولونان
سرگذشتلر بیله سراپا حماست نمونه لر بیله طولودر . تورکجه ده مطبوع ، غیر مطبوع
وقتیله یازلمش یوزلرجه آثار واردرکه - کرچه بر عرب ویا عجم منقبه سی کبی
کورولورلر سه ده - نفس الامرده بوتون تورکلک احوال و اوصافدن عبارتدر .

بر قسمی ده دوغروندن دوغرویہ (شاه اسماعیل کبی) بر تورک حکایہ سیدر .
 (جامع الحکایات) ده مسطور بو یولده برچوق حکایہ واردر . کتبخانہ لریمز
 تتبع ایدیله جک اولسه داها بوقیلدن خیلی آثار بولنور . (دده قورقود) کبی
 الیمزده مطبوع اولانلرده واردر . وقتیلہ ویانه سورلرینه دایانان غازی لریمز سفرده ،
 حضرده بونلری اوقورلر ، دیکر لر ایدی . یکی چری اورته لرنده اویون اوله رق
 بو حکایه لر دن بعضیلرینی تمثیل ایلرلردی . وقتیلہ اوزانلر ، بزم یتیشدیکمز
 دورلرده عاشق لر بونلرک منظوم قسملرینی سازلر ایله ترنم ایدرلردی . اونلرده
 هیچ (تورکیچک) دعواسی اولمادیغی حالده ایشلری کوجلری تورکلک یا تاغانی
 انواع حماسه بیله کیلری ایله زاغلامقدن عبارت ایدی .


بر تورک چوجوغی اوچ بش یاشندن اعتباراً متصل تورکلکک مناقبی دیکلیرک ،
 تورکلکک اویونلرینی اویناه رق ، تورکلکک مأثرینی کوره رک ، قیش کیجه لری
 بویوک والده لر دن ، یاشلی قومشو خانلر دن بو یولده کونا کونا ماصلالر دیکلیرک
 - کندی فرقه وارمادیغی حالده - ملکک بوتون سجه سنی حائر تام بر تورک
 بابا بیکیدی اوله رق یتیشیر .

کنجلیکنده کون کورمش اسکی اختیارلر دن ، عسکره کیمش ، وطنک
 دورت بر اطرافنی کزمش غازیلر دن انواع فضائی حاوی سرگذشتلر دیکلر .
 آیرجه کتابلر دن اوقور . فقط اعتراف ایدلم که : بز بونلرک هپسنه یتیشدک ،
 هر نوعی کوردک و اوقودق . قسم اعظمی ، بلکه ده عمومک نتیجه سنی حماسه ده ،
 شجاعتده ، مردلکده بولدق . اوندن دولاییدر که : اوزمان ملتزمده هر نوع
 مأثر ملیه ومدنیه موجود اولقله برابر عسکرکک روحی جمله سنه غالبدر .
 هر شیدن زیاده حربه قابلیتمز جهانکک مسلمیدر .

بوکون بقا واستقلالیزی تأمین ایدن یالکز بو خاصه مزدر .

عسکرلکدن ، حماسه تن ماعدا فضائله دائر آثارکک بالنسبه ندرتدن بحث
 ایتشدم . فقط بوندردن مقصد ، اولیه پارماقله صایله حق درجه ده قلت دیکلدر .
 هر حالده کتبخانہ لرده منظوریمز اولان بوقیل آثار بیله یوزلرجه در . بونلرک
 الک مشهوری ملی (مثل) لرایله فقره لر در . چونکه اوزون اوزادی ماصلالرک ،
 دستانلرک ، سرگذشتلرک هر مجلسده در حال ایرادی ، هر یازی آراسنه

صیقیشدیرلماسی قابل د کیلدر . فقط بر صحبتی جانلاندیرمق، برمدعای اثبات
ایله مک، بر مجلسی منبسط ایتک ایچین بر مثل ایرادی، بر فقره نقلی بعض کره او یله
عظیم تأثیر یاپار که او تأثیر نتیجه سنده بویوک ایشلر سهولتله کورولور. بویوک آداملر
مهم غایتلرده بولونور . بعضاًده بر آدامک وجودینک ازاله سنه ، خانمانک
سوعه سنه ، حتی ایکی ملت آراسنده نأثره حرب وجدالک اشتعاله بادی اولدیغی
بیله واقعدر . تاریخنده بونلرک برچوق مثاللری واردر .



خواجه نصرالدینک مرقدینک اسکی حالی

دنیاده سوزک تأثیری فوقنده تأثیر کورولمز .

*
**

ملی فقره لری حاوی مجموعه لر ایچنده خلقمزک الک مقبول و معدوحی ، عادتاً
انیس ملیسی (نصرالدین خواجه لطائف) در. عالم مطبوعاتده قرق سنه لک تجربه م نتیجه سی
اولق اوزره حکم ایدرم که ملتزمک فراغ و انبساط ایچین الک خوشالاندیغی سیما؛

خواجه نك سیماسیدر. ترجیحاً ك خوشلان دینی فقره ده خواجه یه اسناد ایدیلن فقره در. حتی بوسیدن ناشی در که بز، و قتيله حسین افندی ايله بو کتابك طبعنه باشلا دیغمزده اصلنی دورت، بش فورمه تخمین ایدوب آلمیزه کچن غایت قیمتدار اسکی بر مجموعه ده - آلمیزه کی قسم مطبوعنده بولونمایان - لطائفه برابر استانبول ارباب عرفانك کوندره جکی حکایه لری ده نهایت ایکی اوچ فورمه اولور دیمشك . وقتا که صاغدن صولدن، هر صنف انسانلر طرفندن لطائف یاغموری یاغمه باشلادی . کندیمز اون آلتنجی فورمه ده کسمکه و بر خیلی لطائفی ترك ايله مکه مجبور اولدق. اعتراف ایده لم که الده قالانلرك قسم اعظمك خواجه یه اسنادی بك بعید و بارد اولوردی. حتی بو یوله برچوق لطائف مرسوله یی طی ایتمه مجبور اولدق .

*
* *

حضرت مولانا بر رباعیسنده (هرهانی شیشه که اونده فانی اوله جق درجه ده اونکله مشغول اولور سین ؛ سن اوسین) بویورور. بو ؛ هر شیشه تطبیق ایدیلیر. نصرالدین خواجه لطائفه چوق مشغول اولانده اولطفه لرده اویله بر رسوخ حاصل ایدر که اونلر حقنده سویله دیکی سوزلرك، یوروتدیکی فکرلرك قسم اعظمی مصیب اولور . ایشته بو ممارسه مزه اغتراراً نفس کتاب حقنده - دیگر مقدمه ده بولونمایان - برقاچ استنباطاتمزی علاوه ایده جکمز. اصابت ایده مدیکمز نقطه لر اولسه بیله متفکرین قارئیمز بلکه طولایسیله بر خدمت فکریه ده بولونمقلممز محتمل اولدیغندن بوجه آتی عرض ايله یورز :

فقره لر میاننده چشمه لوله سنك طیقاجی فقره سی مثالی مستهجن، باغچهدن میمش چالمق کبی نالایق، لیلکک غاغه سنی، آباغنی کسمک کبی باربارجه سنه حکایه لرك درجنی ترك ایده مدك . زیرا بونلر افواه ناسده عنعنه و ضرب مثل اولمشدر. بر مبحث آراسنده :


آل آبدستی ویر بابو جی .

خاشاری خاشاری آقدیغکدن دولای بویه طیقاجی طیقمشلر .

ایشته شیمدی بر قوشه دوندک .

کبی تعبیرلرك یرنه کوره ایراد ایدیلدیکی بر مسئله ده حاصل ایتدیکی قوتی

اوزنه اوزنه بيك طلاقتله اختراع ايديلنك بليغ افاده ده بولمق قابل اوله ماز. اونك ايچون مثل طرزنده ايراد ايديلن بالاده كي جمله لري حاوي بولونان فقره لري غلظندن دولاي ترك ايدمه دك. ممكن مرتبه حكايه نك افاده سني تخفيفه چاليشدق. فقط مثل درجه سسه كان صوك فقره ده بوتصرفي ياپمايه رق بعضلرند نقطه لرله كچدك. هر ملتك غنغناقي ايچنده بوقيل شيلرده اكسيك دكيلدر. هله عربلر بوتون آناري طوبلاندني جهته بوقيل اثرلرده جلدلر تشكيل ايلر.



خواجه نصرالدينك مرقدينك يكي حالي


بعض لطيفه لرده خواجه نك خير سيزلق ايمه سي، ياخود بك باياغي بر فعلي ارتكاب ايله مه سي بيان ايديلور. بر كره - آناطولوده معتاد اولدني اوزره - كنجلر، باغچه لردن ييمش چالمقني خير سيزلق عد اتمزلر. اونلرجه اويون عددانده صايلير. اويولده خير سيزلق لري خواجه نك؛ چو جوقكن پامادني نه معلوم؛ حتي اوقيل حكايه لر خواجه نك برتمالي حكمنده در. هر توحافقني خواجه يه اسناد

ایتمک بر عادت صیره سینه کیرم شدرد . بایاغلیق مثاللردن اولان مثلاً خواجه نك چپلاق سیوری حصاره کیمه سی ، البسه سی ایصلا ناماق ایچین آت اوستنده چپلاق یول کیدیب شهره یاقلاشدیغنده البسه سی کیهرک تیمورک حضورینه ، یاغمورلی کونده قورو البسه ایله کیرمه سی مثلی کولونه جک ویا مدار عبرت صایلمایه جق حکایه لر ده ابقا ایتدک . چونکه بوقیل حکایه لر بیه ، خلقک دیلنده کمال نشنه و شطارتله طولاشدیغنی همز ایشتمکده یز . خلقی بیلدیکندن محروم ایده مز ایدک . بزم شخصی مالز دکیل که کندی زعمزه کوره تصرف ایدم . انسانلرده مشربلر شایان حیرت بر صورتده متخالف اولدیغندن بزجه سهویله جک یری اولمایان برفقره باشقهرینی سرمست انشراح ایدیور . بناء علیه عامه نك مظهر قبولی اولان حکایه لر سلمه السلام طی وابطال ایله مکة نفسمزده برحق کوره مه دک . آنجاق هم معناسز ، هم تربیه خلافته کورولن طوبی بر قاج حکایه بی ، تربیه عامیه سوء تأثیرینی ملاحظه ایدهرک طی ایله دک .

اخلاقه منافی بریری اولمادیغندن دولای خواجه نك کندی غائب ایتمه مک ایچین بلینه قبااق باغلامه سی حکایه سی - خواجه به یاقیشهادیغنی بیلدیکمز حالد - ابقا ایتدک . حتی بیک سنه اول یازلمس عربجه کتابلرده مشهور (هبقة) به اسناد اولومشدر . واوکا یاقیشیر . چونکه واحق ایدی . خواجه مز ایسه ظریفدر . حال بویه ایکن منافی آدب اولمامسی حسیله درجده محذور بوله مادی . مجسم عرفان اولان خواجه اولاد مملکتی تهذیب و تربیه ایچین ، تفکره و عرفان ظرافته آلیشدرمق اندیشه سیله ادنی فرصتی غائب ایتمز . مخاطبی هرکیم اولورسه اولسون یری کلنجه نکته پردازلقدن ، ظرافت کوسترمکدن کری طورماز . آغاجه قورومق ایچین آصیلان جبه سنی روز کار دوشورنجه (شیمدی بزه قربان کسمک کوروندی) فقره سی بوقیل نکته لردندر . بزم کنجلیکمزده اکثر شاعرلر ، منشیلر کوزل سوز سویلر ، غایت لطیف نکته لر ایراد ایدرلردی . بونلره نکته پرداز ، سخن کو ، سخن شناس دیرلردی . بونلر مجلسلرنده بولونان کنجلره نکته لر ایراد ایدرلر ، بیلنری ایتدیر ایدوب آ کلامایانلری ظریفانه مؤاخذه ایدرک دفته ، اعمال فکره مجبور ایدرلردی . ایشه کتبخانه لری طولدوران دواوین ادبیه و منشآت ملیه بویوله وجوده بکشدرد .

معلومدرکه (نکته) دینلن شینک اکثریسی (چونکه) دیه
 دلیلی بسط ایدیلهمیهجك درجهده نارین ورققدر . بك كسکین اولان عیون
 تفكره آنجاق نمایان اوله بیلیر . بناءً علیه : ایراد اولونان بو قییل نكتهلره
 قارشى (نه دن اوله اولمق لازم كلسین) دینلر اکثریا مجالس عرفاده كولونج
 اولورلردی . مثلاً خواجهنك لطیفه لرندن (اكر خلقك هپسى بر طرفه
 كیتسه لردی ؛ دنیانك موازنه سی بوزولور ، ده وریلردی .) سوزینه قارشى بیر
 طاقیم قضایای فیه ایله اعتراض ایتك نه قدر غریب اولور . چونكه او سوزی
 سوبله یین دنیایی دكیز اوزرنده بر صال كبی تصور ایتمه مشدی . بوتون جهان
 خلقی بر جهته متوجه اولسه كره مزده اوافق بر تمایل حصوله کلیه جكنی بك اعلا
 بیلردی . فقط مخاطبنه آكلاته جنی درسی بو یولده افاده ایله مكمله نه درجه
 بر تأثیر بلیغ كوسترمش اولدی . بوكا بدل اوتورسه دیدی ده (اوغلم ! . بالطبع
 انسانلر فلان وفلان سبیلردن دولایی دنیایه یاییلمشلر . هر مملكت خلقی صبا حلین
 قالدیجه وظیفه معیشتلری زرده ایسه اورایه كیتمه لری طبعیدر . الی آخره)
 طرزنده بر تفصیل بر درس ویرسه بیله بوموجز جوابك قوتنی حائر اوله بیلیرمیدی ؟
 مخاطبنده بو تأثیری كوستره بیلیرمیدی ؟

بو کتابی متعدد دفعه لر باصدیفمز حالدله اسکی شكلی تغییر ایتهدك . یعنی
 قارئین كرامدن ورودی شككنده وكوندردن ذاتك اسعنی تصریح ایدرك نشر
 ایلك . اشبو مصحح ومهذب نسخه نك ترتیبی ده بوزمایاجغز . چونكه بونسخه
 اشبو راویلریله زما نمزده خواجهیه عائد اولمق اوزره شایع بولوندیغنه دلالت ایتك
 صورتیه بر اصل اولمشدر . بالا آخره بواثر ، باشقه كتابلره مأخذ اوله جقدر .
 از جمله كنندیمزده بونسخه دن (چو جو قله قرائت) نسخه سی افراز ایله ديكمز كبی
 بویوكلر ایچین ده داها مهذب بر نسخه التقاط ایده جكز .
 هر حال وكارده توفیق و عنایت جناب حقندرد .



درس حکمت امام‌العالم و موثوق الیه خواجہ نصرالدین افندی رحمۃ اللہ علیہ

خواجہ نصرالدین افندی — اک قدیم بر مدنی و غایت شغشعلی بر تاریخ جنکورانہ سی اولان و بوتون جهانک اک مهم اقلیم لرندہ بو زمانہ قدر حکم سورن و موجودیت مردانہ سنی آفاقہ تسلیم ایتدیرن (تورک) قوم نجیب و اسیلندندر . عثمانلی مبادی سلطنتندہ یتشمش کزیدکان مشاہیر دندر . آناتولیدہ سیوری حصارده دوغمش و آق شہرده وفات ایتمشدر . خواجہ مرحوم آق شہرده و قونیه تحویل و تکمیل علوم و فنون ایدوب آق شہر جوارنده بعض قصبہ و نواحیدہ قاضیلق و مملکتی اولان سیوری حصارده خطابت و بعض یرلرده مدرسلک و امامت خدمتندہ بولونمش و قونیه، آنقرہ، بورسہ ولایاتی و ملحقاتندن بعضلرینہ لمصلحتہ سیاحت ایلمه مشدر . اوائل مآذونیتندہ بر مدت تعلیم علوم ایلمه دیککی کبی اواخر حیاتندہ دخی عمرینی افادہ علم دین ایلمه امرار ایلمه مش و مادام الحیاء مواعظ حکمت نثاریله و نصایح لطائف مشواریلہ خلقلک ریاض ارواحنہ ازهار ترقیات و کمالات زرع ایلمه مش و عوامی انسانلقدن نصیبیه دار ایلمه مکملکک یولنی پک ایی بولمش و بیلمش و بو مدتده دولت علیہ جانب علما پروریسندن اعطا ایدیلن جزئی (مدرسلک) و وظیفه سیله (سلطان اقلیم قناعت) اوله رق یاشامش و زهد و تقواسنی عجب وریا ایلمه تلویث ایتمه مش و فلکک کرم و سردینی دائماً آلایه بوزہ رق سر اوضر ای دورانه هیچ اهمیت بیله ویرمه مشدر . کندیبی فقهای حنفیه دن اولوب حق‌اللہی بیانده لومه لائمندن احتراز ایتمز

وزمانك امرا و قضاة و حكامى بي پروا مقتضای شرع شریفه دعوت ایدردی .
 عامه مسلمینه وبالخاصه علمایه فرض اولان (امر بالمعروف) ی کسوه لطیفه
 بورویوب حدود اللهی اجرا ایتدیریردی . اوائل حیاتنده هنوز پایتخت اولان
 قونیه نك علماسی عدادنده اولوب برخیلی مدت اوراده اقامت ایتمش و مدرسه نشین
 اوله رق خلقه وعظ ونصیحت ایله مشدر . بر وقت طرف حکومتدن لمصلحه
 کردستانه کوندرلسنه ، فلانه باقیلیرسه خواجهمزك علم سیاست وفن ادارهیه




خواجہ نصرالدینك تربه سنك اسکی حالی

واقف بر مرد کامل اولدینی تظاهر ایلر . آقشهرده بولوندیغی ائشاده دخی ،
 ایجاب ایتدیکجه ، همان طرف حکومتدن تاتار چیقاریلوب خواجهمی پایتخته دعوت
 ایده کلدکلری بعض فقراتدن استنباط اولونمقده در . اکثر اشتغالاتی (علم فقه)
 تشکیل ایلردی . علی الاکثر اکمل مختصراتدن اولان وبرکت قدسیتی عامه
 علماجه مسلم بولونان (قدوری شریف) ک تعلیمی التزام ایدردی . حتی

بو کتاب جلیل القدرک تعلیم و تطبیقی حسیله واصل الی الله اولدینی خاتمہ
کتابده مسطوردر [۱].

غوامض علم و معرفته و دقایق فن و حکمته و قوفیه بین الناس شهرتیا
اولدیغدن او دورک سیاحتکیزین علما و حکما سنه آناطولی ده (خواجه نصرالدين
افندی) بی صاغلوق ویرلردی. کندیسنی تیمور جبارک حضورینه داخل ایدن
و مملکتنی آفت مظالمندن قورتاران و کمال جرأته تیموره بعض حقایق سولتدیرن



خواجه نصرالدينک تربه سنک یکی حالی

آنجیق خواجه نك فضائلی ایدی . یوقسه او یله عادی آبدال بذله کو حضور
تیمورده بو درجه اقبال و جرأت قازانه مزدی .

[۱] جناب مولانا دخی اثنای تحصیلده (سلطان ولد) حضرتلرینه (هدایه) فی
ایکی اوچ دفعه اوقوش و صوک تعلیمنده بوتون اصول فقه و غوامض اعمال و اسرار
عباداتی و سائر لطائف سیر و سلوکی بسط ایدرک واصل سر منزل کمال ايله دیکی یه
حضرت سلطان ولدن مروی اولق اوزره مناقب کتابلرنده مسطوردر .

بز خواجه مرحومی نوعی شخصه منحصر (امت واحده) عد ایده رز .
 نه صدر اسلامک (بهلول دانا) سی وامثالی اولان مجاذیب ، نه (جیجا)
 واشیاعی اولان آبدالر ، نه ده عربک (ابودلامه) سی ، عجمک (طلحک) ی
 کبی امرا طالقووقلری ، نه ده اقوام سائرک شوسی بوسی بزم خواجه مزه
 عدیل اوله مز . خواجه دائمی بر مجذوب مستغرق دکل ایدی . خیری ، شری
 فارق اولمایان بودالاردن صایله سی ده خواجه نک شان جلیله تجاوزدر . هله
 حقنه (طالقووقلق ، قورنازلق) کبی شوایی تخطر ایتمک بیله بر مسلم خلوق
 حیا ایدر . نصرالدین افندی مرحوم (صاف) کله سنک اک قوتلی معاسنه مظهر
 بر عالم عارف وزاهد سینه صاف ایدی . ملک خصلت ایدی . بوتون انسانلرک
 سعادتنه خدمت ایتمک ، اونلرک مسعودیتله بختیار اولمق ، هپسیله خوش کچینمک
 دستور معاشرتی ایدی :

رند مشرب لایالی مذهب عالی دلز

خوش کچینمکدر جهانده احسن آمالز

بقی مصداق روحی ایدی . خواجه تحصیل صوریسندن زیاده مکتب
 طبیعته یتشمش بر فیلسوف کامل دیه توصیف اولونمغه جیباندیر . مومی الیه
 هر فنا شیئک خصم جانی ایدی . هیچ بر فنا شیئی کورمک ، بیلیمک ، تصدیق
 ایتمک ایسته مزیدی . هر شیئه اینانیردی . بر انسانده کذب وحیله نقیصه سی
 کورمک ، تصور ایتمک عذاب وجدانیسه قاتلانمقدن ایسه آلدانوبده ماده
 ضرر چکمه یی ترجیح ایلردی . بویولده بر نمونه اخلاق ، بر درس مجسم
 ویره رک بی نوعی ارشاد و اصلاح ایتمک ایستردی . خواجه مرحوم یرینه کوره
 چفت سوروب کدیمنیله کچنیر ، طاعدن اودوننی کندی کسر ، حق قیشین
 بعض طلبه سی ویارانیله جاناوار آوینه بیله کیدردی . یعنی بین الاقران هر نوع
 اسباب معاشرتدن قانزدی . بوکبی بر چوق دلائلدن نمایاندرکه خواجه خیر
 وشری غیر فارق ، دیوانه نهاده ، آدی خواجه اهمیتسز بر کیمسه دکلدی .
 مملکتک اک کزیده اشراقندن اولمغله بعض جوار کویلیروغریب الدیار آدمیر
 خانه سنه مهمان اولورلر وخواجه اونلره اعزاز واکرام ایلردی . خواجه یه
 حقیقه منافی بعض حکایه لرده اسناد ایله مشلر . شهرته بناء [اصلی بوزمش


اولماق واسكى كتاب تلخيص ايدلمشدر ديديرمه ملك ايجون] اينانميه اينانميه — دها
 طوغريسى ايسته ميه ايسته ميه — درج ايتدك . فقط خواجه نك روحنى
 آكلماق ايسته يرك بو كتابى اوقويانلر او فقره لرى بك قولاي آيبرد ايدرلر .
 خواجه بعضاً صوك درجه زندك ، لاابالليك كوستيرر . سائر امثالنك
 زندقه وتلعيننى وبلكه سياست اعدامنى مستوجب اوله جق مسائل ستره لطائف
 آلتند سويله مش اولقله برابر عامه صنوف مسلمين ميانده ينه (رحمة الله عليه)
 ديه ياد اولونه كلسدر . فقط افندى حضر تلى هيچ بر وقت بر عالمه ياقيشمايه جق
 صورتده كفر بازلى ، عاديلكى ، باياغلى — دكل ارتكاب — تصور بيله
 ايتمه مشدر . بونكله برابر خواجه نك، ينه غايه سى بر بشر، بر مسلم غير معصوم
 اولق اعتباريله خطايه دوشمه سى ممكن اولديغى كى چوجوقلق ، كنجلك
 هنكامنده بعض مناسبتسزلك ارتكاب ايله ميه سى ده قابلدرد . آنجق كيتدكجه تكمل
 ايتش ، علم و عرفان وكمال و حكمتى ترقى ايله مش ، تهذيب ذات وصفات قيلمش
 والنهيه مرتبه وصاله ايرمشدر . قدس الله روحه العزيز .

نتيجه تحقيقاتمزه كوره خواجه مرحوم تقريباً سلطان اورخان زماننده
 ظهور ايدوب سلطان ييلديرم بايزيد عصرنده بر حيات بولنيوردى . يعنى يديوز
 عصر هجري سى مباديسندن اواخيرينه — مزار طاشى تاريخنه نظراً (۶۷۳)
 تاريخ هجري سنه — قدر ياشامش وتخميناً آلتشى متجاوز برسندده عازم
 مدرسه بقا اولمشدر .

بر وقت (چنگراقلى تاتار) غزنه سنى نشر ايدن بذله كو و لطائف نويس
 شهر (چيلاق توفيق) بكك ايكي جزؤ نشر ايلديكى (لطائف نصرالدين)
 مقدمه سنده ديركه: مرحوم، ييلديرم بايزيد خان عصرى رجالندن اولوب [۱]
 سلاله سنك مراد ثالث عهدنده استانبوله كلديكى مقيد تاريخ اولديغى كى
 اولادندن برى اوقاف همايوندن مخصص بر مقدار نان پاره نك كندوسنه انتقالى
 لازم كلديكى واو سلاله دن بولنديغى بيان ضمننده باب آصفيه عرضحال
 تقديمه كلديكى صيره ده حيوانى ميدانده براغيلان نوبت كوسنه يعنى كبير داووله

[۱] تراجم احوال يازانلرجه عاتدركه بر ذات هانكى پادشاهك زماننده وفات
 ايدرسه رجالندن عد ايدرلر .

باغلامش . حیوان داوولی سوروکلہینجہ اورکمش ، اورکدجہ سوروکلہمش
وبالتصادف اوکون (صرہ) قاطرلری دخی اورادہ بولندیغندن انلرده اورکوب
بر ولولہ عظمی حاصل اولهزق اورادہ بولنانلرہ (بونه در، بونی کیم باغلادی؟)



آقشہرده خواجہ نصرالدینک تربہ سنک ہجارجا کورونشی

دینیه سؤال اولدنفده سالالهدن اولدیغنی اثباته کلان ذات ایدوکی آ کلاشلمسی اوزرینه (مطلقا مرحومک اولادندن اولدیغنه شبهه قالدی. باشقه دلیلله حاجت یوقدر) دینیلرک استدعاسنک اسعافنه مساعدنه اولمشدر.

آناطولیده بر چوق تحقیقات علمیهده بولنهرق کتبخانه عرفانمزه بر (قونیه سیاحت نامه سی) اهدا ایدن اکارم اخوانمزدن ضیا بک افندینک بوبابده واقع اولان مراجعتمز اوزرینه یازدیغنی تذکرهده دیرکه :
خواجه مرحوم آق شهردهکی بویوک قبرستانده غنوده خاک غفراندر. سنک مزاری اوزرنده شو عباره یازیلیدر :

هذه التربة المرحوم

المغفور المحتاج الى رحمة ربه الغفور

نصرالدین افندی روحه

فاتحه ۳۸۶

شو تاریخ بک زیاده نظر دقت واستغرابمی جالب اولدی . چونکه خواجه نصرالدین هجرت سنیه نبویهدن (۳۸۶) سنه صکره وفات ایتمش اوله سی غریب کلیوردی . بالاخره آ کلاشیلدی که تاریخک رقلری ترس اوقونمه سیله مقصد حاصل اوله جقمش . یعنی طوغروسی (۶۸۳) ایش [۱] خواجه حقنه محلنجه اجرا ایلدیکم تحقیقاتدن آ کلاشیلدیغنه کوره مرحوم مشار الیه سلطان اورخان عصری رجالدن اولوب بالخاصه حکم ورموزات ایله متوغل وصحبته بر طاقم امثال وتلمیحات ایله خلقی ارشاده بذل همت ایدرمش . ذاتاً او عصرک فحول رجالی دائماً بو مسلك تلقین وارشادی تعقیب ایتدکلرندن [۲] ودها طوغروسی ناسک سویه عرفانه کوره سوز سویله مکی دها زیاده موجب منافع بیلدکلرندن جناب مولاناک مثنوی مغویلرنده بویوردقلری کبی (خود تودر

[۱] عبارته جاهلانهدن و خطندن آ کلاشیلدیغنی وجهله صوکره دن یازیلان وقازیلان بو تاریخک بو یولده تحریری قصده مقارن دکله بوده خواجه نک آرتق تحفلق ایچون یارالیش اولدیغنه بر دلیل صاییلیر .

[۲] شیخ شستری (قارا کوز وحاجیواد) اویونخده اورخان زماننده ایجاد ایتدیکی مشهوردر . بک افندی بوکا تلمیح ایدر .

ضمن حکایات کوش دار) فرمان حکم آموزینه توفیقاً مقصد و مرام لرینی امثال
وتشبهات پرده سی آلتند آکلایرلردی. خواجه نك مجلس صحبتده قصبه نك
صغار و کباری، عالم و فاضلی دوام ایدر، هر بری بر درس حکمت و عرفان
اولان سوزلرینی جان قولاغیله دیکارلر مش، عوام ناسك ذهابی کبی خواجه
مرحوم بی سرو بن سوز سویله مه مش، نه دیدیسه هپسینی برلرؤم و حکمتده مستنداً
صرف ایله مشدر.



آقشمهرك منظره سی

مرحوم حال حیاتنده مظهر حرمت عامه اولدینی کبی ارتحالنده دخی او نظر
حرمت و توقیری استجلاب ایلمشدر. اوزرینه انشا ایدیلن تره ایسه مظهر
اولدینی او حرمتك تمثال مجسمی اولسه کي کدر [۱].

[۱] مزاری درت دیرك اوزرینه ساده و ظریف بر کنبد ایله اورتده طاشدن
برصندوقه، قوجامان دیلملی قاووقدن عبارتدر. دیواری زوار طرفندن یازلمش برچوق
نظم و نثر ایله طولودر و تره نك خارجه چکیلن آخشاب پارمقاعك پنجره سنه بی نهابه
صیتمه ایچون پاچاوره باغلانمشدر. بو پاچاوره لر آقشمهرك باطالقنك نیجه بیکلرجه بیچاره بی
مزار عدمه سوروکله دیکنك اسان حالی تمثالیدر و آلانده سوروکلمکده درلر.

بك افنديك افاده اخيره سنی تصديقاً دیرزكه : حقیقه خواجه مرحومك
 تربۀ مقدسه سنه و روحانیت جلیله سنه قارشی عامۀ مسلمینك، خاصۀ و طنداشلرینك
 بك بویوك حرمتی واردرد . بعض مشاهد مبجله کبی قورقازلر، حذر ایتمزلر .
 بلکه سورلر . هله همه حال کولرلر . حتی براعتقاد واردرکه : هرکیم خواجه نك
 قبرینی کورور کورمز کولمزه همه حال باشنه بر آفت ایریشیر . واقعا بر یوجلیقلده
 محرر حقیر و پدرم و انشستم بر آبا ايله تربنه نك اوکندن جاده دن کچرکن
 انشستم : (کولیه جکم شو آدامه باقلم نه اولاجق ؟) دیدی . عادات واعتقادی
 بوزماماسنه ابرام ایتدیلسه ده دیکله مه دی . او آنده اوستمزده بر قوجه چنار
 دلی بیندیکمز ناتار آریاسنك تنه سنه طاقیلوب پارچه پارچه ایتدی . آتلر اورکوب
 دوریلکه رمق قالدی . آزدها هیمز کریه خند اولاجقدق . خواجه نك مظهریتنی
 تبدیل ایتك کیمك حدیدر . عرف و اعتقادك آقیریسنه کیتمك یالکیز دینه
 دکل عقل و حکمتده مغایردر .

آقشهر لیلرده صاف ، عادتا شعر دینله جك بر عادت دها وار ایمش . بر
 دوکون اولونجه همه حال نصرالدین خواجه نك تربنه سنه کیدوب دوکونه دعوت
 ایدرلر ایمش . حتی : (منلارینی ده آل برابر کل ! . .) دیمك شرط ایمش .
 اکر خواجه دعوت اولمزه طرفینجه دیرلکسزلک یوز کوستره جکی اعتقادنده
 بولونورلرمش .

واقعا خواجه نك روحانیتی بر دوکونه درنکه چاغیرمق ، امداد روحانیتی
 برابر بولونمق ، نشئه بخشا اولق ایچون زعفرانی زرده پیشیرمکدن آشاغی قالماز .
 زوالی خلق بیلمزکه یالکیز خواجه مرحومك طلبه سنك روحانیتی
 چاغیرمقله اکتفا ایتمه ملی ، بلکه کلین کوفه کی انسانلرک حسن معاشرتیه عائد
 خواجه نك لطائف و حکمیاتندن درس عبرت آلمالی ده خوش کچنیمه نك یولنه
 باقمالی .

بزم ملی شرقیلرمن ، اویونلرمن نه ایسه ، بزجه خواجه مزك لطائفی ده
 اودر . نشئه سز زمانلرمزده هیچ بر ائلف کتـابی بزجه خواجه مرحومك
 سوزلری قدر خوش کلز . بو نفس الاُمرده مطابقدر . خواجه نك اکثر
 لطائف ، حسن اسلوبی ، سحر بیان ايله برابر او قدر درین حکمتلری ، مضمونلری

حاویدرکه انسان بو کبی عظیم قوهٔ تسخیری به مالک اولان دلنشین لطیفه‌لری
اوقورکن درحال فضولینک :

بو بر کتاب سوزدر فهم ایدن اهل حاله

مصرعنی تخطر ایدر . خواجه‌نک اکثر کفتاری حقیقهٔ سهل ممتنعدر .
ردهٔ صفوته بورونمش اولان حاضر جوابقلری مخاطبینک تا جانکاهنه شمشر
زهر آلود کبی قطعی بر تأثیر بلیغ کوسترر : « بیلنکز بیلمه‌ینلره او کر تسین . »
— « بو قونیله‌یر نه ایی آداملردر . آدامه دوکه دوکه حلوا یدیر لر . » —
« اکر چوملک حسابنه باقارسهک بو کون آیک یوز بیکرمیسی در . » — « اسکی
آیی قیرپار قیرپارده بیلدیز یاپار لر . » — « کندی کنیدنه خطاباً : بز سنک
کنج‌ککی ده بیلر یاز ! » — « بو قادار طاووغه بر خروس لازم دکلې ؟ »
— « قازانک طوغوردیغنه اینانیر سنک ده ، اولدیکنه اینانمازمیسک ؟ » —
« اوسته آتیلان کوپکه خطاباً : کچ بیکیدم کچ . » — « ویرمه کوکلم اولمايخه
ایبه اون سریلیر . » — « فنجانجی قاطرلرینی اور کوتمزسهک آخرتده قورقولاچق
برشی یوقدر . » — « قوردک قویروغی قوپارسه ، او زمان کورورسک سن
توزی دومانی . » — « بن صاغ ایکن شو یولدن کچردم . » — « بئندیکی دالی
کسوب دوشمه‌سی . » — « طقوز یوز طقسان طقوز آلتونی ویرن الله برینی ده
ویریر . » — « بویور کورکم طعامه ! » — « قیز اوغلان قیز آلتی آیلق کبه . »
— « ایی بولدیکنز صاحبی اولمش اشکی ! » — « اشکک سوزینه اینانیور سنک ده
آق صاقلله نم سوزیمه اینانمايورسک ! » — « دنیانک اورته‌سی اشکمک اوک
آیاغک باصدیغی یردر . اینانمازسهک اولچ . » — « چوق شکرکه اینجیر هدیه
ایتدم . یا پانجار کوتوره‌یدم ، ققام کوزم یاریلیردی . » — « امام اوصورنجه
جماعت » — « او چوماغی سن ییسه‌یدک ، دورت آیاقلی اولوردک . » —
« غوغا بزم یورغانک اوستنه ایمش ، یورغان کتندی غوغا بیتدی . » — « قاری
بیراق خرسزی کندی حالنه ، او برشی بولایلیرسه آلدن آلق قولای . » —
« ایکی آچهلوق جکری قاپان کدی ، قرق آچهلوق بالطیه طمع ایتمی ؟ » —
« طوقومنه قاری قارغیه ، اولک اوستی بزدن کیرلیردر . » — « چوجوغمک
کندی بولوشی در ، بن اوکره تمه‌دم . » — « آغاجه چیقارکن پابوجی قوینه

صوقه رق: بلکه آغاجدن اوتیه یول واردر.» — «طاوشانک صوینک صوینک صویندر.» — «صاری آشی ییین کردکه کیرسین.» — «اوغلکک آدینی ایوب قویمه، کثرت استعمالله ایپ اولور.» — «بن نه بیلیم قارا کلکده صاغ طرفی؟» — «عجبی بلبل بوقادار اوتر.» کبی دیلدرده داستان اولان حکمتلری صیره سی کلدکجه بر تورلوا کلاتیله میان مقصدلرک قارشیدنده انسان ککله یوب طورورکن «حضر» کبی امداده یتشیر. مخاطبینه اوآنده سحرکبی تسخیرایلر.



آقشهرده خواجه نصرالدین مرحومک تربه سی

بوتون تورکلرک فرط محبت ورغبته دن ناشی نسخه لری بیکلرجه، میلیونلرجه باصیله باصیله الده بولنان طاش باصمه سی (لطائف خواجه نصرالدین) کتابنک یا کشلقلری او درجه چوغالمش، افاده سی او رتبه تعقید و ابهامه اوغرامش ایدی که آرتق خواص آلّه یاقیشامایه جق برحاله کلشدی. حتی طبع ونشری، خواصک غیری به عائد محضا پاره قازانق ایچون کتاب باصان برقاچ طابعه منحصر قالمشدی. کوفدن، پاسدن ناشی معالی پروران ادب و حکمتک نظر رغبته دن دوشن بو (جمع النفائس) اوزرینه تکرار جلب انظار رغبته ایتمکی دوشونوب

بيك مشكلات ايله برقاج دانه و بولاق باصمه سي اسكي نسيخه لريني آلد ايتدك. اثنای تصحيحده هم كتابك چاشني اصيليني بوزمامغه، همد اهام درجه سینه وارن بعض تعیراتی اصلاحه چالیشدق. بو آراق الد بولوتان لطائف کتابنده مسطور اولمیان بر خیلی لطائف اسکی بر یازمه مجموعه ده ائزه کچدی. بعض کتب ادبیة قدیمه و جدیده و مجامع لطائفده بولایلیدی کمز لطیفه لر ايله برابر اصل کتابه قاریشديرمايه رق خاتمه يه الحاق ایلدك. بو شكلده بی نظیر و نفیس بر (مجمع اللطائف) حصوله کلدی. خواجه حکمت نثارمك روحانیت قدسیه سنی بو صورتله دخی شادان ایلدك.

(لطائف نصرالدين) عربجه يه (حجا الرومی) عنوانيله ترجمه ایلدیکی کبی انکلیزجه يه، فرانسه زجه يه و سائر ملل متمنده لسانلرینه نقل ایلمشدر. هله بر انکلیز (لطائف نصرالدين) مراق ایدوب طوبلايورمش. کندیسنده اولمیان بر انکلیز لیراسنه آلیيورمش (دییه بوندن اوچ سنه اول بر سوز ایشیتدك. اصلی اولماملی که استانبولجه بویه بر تشبثی کورولمده دی؛ حالوکه بورایه بر باش وورمه سي لازم ایدی. او صورتده بزم معلومز اولوردی. اصلی وارسه بز انکلیزه، باد هوا اوله رق یوزی متجاوز لیرا قازانديرمش اولدق.

بو آله قدر عالم اسلامده یعنی اوچ لسانده یازیلش اولان يك چوق لطائف منظور و مسموعمز اولدینی جهتله مطلقا خواجه نك لطائف اولدینی بزجه کسب یقین ايله مده کجه و یا خود متعدد مأخذلرده کورولمده کجه هر اسنادی قبول ايله مده ک. بونکله برابر دخی علاوه مزی ینه اصل کتابه قاریشديرمايوب خاتمه يه الحاق ایتدك. خواجه نك ترجمه حانه و لطائفنه عائد اولق اوزره اثنای نشرده قارئلرمزدن ورود ایده جك محررات خاتمه کتابه علاوه ایديله جکدر. بوبایده بزه یارديم ایدنلره — ایسترلرسه — بزده کتابمزدن جزو و یا نسیخه اولق اوزره بر حصه ناجیزانه تقدیم ایده جکز. آنجق کوندریلن لطائف بزده وارسه بالطبع بر شی تقدیم ایديله مز. آرتق بو کوچوک اعتمادی بزه ایثار بویورمه لیدرلر. [۱]

برای

[۱] بمقدمه یازیلوبده (لطائف خواجه نصرالدين) جزو جزو نشر ایلدکله باشلانجه قسم اعظمی — بلده عرفان و ظرافت اولان — استانبولمزدن و بر قسم مهمی ده خارجدن اون فورمه تشکیل ایلین لطائف کلدرک جمله سي تهذیب و تألیف اولوغق صورتيله شو مهم مجلد وجوده کلشدر.



❦ ابتدای لطائف ❦

خواجه نصرالدین افندی آق شهرده بر کون وعظ ایچون کرسی یه چیقوب:
 «ای مؤمنلر! بن سزه نه سویله یه جکم بیلیر میسکمز؟» دیمش. جماعت: «بیلمه یز.»
 دیمه لرله خواجه: «سز بیلمه نیجه بن سزه نه سویله ییم؟» دیوب کرسیدن اینر،
 بیراقیر کیدر. ینه بر کون کرسی یه چیقوب اولکی سؤالنی تکرار ایدنجه بو
 سفرده جماعت: «بیلیرز.» دیرلر. خواجه: «مادامکه بیلورسکمز. او صورتده
 بنم سویله مکملکمه نه لزوم قالیر؟» دیر، ینه چکیلیر کیدر. جماعت حیرتده
 قاله رق: «افندی بر دها کرسی یه چیقارسه کیمنز بیلیر، کیمنز بیلمه یز.»
 دیمکه قرار ویرلر. خواجه ینه بر کون کرسی یه چیقوب اهالی یه اولکی
 سؤالی تکرار ایدرک «کیمنز بیلیرز، کیمنز بیلمه یز.» جوابی آلتجه،
 خواجه جدیدنه هیچ خلل کتیرمه یه رک: «نه قدر اعلا، او یله ایسه بیلنکمز
 بیلمه ینکزه او کرتسین.» دیمش.

❦ لطیفه ❦ خواجه بر کون وعظ ائناسنده دیمش که: «ای مسلمانلر!
 حق تعالی یه شکر ایدک که دوه یه قاناد ویرمه دی. یوقسه طاملریکنزی باشکزه
 بیقاردی.»

❦ لطیفه ❦ ینه بر کون خواجه قونیه ده وعظ ایدرکن: «مسلمانلر!
 بو شهرک هوا سیله بزم شهرک هوا سی بردر.» دیوب جماعت «نه دن بیلدک؟».

دیخه خواجه: «آق شهرده نه قدر ییلدیز وارایسه بوراده ده او قدر وار.»
دیمش.


﴿لطیفه﴾ برکون خواجه حمامه کیدر. تصادف حمام تنها اولمغه
کندی کندینه (قایا باشی) سویله مکه باشلار. کندی سسی پک خوشنه کیدر.
«مادامکه بنم بویه چوق کوزل سسم وارمش. نیچون مسلمانلره دیکلمه ییم؟»
دیه حمامدن چیقدیگی کی طوغری مناره یه حیقار. اویله وقتی اولدیغی حالد
خواجه تمجید اوقومغه باشلار. آشاغیدن بریسی: «به جاهل حریف! بویه
کریه صدا ایله اویله وقتسز تمجید اوقومغه نه مجبوریتک وار؟» دینجه،
خواجه مناره دن اکیلوب اوآدمه: «آه بر صاحب خیر بورایه بر حمام یاپدیره
ایدی ده، سن آکلایه ایدک بنم سسمک کوزل لکنی.» دیمش.

﴿لطیفه﴾ خواجه یه بر کیچه رؤیاسنده طوقوز آقچه ویرمشلار.
«هیچ اولمازسه شونی اون آقچه یاپک» دیه رجا ایله دیککی برصیراده او یانش
باقش که آووجنده بر شیرلر یوق. ینه صیقی صیقی کوزلرینی قیایوب الینی
اوزاتهرق: «کتیر باری طوقوز آقچه اولسون!» دیمش.

﴿لطیفه﴾ خواجه برکون شهر خارجنده مصلاده [۱] حسب الاقتضا
چاماشیرینی چیقاردیغی برصیراده قارشیدن برخیلی آتیلر کلدیکنی کورور.
کینمکه وقت بوله مایه رق باری بلنه قدر بر قبر چوقورینه صوقولور. آتیلر
خواجه یی کوروب: «بره آدم قبر ایچنده نه ایشک وار؟» دیه لرله خواجه بر
لاقیردی بولامایوب: «بن اهل قبوردنم. سویله سیره چیقمش ایدم» دیمش.

[۱] (مصلی) نماز قیله حق یر دیمکدر که بویوک شهرلرک خارجنده بویه بر
میدانلق اولور. طاشدن محراب و منبری بولونور. بویوک بر وقعه اثناسنده یاغفور
قیطلغنده (حاجت نمازی) قیلینوب دعا ایدیلیر. جماعت کبری ایله غایت هیبتی اولور.
اکابر مملکتدن برینک وفاتنده بعضاً نمازی مصلاده قیلینیر. ذاتاً عمومه مخصوص
اولدیغدن جوار محله جنازه سنک نمازی ده اوراده قیلینوب جوارینه دفن اولونور.
اوراده مزارلق بولونور.

﴿ لطیفه ﴾ خواجه کنبجلیکنده صباحك آلاجه قارانلغنده بر باغچه
 کیروب الہ کجیردیکی قاوونی، قارپوزی، حاووجی، شالغامی النده کی چواله طولدر مقده
 ایکن باغچوان آنسزین خواجهنک اوستونه چوللانیر، خواجه شاشیریر .
 باغچوان ایله آرالرنده شویله بر محاوره کچر . « بوراده نه آراسین ؟ » دینجه
 « آقشامکی دهشتلی فیرطنه بنی بورایه آتدی ! » « ای ، بونلری کیم قوپاردی ؟ »
 « فیرطینه بنی اورادن اورایه آتدجه بنده هر نه یه یاپشدمسه ائمه قالدی . »
 « پک اعلا . یا ، بونلری چواله کیم طولدوردی ؟ » دینجه خواجه « اوت ،
 فی الحقیقه بنده اونی دوشونیور ، اوکاده بر قولپ طاقغه اوغراشیوردم . »



خواجه — بن اهل قبوردم ، شویله سیره چیمش ایدم .

﴿ لطیفه ﴾ خواجه افندی « رحمه الله علیه » قونییه کیتدیکنده بر
 حلواجی دکانه کیرر ، هیچ ایکی طرفنه باقادن طوغرو دستکاهه یاناشوب
 « بسم الله » دیهرک متصل حلوائی یمکه قویولور . حلواجی : « به آدام ! اوققه سز ،
 قانطارسز ، پاره سز ، پولسز امت محمدک حلواسنی نه حقله بیورسین ؟ » دیه

خواجه بی دوکمه باشلا بجه خواجه کال حیرته: «بوقونیه لیلر نه ایی آدملردر؟
حلوا بی آدمه دوکه دوکه یدیر لر .» دیمشدر .



یا ! بونلری چواله کیم طولدوردی ؟

﴿لطیفه﴾ بر رمضان شریف کلدیکنده خواجه مرحوم کندی کندینه:
« نه ایچون خلقه او یوبده اوروج طوتا جم ؟ برچوملک ندارک ایدهرم . کونده
چوملکه برر دانه طاش بیراقیرم . طاش اوتوزی بولنجه بایرامی ایدهرم . »
دیهرک پیدا ایلدیکی چوملکه کونده برر طاش آتمه باشلار . قیزی کوروب
بر آووج طاشده او طولدورور . برکون خواجهیه: « بوکون آیک قاجیدر؟ »
دیرلر. خواجه: « براز صبر ایدکده باقایم . خبر ویرهیم . » دیوب آوه کلیر ،
چوملکی بوشالتیر ، صایغه باشلار . بائارکه طاش تام یوز یکر می عدد اولمش .
کندی کندینه: « اکر بن بونک طوغروسی سویلر سه م سر سملکمه حکم
ایدر لر. » دیوب خاقلک یانسه کلنجه: « بوکون آیک تام قرق بشی در. » دیر .
« خواجه افندی بوناصل ایش ؟ برآی طوبی اوتوز کوندر. » دیمه لریله خواجه
جواباً دیر که : « سز نه سویله یورسکیز افندی لر؟ بنینه انصافی طاوراندیم . اکر
چوملک حسابنه باقاجق اولورسه کز بوکون آیک یوز یکر میسدر. »

﴿لطیفه﴾ خواجه یه : « یکی آی کیرنجه اسکی آی نه یاپارلر؟ » دییه صورمشلر. « قیرپارلر ، قیرپارلرده ییلدیز یاپارلر. » دیمش .

﴿لطیفه﴾ بر آراق خواجه یومورطه نك طوقوزنی بر آقچه یه الدن طوبلایوب بازاره کیده رك اوتی صاارمئس . « بونه بیجم تجمارتدر ؟ » دییه صورانلره خواجه افندی : « مشربلرك بكا محومنی کورمه یورمیسکز بواز ذوقی؟ مقصد مادرابازلقي دکیل، تك دوستلر بزی آلیش ویریشه کورسون. » دیمشدر.



خواجه — بوقونیه لیلر نه ایی آدامدرلر، حلوانی آدامه دوکه دوکه یدیریرلر .

﴿لطیفه﴾ بر کون خواجه نصرالدین بر ایرماق کنارنده اوطورورکن اون قادار اعمی کلیر. ایرماغل اوته طرفنه برر پوله [۱] چکیرمک ایچون خواجه ایله بازارلق ایدرلر . خواجه بونلری صیرتنده برر برر طاشیرکن ناصلسه برینی یاری یولده دوشورور . صو آلیر کوتورور . اعمالر فریاده باشلار . خواجه دیرکه : « نه شاماطه جی حریفلر. نه باغیروب چاغیر یورسکز؟ بن واز کچدم ، بر پول اکسیک ویرک. »

[۱] (پول) اسکی زمانده بر بازه درجه سنده اوافقلق .

﴿لطیفه﴾ بر کون بر آدم آووجنده طوتدینی یومورطه بی اشارت ایدرک: «خواجه افندی . شو آووجده کینی بیلیرسه ک سکا بوندن بر قایغانه لق ویرهیم.» دیدکده خواجه: «براز شکلی تعریف ایت ، بیلیرم.» دیر. او آدم: «طیشی بیاض ، ایچی صاریدر.» دییه ایضاح ایدجه خواجه دیر که : «بیلدم ، بیلدم . شالغامی صویمشدر ، اورته نی اویمشدر، ایچنه هاووج قویمشدر .»



چو ملک حسابه بافارسه کز آیک یوز یکر میسیدر .

﴿لطیفه﴾ بر کون خواجه نصرالدین افندی بازارده کز رکن بر حریف: «خواجه بوکون آیک اوچیمی ، دوردمی ؟» دییه صورنجه: «والله بیلیم، شوکونلرده آی آلوب صاندیغ یوقدر.» دیمشدر .

﴿لطیفه﴾ خواجه کنجاکننده اوموزینه بر زردبان آلوب بر باغچه نک دیوارینه چیقار . صوکره زردبانی باغچه نک ایچریسنه طایار باغچه یه اینر . بو حالی کورن باغچوان خواجه نک یانه کلوب: «سن کیمسین؟ بوراده نه آراسین؟»

دید کده خواجه فتورسز: « نردبان صانارم . » دیر . بانچوان: « بوراده نردبان صاتیلیرمی؟ » دیمکله « بهی جاهل حریف ، نردبان بو ! زده اولسه صاتیلیر . » دیمشدر :



خواجه نك اعمالرله غوغاسی .

﴿ لطیفه ﴾ بر کون خواجه نك تارلاسنه بر او کوز کیرر . خواجه الینه بر صوبا آلوب اوزرینه هجوم ایدنجه او کوز قاجار . بر هفته صوکره او کوزی بر کویلونك قاغئیسنده کورور . همان بر اودون یا قالا یوب اورمغه باشلار . کویلی « بره آدم . بنم او کوزمدن نه ایسترسین؟ » دینجه خواجه : « سن خلط ایتمه جاهل کوبك ! . او قباحتی بیلیر . » دیمشدر .

﴿ لطیفه ﴾ بر کون خواجه بر ایرماق کنارنده آبدست آلیر کن پابوچی دوشر . صو آلیر کوتورور . خواجه پابوچی قورتارمه جغنی آکلانجه بر کناره چکیلوب آلدیغی آبدستی بوزارق : « آل آبدستکی ویر پابوچی . » دیمشدر .

﴿لطیفه﴾ خواجه بر کون احبابنه: «اولدو کم وقت بی اسکی قهره قویکیز. دیه وصیت ایدر. سببی صورانلره: «سؤال ملنکاری کلدیکی وقده [بکا چوقدن سؤال اولدی. باقسه کزآ. قیرم بیله اسکیدر.] دیر یاقانی قورتاریرم.» دیمشدر.

﴿لطیفه﴾ بر کون خواجه بر آته بینمک ایستر. حیوان یوکسک اولدینی ایچون صبحرایوب بینه مز. «آه، کیدی کنجلك!» دیر. اطرافه باقیبده کیمسه کورمه یخه: «کنجلكدهده بر خیرلی اوغورسز دکل ایدک یا!» دیمشدر.



خواجه نك اوکوزی دوکمه سی .

﴿لطیفه﴾ بر کون خواجه افندی سیاه البسه کییوب طشره چیمش. بعض هرزه وکیللر: «خواجه افندی نه اولدک؟ قاره لر کیمشسک!» دیه سؤال ایله دکلرنده خواجه: «اوغلمک باباسی مرحوم اولدی ده اونک یأسنی طوتارم.» دیمشدر.

﴿لطیفہ﴾ یاز موسمندہ برکون خواجہ افندی اوزاق یولدن کلیرکن
 کندینی شدتلی برحرارت آلیر . اوآردلق برچشمہ یہ تصادف ایله مشہدہ باقارکہ
 لولہ سنہ بر آغاچ صوقشسلر [۱] . خواجہ صو ایچمک ایچون آغاچی چکوب
 چیقاردینی کبی صو قوتلیجہ فیشقیروب خواجہ مک اوستنی باشینی ایصلاتمش .
 خواجہ فوق العادہ حدتہ نوب : « ایشته بویله دلی دلی آقدیغک ایچون دیبکہ
 بوقازینی طیقشسلر . » دیمشدر .



اوغلمک باباسی اولدی ده یأسنی طوتارم .

﴿لطیفہ﴾ برکون خواجہ یانہہ برقاچ قارپوز آلوب طاغہ اودون کسمکہ
 کیتمش . صوصادینی وقت قارپوزک برینی کسر . طاتسز دیہ آتوب برینی دخی
 کسر . والحاصل جملہ سنی کسوب برازینی یر ، باقیسنی ده اورادہ کی ملوئات ایچنہ
 آتار . برزمان صو کرہ ینہ حرارت آلیر . صو بولامانجہ آرہ صیرہ تلویث
 ایتدیکی قارپوزلرک باشنہ چوکوب : « شوکا دکمش ، بوکا دکمہ مش . » دیہ
 آقشامہ قادار جملہ سنی یمش .

[۱] اسکی زماندہ یول اورتلرنده کی خیرات چشمہ لردہ پرنج موصوق بولونمزدی .
 لولہ سنی بر آغاچ ایله قاپاتیرلردی .

﴿لطيفه﴾ خواجه نصرالدين افدينك كوزل بر قوزوسى وار ايمش .
 هيچ ياندن آيرمايوب اعتناليجه بسله ديكندن تورلو نورلو شاقلا بانلقلر ياپوب
 خواجه يي اكلندير ير مش . احبابي قوزويي كوزلر ينه كسيديروب خواجه يي باغفال
 ايدەرك يمكه قرار ويررلر . بريسى كلوب : « خواجه افدى ، بوكون يارين
 قيامت قوپاجق ايمش ! بو قوزويي نه يابه جقسين ؟ كتير شوني ييهلم . » دير .
 خواجه الديرماز . برى دهاكلير . اوده بو يولده اصيلير . خواجه اونى ده



ايشته بويله دلى دلى آقديغك ايچون ديكه قازيق صوقشلر .

صاوار . ديركن تعجيزلر توالى ايدر . آرتق خواجه بيزار اولوب ايرتسى
 كون برسيرانكاهده كسيلهرك ضيافت چكلمه سنه قرار ويريلير . قوزو كسيلير ،
 آتش ياقيلير . خواجه قوزويي چويرمكه باشلار . آرقاداشلر دخى صويونوب
 ائوابلر يي خواجه يه تسليم ايدرك مناسب بر ميدانلغه اوينامغه كيدرلر . سوكيلى
 قوزوسنى آليه پريان ايتك مجبوريت آلمه سنده بولونان خواجه ، فرصدن استفاده
 ايدرك ائوابك هپسنى آتسه اوروب ياقار . براز صوكره قوشمقدن يارانك قارنى

آجیوب کری کلدکلرنده کورورلرکه اثوابك جلهسی یانوب کول اولمش .
 « امان خواجه نه یاپدك ؟ » دییه افندینك اوزرینه هجوم ایله مه لریله خواجه
 دیرکه : آی اوغول ! نه تلاش ایدیورسكز ؟ یارین قیامت قوپه جق ایش ،
 نه یاپه جقسكز اثوابی ، اسبابی ؟ »

﴿ لطیفه ﴾ بر کیجه خواجه نك اوینه خیرسز کوروب بر چوقاشیاسنی
 یوکلنه رك کیدرکن خواجه ده کندی یاندینی اوطه نك اشیاسنی اوموزلایوب
 خیرسزك آردنجه کیدر . خیرسز اوینه کیرنجه خواجه ده آردنجه کیرمك ایستر . خیرسز :
 « بنم اومده نه ایشك وار ؟ » دییه چیقیشنجه خواجه : « یا بز بواؤه کوچ ایتمدکمى . »
 دیمشدر .



خواجه نك ملاله فارسی بیت سویله میسى .

﴿ لطیفه ﴾ بر کون خواجه یه بر قاج افندی کلوب : « اوقور یازار
 کچمیرسین اما فارسی بیلمزسین . » دیرلر . خواجه : « نیچون بیللم ؟ » دیر .

« بیلیرسهك بزه بر بیت اوقوده ایشیده لم. » دیمه لریله خواجه بداهه :

رقم بجای سرویلر کوردم طوقوز قورد آمدند
بر قاچی یاتیرلادم بر قاچی تارلا میروند

دیمکه ملالر: « ای والله . » دیوب خواجه نك اقتدارینی تسلیم ایدرلر [؟].

[حکایه نك اصلی بویه در. یعنی افندیلر خواجه نك فارسی بیلیمکده قدرتی، حتی شعر سوبله یه جك قادر کفایتی کوره رك فضیلتی تسلیم ایله مش بولونیور. آفرین اونلرک اذعانله].




یا ! طوغوردیغه اینانیرسك ده ، اولدیكنه ایناغازمیسك ؟

﴿ لطیفه ﴾ بر کون خواجه قوموشوسندن بر قازان ایستر . ایشنی بیتیردکن صوکره قازانك ایچنه بر کوچوک تجره قویوب کوتورور ، صاحبنه ویرر. صاحبی تجره بی کورنجه: « بو نه در؟ » دیبه خواجه دن صورار . خواجه: « قازانکز طوغوردی. » دیر. قومشو: « پک اعلا! » دیوب تجره بی قوللانیر. ینه بر کون خواجه قازانی ایستر ، آلیر کوتورور . صاحبی بر خیلی وقت

بکله ، باقارکه قازان گلز . خواجه نك اوينه کليز ، قازانی ایستیر . خواجه حزین بر چهره ایله : « سن صاغ اول قازان مرحوم اولدی . » جواخی ویرر . قومشو کمال حیرتله : « خواجه افندی . هیچ قازان مرحوم اولورمی؟ » دینجه خواجه؟ « یا طوغوردیغنه اینانیرسین ده اولدیکنه اینانمز میسین؟ » دیمشدر .

﴿لطیفه﴾ برکون خواجه برلیک طوتوب اوينه کتیره رک اوزوندر دییه غاغه لرینی ، آياق لرینی کسمش . شویله بر یوکسک یره اوطورتمش : ﴿ایشته شیمدی قوشه دوندک .﴾ دیمشدر [۱] .



ایشته شیمدی قوشه دوندک .

[۱] شو حکایه و بوکا بکزه ن حکایه لر بزه آکلاتیرکه بو کبی تمثیلات بر وقعه نی جانلاندیرمق ایچون پک اسکیدن بری سور وکلنوب کلیور . صدق ، کذب ده مطلوب دکیلدر . بوکا بناء بز پک مسهتجن اولمایانلری درجه مجبور اولدق . (بوخواجه نك شاننه یاقیشماز .) دییه ترک ایدمه دک . زیرا هنوز السنه ملته شایعدر . بلکه ده خواجه هنوز مولالغنده جانسز بر لیلک جسدینی بویله کسمش بودامشدر .

﴿لطیفه﴾ * خواجه براشتهالی زماننده سفره ده کی صیجاق چور بابه قاشیغی
طالیدیروب همان معدیه ایندیرنجه — قورشون دو کر کبی — دوداقلرندن
قارننه قدر بر آتش سیال جریان اینجه باغیره رق سوقاغه فیرلامش . اوکنه
کلنه: «صاوولک قارداش لر قارنمه یانغین وار!» دیرمش .



صاوولک قارداش لر قارنمه یانغین وار !

﴿لطیفه﴾ بر ملا سیاحت اتاننده ملاقی اولدیغی عرفایه بعض مشکلاتی
سؤال ایدر . بریسی: «بوکی شیرلی بیلسه بیلسه آق شهرده خواجه نصرالدین
بیلیر.» دیر . ملانک یولی آق شهره دخی اوغرایوب شهر خارچنده صیرتی
هکبه لی، آیانغی چاریقلی، باشی صاریقلی چیفت سورمکه مشغول بر کیمسه یه
تصادف ایدر [۱] . مکر خواجه مرحوم ایش . یانه واروب سلام ویریر .

[۱] اسکی زمان علماسی علمی حسیبه الله قازانیر ، ینه حق رضاسی ایچین اربانه
نشر ایلرلردی . اسباب معیشتلرینی کندی زراعت، صنعت وسائرهلرندن قازانیرلردی .
مشهور امام بر کوبده کندی چیفتی کندی سورردی . حتی بزم چوجوقلغمه زده
بو قیل عقیف ، صالح عالم وار ایدی . بز اولردن استفاضه ایتدک .

بجبت انساننده بعض مشکلاقی اولدیغی بیان ایدوب کندیسنه صاغلق [۱] ویریلن
 نصرالدین افندی ایله کوروشدیکنده اوکا صوره جغنی سویله مش . خواجه
 ملائک مذیلنده کوزل نارلر کوروب: « شونارلردن بکاویررسه ک سنک مشکلی
 حل ایتمکه چالیشیرم. » دیر. ملاهرنه صوردیسه خواجه نارلری آلهرق جوانی
 ویرمش . نهایت نار بیتمش . ملا: « برمشلکم دها قالدی . شونی ده لطف ایت. »
 دیدکده خواجه: « یوری، وار خلط ایتمه، نارلرک تو کندی. » دیوب قالقار،
 چقتیله مش-غول اولور. ملا: « دیار رومک چفتجیسی بویله در. یا علماسی نیجه
 اولسه کرک؟ » دیوب چیقمش کیتمش .



خواجه اوردکری طومایه اوغراشیر .

﴿ لطیفه ﴾ خواجه بر پیکار باشنده اوردکلرک اویناشدیغی کوروب
 طوتهیم دیبه اوستلرینه سکیردنجه قاچارلر. خواجه پیکار باشنه اوطوروب انده کی

[۲] صاغلق یا کیشدر . دوغروسى (صالیق) درکه خبر ویرمک، جواب ایصال
 ایله مک معناسه در . (صالقی) اصلنددر. حالا (خبر صالقی) ده قولانیلور .

اتمکی صویه باتیره باتیره یمکه باشلار. بریسی: «خواجه افندی! عافیت اولسون.
نه بیورسین؟» دییه صورار: «اوردك چورباسی.» دیر.

﴿لطیفه﴾ بر کون خواجه طاووقلرینی بر قفسه طولدیروب آقشهردن
سیوری حصاره کیدرکن: «حیوانجغزلر صیجاقدن بری اوستنده هلاک اوله جقلر،
شو زواللیری محبسدن خلاص ایدیم، سله سرپه یوللرینه دوام ایتسونلر.»
دیبهرك صالی ویرر. طاووقلر دوغرو یولی تعقیب ایتیهرك هر بری بر طرفه
قالچار. خواجه آینه بر دکنك آلوب، خروسی اوکنه قاتوب قوغلامغه باشلار.
و: «کیجه نك یاریسنده صباح اولدیغنی بیلیرسین ده، اوکله زماننده سیوری حصار
جاده سنی نچون بیلمزسین؟» دییه پایلارمش.



کیجه نك یاریسنده صباح اولدیغنی بیلیرسین ده اوکله زماننده سیوری حصار
جاده سنی نچون بیلمزسک؟

﴿لطیفه﴾ خواجه نصرالدین افندیدن قومشوسی اورغان ایسته مش.
خواجه ایچری کیروب چیقهرق: «ایپ بوش دکلدنر. قادینلر اوستنه اوز سرمشله.»

دیمش. حریفك بتكرار: «افندی! بو ناصل ایشدر، ایپه اون سریلیرمی؟»
 دییه اعتراض ایله مه سی اوزرینه: «ویرمه که کوکلم اولما یخه ایپه اون سریلیر.»
 دیمشدر.

﴿لطیفه﴾ برکون خواجه نك یانه برذات کلیر. اوزون مدت دق ولق
 صحبت ایدر لر. کیدر کن خواجه: «عفو ایدر سکز، طانیه مه دم، سز کی مسکز؟»
 دیر. او ذات ده: «او صورتده آرا مزده اوزون بر معارفه وار ایش کبی
 شیمدی یه قدر لا ابالیانه ناصل قونوشدیکیز؟» دیمکه خواجه دخی: «باقدم که
 تاجك تاجه، قفتانك قفتانه بکزر. بن سنی کندم صاندم.» دیمش [۱].

﴿لطیفه﴾ برکون خواجه قبرستان جوارنده کزر کن ناصلسه آیانی
 قایار، براسکی قبرك ایچنه دوشر. چیقلاق تنینه، کوملکینه وارنجه طوز
 طوپراق ایچنده قالان البسه سنی چیقاروب اوستنی باشنی تمیزله مکه، دوزلمکه
 اوغرا شیر. او آنده خاطرینه کلیر که، شوراده بنی ئولو صانه رق عجا منکر
 نکیر [۲] کلیرمی؟ خواجه بو حالد ایکن ایلریده قاطیر جیلر حیوانلرینی
 سرعتله سورده رک مزارستانه ایریشمش بولونور لر. خواجه یوزلرجه چاگ سنی،
 حیوان کورولتوسنی، قاطیرجی شماطه سنی بردن بره آکلامایارق: «ای واه! نه
 عکسی زمانه تصادف ایتدم؟ قیامت قوپور!» دییه رک شاشقینقله برازوته بری
 چابالانوب نهایت مزاردن طیشاری فیرلار، قاحق ایستر. قاطیرلرده تام
 اوحذایه تصادف ایله دکرندن خواجه نك بویه عجل عجایب [۳] برقیافله مزاردن
 فیرلامسندن قاطیرلر اورکه رک قارمه قاریشیق اولور، بربری اوستنه ییغیلر لر.
 یوکلری اولان کاسه، بللور، فنجان، طباق مقوله سی اشیا بوتون خردوخاش

[۱] (تاجك تاجه، قفتانك قفتانه بکزه دیکندن دولای سنی کندیه بابانجی
 عد ایتدم.) دینلسه یدی داها خوش اولوردی. فقط خواجه یه عائد اولان سوزلر
 (امثال) صیره سته کچدیکی جهته بالطبع تغییرینی تجویز ایتدم.

[۲] (منکر نکیر) سؤال ملکری ده دیر لر. انسان قبره دفن ایدیلنجه کلیر لر.
 دینی، عقیده سنی صورالر. مجرمله، دینسزله پک هیبتلی کورونور لر.

[۳] (عجل عجایب) بعضاً (علی العجایب) دیر لر. غلط بر تعییردر. هیچ بر
 شیئه بکزه مین مناسب سز لکی ایله حیرت وتعجبی جلب ایدن شیرله دیر لر.


اولور . قاطر جیلر شاشالایوب صوپالریله خواجه نك اوزرینه هجوم ایلرلر: « سن کیمسک، بوراده نه آراسین ؟ » دیرلر . خواجه فطری تحفلی ایجابی اوله رق: « اهل آخرتم، دنیای سیره حیقمشدم . » دیمکله یوباز حریفلر « طور ! بز سکا برخوشجه سیران ایتدیره لم . » دییه خواجه بی برائی دوکوب باشنی کوزنی یارمشلر . خواجه بیك زحمت و مشقتله کیجه یاریسی نه وینه دوغش . قاریسی: « بونه حال؟ شیمدی یه قدر زرده قالدک؟ » دییه صورمغله: « مزاره دوشدم، اولولره قاریشدم . » دیمش . قاریسی اولانجه صفوتیله: « اوته کی دنیاده نه وار ، نه یوق ؟ » دییه صورونجه خواجه جواباً: « فنجانچی قاطرلرینی اور کوتمزسه ک برشی یوقدر . » دیمشدر .



خواجه نك یاری چییلاق تویسمز باشیله عجیب الشکل مزاردن فیولایوب فنجانچی قاطرلرینک اور کوتدیکنک رسمیدر .

﴿ لطیفه ﴾ برکون آقشهر چوقوقلری خواجه بی حمامه کوتورلرلر . کوبك طاشی اوزرینه اوتوردقلرنده برلرینه: « کلیکز سزکله یومورطالایه لم . هر کیم یومورطالایه مزسه حمامک مصارفی او ویرسین . » دییه قرار و یروب

صوکره طاووق کی: « غید غید غیداق... غید غید غیداق ... » دیه فریاد ایدرک برابرجه کتیردکری یومورطه لری یواشجه ال چابوقلغیله مرمرک اوزرینه براقیرلر، خواجه افندی بونلری کورنجه هیچ تلاش کوسترمکسزین همان خروس کی چیرپینوب اوتتمککباشلار. چوجوقلر: «خواجه افندی نه یاپیورسین؟» دیدکرنده: « بو قدر طاووغه بر خروس لازم دکلی؟ » دیمشدر.



خواجه — بو قادیار طاووغه بر خروس لازم دکلی ..؟

﴿ لطیفه ﴾ خواجه یی ایلیچیلکله کوردستانه کوندرمشلر. کورد بکری خواجه یه فوق العاده اکرام ایدوب بر مکمل ضیافت چکمشلر. خواجه ده هیتلی بر صاریق صاروب کورکنی کیمش ومنلاسنی آرقه سنه آله رق وقارایله ضیافته حاضر اولمش. خواجه مشربنه مخالف اوله رق اجرا اولونان تکلیف و تکلفدن بیزاز اولوب، صقیلوب ناصلسه سسلیجه یلانمش. عودته یولده منلاسی: « افندی پک عیب اولدی. » دینجه خواجه: « بهی احق! دیل بیلمز کوردلر تورکجه یلانمهدن نه آکلایه حق؟ » دیمشدر.

﴿لطیفه﴾ بر کون خواجه منلاسی [۱] «عماد» ایله قورد آوینه کیدر . عماد قورد یاوروسی طومتق فکریله یووايه کیرەر . طیشاریده بولونان قورد تصادف اوله رق اینه کیرمکده ایکن همان خواجه آتیک [۲] طاورانوب قویروغندن یاقالار . قورد قویروغنی قورتاروب اینه قاقچق ایچون اشینمکه ،



قوردك قویروغنی قوبارسه او زمان کورورسین توزی، دومانی !

[۱] (منلا) چولخا وزندهدر (ملا) موللاده دینیلیر . بئم فکریجه بوکله فی الاصل ایران شیوه سیله تلفظ اولونان (مولنا) دن مغلوبدرکه بوده (مولانا) دن مرجهدر . چونکه ایرانده (مولانا) ینده میمک ضمیله سویلرلر . میچی مفتوح ، وای ساکن تلفظ ایتمزلر . (مولانا) افندیغز دیمکدر . بویوکره ویریلن عنواندر . [۲] (آتیک) آهنکه مغایر اوله رق یالکیز بزم لهجه مزده شایع اولمش بر کلهدر : ماهر، الی یاتغین، الی چابوق ، الی اویغون ، چست وچالاک دیمکدر . (آتمق) اصلندن (آتاق) ماده سندن تحریف ایدلمش و (آتاق) کله سندن آبری معنایه دلالت ایله مشدر . (قودانقو بیلیک) ی مستشرق آثارندن بزه نقل ایدن کفایتسز تورکیلر بوکله نك (قودانقو بیلیک) ده وجودینی سویلرلر سده خطادر .

چابالامغه باشلار . ايجريده حالدن خبردار اولمايان عمادك كوزينه توز كيتمكه :
« افندی ، نه تېنيورسين ؟ پك توزوتدك . » دينجه خواجه : قوردك « قويروغی
قوبارسه او وقت كورورسين توزی ، دومانی . » ديمشدر .

﴿ لطيفه ﴾ خواجه بر کون برايش ايچون ايزبه سنك كوشه سنی قازار كن
قومشونك آخريته بر دليك آچيلير . اوراده بر چوق صيغير كورور . هان
سوينه رك قاريسته قوشار . ديركه : « دقيانوس [۱] زمانندن قاله بر آخير طولوسي
او كوز بولورسم بكا نه مژده ويرسين ؟ »

﴿ لطيفه ﴾ خواجه بر کون سيوري حصاره كيتمش كورمش كه خلق
بر يره بيريكمش رمضان هلاله باقارلر . كمال تعجبله ديمش كه : « ياهو ! سز نه
توحاف آدملر سکنز . بزم آق شهر خلقي بونك آراهه تکرلکی قدريني كورورلرده
باشلريني چويروب باقزلربيله . سز قاش قدر آي كوره جكزديه بورايه طوپلانمشكز .
زمانكزي بوشينه تلف ايدیورسكز . »

﴿ لطيفه ﴾ خواجه افندی دعوت اولونديني بر ضيافته اسكي البسه سيله
كيدر ، كيمسه اهميت ويرمز . خواجه كيزليجه سيويشير . هان خانه سنه قوشار ،
آغير البسه سيله كوركني كير ، كری دوز . خواجه يي كمال تعظيمله قاپودن
قارشيلايوب باش سفره يه اوتورتورلر . نفيس ييمكلره اشارت ايدرك : « بويورك
خواجه افندی ، بويورك بويورك ! » ديرلر . خواجه كوركنتك ييكنی يمك صحنه
اوزاتوب : « بويورك كورك . » دير . خلق : « خواجه افندی نه ياپيورسين ؟ »
ديدكلرنده كوردیکی معامله يي آكلاتوب : « مادام كه اكرام كوركدر ، ييمكه ده
او بويورسين . » ديمشدر .

﴿ لطيفه ﴾ بر کون سواقده بر آدم قوشه رق خواجه نك يانه كلوب :
« افندی مژده ، بر اوغلك دوغدی ! » دير . خواجه هيچ فتورسز : « اوغلم
طوغديسه جناب حقه حمد و ثنا اولسون ! يا سكا نه ؟ » ديمشدر .

[۱] دقيانوس — قديم روما حكمدارلرندن حشمتلي برايمراطور اولوب آناتولوده
من القديم آثار قديمه (دقيانوس) ه (جنويز) لره (اسكندر) ه اسناد اولوبور .

﴿ لطیفه ﴾ خواجه بازاره بر اینک کوتورور . کز دیرر ، کز دیرر
 صاهماز . احبابندن بری تصادف ایدوب : « اینکی نه ایچون صاهمازین؟ » دیر .
 خواجه : « صابحدن بری کز دیردم . دیلم دوندیکی قادار مدح ایتدم . کیمسه
 یوزینه باقادی . » دیبه جواب ویرنجه حریف همان اینکی آلوب : « قیز اوغلان
 قیز ، آلتی آیلق کبه در . » دیبه رک کز دیرمکه باشلامقله آئیده مشتری ظهور
 ایدرک زیاده بها ایله صاتین آلیر . خواجه هم تعجب ، هم تشکر ایدوب اینک



قیز اوغلان قیز ، آلتی آیلق کبه ! .

آچه سنی قویننه قویارق سوینه سوینه خانه سنه کیدر . مکر خواجه نك خانه سنه
 کوریجیلر ککش ایمش . قاریسی : « افندی سن بر پارچه آشاعیده بر یر بولر ،
 اوتور . بن کوریجیلره قیزیمزی کوسترهیم ، هنرلرینی صاییم ، دوکهیم . بلکه
 بکنیرلر آلیرلر . » دیمکله خواجه : « آمان قاری ، صاقین سن آغزینی آچه بن
 شیمدی یکی برشنا اوکردم . سویله یمده باق ناصل بکنیرلر . » دیر . قادین دخی
 بلکه افندی نك بریلدیکی واردر دیبه کوریجیلره لازم کلن اکرایی یاپوب قیزینه

آل اوپدیرد کدن صو کره: «خاملر باشکزی اورتک، بوايش ايچون سزکله افندی کوروشه جک.» دیر. خواجه افندی قادینلرک يانسه کوروب: «خاملر، نه حاجت لاقیردینک اوزونی قصه سی، بئم اولادم غایت جنس، قیز اوغلان قیز آلتی آیلق کبه در.» دیر دیمز قادینلر بر برینه باقهرق همان قبودن دیشاری فیرلارلر.

﴿لطیفه﴾ بر قیتلق زماننده خواجه بر کویه کیتمنس. باقش که خلق ییبوب ایچورلر. خواجه یه ده طاتیلر، بورکلر ا کرام ایتشلر. خواجه: «بوراسی نه بوللق مملکتیمش؟ بزم اورالرده خلق آچلقدن قیریلورلر.» دیر. عوامدن بریسی: «هی آدم! دلیمسین؟ سن بایرام سیران بیلمز میسین؟ بو کون بایرام اولدیغی ایچون هر کس کندی قدرته کوره ییه جک ایچه جک تدارک ایدیور. آشه، دوسته، یابانچیلره، فقرایه ا کرام ایدیورلر. اونک ایچون طعام بولدر.» دیر. خواجه راز دوشوند کدن صو کره کندی کندینه: «آه کاشکه هر کون بایرام اولسه ده امت محمد ییه جک صیقیتیمی حکمه سه!» دیمشدر.

﴿لطیفه﴾ بر صبح قوموشوی خواجه دن اشکنی ایستر. خواجه: «کیده ییم اشکه طایشه ییم. کوکلی اولورسه ویره ییم.» دیهرک ایچری کیرر و بر مقدار طور دقدن صو کره کلوب دیرکه: «اشکه سوبله دم، کوکلی اولمدی و بکا دیدی که: بنی یابانچی یه ویریرسه ک بئم قولانغمه اورورلر، سنک ده عرضکه سو کرلر.»

﴿لطیفه﴾ بر کون خواجه اودون کسمکه کیدرکن اشک بر درلو طاعه طوغری یورومه دی. بریسی: «شورادن آقظاردن راز نیشادیر آل، قیچنه سور. باق ناصل یورور؟» دیدی. خواجه تجربه ایتدکه حیوان جان آجیسیله قوشمغه باشلادی. خواجه عودته کندیسنده ده بر درمانزلق حس ایتمکه کندیسیده او علاجدن بر مقدار استعمال ایلدی. اشکدن اول خانیه واصل اولوب اوراده دخی طوره مایه رق طولاشمغه باشلادی. قاریسی: «افندی! نه اولدک؟» دیدکده: «قاری، بکا یتیشمک ایسترسه ک سن ده بر از نیشادیر قوللانمیسین.» دیمشدر.

﴿لطیفه﴾ بر صباح خواجه صاریغنی صارار ، صارار بر تورلو اوجی آرقه‌یه کلز . بوزار ، صارار ، ینه کلز . جانی صیقیلوب صاریغنی مزاده ویرر . بر بیچاره مشتری اولور . خواجه کیزلیجه مشترینک فولاغنه : « صاقین برادر ، پی وورمه ، صوکره اوستکده قالیر . نافله بو صاریغک اوجی آرقه‌یه کلز . » دیر [۱] .



صاقین برادر پی وورمه ، صکره اوستکده قالیر . نافله بو صاریغک اوجی آرقه‌یه کلز .

﴿لطیفه﴾ بر کون خواجه صامق ایچون اشکینی بازاره کوتورور . باقارکه قویروغنی پک چوق چامور اولمش . همان کسر ، صیرتنده کی هکبه‌یه قور . بریسی اشکه مشتری اولور . معاینه ایدرکن : « قویروقمز اشک نه‌یه یارار ؟ » دیمه‌سیله خواجه : « سن بازارلنی اویدور . قویروق یابانده دکل . » دیمشدر .

[۱] صاریغک بر مقدارینی آرقه‌یه بیراقتی سنت سنیه‌در . اسکی عالمی بویله یاپاردی . بوکون سادات مولویه وطائفه نقشبندیه بر اثر کزینه سالک اوله‌رق اویولده (طیلسان) بیراقیرلر .

﴿ لطیفه ﴾ بر کون قوموشوسی خواجه دن اشک ایستر . خواجه :
 « یوقدر . دیر . او ائاده اشک ایچریدن آ کیرمغه باشلار . حریف : « اقدی !
 سن اشک یوق دیورسک ، حال بوکه باق اشک ظیرلایور . » دینجه خواجه
 باشینی صالایه رق : « الله الله ! یاهو ، سن نه عجایب آدمسک ؟ اشکک سوزینه
 اینانیورسین ده ، آق صاقالمه بنم سوزیمه اینانمایورسین . » دیمشدر .



اشکک سوزینه اینانیورسین ده ، آق صاقالمه بنم سوزیمه اینانمایورسین ؟

﴿ لطیفه ﴾ بر کون خواجه طاغده اودون کسرکن دره ایچنده یاییلان
 اشکینی قوردلر یش بیتیرمشلر . خواجه کلنجه قوردلر قاقغه باشلامشلر . اورادن
 دیگر بر آدم : « بره ، واردا ! طوتوک ... » دییه شاماطه ایتک ایستر . خواجه
 دیرکه : « به آدم ! نافله نه باغیروب چاغیریورسک ، طوق قورد باری یوقوش
 یوقاری بیهوده زحمت چکمه سین . »

﴿لطیفه﴾ بر کون خواجه مزارلق آرد سنده کز رکن قوجه بر کوپک
مزار طاشنه ایشه دیکنی کوروب همان النده کی صوپاسیله کوپکه ازمق ایسترسده
کوپک دیشلرینی صیرتاروب خیرلایه رق خواجهنک اوزرینه هجوم ایدنجه خواجه
باقارکه پارچالاهجق قورقوسندن بوزوله رک، آرقه آرقه چکیلهرک: « کچ یکیدم
کچ » دیمشدر .



خواجه کوپکه خطاباً — کچ یکیدم کچ .

﴿لطیفه﴾ بر کون خواجه اوزاق بر یردن کلبرکن اشکی غایت
صوصامش. او ائنده بر کوله صوبی کورنجه حیوانک صبری قالمایوب کوله
قوشار . مکر یاناشدینی یر صارپ اوچوروم بر محل اولغله حیوان کوله
دوشمه رمق قالمش ایکن او ائنده قورباغیرلر اوتمهک باشلا نجه حیوانلر کوپ
کری چکیلیر . خواجه پک زیاده محظوظ اولوب اشکینی یاقاله دقدن صوکره
کوله بر آووج پاره سر به رک: « آفرین کول قوشلری ، آلیک شوپاره لری .
طاطلیجه حلویه ویرکده بییک. » دیمشدر .

﴿لطیفه﴾ برکون خواجه قاریسنة: «أولش آدم ناصل بللی اولور؟»
 دییه صوروب قاریسی: «الی آياغی صوغور. اوندن بیلنیر.» دیر. برکون زواللی
 خواجه طاغده اودون کسوب درمانی قالمایه جق درجهده یورولدیفندن بر آغاجک
 دینه چوملمش. ترلی ترلی کندینی روزکاره ویرنجه الی آياغی طومایه جق
 درجهده اوشومش «بن اولدم.» دییه کندیسینی اولدینی یره بیراقی ویرمش.
 او ائنده قوردلر خواجه نك اشکنه مسلط اولوب یمکه باشلامش. بیچاره
 خواجه کوچلکه اولدینی یردن باشینی قالدیره بیلوب: «ای بولدیگز، صاحی
 اولمش اشکی.» دیمش.

﴿لطیفه﴾ خواجه بر زمان هر سحر وقتی: «یاری بکا بیک آلتون
 ویر، طقوز یوز طوقسان طوقوز اولورسه آلام.» دییه دعا ایتمکلی عادت
 ایدیش. قومشوسی اولان بریهودی ده هر وقت خواجه نك دعاسی ایشیدیرمش.
 یهودی غایتله سراق ایدوب برکیسه ایچنه قویدینی طوقوز یوز طوقسان طوقوز
 آلتونی بر سحر وقتی خواجه نك دعا ایلدیکی ائنده باجه سندن ایچری به آتار.
 باقلم خواجه نه یابه جق دییه باجه دن دیکله مکه باشلار. خواجه دعاسنک قبول
 اولدیغنه پک چوق حمدوشنا ایدهرک کمال تعظیم ایله باجه دن دوشن آلتونلری آلیر.
 صایار، باقار که طوقوز یوز طوقسان طوقوزدر. هیچ وضعیتنی بوزمایه رق: «طوقوز
 یوز طوقسان طوقوزی ویرن الله بریخه ده ویرر.» دیر، همان قبوللانیر.
 یهودی، بو خلاف مأمول حرکتی کورونجه فوق العاده تلاش ایدوب اورته لق
 آغادیر آغارمن خواجه نك خانه سنه قوشار کوله رک: «خواجه افندی! شو بزم
 آلتونلری ویر.» دیر. خواجه، جدی بر طور ایله: «بازرکان! سن دلیمی
 اولدک؟ بندن نه پاره سی ایسترسک؟ بن سندن پاره ایستدمی؟ سن بکا الکله
 بر پاره ویردکم؟» دیمکه یهودی: «جانم خواجه افندی! سنک هر سحر
 وقتی اصرارک اوزرینه باقلم خواجه سوزنده ثبات ایده جکمی؟ دییه او پاره نی
 بن آدم.» دیرسه ده خواجه استهزا طوریه کوله رک: «به یهودی! شو
 اویدوردیغک ماصاله کندیک اینانیورمیسک؟ تجربه ایچون بر یهودی هیچ
 آدمک باجه سندن بو قدر بر پاره نی آتارمی؟ بونجه مناجات واصرارم اوزرینه

جناب حق اونی بکا غائب خزینہ سندن احسان الٰہ شدہ. دیہہ جدی بر صورتہ ادا ایلر. یہودی آکلار کہ بو ایش آرالرنده بیتیمہ جکدر. «اولہ ایسہ محکمہ یہ کیدہ لم.» دیر. خواجہ: «بن محکمہ یہ کیتمکدن قاحام؛ آنجا بوردن تا اورایہ یایان کیدہ نم.» دیر. یہودی اعلا بر قاطر کتیرر. خواجہ: «بنم حیثیم وار. بو اسکی جبه ایلہ حضور حاکمہ ناصل کیدہ یم؟» دیمکله یہودی خصمنی یولہ یاتیرمق ایچون برده ذی قیمت کورک کتیروب خواجہ یہ کیدیرر؛ قاطرہ بیندیرر، کیدرلر. قاضی بک حضورینہ کیررلر. قاضی: «نه ایسترسیکز؟» دیہہ صورنجہ، یہودی سوزہ باشلایوب: «افندم! بو آدام بنم شو قدر آلتونمی آلدی. شیمدی انکار ایدیور.» دیر. قاضی خواجہ یہ: «سن نه دیرسین؟» دینجہ خواجہ: «افندم! صورکیز. بکا ایلہ بر پارہ ویرمشمیدر؟» دیمکله یہودی قصہ یی تمامیلہ آکلایر. خواجہ کولہ رک: «افندم! بو یہودی بنم قومشومدر. احتمال کہ بن پارہ صایار کن ایشیتمشدر. واقعا بکا ریم بر چوق آلتون احسان بویوردی. دها بونک بیک قاتی ده ویرمکه قادردر. بو یہودی یہ کلنجہ: بر مسلمانہ اولوم درجہ سنہ کلسہ بیلہ بر پارہ ویرمز. بر دولالہ بندن مالی المی ایستر. شیمدی سورسہ کنز طیشاریدہ بیندیکم قاطرہ ده صاحب چیقار.» دینجہ یہودی قاطیری ده آلدن قاچیرماق قورقوسیلہ: «الته بنذر! محکمہ یہ یایان کلہ مک ایستہ دیکک ایچون دها شیمدی آلتیکہ چکدم.» دیر. قاضی یہ بر تردد کلیر. خواجہ: «کوردیکز یا افندم! شیمدی صیرتمده کی کورکده صاحب چیقار.» دیمکله یہودی یہ بوس بوتون فنالق کلہ رک: «اولہ یا! اوده بنذر.» دینجہ آرتق قاضی افندی حدتلوب: «برہ شرت یہودی، هم جملہ مزک مسلمی اولان بویلہ محترم بر آدامک ماللرینی غصب ایتمک همده محکمہ ایلہ اکلنمک ایستیورسین. یقیل دیشاری.» دیوب محکمہ دن طیشاری یہ چیقارلر.

خواجہ کال وقارلہ کورکنہ بورونوب قاطرہ بینہ رک خانہ سنہ کیدر. مأیوس ونومید بر حالده خانہ سنده دوشونمکده اولان یہودی قومشوسنی چاغروب ماللرینی بالتمام تسلیم وکندیسنی تطیب ایتدکن صوکرہ: «بر دها الله ایلہ قولی آره سنہ کیروب ده عباد اللهی بحضور ایتہ. دیہہ نصیحت ایلہ مشدر. یہودی آبدالدر دیہہ اکلنمک ایستہ دیکی بر ذاندن بویلہ مکمل بر درس آلوب

مغلوب اولونجه بر دها بر مسلمانان صائشماغه یمین ایدهرک خواجه نك النده
مظهر هدايت اولمشدر ..



حضور حاکمه خواجه نك یهودی ایله مرافعه سی

﴿لطیفه﴾ خواجه مرحوم دورنده اوج رهبان هر اوغرادقلری
بلده نك علماسیله مصاحبه و مباحثه ایلیه رك سیر و سیاحت ایدرلر مش. دیار رومه
واصل اولدقلرنده كذلك او جهتك مشهور عالملیله ملاقات آرزو ایتمه لریله
سلطان زمانه خواجه نصرالدینی توصیه ایدرلر. و خواجه نك حاضر جواب
و خوش صحبت اولدیغنی سویلرلر. سرای میداننده بر ضیافت ترتیب ایدیلوب
خواجه یی و رهبانلری اورایه دعوت ایلرلر. تاتارك و رودنده هاندم خواجه
اشكنه ینوب عصاسینی ایله آلوب یوم معینده مجلسه حاضر اولور. آداب تام
ایله سلام و یروب دعای پادشاهی یی ادا ایله دكدن صوكره اثنای صحبتده خواجه
افندی یه رهبانلرك آرزوسنی بیان ایلرلر. خواجه: «ایله ایسه اولا مشكلا تمزی
حل ایدلم؛ بعده شرف مجلسدن استفاده ایله یلم. بویورك باقلم؛ رهبانلر بر

سؤالکز وارسه ایشیده.م. « دیر. برنجی رهبان: « افندی حضرتلری! دنیانك اورتہ سنی زہ سیدر؟ « دیر. خواجه عصایله اشكنك اوك آياغلك صاغنی کوستره رك: « ايشته اشكمك شوآياغی باصديغی یردر. « دیر. رهبان: « نه دن معلوم؟ « ديمكله خواجه: « سوزيمه اينانمازسه كز ايشته اولچك. ا كسيك، زياده كليرسه اوکا كوره سويله يك. « دیر. راهب حبط اولوب چكيلير. رهبانك بری ایلری كلوب: « يا! بوكوك يوزنده کی بيلديزلر نه قدردر؟ « دیر. خواجه:



خواجهك رهبانه دنيانك اورتہ سنی کوستزه سیدر

« اشكمك وجودنده نه قدر قيل وار ايسه او قدردر. « دیر. رهبان: « او قدر اولديغی نه بللی؟ « ديمكله خواجه دخی: « اينانمازسهك صای؛ ا كر فضله، نقصان كليرسه او وقت بر سوز سويله مكه حقل اوله بيلير. « دیر. رهبان: « افندی! اشكك قيللری صاييليرمی؟... « دينجه خواجه دخی: « يا كو كده کی بيلديزلر صاييليرمی؟ « ديه جواب ويرمكه بو رهبان دخی جواب بوله مايوب چكيلير. اوچنجی رهبان دخی ایلری كلوب: « ای خواجه! شو بنم صقالمك

قاج قیلی وار؟ « دبیہ صورمقله خواجه اوکاده تردد کوسترمیه رک: « اشکمک قویروغنده نه قدر قیل وارسه او قدردر . « دیر . رهبان : « نه ایله اثبات ایدرسین؟ « دیمکه خواجه: « او قولایدر . بر قیل سنک صقالکدن ، بر قیل بنم اشکمک قویروغندن قوپاریرز . ا کر مطابق گلزسه او وقت حق سنکدر . « دیر . رهبانلر خواجهنک ظرافتنه وحاضر جوابلغنه مفتون اولوب هدایت ربانی دخی ایرشمش اولقله شرف اسلامله مشرف اوله رق خواجه « رحمة الله علیه » بنده اولورلر .

﴿ لطیفه ﴾ ماوراء النهرک اک معظم پادشاهلرندن اولوب بر وقت شهنشاه روم ییلدیرم بایزید خان مرحومک ممالکنه تجاوز ایله مکه . میانه لرنده مشهور آنقره محاربه سی وقوعه کلن جهانگیر شهر تیمورلنک برمدت آقشهرده اقامت ایله مکه اوتوردینی مدت خواجه مرحومه پک چوق التفات ایله مشدی . خواجهنک سایه سبنده آقشهر اهالیسی تیمور خونخوارک قتل عامندن وسائر سیاست شدید سندن خلاص اولمشلردی . آرالرنده ظهوره کلن بعض لطائف بوراده ذکر اولنه جقدر . از جمله برکون خواجه نصرالدین افندی مرحوم بر بویوک طابلهنک اوستنه اوچ اریک قویوب سلطان تیمورلنکه هدیه کوتورورکن یولده اریکلر اوتیه بری یه یووارلانمغه ، اوینامغه باشلار . خواجه هر نه قدر : « اوصلو اوتورک اوینامه یک ؛ شیمدی سزی یرم . « دیرسده دیکله مزلر . ینه متصل زیبار ، یووارلانیرلر . خواجه حدته کلدکجه یولده برر برر ایکسینی یر . بردانه اریکی امیر تیمورک حضورینه تقدیم ایلر . پادشاه پک محظوظ اولوب بر خیلی آچه باغشلار . خواجه بر قاج کون صکره بر چوق پانجاری بر سپته قویوب ینه پادشاه کوتورورکن یولده بر آدم کوروب سؤالی اوزرینه امیر تیموره هدیه ایده جکنی سویله مکه : « اینجیر کوتورسه کدها حظ ایدر . « دیمه سیله خواجه بر قاج اوقه اک کوزل اینجیر تدارک ایدرک حضور سلطانه تقدیم ایلر . پادشاه معیتده کی ندیملره و غلامان خاصیه امر ایلر . اینجیرلرک هپسینی خواجهنک باشندن کچیرلر . اونلر اینجیری یاپیشدیردجه خواجه متصل : « شکر یاربی ! حمد اولسون لطفکده ، احسانکده ! « دبیہ متصل میریلدانیرمش . تیمورلنک ایشیدوب : « خواجه ! نه یه شکر ایدرسین؟ « دیدکده خواجه : « پادشاهم ! بن اولجه بر قاج

اوقه پانجار کتیریور ایدم . برکت ویرسون ، یوله بر حریف بونی تعریف ایلهدی . یا پانجار کتیره ایدم . بنم حالم نه اولوردی ؟ نه باشم قاله جقدی ، نه کوزم قاله جقدی ؟ شیمدی یه قدر خردوخاش اولمشدی . دیمه سی اوزرینه امیر محظوظ اولوب عطیه لر انعام ایلهمشدر .

﴿ لطیفه ﴾ تیمورلنک آقشهره ییکی کلدیکی صبرده خواجه نك خوش صحبت و لطیفه پرداز اولدیغنی ایشیدوب بر کون خصوصی اوله رق دعوت ایلر . خواجه حضوره داخل اولدقده کورور که تیمور کمال وقار ایلر برمیندره اوتورمش و بر آیاغنی گوشه سندن میندرک آلتنه صوقوب اوزاتمش . خواجه نك ورودیه تیمور هیچ وضعیتی بوزمایوب آنجق اکرام اوله رق خواجه یه اوتوردیغنی میندرک او بر اوجنده ر کوسترر . حال بوکه خواجه مرحوم کبی آزاده مشرب عرفا و ظرفا هیچ بر وقت کندیلرینه عادی طالقاقوق معامله سی یاپیلدیغنی چکه مزلر و حقارنده اولونه جق احترامانده جزئی نقصان کوردیکلرنده و یا نور اخلاصدن خالی و شائبه ریا ایلر مالی بر معامله یه دوچار اولدقلرنده نشئه لری ، انشراحلری جدیده ، وقاره مبدل اولور . علی الخصوص که خواجه مرحوم هر نه قدر خلقتنک آزاده لکی حسبیه دنیا ده هیچ بر شیئی ، حتی علم کالی بیله کندینه پرده ایتماش ایسه ده ینه رینه کلنجه علمک شاننی محافظه ایلردی . امیر تیمورک ، حضوره داخل اولدیغنده لازم کلن تعظیمی ادا ایتمه مه سی ، آیاق اوزاتماسی خواجه یی صوکه درجه حد تلندیرمشدی . حال بوکه نفس الامرده تیمورلنک طوبالغندن ناشی اولیه قولایجه قالقوب اوتوره مادینی کبی راحتجه اوتورمق ایچون کندیسنی آغیر آغیر بر وضع مخصوص اوزره ایستیف ایدردی . آیاغنک برینی اوزاتمه سی ده بالطبع بو سبیدن ناشی ایدی . طور عظمت کارانه سی ایسه مظفریات متوالیه سنک کندیسنده حصوله کتیردیکی جهانگیرانه بر طبیعت ثانیه حکمنی آلمشدی . یوقسه خصوصیت حالی غایت کشاده مشرب ، سخن شناس ، اولدجه کر مکار ، علما پرور و هنر دوست بر آدم ایدی . صوگره لری خواجه ایلده آرالرنده خیلی مخالفت حاصل اولمش ایدی . الحاصل خواجه یا کلش ذهابی اوزرینه طارغینلغنی ده بللی ایتمیه رک — بارد بر صورتده — کوستریلن یره اوتوردی . آبدالغه اوروب خواجه ده بر آیاغنی مندر آلتندن اوزاتدی .

پادشاه، خواجه نك بووضعندن بيجضور اولوب كندى كندينه: «بن معذورم، على الخصوص كه پادشاهم. بو آدم زه آ كلاتدقلى كى دكش. تحفلقسه؛ تحفلق بونك زه سنده؟» ديه رك آرتق خواجه نى اينحيتمك قصديه خود بخود ديدى كه: «سنكه اشكك آراسى چوق اوزاق اولمازسه كرك.» خواجه درحال: «آره مزده آنجق ايكي اوج آرشينلق بر مسافه وار يوق كيدر.» ديدى. تيمورى درحال تهور سباعانه استيلا ايتمشده فقط آمالنه قاووشنجهيه قدر حياتده معروض اولديغى انواع تحقيرات ومصائب كنديسنى مكمل پيشيرمش وهر حالده اعتدالى محافظه ايده بيله جك حزم وبصيرت صاحبي بر داهى صاحبقران كيسيلمش اولمغله خصمنى هر وقت پارچالايه بيلمك امنيتى كنديسنه بر سكون طبيعى ويرمشدى؛ آديرمدى. او آراق يمك كلى. طعامه باشلاديلر. بعض آفاقى صحبت آراسنده تيمور همان خواجه نك صورائينه طوغرو آقسيرير. خواجه بر طور بذله كويانده: «سن جهانكبر بر پادشاهسين انسانك صورائينه طوغرو آقسيرمق عيب دكلى؟» دينجه تيمورلك قيدسزجه سنه: «بزم ديارده عيب دكل.» دير. يمكن قالقيلوب شربتلىر ايچيلد كدن صوكره خواجه بر آراق قضارا يالله نير. تيمور خواجه نى بر نظر غضوبانه ايله سوزوب: «نهر بو ايتديكك تربيه سزلك؟ بو عيب دكلى؟» دير. خواجهده اولكى معامله يه بر مقابله اولقى اوزره: «بزم بورالرده عيب دكلدر. اونك سسسه كيمسه قولاق ويرمز.» ديه جواب ويرر. غايت مختصر وبارد آفاقى صحبتدن صوكره خواجه افندى وداع ايدر. يولده كيدر كن منلاسى: «افندى نيچون اويله بر پادشاه جبارك حضورنده ييللندك؟» ديد كده خواجه كنديسنده اندر كورولور بر جديتله باشنى چويروب: «منلا، منلا، امام اوصورونجه جماعت.....» ديمشدر.

﴿لطيفه﴾ خواجه بر كون قاز پيشيرتوب پادشاه كوتورور. يولده كيدر كن اشتها سنه غلبه ايده ميهر ك قازك بر بوطنى، سپر بريده، معديه اينديرر. حضور پادشاه واروب اصول وجهله هديه سنى عرض ايلر. بر بوطنك نقصانى تيمورلنكك كوزينه اصابت ايتمكه: «خواجه! هانى بو قازك بر آيغى؟» دير. خواجه هيچ وضعنى بوزمايه رق: «بزم آقشهر ك قازلىر هب تك آياقلىدر [۱].»

[۱] بوراده تيمورلنكهده فنا بر ايهام وار يعنى طويل قاز ياپيور.

این‌غزسه‌ك باق شو چشمه باشنده‌كى قازلره . « دیر . واقعا او ائناده چشمه باشنده آياقده طوران قازلر . كوشله‌مك ايجون بر آياقلىرى صاقلايه‌رق تك آياقده باشلىرى كو كسلىرینه طایایوب اویومقده ایدیلر . پادشاه پنجره‌دن باقديغنده تك آياقلى اوله‌رق مشاهده ايله‌دی . حالبوكه بالتصادف نوبت اورولق زمانى اولغله بر چوق مهترلر جسيم كوسلره ، طاووللره بر اوغوردن چوماقلىرى اينديروب كره‌نايلر ، بورولر غلغله‌يله قبه سمايى ولوله‌يه ویرمه‌لریله قازلر ايكي آياق اوزره اوله‌رق بر محل فرار آراقى عزيميله مترددانه او يانه بو يانه قوشمغه باشلادیلر . همان تيمور خواجه‌يى پنجره او كنه چاغیروب : « خواجه ! سن يالان سويله‌يورسين ، باق قازلر ايكيشر آياقلىدرلر . « دينچه خواجه نصرالدين رحمة الله عليه : « او چوماغى سن ييسه‌يدك دورت آياقلى اولوردك . « ديمشدر .

﴿ لطيفه ﴾ خواجه‌نك مخدومى بر كون : « بابا ! . بن سنك طوغديغنى بيليرم . « دیر . حرمى اوغلانى پايلامغه باشلايچه خواجه : « به قادين ، نيجون اينجيتيورسين ؟ اوغلان عقلليجه‌در ؛ بيلسه‌ده اولور . « ديمشدر .

﴿ لطيفه ﴾ خواجه بر كون بر عجمى برره تراش اولور . برر اوسطوره چالديجه كسر ، متصل پاموق پايشديزيرمش . خواجه بر آره‌لق قاووغنه اوزانوب كييمك ايستر . برر : « افندی ! ده ياريسى تراش ايدلمه‌مشدر ! « ديمكله خواجه : « به حريف ! سن باشمك ياريسنه پاموق اكدك . بيراق ؛ بارى بن‌ده كرى قالانه كتان ا كيم . « ديمشدر .

﴿ لطيفه ﴾ بر كيجه ياريسى خواجه‌نك قپوسنك اوگنده بر كورولتى اولور . خواجه چيقوب غوغاك سببى آ كلامق ايستر . زوجه‌سى : « افندی ! نه‌كه لازم ! يات يرنده ، كيجه ياريسى كورولتى آراسنه قاريشمه . « ديديسه‌ده ديگكه ميوب همان يورغانينه بورونور . قپونك اوگنه چيقار . خواجه مسئله‌يى آ كلامغه اوغراشيركن او كورولتى آراسنده بر حريف كلوب بر آصيليشده يورغانى خواجه‌نك اوستدن صويوب آلير ، قارائغه قاريشير . خواجه بومعامله‌دن‌ده


شاشالایوب او یله سرسم برحالده بر مقدار دها طور مشسده زیاده جه اوشویوب ذاتاً هر کس ده طاغیلمغه باشلامش اولمقله تیتیره رک ایجری یه گیر . قاریسی: «افندی! غوغانک اصلی نه ایتمس؟» دییه صورنجه: «نه اوله جق؟ غوغا بزم یورغان اوزرینه ایتمس؛ یورغان کیتدی ، غوغا بیتدی. « دیمشدر .



خواجه نك آغاچ اوزرنده باصديفی دالی كسمه سیدر

﴿ لطیفه ﴾ خواجه بر آغاچه چیقوب بیندیکي دالی کسمکه باشلار .
 آشاغیدن بری بو حالی کوروب: «خواجه! نه یاپور سین؟ شیمدی دوشه جک سین.»
 دیر . خواجه بوکا هیچ اهمیت ویرمز سده عقبنده دال چاتیر چوتور قیریلیر،
 خواجه ده پالدير، کولدور دوشر . خواجه یاره سنه بره سنه باقما یه رق همان فیرلایوب
 او آدمی بولور . «آی اوغول آ کلاشیلدی . سن ارباب مکشفه دن بر آدم سین .
 مادام که بَم دوشه جکمی بیلدک، اوله جکمی ده بیلیر سین . الانم اوله جکم زمانی
 خبر ویر . « دییه یاقاسندن صاریلیر، بیراقز . حریف یاقه سنی قورتاروب یولنه

دوام ایتک ایچون : « اشککه اودونی یوکه توب یوقوش یوقاری کیدرکن اشک بر کره ظیرلاینجه جانکک یاریسی کیدر، ایکنجیسنده هپسی چیقار . » یولنده عامیانه [۱] بر جواب ویروب یولنه کیدر . خواجهیه ذاتاً هوانک صیقاقلغندن وفوق العاده یورغونلقدن بر حالسزک کلمش اولغله او اشناده اشکک برنجی ظیرلامه سنده کنديسنده اولوم علامتلی حس ایدوب ایکنجیسنده بوسبوتون سیکیرلری بوشانه رق : « ای واه! بن اولدم. » دیر، کنديسنی بیراقی ویرر. جوار



خواجه باصديفی دالی کسهرک دوشدیکنک رسمیدر

کویلیرلی خواجهی اویله بت بکیز اوچمش یغیلی ویرمش کورونجه باشنه اوشهرک : « بیچاره آدم اولمشدر. » دیهرک هان کویدن برتابوت کتیروب خواجهی قویارلر . شهره کوتورورکن یولده چامورلی صارپ بر باتاقلغه تصادف ایدرلر . یول چاتالانوب برقچ کچید کورونورسده هانکیسی ده ائی اولدیغنی کس دیرمه یهرک :

[۱] عوامک ، اوقویوب یازمه سی اولمایان اهالینک ساده تیکرلری واونلره یاقیشان شیلر .

« عجا شورادن می کیتسهك ، یوقسه بورادن می؟ » دیسه مشاوره قویولمالریله
خواجه تابوتدن باشی قالدیره رق: « بن صاغ ایکن شورادن کچردم. » دیمشدر.



خواجه تابوتدن باشی قالدیروب جماعته خطاباً: بن صاغ ایکن شورادن کچردم

﴿ لطیفه ﴾ برکیجه آی ایشیغنده خواجه باقارکه باغچهده ایری یاسیلی،
هیبتلی برکیمه آلرینی کرمش طورییور. هان قاریسنی او یاندیروب: « یا هو!
چابوق اول! شو بنم اوقی یایی کتیر. » دیر. کلنجه همان اوقی یایه صاغلاجه
یرلشدیروب: « یا حق! » دیهرک عشقه بر پرتاو ایدر. اوقک تام قارندن
صاپلاندیغنی کورور. او قوجه هیکل بر کره صارصیلوب صاغه صوله دوز.
« آر او یونی بردر. شیمدی دکه کیفه. او صباحه قدر قیوریله قیوریله جان
ویره طورسون. » دیهرک همان ایجری کیر. قیویی صاغلاجه قاپار، یاتار،
برده کون طوغمدهن باغچه چیقوب باقارکه مکرسه کیجه اوردیغنی کندی
قفتانی (بینشی) ایش. کوندوزدن زوجه سی ییقایوب — صباحه قدر

قوروسون دیه — ایپه کرمش ایمش . تا کوبکی حذاسندن قفتانه بویوک بر دلیک آچیلمش . خواجه همان سجده شکرانه قبانوب یوکسک سسله: « شکر یارب! لطفک بیک شکر! » دیه دعایه باشلار . زوجہ سی: « افندی! نه اولدی؟ بزده شو حمدک، شکرک اصلی آکلایلم . دیجه: « به شاشقین قاری! کورمه یورمیسک اوقک ضربه سنی؟ تام کوبکی اورته سندن بر طرفندن دلش ، او بر طرفندن کچمش . آووج ایچی کی پارالامش . یا او ائسادہ بن ایچنده اوله یدم . نه اولوردی حالم؟ » دیمشدر .

﴿ لطیفه ﴾ بر کیجه خواجه مرحوم یاتیر کن طامده بر خیرسز کزدیکی حس ایدر . قاریسنه دیرکه: « کچن کیجه کلدیم ، قاپویی چالدم ، طویمادک . بنده شو دعای اوقودم . آیک ایشیغنه یاپیشوب خانیه کیردم . » باجه دن لاقیردی بی دیکله مکده اولان خیرسزده دعای از برله یه رک اوقور . آیک ایشیغنه ایکی اللریله صاریلوب باواشجه اینمک سوداسیله کندیسنی قالدیرر ، طامدن آشای بیراقی ویریر . « پات! » دیه ره دوشر ، خردوخاش اولور . خواجه همان قوشه رق خیرسزک یاقه سندن صاریلیر و بر طرفندن: « قاری! چابوق مومی کتیر . خیرسزی یاقه لادم . » دیه باغیرنجه بیتاب خیرسزایکله مه قیلندن: « افندی حضر تلری! عجله اتمه . اودعا سزده ایکن ، بو عقل بزده ایکن ، اوله قولای قولای سزک الکزدن قورتوله مایز . » دیمشدر .

﴿ لطیفه ﴾ بر کون خواجه نک خانه سنه خیرسز کیرر . حرمی تلاشله: « افندی! خیرسز کزینور . » دیمکله خواجه غایت قیدسز برطورله: « قاری سن هیچ طینه . او ایشه یارایه جق برشی بولسون ده التدن آلماسی قولایدر . » دیمش .

﴿ لطیفه ﴾ بر کیجه قاریسی: « آقوجه! بر آز ایلری کیت . » دینجه همان خواجه پاپوشلری آباغنه چکوب آلدی یورویی ویردی . ایکی ساعت قدر بول کیتدکن صوکره بر بیلدیکی آدمه راست کلوب: « آق شهره واردیفکده بزم اوه اوغرا ، بزم قاری یه سویله ، دها کیدیمی؟ » دیمش .

﴿ لطیفه ﴾ خواجه بر کیجه باتیرکن: «آمان قاری قالق مومی یاق؛
خاطریمه پارلاق بر مصرع کلدی . یازهم . دیر . قادین هان قالقوب مومی
یاقار . دیوبت قلم کتیروب برکاغده کمال اعتنا ایله یازار . مومی سوندیروب یاتمق
ایستر . قادین: «جانم افندی ! بویله کیجه یاریسی صیقی فیقی یازدیغک شیئی اوقو
باقالم !» دینجه بورنه کوزلکئی قویوب شویله اوقومش :
یشیل یاپراق آره سنده قره طاووق قیزیل بورنی

﴿ لطیفه ﴾ خواجه افندی بر ایکی دفعه اوینه جکر کتیرر . قاریسی
دوسته یدیرر و آقشام طعامنده خواجه نك اوکنه خور مانجه سی قویارمش .
برکون خواجه : «آقاری ! بن آرده صیره ده جکر آلیورم . یمک قسمت
اولمایور؛ زه یه کیدیور؟» دیه صورمانسه قادین هپ: «کدی قاپیور؛ کدی
چالیور.» دیه جواب ویرنجه خواجه هان قالقوب بالطه یی صانديق ایچنه کلیدلر .
قادینك: «بالطه یی کیمدن صاقلایورسین؟» دیمه سنه خواجه : «کدیدن ...»
دیوب «کدی بالطه یی نه یاپسین؟» دیه متعجبانه صورنجه خواجه رحمة الله علیه :
«به قادین ! ایکی آقچه لق جکری قاپان قرق آقچه لق بالطه یی آلزمی؟» دیمشدر .

﴿ لطیفه ﴾ برکون خواجه زوجه سیله برابر کول باشینه چاماشیر ییقامغه
کیدرلر . چاماشیرلری ییغوب، صابونی قویوب ایشه باشلايه جققلری ائنده هان
برقاره قوزغون کلوب صابونی قاپوب کیتمش . قاریسی: «افندی یتیش ! صابونی
قوزغون قایدی .» دیه هایقیرمقله خواجه فتورسزجه : «آقاری ! نه تلاش
ایدیورسین؟ وارسین، آلسین اونك اوستی بزدن دها کیرلیدر .» دیمش .

﴿ لطیفه ﴾ خواجه نصرالدین بر بربرده تراش اولوب بر آقچه ویریر .
ایرتسی هفته ینه تراش اولدقدن صوکره بربر معتاد وجهله آینه یی خواجه نك
اوکنه قونجه خواجه بربره دیرکه: «بیلورسین که بنم باشمک یاریسی کل در .
شو صورتده سن هر وقت یاریم باش تراش ایتمش اولیورسین . کچن هفته نسککی
ایله برابر ایکی تراش بر آقچه یه اولسه اولزمی؟»

﴿لطیفه﴾ خواجه نك بش آلتی یاشنده کی اوغله باطلیجانی کوستره رك: «بونه در» دیه صور مشلر. «کوزی آجیلما دق صیغیر جق یا وروسیدر. «دینچه خواجه اورادن کمال افتخار له آتیلوب: «واللهی عمو جه لری! بن او کرتمه دم. اوغلان کندسی ذهندن بولدی. «دیمش.

﴿لطیفه﴾ بر کون حرمی معذبلك اولمق اوزره چوربایی سفره یه غایت صیجاق اوله رق قویار. بالاخره ینه کندسی اونوتوب طولو قاشینی همان معدیه ایندیرر. شدت اضطرابدن کوزلرندن یاش کلیر. خواجه حرمندن سبیسز آغلامه سنك وجهنی صورنجه: «زواللی آنه جکم، بو چوربایی پك چوق سه وردی ده او خاطریمه کلدی. اونکچون آغلادم.» دیر. خواجه ده حرمتلیجه بر قاشیق چوربایی یو وارلامه سی عقبنده کوزلرندن یاش بوشانیر. حرمی: «یا سکا نه اولدی، سن نه ایچون آغلا یورسین؟» دینچه خواجه: «اوغورسز آناك اولوب ده سنك کی نابكارك صاغ قالدیغنه آغلارم.» دیمش.

﴿لطیفه﴾ بر وقت خواجه کاروانله سفره کیدرکن بر صباح ایرکندن هر کس علی العجابه حیوانلرینه بینمکه باشلارلر. خواجه نك آتینی ده بینك طاشینه حاضرلارلر. اوزنکی یه صاغ آیاغنی کچروب صیچرایجه خواجه نك یوزی آتک صاغریسنه کلیر: «افندی یازیق سکا! آته ترس بینك.» دیدیکلرنده خواجه: «بن ترس دگم، حیوان صولا قدر.» دیمش.

﴿لطیفه﴾ خواجه نك «حماد» نامنده حبشی بر تلیدی وار ایتمش. بر کون خواجه نك البسه سنده کی مرکب لکهنی صور دقلرنده: «دون بزم حماد درسه کچ قالمش، قوشوب ترله مش ده الیمی اوپرکن اوستمه تری طاملادی.» دیمش.

﴿لطیفه﴾ بر کون خواجه منبره چیقوب: «مسلمانلر! سزه برشی سویله یه جکم: اوغلرکز اولورسه زنه ارآدینی ایوب قویما ییکمز؛ زیرا خلقت دیلنده چو نجه سویله نه سویله نه ایپ اولور.» دیمش.

﴿لطیفه﴾ خواجه بر وقت آبدست آتش . بر آياغه صوتيشمه مش .
 قاز کي بر آياغي اوسته نمازه طور مش : « افندی ! نه ياپديورسين ؟ » ديه
 صورانلره : « ضول آياغمك آبدستی يوقدر . » ديش .

﴿لطیفه﴾ بر آقشام خواجه به بر مسافر کلير . ياتارلر . کيجه ياريسي
 مسافر : « افندی ! صاغ طرفنده موم وار . ويرده ياقهيم . » دير . خواجه :
 « سن دلمی اولدک؟ بن بو زيفیری قازانلقده صاغ طرفی نه بيلهيم ؟ » ديش .
 ﴿لطیفه﴾ بر کون خواجه به : « سنک طالک ندر ؟ » ديرلر .
 « تکه در . » دير . افندی ! زايچوده هيچ تکه يازمز . « ديرلر . خواجه : « بن
 چوجوقدم والدم طالعی يوقلاتدی . جديدر ديديلر ایدی . » دير . « افندی !
 جدی تکه دکل ، اوغلاق ديمکدر . » ديمه لريله : « به آحقلر ! بن ده بيليرم (جدي) نک
 اوغلاق ديمک اولديغی ؟ فقط آنام بنم طالعه باقديرالی قرق ييل اولدی .
 اوزماندن بری اوغلاق تکه اولما دیمی ؟ » ديش [۱] .

﴿لطیفه﴾ بر زمان خواجه سيوری حصارده خطيب ايکن صو باشی [۲]
 ايله غوغا ايدر . ناصلسه او ائنده صو باشی اولور ، دفن ايدرلر . خواجه به :
 « افندی ! کل تلقين [۳] وير . » ديرلر . خواجه : « باشقه بر خواجه بولک ،
 بنمله غوغا ايدر ، سوزیمی طومزا . » ديش .

[۱] (طالع) طوغان ييلديز ديمک اولوب اسکیدن برچوجوق دوغنجه (منجم) لره
 کيدزلردی . منجم ييلديزلره باقوب او ائنده هر بری بر حيوان اسميله ياد ايديلن
 ييلديزلردن هانکيمسنگ برجنه تصادف ايدرسه او ييلديزک خاصه سنه کوره ای ، يا خود
 فنا ديه بر شی سويلرلردی .

[۲] (صو باشی) اسکی تورکجه ده عسکرلرک قوماندانی ديمکسه ده صوکره لری بو
 عنوان ده ها کوچوک رتبه ده عسکرلره ويرلشدیر . خواجه نک عصرنده (جاندارمه
 قوماندانی) مقامنده ايش .

[۳] (تلقين) جنازه کومولدکدن صوکره سؤال ملکاری کلير . اوکا مسلمانلغنه
 دائر سؤال صورار . خواجه او سؤاله ويره چکی جوابلری تلقين ايدر ، آکلاتير .
 هر حالده اوزاده بونونان آداملره (ايشيکزی بو زمانه بيراقادن وقتيله حسابکزی کوریکز) .
 ديهه طالعيلره ای بر نصيحتدر .

﴿ لطیفه ﴾ ایکی قومشو بربرینه بیتیشیک خانه لرینک قارشیسینده کی دکانده اوتورورکن برکوبک کلوب ایکی اوك اورتەسی حداسنده سوقاغه یستهلر . بری : « سنك اویکه یاقیندر ، سن قالدر » دیر . او بری : « خیر ، سنك اویکه ده ا یاقیندر ، سکا دوشر . » دیهرك نزاعی آرتیروب محکمه یه کیدرلر . مکر خواجه افندی ده قاضینک یاننده بولونورمش . قاضی خواجه مرحومه اکلنمک ایچون : « افندی ! بو دعوائی سن فصل ایت . » دینجه خواجه مدعیلره خطاباً بلا تردد : « اوسوقاق طریق عام دلمی ؟ او بره وادر ، کیمسه نك ملک یه اوله من . بو صورتده نه سکا دوشر ، نه بوکا دوشر . اونسنه قاضی افندی یه دوشر . » دیمش .

﴿ لطیفه ﴾ برکون خواجه نك بوزاغیسنی بوکله لك [۱] طوتمش . اوتە بری قوشارق زرزو اتلری خراب ایتمش . خواجه همان برصوپا یانالا یوب اوکوزی دوکمه که باشلامش . « خواجه ! تارلا یی بوزاغی خراب ایتدی . بو قباحتمز اوکوزی نه یه دوکیورسین ، قباحق نه در ؟ » دیدکلرنده : « هپ صوچ یاشلی اوکوزو کدر . بو اوکرتمه مش اولسه دونکی بوزاغو بو حاشاریلغی نه بیلسین ؟ » دیمش .

﴿ لطیفه ﴾ برکون خواجه دربنده [۲] کیدرکن بر چوبانه راست کلوب چوبان : « افندی ! فقیه میسین ؟ » دیر . خواجه طبعی^۱ بر وضعیتله : « اوت » دیر . چوبان : « باق شو دره نك ایچنده یاتان جانلره . اوبولره مسئله صوردم ، بيله مدیلر . هپسنك کله سنی اوچوردم . جاتی جته کوچوردم . مادام که فاقیم دیورسین ، بر مسئله صوره جفج جوانی ویر . » دیر . خواجه : « نه در سؤالک ؟ » دیر . چوبان : « آی یکی ایکن کوچك اولور . صوکره بویور ،

[۱] (بوکله لك ، بووه لك) ایری ، بوز رنکده برسینکدر که حیوانات اهلیه یه مسلط اولور . فنا حالدە جانی یاقار . حتی قان چیقاریر . حیوان ؛ دلی کبی اولور . قوشار ، زیبار ، چیفته آتار . دفع ایدنجه یه قادار اوغرا شیر .

[۲] یولارک تهلکه لی بعض نقطه سنده بنا یاپایوب عسکر اقامه ایدیلن محلدیر . مرور زمانله او جوارده کوی شکل ایدر . بو نامه آنیلیر .

تكرلك اولور ؛ اون بشندن صوكره كوچولور ، هلال قدر قالير ؛ صوكره غائب اولور ؛ او اُسكى آيى نه ياپارلر ؟ » دير . خواجه مشرب ملايم صحبتده مهارتنه كووه نرك فتورسز بر صورتده : « شو قدر شيئى بيله مدكمى ؟ او اُسكى آيى اوزاتيرلرده شيمشك ياپارلر . كورمز ميسين ؟ كوك كورله نجھ ناصل قيليج كچي پارلار ؟ » دينجه چوبان : « آفرين فقيه ! » ايني بيلدك ؛ بن ده اويلاه فكر ايدردم . « ديمش .



خواجه — كتير آبدستلكمى آل سمرىكى

﴿ لطيفه ﴾ بر كون خواجه اشكىنه بينوب شهر خارچنده كى باغچه سنه كيدر كن يولده صيرتندن آبدستلكى چيقاروب اشكك اوستنه آتار . كنديسى بر ايكي آديم ايلريده آبدست تازه لر . باشى بوش حيوانك اوستنده كى جبه يي كورن بر باغچوان ياواشجه خواجه نك جبه سنى آلير ، آغاچلر آراستده غائب اولور . خواجه كلير باقار كه جبه چالمنش ، همان اشكك سمرىنى صاللاصيرت ايدر . اشكك

قیچنه خیزلیجه بر قامچی ایندیروب : « ناصل چالدردکسه اویلهجه کتیر
آبدستلکمی ، آل سمریکی . » دیمشدر .



خواجه — بلکه آغاچدن اوتیه یول دوشر دیدیکنک رسیدر

﴿ لطیفه ﴾ بر کون محله چوجوقلری بر لرینه : « کلکنز! خواجه بی
آغاچه چیقاروب پاپوشلرینی آلهلم . خواجه ایله بر از لطیفه له شهلم . » دیه
قرارلاشدیر لرلر . بر آغاچک دینده : « کیمسه بو آغاچه چیقامز . » دیه شدتلی
بر بجه طوتوشورلر . خواجه اورادن کچرکن بجه قولاق ووروب ایجلرینه
قاریشهرق : « بن چیقارم ! » دیر . چوجوقلرده : « چیقامز سین . چیقیله جق
کبی کوردونور اما هر ییکیدک کاری دکلدیر . کیت ایشیکه . » دیرلر . خواجه
پر آتش کسیلوب : « چیقامز میم ؟ چیقامز میم ؟ بن شیمدی سزه کوستیرم . »
دیه رک همان انکالرینی بلینه چهره یوب پاپوشلری صیقی صیقی قویننه صوقغه
اوغراشیر . چوجوقلر : « افندی ! پاپوجی نهیه قوینکه صوقیورسین ، آغاچه

پاپوجك نه لزومی وار؟» دیدکلرنده خواجه : « ای ... نه بیلیرسیکیزاولادلر .
حاضر یانمده بولونسون . بلکه آغاجدر اوتیه یول دوشر . » دیمش .

﴿ لطیفه ﴾ برکون تیمورلنک خواجه یی جرید او یوننه دعوت ایدر .
« حیوانه بینسون کلسونده رازجرید اوینایه لم . » دیر . خواجه نك بر قوجه
اوکوزی وار ایمش . همان اوکوزك صیرتنه بر پالان اوروب میدانه حاضر
اولور . خلق بونی کورونجه قهقهه لری میدانی ولوله ویریر . امیر تیمور



خواجه جرید اوینامق ایچون اوکوزه بینوب میدانه کلدیکدر

حضورینه جلب ایدوب : « خواجه ! جرید او یوننده حیوانك غایت چویك
اولمه سی وقوش کی سیکیرتمه سی لازمدر . بو بطلال ، قالتابان اوکوزه نه یه بیندک؟ »
دیدیکده خواجه دیمش که : « واقعا بش اون سنه در تجربه ایتدیکم یوق ؛ فقط
بوزاغی ایکن کوروردم . اوله قوشاردی که آردندن آت دکل قوش بیله
یتشمزدی . »

﴿ لطیفه ﴾ بر کون قیزی اولک آلت قاتنده کی بویوک لوش ایزبهیه بر شی آلمق ایچون کیرر . باقارکه خواجه بر کوپ آرقه سینه کیزلمش یاتیور . « افندی بابا ! بوراده نه یاپیور سین ؟ » دینجه : « آقیزم نه یاپه جغم ؟ شو آنا کک ائندن غربت ایللرده اولهیمده باری قورتولهیم دییه تا ... بورالره قدر چکیلدم کلدم . » دیمش .



خواجه کیلارده کوپ آرقه سنه صاقلانوب قیزیله محاوره سیدر . .

﴿ لطیفه ﴾ بر کون نصرالدین افندی اوندی اوتورورکن بر آدم قابونی چالار . خواجه : « نه ایسترسین ؟ » دیر . بر پارچه آشغیه کلیکیز . « دیر . خواجه آشغی اینوب قابویه وارنجه فقیر آدم : « صدقه ایسترم . » دینجه خواجه حدتله نوب فقط هیچ طورینی بوزمایه رق : « یوقاری کل . » دیر . فقیر تا کندی اوتور دینی اوست قاته چیقنجه خواجه : « الله ویره . » دیمکله

فقير: « بهی افندی ! مادامکه بوش کوندره جکدک، نیچون آشاغیده سویله مدک؟ »
 دنجه خواجه: « یا بن یوقاریده ایکن سن نه ایچون سویله مدکده بی تا قاپونک
 اوکینه قدر ایندیردک؟ » دیمش .

﴿ لطیفه ﴾ برکون خواجه ملالری آرقه سنده اولدینی حالدہ جامع
 شریفه درسه کیدرکن مرکبه ترس بینر. ملالر: « خواجه افندی! نیچون بویله
 ترس بینوب راحتسز اولیورسین؟ » دیدیکلریده افندی جواباً: « اگر طوغری
 بینسه م سز بنم آرقه مده قاله جقسکیز . سز اوکده کیده جک اولسه کز بن
 آرقه ده قالب یوز یوزه کله مہ یه جکیز . ایمدی بویله بینمک اولادر . » دیمش .



خواجه اوکده مرکبه ترس بینمش ، آرقه ده طلبه کلپور

﴿ لطیفه ﴾ مرحوم نصرالدين افدينک بر مقدار آچقه سی واریمش .
 برکون خانہ سی تنها ایکن بر یری قازار ، کومر . قاپویه قدر کیدر ؛ باقار :
 « بن خیرسین اولسه م بونی درحال بولورم . » دیر . اورادن قالدیرر ، باشقه

یره کومر، ینه اوزاقدن معاینه ایدوب : « بوده اولمادی . » دیه‌رک باشقه
 بر یره صاقلار . الحاصل هیچ برینه کوکلی قانع اولماز . مکر خانه سنک
 اوگنده بر ته‌جک وار ایش . باغچه‌سندن بر اوزون صیریق کسوب آقچه‌نی
 طوربه ایله بو صیریغه باغلار . کوتوروب صیریغی او ته‌یه دیکر . آشاغی اینوب
 یوقاری نظر ایدر . آرتق کوکلی راحت اولوب : « آدم قوش دکل که اوچه‌ده
 بونک اوزرینه چیه . ای یرنی بولدم . » دیه‌رک کیدر . مکر حرامزاده‌نک
 بری خواجه‌نی کوزه‌تیر ایش . او کیجه ته‌یه چیقار ، صیریغی سوکر ،
 چیقاریر . آقچه‌نی آلیر . صیریغک ته‌سینه بر آز صیغیر تزه‌کی سورر . صیریغی
 ینه یرینه دیکر ، کیدر . بر آرهلوق خواجه‌یه آقچه لازم اولمش . صیریغک دینه
 کلیر ، کورور که آقچه طوربه سیله کیتمش . صیریغک تا ته‌سنده صیغیر تزه‌کی
 وار . کندی‌کندینه کمال حیرتله : « بو صیریغه‌آدم چیه‌ماز دیر ایدم . یا بونک
 ته‌سینه صیغیر ناصل چیقمش ؟ سبحان الله ! بو بر غریب ایش‌در ! » دیوب
 باشی صالارمش . رحمة الله علیه .

﴿ لطیفه ﴾ . بر وقت بر کوئی خواجه مرحومه بر طاوشان کتیریر .
 خواجه کوئی‌یه الدن کلدیکی قدر عزت واکرام ایدر . بر هفته صوکره ینه
 کلیر . خواجه طانیه‌مز : « کچن هفته سزه طاوشان کتیرن کوئی‌یم . » دیر .
 خواجه کولر یوز کوستروب چوربا چیقاریر : « طاوشان صویندن چوربا‌یه
 بو یورک ! » دیه اوفاق بر لاف دوقوندورر . بر قاچ کون صکره اوچ درت
 کوئی کلوب مسافر اولوق ایستلر . خواجه : « سز کیملر سکز ؟ » دیه
 صورار : « طاوشان کتیره‌نک قومشولری یز . » دیرلر . خواجه بونلر ده‌لقمه
 چیقاریر ، مهمان ایدر . بر هفته صوکره ینه بر قاچ کیشی کلیرلر . خواجه
 بونلر ده‌ده صورار : « طاوشانی کتیرن کوئی‌نک قومشوسنک قومشوسی یز . » دیرلر .
 خواجه : « خوش کلدیکز ! » دیوب اورته‌لق قارارمه‌دن همان اوکلرینه بر طاس
 صو کتیریر . کوئیلر طاسه حیران حیران باقدندن صوکره : « افندی !
 بونلر ؟ » دیه‌لریله خواجه دخی : « طاوشانک صوینک صوینک صویدر .
 دیش .

﴿ لطیفه ﴾ بروقت خواجه خسته لائز . قومشو قادینلری ایشیدوب خاطر صورمغه کلیرلر . خواجه بی ایجه بولوب قادینلردن بری لطیفه قصیدله : « افندی ، الله کجندن ویرسین . شاید سکا بر امرحق واقع اولورسه نه دیهرک یاس طوته لم ؟ » دییه صورنجه خواجه او حالندهده لطیفه لشمکدن واز کچمه یوب : « قادینلرک صحبتنه طویمازدی دییه آغلا ییکیز . » دیهرک قادینلری کولدورمشدره .



خواجه بی قومشو قادینلرک عیاده سیدر

﴿ لطیفه ﴾ برکون خواجه اوینه کلیرکن بر قاچ طالب علمه راست کلیر : « افندیلر ! بوکیجه بزه کیده لم ، بابا چورباسنی بزه ایچم . » دیر . طلبه : « پک کوزل ! » دیوب خواجه نک آرقه سنه دوشر ، اوه کلیرلر . خواجه : « بویورک ! » دیوب او طیه چیقاریر . ایجری کیرر : « قاریجغ ! بر قاچ مسافر کتیردم . بز طاس چوربا ویرده بییه لم . » دیمکله زوجه سی : « آه افندی ! اوده یاغمی وار ؟ پرنجمی وار ؟ مصرف کتیردیکک وارمی که چوربا ایسترسین ؟ »

جوانی ویرر. خواجه محزون اولوب: «قادین! ویر اورادن بکا چوریا طاسنی.»
 دیر. طاسی آلوب طلبه نك یانینه کله رک: «افندیلر! تعیب ایتمه یکنز! اگر بزم
 اوده یاغ، برنج اولسه یدی سزه شوطاس ایله چوربا چیقاره جق ایدم.» دیمکه
 طلبه کولوشه رک چکیلش کیتمشلر.



خواجه — نه مه لازم؟ صاری آشی ییین کیرسین کرده!

﴿لطیفه﴾ خواجه اولنه جکی آقشام اشی دوستی دعوت ایدرلر.
 هرکس یر ایچر. خواجه بی چاغیرمه اونوتورلر. اُک سه ویدیکی زرده دن محروم
 قالنجه خواجه طاریلیر، چیقار کیدر. بر آراق خواجه بی آرارلر بوله مازلر.
 اوتیه بری یه آدملر صالدیرلر. بیک مشکلاته اوزاق بر محله یاقالار کتیرلر.
 ارکان عاُله دن بعضیلری: «کل آجانم! زرده سین؟ کردکه کیره جکسین. ایکی
 ساعتدر سنی آرایورز.» دیدنجه خواجه طارغین بر صورتله: «نه مه لازم؟
 صاری آشی ییین کیرسین کردکه!» دیش.

﴿ لطیفه ﴾ خواجه قاضی ایکن ایکی آدم کلوب بری : « شو آدم بنم قولاغنی ایصیردی.» دیه دعوا ایدر. دیکری ده: « خیر افندم کندیبی کندی قولاغنی ایصیردی.» دیه جواب ویریر . خواجه : « برازدن کلیگزده سزه جواب ویرهیم.» دیدکدن صوکره حرمه کیروب کندی خصوصی اوپه سنه چکیله رک: « باقهیم انسان کندی قولاغنی ایصیره بیلیرمی؟» دیه قولاغنی چکوب



خواجه — ایصیریر اوغلم ! ایصیریر؛ حتی دوشرده باشی بیله یاریلیر !

اوغراشیرکن صیرت اوستی دوشر ، باشی بر مقدار چیزیلیر. بر بز باغلا یوب محکمه یه چیقار . ینه دعوا جیلر کلوب مدعی خصمک جوابی جرح ایله مک صد دنده: « افندم قاضی انصاف ایدیکز. هیچ بر آدم کندی قولاغنی ایصیریرمی ؟ » دینجه خواجه مرحوم: « ایصیریر اوغلم ! ایصیریر ؛ حتی دوشرده باشی بیله یاریلیر ! » دیشدر .

﴿ لطیفه ﴾ خواجه ینه بر کون تیمورک قوناغنه واریر. بونی بر قالتابان
 آته بیدیروب معینده آوه کوتورور. آو ائسانده یاغمور یاغمه باشلار.
 هرکس آتیرینی تیوب قرارگاهه واریرلر. خواجه نك آتی یورومه دیکی جهته
 بالطبع قاجه مز. هان چیلقلانوب ائوابی آلتینه آلیر. یولده یاغمور کسینجه
 البسه سنی کیوب منزلگاهه ایریشیر. پادشاه خواجه نی ایصالنامش کورونجه
 سبب وحکمتی سؤال ایلر. خواجه: « انسان بویله ییکیت آتک اوستندم



خواجه نك البسه سنی آلتینه آلوب چیلقل آته ینمه سیدر.

ایصالنیرمی؟ یاغمور باشلايجه هان بر اوزنکی چالدم. بنی قوش کی منزله
 ایریشدیردی. « دیر. پادشاه تعجب ایدر. امر ایدر، او حیوانی باش طاوله یه
 باغلارلر. او ائشاده ینه آوه کیدرلر. پادشاه او آته ینر. او کون ینه یاغمور
 یاغار. خواجه و سائرلی حیوانلرینی تیوب هان قرارگاهه ایریشیرلر. پادشاه
 او تنبل آت اوزرنده مکمل صورتده ایصالنیر، کیچ وقت منزلگاهه واصل


اولور . ايرتسی کون خواجه يي چاغیرتوب تکدیر ایدەرك : « سکا یاقیشیرمی ؟
بکا یالان سویلدک ، آلداتک ، بی قیرده صوجوق کی صیر صیقلام ایتدک . »
دیدیکده خواجه : « جانم نه طاریلیورسین . سنده بئم کی البسه کی صویونوب
آلتیکه آلهرق حفظ ایدەيدک ویاغمو ر بیتدیکنده تکرار کینسه ایدک ایصلاغمزدک .
بئم کی قوب قورو البسه ایله کلیردک . » دیمشدر .



خواجه نك چيلاق سيوری حصاره کيتديکيدر

﴿ لطيفه ﴾ بر صباح ایر کندن قابوسنک اوگنده بر آرابەنک کندی
وطنی اولان سیوری حصاره کیتەمکده اولدیغی خواجه آکلانجه هان یاتاقدن
فیرلایوب کوملکله آرابهیه آتالار . خواجه محترم ومظنه دن بر ذات اولمغله ایشینه
قاریشمزلر . کویه یاقلاشدقارنده آرابه جیلر بر آدم قوشدوروب خواجه افندی نک
کلەمکده اولدیغی خبر ویرلر . بوتون کویلی قارشى چيقوب خواجه يي چيريل
چيلاق کوره رک : « افدی ! نەدر بو حال ؟ » ديه حيرتله سؤال ايله مه لريله خواجه
رحمة الله عليه : « سزى بک سودیکمدن ألبسه کيمه سنى اونوتدم . » دیمشدر .

﴿ لطيفه ﴾ خواجه نك ايرى و هيتلى بر او كوزى اولوب ياي كې قوجه مان ايكي دانه بوينوزى وار ايمش . هر زمان حيوان خر كله دن صالينه صالينه عودت ايلر كن ايكي بوينوزينك آراسينه بينمكه خواجه نك ايجي تيرمه ايمش . كندى كندينه : « آه شونك ايكي بوينوزى آراسينه اوتورسه م ، اللرم له بوينوزلرندن طوتوب شويله بر طولاشسم . » ديه خوليالر قورارمش . بر كون



خواجه نك او كوزك ايكي بوينوزى آراسينه بينوب دوشمه سيدر

او كوز حاوليده ياتوب طالعين طالعين اويوقلار كن خواجه فرصتدر ديوب اوصولجه او كوزك آئينه اوتورور اوتورمز او كوز فنا حالد خويلانه رق بردن بره صيچرار ، خواجه بي قالدیرر يره چالار . خواجه بيني اوزرينسه تکر مکر يووارلانبوب دوشر ، عقلی باشندن كيدر . اوراده ييغيلير قالير . قاريسی كلوب خواجه بي او حالد كورونجه هلاك اولمش صانير ، آغلامغه باشلار . بر زمان صوكره خواجه كوزلريني آچهرق قاريسی آغلار كورنجه : « آغلامه قاريچم . واقعا خيلي زحمت چكدم اما هله آرزومه نائل اولدم يا ! » ديمشدر .

﴿لطیفه﴾ خواجه بر قاج طلبیه راست کلوب: «بویورك، بزه كیده لم.»
 دیهرك أولك قاپیسنه قدر کتیر: «سز آزیحق بوراده طورك.» دیه ایچری
 کیروب حرمنه برهانه ایله صوفته لری صاومه سنی سویلر. حرمی قاپی ارقه سندن
 کویا بیلمه مز لکدن کله ركه نه ایسته دکلرینی صور دیقدن صو کره: «افندی یوق.»
 دیر. صوفته لر: «آجام. شیمدی برابر کلدک. او بزی زورلادی کتیردی.»



خواجه نك پنجره دن باشنی چیقاروب طلبه ایله محاوره سی

دیرلر. قادین خواجه نك خانه ده اولما دیغنده اصرار ایدر. نزاعی آر تیریرلر.
 خواجه صبر ایده میوب پنجره دن باشنی اوزاته رق: «به افندیلر! نه مجادله
 ایدر سیکز؟ بلکه قاپی ایکیدرده برندن چیقمش کیتمشدر!» دیمکله صوفته لر
 کولوشه رك کیدرلر.

﴿لطیفه﴾ خواجه نك حرمی طوغوره جق اولور. صانجیلر ایچنده
 قیورانهرق اسکمله اوزرنده برایکی کون قالیر، طوغوره مز. ایچریدن قادینلر:

« افندی بر دعا ویا بر چاره بیلیرسهك یاهلمده چوجوق طوغسون. » دیمه لرله
 خواجه : « بن اونك علاجنى بیلیرم . » دییه همان بقاله قوشوب بر آز جویر
 آلهرق طوغرو ایچری کیرر وایسکملهك آتینه جویرلری دوکدرک : « شیمدی
 اوغلان جوزلرك سنى طویار طویمز اوینامغه چیقار . » دیمشدر .



خواجهك زردالی آغاچنده اوتمه-سی ، باغچه صاحبك آشاغیدن
 حیرتله تعریض ایتمه-سی .

﴿ لطیفه ﴾ خواجه بر کیمسهك باغچه-سنده کی زردالی آغاچنه چیقوب
 زردالی یرکن صاحبی کلهرك : آغاچده نه ایشك وار؟ « دییه سورار. خواجه :
 « بلبلم ، اوتیورم. » دیر . حریف : « اوت باقهلم ، ایشیدهلم. » دیر. خواجه
 اوتمه-یه باشلار . حریف اختیارسنز کولهرك : « بلبل بویه می اوتر ؟ » دینجه
 خواجه : « عجمی بابل بوقدر اوتر . » دیمش .

﴿لطیفه﴾ بر کیجه آی آیدینلغنده خواجه قویودن صوچکه جک اولور،
باقارکه آی قویونک ایچنده در. چیقارمق ایچون ایپه چنکلی طاقوب صارقیتیر.
تصادفاً چنکل بر طاشه طاقیلیر . خواجه اولانجه قوتیله ایپ چکمکله چنکل
قورتولوب خواجه صیرت اوستی دوشونجه باقارکه آی کؤک یوزنده در: « حمد
و ثنا اولسون ! چوق زحمت چکدم اما هله آیده یرینه کلدی یا . » دیمش .

— ﴿روایت اولونورکه﴾ —

خواجه مرحوم « نورالله قبره » هر علمده ماهر و هر فنده کامل ایمش [۱].
لکن طلبه کنديسندن درس رجا ایلدکلرنده : « قدوری اوقویهلم . » دیرلرسه
اوقوتور ایمش . باشقه بر کتاب ایسته یه جک اولورلرسه اوقوتمز ایمش . بعض
ارباب وقوف دیمشدرکه : خواجه قدوری اوقوتور ایکن کشف و کرامت
صاحبی اولمش . قدوری شریف اوقوتمه وقف انفاس بویوردقلرینک سر
وحکمقی بو ایمش . رحمة الله تعالی رحمة واسعة [۲] .

اسکیدن بری طبع اولونه رق خلقک الله تداول ایدن مشهور (لطائف
خواجه نصرالدین) کتابی بورایه قدردر . برقاج حکایه سی موافق کورولمه یه رک
درج ایدله مشدر .

[۱] هر علم و هر فن دیدیکی او زمانده اوقونمه سی مجبوری طوتولان اون ایکی
فندرکه (صرف ، نحو ، منطق ، معانی ، اصول ، فقه ، تفسیر ، حدیث) دن ماعدا
(حکمت ، هندسه ، نجوم ، موسیقی ، اخلاق) الخ کبی علملردن بعضلرینی یکدیگرینه
متداخل عدایدرک اون ایکی عدایدرلر . بعضاده (خواص ، نیرنجیات ، شعبده) کبی اصللی اصلمز
اسکیدن قاله علملری قاهر (اوتوز ایکی فن) ه چیقاریرلر .

[۲] (قدوری) فقه صنفی مختصراتی میاننده الکنافع بر اثر اولوب مؤلفی ده اجله دن
اولغله علما او زمان کاملاً بو کتابی اوقوتورلر ایدی . اونکچون متعدد شرحلری واردر .

« لطائف خواجه نصرالدین » کتابنه ذیلدر

بوندن اون بش سسه اقدم الیه کوزل تعلیق خطله یازلمش بر مجموعه کچمشدی که شعرا، عرفان بر ذاتک مجموعه سی اولدینی آکلاشیلیوردی . مندرجاتندن برعصر دن داها اول یازلدینی آکلاشیلیوردی . خواجه نک مطبوع لطائف کتابنده اولمایان و فقط افواهدده خواجهیه اسناد ایدیه کلن بر طاقیم لطائف حاوی اولدینی جهته اشبو اثریمزه درج ایلهدک :

﴿ لطیفه ﴾ خواجه بر آرهلق قونیهدده بولونورکن بر طور احترازی ایلہ : « غالباً زوجہک وفات ایلہمش . » دیمش . خواجه قیدسزجه بر لسانلہ : « اولمہسده ذاتا بن اونی بوشایہجقدم . » دیمش .

﴿ لطیفه ﴾ خواجه بر کون اشکنی قوشدورورکن دوشمش . چوجوقلر : « ... خواجه اشکدن دوشدی . خواجه اشکدن دوشدی . » دیہ صاراقیه آلہلریله خواجه هیچ بر شی اولماش کی : « آچوجوقلر ! دوشمهسه مده ذاتا بن اینه جکدم . » دیمش .

﴿ لطیفه ﴾ خواجه داغده اودون کسوب اشکنه یوکتمش . بالطہنی ، آبانی مرکبک اوستنه آتوب : « بن طاغ یولندن کیده جکم [۱] . سن طوغرو یولدن کل . » دیوب کیمش . اوه گلش ، باقش که اشک کلهمش . قاریسیلہ : — اشک کلدیمی؟ خیر کلدی . — ماشاءالله ! بن اشکدن اول کلمش . — یولنده قونوشدقن صوکره بر مدت اشک کله یوب کچیکنجه : « واریم ، باقیم . اشک زده قالدی ؟ » دیہرک طاغہ واریر . باقارکه اشک بیراقدینی یرده اوتلایور . اما اوستنده آبا ایلہ بالطہ یوق . همان اشکک اوزرندن اودونی یقوب سمیری صالہ صیرت ایدر . اشکده : « سن حالا قودیم یرده اوتلایورسین .

[۱] چونکه طاغ یولی یوکی حیوان کچه جک صورتده منتظم دکلسدهه یایان آدمیر ایچون کسیرمه اولور .

هایدی اویله ایسه آبا ایله بالطهینی کتیرده ، سمریکی آل . « یولنده حدتله ، شدتله سویله نرک آیر یورونی ویریر [۱] .

﴿ لطیفه ﴾ خواجه نك اشكى اولمش . قاریسی : « بر اشكه محتاجز .

هایدی بازاردن بر اشك آل . « دییه آینه آلتی غروش ویرمش . خواجه بازاردن آدینی اشكك یولارینی چكوب آردینه باقاندن یولینه دوام ایدرکن ایکی کلخان بکی سوزله شوب یواشجه اشكك یولارینی صیریرلر . بری اشکی بازاره کوتورور . پاره سنی پابلا شمع اوزره ساتار . دیکری یولاری باشنه کچروب خواجه ایله برابر خانه نك قاپوسی اوکته کلیرلر . خواجه آردینه دونوبده اشك یرینه بر آدم کورونجه فوق العاده شاشالار : « باقسهك آ ، آیول ! سن نه جیسیین ؟ » دینجه هین اوغلی سوموکنی چكرك ، کوزلرینی بوزه رك ، سسنده حزین بر طور ووروب : « آه افندم ، جاهللك ! ناصلسه آنامك حضورنده بر اشكك ایتدم . آشیری درجه ده جانی یاقدم . والدهم ده : [دیلرم اوغلان اشك اولاسین .] دییه انكسار ایله مكله درحال اشك اولدم . بنی بازاره کوتوروب صا دیلر . سز آدیكز . سزك یمن وبرکتكزله شیمدی آدم اولدم . « دییه خواجه یه بر جوق تشکرلر ایله مش . خواجه ده : « هایدی بردها اویله کلخانیلک ایله مه ! » یولنده نصیحت ایله یوب صالی ویرمش . ایرته سی کونی تکرار اشك آلق ایچون بازاره وارمش . باقشكه دونکی آدینی اشك ینه جانباز النده طولاشیور . خواجه هان مرکك قولاغنه ا کیلوب کوله رك : « کیدی کوفته خور ! غالبا سوزیمی دیکله مه یوب والده کی ینه طاریلتمشسین ! » دیمشدر [۲] .

﴿ لطیفه ﴾ خواجه نك خانه سنه خیرسز کیرمش . خواجه یوك ایچنه

صاقلانمش . خیرسز خانه یی یوقاریدن آشانغی آرامش طارامش . چالاجق برشی بولامامش : « عجبا یوکده برشی وارمی ؟ » دییه قاپوسنی آچنجه کورورکه

[۱] بو حکایه بالاده مختصر بر صورتده کچدی . حال بوکه بو دها اطرافلی ، دها مکمل یازلمش . همده : « سن حالا قودیم یرده اونلایورسین . » مثل مشهورمرك منشأی ده کوستریبور . اونکچون بونكده تحیری مناسب کورولدی .
[۲] توفیق بلك (لطائف خواجه نصرالدین) ندهده واردر .

خواجه آياقه ديم ديك طورويور . خيرسز خلجانندن شاشيروب : « سز بوراده ميسكنز ؟ » ديمكه خواجه اوفتورسز شاقلا بانلغيله : « اوت ! سندن اوتانديغمن بورايه صاقلاندم . چالاجق بر شي بولاماديغكه چوق اوتاندم . عفو ايدريكنز . » ديمش .

﴿ لطيفه ﴾ خواجه نك خانه سنك آلت قاتنده (دهليز) دينلن بوش ولوش محله بر يوزوك غائب اولش ، بوله مامش . چيغمش قاپوسي اوكنده اراركن قومشوسي سوال ايدوب ايجريده يوزوك غائب ايتديكني آكلانجه : « اوصورنده ايجريده آراسهك آ ! . » ديمكه خواجه : « آ قارداشم ! بيليرسين بزم اوك ايجريسي بك قاراكلق ، اوراده يوزوك كورونمز . اونكچون بوراده آرايورم . » ديمشدر .

﴿ لطيفه ﴾ خواجه چيفت سورركن قايش قيرلمش . باغلايه جق برشي بولامايوب باشنده كي صاريفي اوچ قات ايدرك باغلامش . او كوز زورلانجه درحال صاريق اوزولمش . خواجه اك صاغلام صيريمك وظيفه سي يوكه تيلن توليندك شوحالنه باقوب : « باقندي دودوكم ؟ قايش نه لر چكر ؟ » ديمشدر [۱] .

﴿ لطيفه ﴾ خواجه دلقانليغنده ربوستانه كيروب قاوون قوپايركن [۲] بكجي كوروب اوزاقدن هايقيرمش : « هي ! . . اوراده نه ايشك وار ؟ چيق بوستاندن ! . » ديمش . خواجه ده : « بويوك آبدستمي بوزويورم . » ديه جواب ويرمش . حريف كلوب : « هاني يا قباحتك ؟ » دينجه اوراده بر تازه صيفير ترسي وارمش اوني كوسترمش . بكجي : « بهي آدم ، اوصغير ترسيدر . » دينجه خواجه : « ياسن راحت ، راحت آدام كي ترسله مكه ييراقدكي ؟ » ديمشدر .

[۱] (لطائف لامعي) ده دخي مسطوردر .

[۲] آناتولينك عادت قديمه سندنر كه عيش ، بوستان قيبيلندن شيلره اهميت ويرمزلر . صاحبنه طانيشمه دن برينك باغچه سنه كيروب قوپايرلر . برقابه طولدوروب كوتورولوزسه نه قدر ينلسه باس كورولمز . ا كثر يا باغچه صاحبلي سس چيقارماز اما بعضلري ده سويله نير .

﴿لطیفہ﴾ خواجہ مملکتہ قاضی ایش۔ بریسی فریاد ایدرک: «طانبوری می چالدرم ایدی [۱]۔ چارشیدہ فلان آدمک آلدہ بولدم۔ بکا آلیو ریکز۔» دیدی۔ خواجہ دخی محضر [۲] ایله حریفی کتیرتوب سؤال ایلد کده: «بو طانبوری بن دیار آخردہ صاتین آلم۔» دیدی۔ خواجہ شاهد ایستہ یوب حریف کتیردیکی شاهدلری حضوره چیقاردی۔ خواجہ: «آغالر سز نه یه شاهدسکز؟» دینجه: «بو طانبور بو آدمکدر۔ اوست پرده سی قیریقدر۔ بورمه لری غایت کوشکدر و آلتی تلیدر۔» دیه شهادت ایدوب فی الواقع عینی ظهور ایتمکه طانبوری مدعی یه حکم ایدہ جکی وقتده ذی الید [۳]: «بو شاهدلر تزکیه [۴] اولونسون؛ زیرا بری اوغلان پزه ونکیذر، بری عورت پزه ونکیذر۔» دیه جرح و رد ایتک ایستہ مکله خواجہ: «بہی آدم! تزکیه نه حاجت؟ طانبور دعواسندہ بوشاهدلردن اعلاسی اولمز!» دیمش۔

﴿لطیفہ﴾ خواجہ یه تیمورلنک دیمش کہ: «خواجہ بیلیرسین کہ خلفای عباسیہ دن ہر برینک عنوانی کیمی موفق بالله، کیمی متوکل علی الله، کیمی معتصم بالله ہب بویولده ایدی۔ بندہ اونلرک میانندہ کلسہ یدم؛ بنم عنوانم نہ اولوردی؟» خواجہ درحال دیمشکہ: «ای صاحبقران هیچ شبہہ ایتہ ییکز کہ سز کی محقق صورتده «نعوذ باللہ» اولوردی [۵]۔»

[۱] طانبور آناتولیدہ اوچ تللی و بر آرشون قدر بویندہ طانبور یاوروسنہ اطلاق ایدرلر۔ بعضاً آلتی تللی ده اولور۔ فارسیسی (سہ تار) و (ششتار) در۔ (چورا) دخی دینیلیر۔ ایوم (طانبورہ) دیرلر۔

[۲] محضر = قاضیک رسمی خدمہ سی اسمیدر۔

[۳] ذی الید = دعوادہ مدخلی اولان یعنی دعوای۔

[۴] تزکیه = شاهدک طوغرو، تمیز آدم اولدیفی آراشدیروب تحقیق ایتک۔

[۵] بو حکایہ (سلطان محمودلہ سعید افندی میانندہ جریان ایلدیکی مروی ایسہ ده مأخذیمز لااقل بر ایکی عصر مقدم (نصرالدین و تیمورلنک) عطفله حکایہ ایتمش۔ استانبولده علمیه دن بر ذاتک مجموعہ سی اولدیفی ظنی غالب اولان او ذاتہ دیمک کہ لااقل دہا یاریم عصر ایلری یه عائد بر کیسمہ طرفندن بویله نقل ایدلشد۔ واللہ اعلم۔

﴿لطیفہ﴾ خواجہ نك اكه سنه بر حریف بر سیلله اورمش . خواجہ
 آرقه سنه دونوب باقینجه : « عفو ایدر سکنز . سزی تمکلیفسز دوستلر مدن برینه
 بکزه بدم . » دیمش سده خواجہ یاقاسنی بیراقایوب سوروکلہ یه رك محکمہ یه
 کوتورمش . قاضی یه شکایت ایتمش . مکر او حریف قاضینك احبابی ایتمش .
 قاضی حریفی چاغیرتوب : « هایدی خواجہ ! سن ده بوکا بر سیلله اور ! »



خواجہ قاضی یه بر سیلله عشق ایله یوب جزای نقدی بی صایدشد یغیدر

دیمش . خواجہ راضی اولماش . قاضی : « اوله ایسه خواجہ افندی ! حلق
 بر آچقه در . هایدی افندی جزای نقدی اولق اوزره بر آچقه کتیر . خواجہ
 افندی یه ویره لم ده سزی حقلاشدیره لم . » دیه رك حریفی آشیرمش . خواجہ
 ساعتلرجه بکله یوب حریفك صاووشدیرلدیغنی آکلانجه قاضینك طالعینلغندن
 استفاده ایدوب : « یا ستار ! » دیه رك قاضینك بوینه لوندانه بر سیلله عشق ایتمش

و : « افندی حضرتلری بنم دها انتظاره وقتم یوق . او برآچہ پی او آدمدن سن آل . » دیہرک صاووشوب کیتمشدر . [۱]

﴿ لطیفہ ﴾ خواجه یہ : « قاریکک عقلی ضایع اولمش . » دیمشدر . خواجه درین درین دوشونمک وارش . « نه دوشونیورسین ؟ » دیہہ صوردقلرنده : « واللہی بزم قارینک اصلندن عقلی یوغیدی . عجبا نہ سی ضایع اولدی ؟ اونی دوشونیورم . » دیمش .

﴿ لطیفہ ﴾ خواجه قاریسنی بوشامق ایچون محکمہ بہ وارش . قاضی : « قاریسنک ، باباسنک اسملری ضبط اولونسون . » دیمکک خواجه یہ صوردقلرنده : « بیلیم ! » دیمش . قاضی : « قاچ سنهک زوجه کدر ؟ » دیہہ سؤال ایدوب خواجه دن : « برقاچ سنه اولدی . » جوابی آلفله : « به آدم ! سنه لردن بری انسان قاریسنک آدینی اوکر نغزی ؟ » دینجه خواجه ده : « مرادم کچینمک دکل ایدی کہ آدینی صورایم ! » دیمشدر [۱] .

﴿ لطیفہ ﴾ خواجه طام آقناریرکن بر دینچی : « آزیحق آشاغیہ بیورک سزکله برحبتم وار . » دیوب خواجه پی تا آشاغیہ ایندیرمش . آشاغی اینتجه حاله آجیندیره حق بر مقدمه دن صوکر ا صدقه ایسته مش . « خواجه الندن طوتوب عزت واکرامله طامہ چیقارمش : « الله ویره قوزوم . » دیمش .

﴿ لطیفہ ﴾ خواجه یہ زوجه سی ایلیک پشیرمک ایچون کوخان کولی ایصارلامش . اینده بر طوربه ویرمش . بر هفتہ در کوخان یا نمادیغندن کول بوله ماش . یولده کلیرکن یا نغین یرنده برازا کسر بولوب طوربه یه قویمش . آوه کلوب قادین : « هانی کتیر دکمی ؟ » دینجه خواجه طوربه پی اینه طوتوشدیرمش . قادین آلوب دمیر شیقیرتیسینی ایشیده رک سیلکمش ، اکسر لر دوکولمش . قادین کمال حیرتله : « بونه افندی ؟ » دینجه خواجه دیمشکه : به جاهل قادی !

[۱] بو حکایه (حکایات و دادی) ده دخی مسطوردر .

[۱] معلومدر کہ علی الخصوص طشرده زوج بر برلرینک آدینی اصلا چا غیر منزل اوائل تأهلده بر ایکی دفعه اسملری ذکر اولنورسده صوکره اونوتولور ، کیدر .

سَنَك اوکا عقلک ایرمز . اوقور یازارلر آراسنده [اکسر ایچون حکم کل واردر .] [۱] دیبه بر قاعده واردر . دیمک که اکسره کولک یرینی طوتار [۲] .

[صوکره قادین نه دیمش ؟ - بالطبع حیران حیران بر مدت افندیَنک یوزینه باقدقَدَن صوکره ایکی طرفنه باشنی صاللامشدر .]

﴿ لطیفه ﴾ خواجه کیجه یاریسی قاریسیله قونوشورکن بر آباق پاطریتیسی ایشتمش . صوصوب دیکله مکّه باشلامش . اوآناده خواجه نك اوغلاغی مهله مش . خیرسزلر دیمش لر که : « بو کیجه اَلیمزه بر کله پیر کچمه دی . باری شو خواجه نك اَوینه کیره لم . اویقوده ایکن باصدیروب خواجه نی اولدوره لم . اوغلاغی ده کسوب ییه لم . قاریسنی ده قاجیره لم . مالنی اوغورلایه لم . » اوآناده خواجه حیزلی حیزلی اوکسوروب کورولتی پاطریدی یاپمش ، خیرسزلر قاجمش . قاریسی : « غالباً قورقو کدن اوکسوردک ، پاطریدی یاپدک . » دینجه خواجه دیمشکه : « اوله یا ! سکا کوره نه وار ؟ اونک اوراسنی اوغلاقله بکا صور . »

﴿ لطیفه ﴾ خواجه خانه یاپدیرمق ایچون بر معمار کتوروب حریف : « شورایه بر او طه ، شورایه بر صوفه ، بورایه بر کیلار یاپمه لی . » دیبه آشاغی یوقاری کزرکن ناصلسه ییاللمش . خواجه : « بوراجه ده بر آبدستخانه یاپمه لی دیمش [۳] . »

[۱] (اکثر ایچون حکم کل واردر) یعنی هر هانکی شیئ اکثریسی بر نقطه ده متفق ایسه جمله سی اونقطه ده متحددر دیبه حکم ایدیله بیلیر . هر هانکی قومک اکثریسی بر فعله ، بر اعتقادده متفق ایسه هپسی اونلری مروجدر دیه حکم اولونه بیلیر - املاده (اکثر) ایله (اکسر) ، (کل = هپ ، جمله ، همه) ایله (کول = رماد ، خاکستر) آره سنده فرق وار ایسه ده تکلمده بالطبع فرق اولماز . بزده لطائف نکات ادبیه ده اوقدر اینجه اَله یوب صیق طوقونمز . خواجه (اکثر - اکسر ؛ کل - کول) آره سنده بر مناسبت جزئیّه بولش ، بوسوزی صرف ایشش . ایشته اوقدر . والعهدۃ علی الراوی .

اکسر = دوغروسی (یک سر) درکه دوز باشلی دمیچ چپوی دیمکدر . چاتال باش چپوی دکدر .

[۲] توفیق بکک نشر ایلدیکی (لطائف خواجه نصرالدین) ده دخی مسطوردر .

[۳] بو حکایه باشقه لرینه ده عزو ایدیلیر .

﴿لطیفه﴾ خواجهیه : « یوز یاشنده کی آدامک چو جوغی اولورمی ؟ »
 دیمشدر . « یکرمی ، اوتوز یاشنده تازه قومشولری اولورسه اولور . » دیمش .
 ﴿لطیفه﴾ خواجهنک قومشوسی بر قازان چالدرمش . برینک آئنده
 بولونوب خواجهی شهادته کوتورمش . قاضی : « بوقازان بو مسلمانک اولدینغی
 سن بیلورمیسین ؟ » دییه خواجهیه صورددقه : « اوت ، کیل قوطولغی [۱]
 زماندن بری بیلیم . بونک آئنده بویومشدر . » دیمشدر .

﴿لطیفه﴾ خواجه دکیز کنارنده غایت صوصامش . ایکی آووحنی
 طولدوروب بر یوتومده ایچمش . آغرینی بوروشدورمش . بوغازی یانمش .
 معدمسی آلاق بوللاق اولمش . براز ایلری کیدوب بر قاینقادده بر طاتلی
 صو بولمش . قانه قانه ایچمش وطاقیه سنی طولدوروب کوتورمش ، دکیزه دوکمش :
 « یوف سنک عظمتکه ! بهوده کوپوروب قابارمه . صو دیدیکک ایشته بویله
 اولور . » دیمشدر .

﴿لطیفه﴾ خواجهیه : « جنازه یی کوتورورکن تابونک اوکنده می
 بولنملی ، آرندینه می ؟ » دییه صورمشدر : « ایچنده بولونمایک ده ، نره سنده
 بولونورسه کز بولونک . » دیمش [۲] .

[۱] (کیل) فارسی (کل) کاف فارینسک کسری ولامک سکونیه تلفظ ایدیلن
 کله دن تورکجه مژه منقول اولوب فی الاصل چامور دیمکدر . بوراده مقصد برنوع یاغلی
 مائی رنکده طوپراق معدنی در که اسکیدن ساده ویا ایچنه کل ، مسک ، عنبر
 قاریشدره رق قالب یاپارلردی . صابون یرینه قوللانیرلردی . حالا آناتولی ایچریلرنده
 قوللانیرلر . (کیل قوطوسی) حمام طاقیمی ایچنه باقیر قوطو ایچنده صابون مقامنده
 کیل قورلردی . ایشته او قوطودر . اغنیانک کوموشدن بیلله اولوردی . کل ایله
 قاریشدرلش کیل قالبی حقنده سعدینک : (کلی خوشبوی درحمام روزی . رسید
 ازدست محبوبی بدستم) منظومه سی پک مشهوردر . بو (کیل) برنوع یاغلی طوپراق
 معدنی اولمغله بعض آدملر ، علی الخصوص حامل قادینلر مبتلاسی اولوردی . بن آنا
 طولی ده کیل مبتلاسی قادین بیلیم که بولدقچه متصل یردی .

[۲] بو حکایه پک اسکی کتابلرده ظرفای اسلافه اسناد اولونمشدر .

﴿لطیفه﴾ خواجه مرحوم برایش ایچون بروسه کیدر . حکومت دائره لرنده او قدر اوغراشیر، ایشی اولماز . بریسی : «ا کر صباح نمازینی قرق کون اولو جامعه محراب یاننده قیلارده ، قرق برنجی کون مناجات ایدرسهك ایشك اولور . «دیر . خواجه بویله یاپار . ینه مقصودینه موفق اوله ماز . بر صباح اولو جامع جوارنده (کوچوك مسجد) . کیدر، عقب صلاتده صدقه مناجات ایدر . بحکمة الله تعالی ایشی اولور . هان (اولو جامع) . کیدوب بویوك قاپودن ایجری به باغیره رق : «یازق سکا ! اوغلك قدر اوله مادیک . «دیمش .

﴿لطیفه﴾ بر اوزون یولجلیق ائساننده خواجه غائب اولمایم دییه بلینه بر قاباق باغلامش . یولنه دوام ایتش . منزلك برنده بر صباح معذب بر آدام خواجهك یاتاغلك یانه قویدینی قاباغی اوصوله آتش، کندی بلینه باغلامش . ایرتسی کونی بلی قاباق باغلی آدمی خواجه اوکنده کورنجه شاشالایه رق یولداشلردن برینه : «بن شو آدم اما عجبا کندیم کیم ؟ «دیمشدر [۱] .

﴿لطیفه﴾ خواجه برکون : «قار ایله املک یمه سنی بن ایجاد ایله دیم اما ، بن ده بکنمه دیم . «دیمش .

﴿لطیفه﴾ خواجه دن کوز آغریسنه علاج صورمشلر : «کچنده بنم دشم آغریدی . چیقارتمقدن باشقه هیچ بر علاج کار ایتدی . «دیمش [۲] .

﴿لطیفه﴾ خواجه به : «صبح اولنجه خلقك کیمی او یانه ، کیمی بو یانه کیدر ، او نه دن ؟ «دیه صورمشلر . خواجه : «ا کر هپسی بر طرفه کیتسه لر دنیانك موازنه سی بوزولور ، دوریلیر ایدی . «دیمش [۳] .

[۱] بو حکایه ده بوکا یقین بر صورتده مشهور (هبنقه) به اسناد اولو عشدیر . بر چوق کیمکلی بر ایبه دیزمشده بوغازینه آمش . بونکله کندیسینی بیلیرمش . حماده چیقارمش باشقه بریسی طاقوب قارشیسنه کچمش . هبنقه حیرت ایدرهك : (بو بن اما بن کیم) دییه بون بون باقارمش . واقعا بو حکایه ده ا زیاده هبنقه به یاقیشیر . [۲-۳] بو پك اسکی آدم لره اسناد ایدلش اولق اوزره کتب قدیمه ده مسطوردر .

﴿ لطیفه ﴾ خواجه او یادی ریر کن دولکره دوشه مه تاخته لری طاوانه ،
طاوان تاخته لری دوشه مه یه میخلامه سنی سویله مش . دولکر سببی سؤل ایدنجه :
« یاقینده تاهل ایده جکم — انسان اوله نجه أولک آلتی اوستینه کلیر — دیرلر ،
یکی مصرفی بر ایده م . » دیمشدر .

﴿ لطیفه ﴾ خوجه تاهل ایتش . بشنجی کونی بر چوجوغی اولمش .
ایرتسی کونی هان الف جزوی ، جزؤ کیسه سی ، یازی طاقیمی کبی شیر
کتیروب قونداغک باشی اوجنه قویمش . « افندی ! شیمدین بو نه اوله جق ؟ »
دینلره : « طوقوز آلیق یولی بش کونده قطع ایدن ، هانده ایسه برقچ کونه قدر
مکتبه باشلار . حاضر یارم وارکن مکتب لوازمی دوزدم . » دیه جواب ویرمش .
﴿ لطیفه ﴾ خواجه نک آغاجه اصیلی اولان کوملکسی روزکار یره
دوشورمش . خواجه : « بزه بر قربان کسمک لازم کلدی . » دیه کندی
کندینه سویلنمش . حرمی سببی سؤل ایله دیکده : « یا معاذالله ! اینچده بن
بولونه یدیم ؟ » دیمش .

﴿ لطیفه ﴾ خواجه مرحوم باغ دیکنلری کوروب نه یاپدقلرینی صورار :
« چوبوق دیکورز . یارین اعلا ، لطیف صالحیم اوزوملر ویره جک . »
دیرلر . خواجه بر آز دوشونوب شوخانه طبیعتی الجاسیله باغچیلره : « قوزوم ،
بنی ده دیککنز . باقم ، بن نه چشید یمش ویرم ؟ » دیمکه تورکه آلائی
لازم ، باغچیلر هان : « پکی ! » دیوب خواجه بی بلینه قدر طوپراغه کومرلر .
کندیلری بر آغاجک آلتینه چکیلوب یمک یمکه مشغول اولورلر . ایلك بهار
اولمغله خواجه ایچه اوشور . قارنی ده آجقیر . حریفلرک اشتالی اشتالی بولغور
پیلایینه قاشیق چالدقلرینی کوروب ایمره نیر . چابالانه ، چابالانه بیک زحمتله
یردن چیقوب باغچیلرک یانینه کلیر . باغچیلر : « خواجه افندی ! نه یرکده
طورمه دیک ؟ » دیدکلرنده : « واللهی برادرلر ! طوغریسنی ایسترسه کز ،
یریمی سومه دم ، طومادیم چیقدم . » دیمش .

علما و عرفادن برذاته عائد بر مجموعه دن اشبو کتابه علاوه ایلدیکم حکایه لر
بوراده ختام بولیور . اون سکیز دانه سی موافق کورولمه یوب درج ایدلمه مشدر .

بعضلرندن ایشیتدیکمز ، بعض کتابلرده کوردیکمز حکایاتدرکه
بورایه نقل اولوندی :

عرفادن برذاتدن مسموعدرکه :

نصرالدین خواجه تیمور حضورنده ایکن بر سپاهی بی سرخوشر. دیبه
کتیرمشلر. « اوج یوز دکنک اورک ! » دیمش . خواجه تبسم ایتش . تیمور
غضب ایدوب : « بش یوز دکنک اورک ! » دیمش . خواجه قهقهه ایله کولمکه
باشلامش . تیمور هنوز اوجاقدن چیقمش کبی یکپاره آتش کیلوب : « شیمدی
سکز یوز اورولسون ! » دینجه خواجه سیکیرلری گوشه یوب قاصیققرینی
طوته رق صالانه صالانه ماقاره لری قوی ویرمشر . تیمور ایسه اوفکه سندن
ظیب ظیب صیچرایه رق : « بره شریعت خاخی . دکرمن قدر صاریغکه هم بنم
اجرا ایله دیکم حدشرعی بی استخفاف ایلرسین . همده بنم کبی جهانی زانغیر زانغیر
تیره تمش بر جهانگیر جبارک حضورنده بولونیورسین . صوکرده نه دهشتلی
فتورسز بر یورکه مالکسین که حالا کولویورسین ! » دینجه خواجه دیرکه :
« طوغروسین ، ایشک اهمیتنی بیلیم . سنکده نه یامان بر خونخوار اولدیغکی
تمامیله تصدیق ایدرم ؛ فقط نه فائده ، شوکا شاشیورم که یا سن رقم بیلیمه یورسین .
یا بزم کبی اتدن ، میکدن مخلوق اولمایوب آدک کبی جسمکده ده میر اوغلی
دمیردر . هله حمایت ایتک ایسته دیکک شریعت غرادن هیچ خبرک یوق .
سکسان دکنک نروده .. سکز یوز دکنک نروده ؟ امر ایتک پک قولای ؟
فقط بو نینرمی ؟ نه اولور ، زحمت آله کده ویره جکک امر ؛ قابل اجرا میدره
دکیدر ؟ بر پارچه جق دوشونسهک ! »



(مناقب شیخ کاشنی قدس سره) ده بالمناصبه یازلمشدرکه :

خواجه کندی کندی شهر خارچنده طولاشیرکن شدتلی بر قتالق کلش .
(اولدم) دیبه کندنن کچمش . بر خیلی زمان بکله مش ، بکله مش ، هیچ بر

کلوب کیدن، جنازه سنی قالدیرمغه تشبث ایدن اولمامش . فوق العاده آجیقمش .
 خانه سنه کیدرک ناصل اولدیکنی ، زرده وفات ایتدیکنی قاریسنه آکلاتمش .
 ینه محل وفاته چکیلوب کیتمش . زوجہ سی ده بو قاره خبر اوزرینه صاجلرینی
 یوله رق ، قان آغلایه رق قومشولره قوشار . خواجه یه قیرده پک شدتلی بر
 فائق کلوب بردن بره وفات ایلدیکنی ، جنازه سی میدانده قالدیغنی سویلر .
 قومشولر جاندن سودکلی خواجه نك آنسزین وفاتی ایشیتنجه پک متأثر اولوب :
 « آمان خانم ! نه زمان وفات ایتمش ؟ زرده اولمش ؟ کیم خبر ویردی ؟ »
 دیدکلرنده قادین ستم وشکایت طوریلہ قومشولره دیرکه : « غریب خواجه نك
 کیمی وار ؟ کندیجکزی اولمش ، ینه کندیجکزی کلدی ، خبر ویردی .
 صوکره مرحوم اولدیغی یره ینه چکیلوب کیتدی [۱] .



لطائف لامعی دن منقولدر :

(شاید حمزه) [۲] نامنده عارف کامل وسالک واصل کچینیر بر درویش
 ملامت کیش بر کون خواجه مرحومه : « بهی خواجه ! بو عالمده کارک همان
 مسخره لقمیدر ؟ بر هنرک وارسه کوستر و بر کالک وار ایسه مستفید ایله . »
 دیر . خواجه صورارکه : « سنک کالاتک نه کی شیلردر ؟ انسانلره نافع نه یولده
 بر فضیله مالکسین ؟ » شاید دیرکه : « بنم هنرم چوقدر . کالاتمه نهایت یوقدر .
 هر کیجه بو عالم عناصردن کچرم . برنجی کوکک سر حدینه قدر اوچارم .
 منازل آسمانده خرامان اولورم . عجایب ملکوته نکران اولورم . » خواجه
 دیرکه : « حمزه ، حمزه ! هیچ او ائاده یوزوکه غایت یومشاق یلپازه کی
 بر شی طوقونورمی ؟ » شاید سفسطه لریمی یوتدوره جغم سویخیله : « بلی خواجه
 اقدی . » دینجه خواجه دیرکه : « ایشته اوزم اوزون قولاغک قویروغیدر [۳] . »

[۱] بورایه بر خیلی حکایاتی نقل ایتدیکمز یازمه مجموعه ده دخی بو حکایه طرز
 دیگرده مسطوردر .

[۲] شاید = مرئی . مشواری ، اطواری ، گفتاری اصحاب سیر وسلوکه
 بکزه توب ساده دلاری اغفال ایدن نابکاردر .

[۳] بو صوک تعبیر اصلنده مرکب دیگر عضوینه دائر فاحش بر افاده ایله
 یازلش ایدی . اصلی موجود اولدیغی ایچون بز بویله جزوی تحریفله نقل ایله دک .

ینه مذکور کتابدن : خواجه بر مزارلقدہ صویونوب کوملکندن
 حشراتی تمیزله یورمش . او ائنادہ شدتلی بر روز کار چیقوب کوملکی آلیر
 کوتورور . خواجه کوملک آردینه دوشر . کاه قوشار، کاه دوشر . او ائنادہ
 بر قاچ آتلی چیقہ کلوب بر شخص عجیب عریانک تنها مزارلقدہ طاشدن طاشه
 سکدیکنی کورونجه کندیلری قورقار ، آتلی اور کر . بومعذبلک انتقامی
 چیقارمق ایچون خواجهنک اوزرینه هجوم ایدرلر : « بره حریف ! خورتلاق [۱]
 کبی بوراده نه یاپورسین ؟ » دیرلر . خواجه جواباً : « آی اوغول ! بن اهل
 قبوردم . ذاتاً دنیایی ابدیاً سزه ترک ایتشم . شورایه بر آبدست ایچون چیقمشم .
 شیمدی همان ینه مزاریمه کیره جکم . بنم دنیا خلقیله ایلشکم یوقدر . »
 دیهرک اللرندن یاقه بی قورتارمشر .



بعض یاران کرامدن منقولدرکه : خواجه مرحومک معصوم چوجوقلرله
 باشی غایت خوش ایمش . آقشهر چوجوقلری اکثریا خواجهنک اطرافنی
 آلیرلر . طاتلی طاتلی محبت ایدرک کولو شوب اویناشیرلر، خوش وقت کچیرلرلر .
 کندیلرینه کوره بر مشکلری اولسه ینه خواجه مرحومه قوشارلرلر . ینه
 بوقیلدن اوله رق بر کون جویر آملشر تقسیمده هر نه سبیدنسه او یوشه مامشر .
 خواجه مرحومه کلوب : « شو جویرلری بزه تقسیم ایدی ویر . » دیمه لریله
 خواجه : « الله تقسیم می ایسترسکز ، قول تقسیم می ؟ » دیه صورمش .
 چوجوقلر میل فطری ایل بر آغزدن : « الله تقسیم ! » دیمشر . خواجه
 دخی دیله دیکنه ایکی آووجنی طولدوره رق ویرمش ، کیمسنه برقاچ دانه ، بعضیسنه
 بردانه ویروب بر قاچ چوجوغه هیچ ویرمه مش . چوجوقلرک بالطبع بو عجیب
 تقسیمه عقللری ایرمه یهرک : « خواجه افندی ! بو ناصل شیدر ؟ » دیمه لریله
 خواجه مرحوم بویورمش که : « یاورولرم الله تقسیم بویه در . یابانه کیمه یه لم ،

[۱] خورتلاق = کویا جنازه سنک اوستندن کدی آتلامق کبی بعض اسبابدن
 طولانی اولو قبرنده دیریلیر ، جادی وخورتلاق اولورمش . احياناً مزاردن چیقار ،
 تورلو قورقونج ایشلر یاپارمش .

شوراده کندیمزدن پای بیچم. باقیکنز شو (بدیع الدین) افندینک پدری غایت زنکیندر. شهرمزنک ایلری کیدن اشرافندن. صوکره عائله جهندن ده بختیاردر. شو یاننده کی مینی مینی سنان الدینک باباسی ایسه غایت فقیردر. عائله جه ده راحتسر. بونکله برابر کندیبی ده سقط. پک آز چالیشه بیلیر. زوجه سی، کندیبی خسته، چکسی صاغلام شو قارشیده کی (حسام الدین) ک عائله سی ده باشقه تورلو، دیکرلری ده هیچ بری برینه اویمز. خواجه کزک حالی ایسه عمومندن آیری. ایشته الله تقسیمی بودر اولادلرم. [۱]



مرویدرکه: بر صبح خواجه قاپدسندن چیقارکن بیتیشیک قومشوسی تصادف ایدرک: «آمان خواجه افندی! مراق ایتدم. بو صبح سزده تلاشلی تلاشلی، حیزلی حیزلی لاقیردیله ایشیتدم. صوکرده بر کورولتی اولدی. او نه ایدی؟ دیمکله خواجه مرحوم اُکشی بر صورتله: «بزمکی ایله بر آزا تیشدق. صوکرده قادین حدتله نوب جبهه بر تکمه آنجه جبهه نردباندن آشاغی بالدیر کولدور دوشدی ده کورولتو او ایدی.» دیوب قومشوسی: «جانم خواجه افندی! هیچ جبهه کورولتی یاپارمی؟» دیبه اصرار ایدنجه خواجه: «صوص آجانم! نه زورلارسین؟ ایشته ایچنده بن ده وار ایدم.» [۲].

﴿لطیفه﴾ خواجه کیچه زوجه سیله حسب حال ایله رکن: «صبح هوا یاغمورلی اولورسه اودونه، اولمازسه چیفته کیده جکم.» دیمش. زوجه سی: «افندی (ان شاء الله) دی.» دیمش. سائقه بشریتله: «نه حاجت! ایکیدن خالی دکل، برندن برینی یاپه جکم.» دیمش. صباحلاین شهردن طیشاری چیقنجه بر سورو سپاهی [۳] یه راست کلوب: «بری کل دایی! فلان قصبه نک یولی

[۱] بو حکایه توفیق بکک نشر ایله دیککی ایکی جزؤ (خواجه نصرالدین) ده دخی مختصراً مسطوردر.

[۲] (تورکجه قبایسان) رساله سنده و (لطائف نصرالدین) جزؤ لرنده ده مسطوردر.

[۳] دولندن (اوله فیه = علوفه) یعنی معاش آلیر بر قسم عسکری ایدی.

تره ده در؟ دیمش لر. خواجه قید سزج، (یلمم) دیمش. تریه سز، خشین عوام لر خواجه یه
سس چیقارمغه مهلت ویرمه یوب برقاچ سیلله توقاد ایندیره رک: « سنی کیدی
شویله بویله، یورو، دوش اوکزه بزى کوتور. » دیه رک یایان قوشه قوشه
اوکلرینه قاتمشر. یاغمورده یاشده اونلری قصبه یه ایندیرمش. کندیسى
کیجه یاریسی خسته و مجروح اوله رق اولو یجیل برحالده خانه سنه عودت ایلمش.
قابونی چالمغه باشلامش. قاریسی: « کیمدر او؟.. » دینجه: « آج قاریجقم. بنم
ان شاء الله. » دیمش لر.



خواجه نك سپاهیلر اوکنده قوشدیغیدر

﴿لطیفه﴾ خواجه تیمورلنك ایله حمامه کیرمش. تیمور: « بن قول اولسه
ایدم قاچ آخچه ایدردم. » دیه خواجه یه صورمش خواجه: « اللى آخچه. »
دیمش. تیمور شدتله: « به اذعان سز! یالکز بلده کی فوطه اللى آخچه دکر. »

دینچه خواجه فتورسز بر طورایله : بنده ذاتاً فوطیه بها یچمش ایدم .
دیمشدر . رحمة الله علیه [۱].



خواجه نك امير تیمور ایله حمامده چیلیاق محاوره سیدر

پراکنده صورته نقل اولونان برقاج حکایه ده بوراده ختام بولمشدر .



[۱] بو حکایه مشهور (اسکندرنامه) صاحبی احمدی ایله (امیر تیمور) آره سنده
چیمش اولوق اوزره تذکره لرده مسطوردر . هرا یکی سی ده تیمور معاصری ، هرا یکی سی ده
تیمور ندماسنده ندر . بز کوردیکمزی یازدیق . والعلم عندالله تعالی .

(تورکجه - قابا لسان) نامنده یکریمی، اوتوز سنه اول نشر اولونمش بر
 آردن که (آنالر سوزی، بیلمهجه، مانی، شرقی، دستان، فقره، ماسال)
 اقسامی حاویدر [۱]:

﴿لطیفه﴾ خواجه بازاره کیدرکن محله چوجوقلری دودوک
 ایصمارلامشیر. خواجه متصل هپسینه: «یکی یکی!..» دیرمش. ایچلرندن بری:



خواجه بازاره کیدرکن چوجوقلرک دودوک ایصمارلامه سیدر

«شوپاره بی آلده، بکاردودوک آل.» دیمش. چوجوقلر آقشام اوستی خواجه نک
 یولنی بکله مشیر. شهره و صولنده اطرافنی المشیر. هپسی ده: «هانی خواجه

[۱] بو کتابده کی لطائفک چله سی توفیق بکک نشر ایلدیکی ایکی جزؤ (لطائف
 نصرالدین) ده عیناً، حرفیاً مسطور اولدیغنه و مذکور لطائفک دها اسکی طبع اولندیغی
 کاغذندن، حروفندن، رسمندن نمایان بولوندیغنه نظراً، یا بو (تورکجه - قابالسان
 کتابی عیناً اورادن نقل ایتمش و یا خود بو کتابده توفیق بککدر.

افندی! بزم دودوکلریمز؟» دیدکلرینده خواجه پاره ویره نه دودوکی اوزاتوب:
«پارینی ورن چالار دودوکی .» دیمشدر [۱].

﴿لطیفه﴾ دوستدن بری مرحومدن بر آز مدت وعده ایله برقاج
آچمه ایسته مش . «واللهی برادر . وقتم یوق پاره ویره هم ؛ فقط دوستم سگ ،
وعده - نه قدر ایسترسه ک - ویره یم .» دیمش [۲].

﴿لطیفه﴾ خواجه کیجه یاریسی سواقعه چیقمش کزینورمش .
ملککتک (صو باشی) [۳] سی قولده [۴] خواجه یه راست کلوب: «افندی! کیجه

[۲، ۱] توفیق بکک نشر ایله دیککی ایکی جزؤ (لطائف نصرالدین) ده ده مسطوردر.
[۳] صو باشی = فی الاصل (سر عسکر) معناسنه اولوب ذاتاً تورکده عمومی خلق
عسکر اولغله اوزمانده (رئیس — و — بک) لرینک عنوانی ایدی. یعنی اک بویوک
عنوان ایدی . اک صوکره عثمانلیقده بو عنوانک قیمتی کوچوله کوچوله نهایت بیک
تاریخی اواخیرینه قدر (پولیس مدیری) وظیفه سنده اولانلره اطلاق اولونوب تشکیلات
خیریه ده بوس بوتون الغا اولونمشدر .

تحقیقات لغویه یه کئنجه : (صو) فی الاصل معلوم مایع اولغله برابر مبادیده
کوچه به تورکار برر صو کئشارنده ساکن اوله کلدیکلرندن (صو) قوم وعسکر
معناسنده قوللانیلمشدر . عربده ده بویله در . (ماء فلان ؛ ماء بنی فلان) دیرلر اوقوی
مراد ایدرلر . (صو) لفظنک (عسکر) معناسنه استعمالی قدیم تورکجه اثرلرده
شایعدر . (باش) رئیس معناسنه حالا مستعملدر . بو صورتده (صو باشی) عیناً
(سر عسکر) معناسنه اولور . (صو باشی) سرعسکرک غیری به عنوان اولدینی زمان
سرعسکره (چری باشی) دیمشدر . بالاآخره بو عنوانکده قیمتی زائل اولمشدر .

بو تعبیر فارسی به ده ترجمه اولونوب (میرآب) دیمشدر . فارسیده دخی بو قبیل
رؤسا عنوانیدر . کذلک تورکار عربده ده زمام اموری اله آلدیقارنده بو عنوان
عربجه به دخی نقل اولونمش . (امیرالماء) دنیلمشدر . بو کله نک (آمیرال) شکندده
اجنبیلره کچدیکی ایسه شایعدر .

[۴] (قول) فی الاصل (عضو، بازو) دینیلن انسانک عضوی معناسنه ایسه ده
بو کونکی (برقول چنکی) تعبیری کی بش اون کیشیلک بر قول عسکره بونلردن ده
خاصه کیجه شهری طولاشان بر ضابطله برقاج عسکره اطلاق اولونور .

پاریسی سواقده ته ارایورسین؟ « دیمکله خواجه مرحوم: « اویقوم قاجدی ده
اونی آرایورم . « دیمش [۱] .



خواجه نك کیجه صو باشی ایله محاوره سیدر

﴿ لطیفه ﴾ خواجه برکویه مسافراولوب هکبه سنی غائب ایدر. خواجه
« کویلیر ! یا هکبه می بولورسکز ، یاخود بن یاپه جغمی بیلیرم . « دییه اعلان
ایدر. خواجه مرحوم معروف ذات و خاطری صایلیر آدم اولمقله کویلیر تلاش
ایدوب هکبه نی آرار بولور ؛ الینه تسلیم ایدوب عذر دیلر لر . خواجه کویدن
کیدر کن تشیع ایدنلردن بریسی مراق ایدوب: « قوزوم خواجه ایتدی ! .
هکبه نی بولماسه یدق نه یاپه جقدك ؟ « دیمکله خواجه غایت قیدسزجه دیر که :
« نه یاپهیم آی اوغول ! . اوده بر اُسکی کیلیم وار . اونی بوزوب هکبه
یاپه جقدم [۲] . »

﴿ لطیفه ﴾ خواجه مرکبی بازاره کتیروب دلاله ویرر . کلن مشتری
 یاشنی آ کلامق ایچون دیشنه باقاجق اولور . اشك النی ایصیرر . حریف سو کوب
 صایه رق چکیلیر کیدر . دیکر بر مشتری ظهور ایدهرک قویروغینی قالدیره جق
 اولور . قابا بالدییرینه دمیردن بر تکمه یر . طوپالایارق ، لغت ایدهرک کیدر .
 دلال کلیر : « افندی ! بو مرکبی کیمسه آلمز . اوکنه کلنی قاپیور ، آردینه
 کلنی تپیور . » دیمه سیله خواجه : « ذاتاً بنده اونی صاتمق ایچون کتیرمه دم .
 مسلمانلر کورسونلرده بنم نه لرچکدیکمی آ کلاسونلر دییه کتیردم . » دیمشدر [۸] .
 (تورکجه — قابا لسان) دن منقولاً تمز بو قاداردر .



(چایلاق) غزته سی صاحبی بذله نویس شهر توفیق بکک نشر

ایله دیکی ایکی فورمه (لطائف نصرالدین) دن :

﴿ لطیفه ﴾ خواجهیه : « قدرت بالغه صمدانیه حقنده نه دیرسین ؟ »

دیشلر . « بن کنیدی بیلدیم بیلهلی هپ جناب حقه دیدیکی اولیور ؟ بوتون موجودات قدرت ربانیک تصرقنده اولماسه ایدی ، برکرده بزم دیدیکم اولوردی . » جوابی ویرمشد [۱] .

﴿ لطیفه ﴾ « قیامت نه زمان قویه حق ؟ » دییه خواجه دن سؤال

ایتمش . « هانکی قیامت ؟ » دیش . « قیامت قاج دانه در ؟ » . دیشلر . « قاریم اولورسه کوچوک قیامت ، بن اولورسه بویوک قیامت . » دیش .

﴿ لطیفه ﴾ خواجه مرکبی غائب ایتش . هم آرار ، هم شکر ایدرمش .

تشکرینک سببی صورمشلر : « اوستنده بولونمه دیغمه شکر ایدیورم . اکر بولونمیدم بنده برابر غائب اوله جقم . » دیش .

[۱] بونی بر بکتاشیه شو یولده اسناد ایدرلر . کئی فیرطنه یه طوتولش . هر ملت کندی لسانیه جناب حقه مناجات ایدوب یالواریرمش . بر کوشه یه بر بکتاشی چکیلش چوبوغنی طومانلاندیرر . هیچ وظیفه ایتیه رک خلقی حیرتله سیر ایدرمش . بر قاج هرزه وکیل . بیچاره نک اوزرینه هجوم ایدرک : (بره دینسز ، ایمانسز بکتاشی . سنک الله ایمانک یوقسه ، ذره قدر وجدانک ده می یوقدر ؟ شوراده یتش ایکی ملت امان الله دییه هایقیریشیور . سن بویه نه مناجات ، نه عباداللهک حاله ، مرحت ، فتورسز چوبوق ایچیورسین . سنده برکره بزم کبی الله یالوارسه ک آ) ! دیگله بکتاشی دیرکه : (بهی عقل ومنطقه بیکانه نه دیدیکی بیلمز عوام هوام ! اکر بن دینسز ایمانسز ايسم بن مناجاتدن نه قازانه جقسکیزده بزم حضوریه مانع اولیورسیکنز . بجه ثابت اولدی که شیمیدی قدر هپ اونک دیدیکی اولدی . هیچ برکرده بزم سوزوم اولدی . آرتیق بن اونک ایشنه قاریشامه عزم ایتدم . برکره ایشنه قاریشدم . قرق بیل سیئنه سنی چکدم . نه مه لازم ملک ده اونک ، قولده اونک ایستدیکنی یاسون .)

﴿ لطيفه ﴾ خواجه بركون جگر آلمش . كيدر كن احباسندن برى
تصادف ايدوب : « بونى ناصل پيشيره جكسين ؟ » ديه سؤال ايدر . خواجه :
« عادتاً » دينجه : « خير ! بونك كوزل پيشمه سى وار . سزه تعريف ايده يم ده
اويله ياپيكر . » ديمش . خواجه : « بو تعريف ايتديكك شيلر خاطر يمده
قالمز . بركاغده يازده اوكا باقهرق پيشيرتيم . » ديمكه او آدمده تعرفه يي يازار ،



آغزنده جكرله هوايه اوچقده اولان چاپلاغه خطاباً خواجه نك تقاضاسيدر

ويرر . خواجه باللانديره باللانديره تعريف ايمه نك ويرديكي خولي اي اشتها ايله
طالغين طالغين اوه كيدر كن بر چاپلاق آلندن جكري قاپار ، قاجار . ييلديريم
سرعتيله هوايه اوچار . خواجه هيچ اثر تلاش كوسترميه رك آلنده كي تعرفه يي
چاپلاغه كوستروب : « نافله آغيز طاديله ييه مزسين ، پوصله بنده ! » ديمشدر .

﴿ لطیفه ﴾ بر مجلسده لطیفه‌یه زمین تشکیل ایتسون دیه خواجه
مرحومك الینه بر ساز طوتوشدورورلر . « خواجه افندی ! شونی چالده
دیکلیه لم . » دیرلر . خواجه صاپندن یافالایوب بوینه آشاغی یوقاری مضرابی
سورتر . آجی آجی برغله در کیدر . « جانم خواجه افندی ! . ساز بویله می



خواجه مرحومك ساز چالده سیدر

چالینیر . کوزل بر نغمه‌یی وجوده کتیرمك ایچون پارمغنی — ایجابنه کوره —
تلرک اوزرنده اوینا تمق ، پرده لرده کزینمك لازم کلیر . « دیملریله خواجه :
« اونلر پرده‌یی بولامزلرده آرامق ایچون کزینیرلر . بن بولدم ، نیچون بیهوده
کزینیم ؟ » دیمشدر .

﴿لطیفه﴾ ینه مرحوم مرکبى ضایع ایدوب هم آزار، هم تورکی چاغیرر ایش. «مرکبى ضایع ایدن تورکی چاغیرمز، فریاد ایدر.» دیمش. «بر شو طاغک آردینده امیدم قالدی. اورادهده بولامازسه م سیر ایت سن بنده کی فریادی.» دیمش.

﴿لطیفه﴾ مرحوم بردفعهدها مرکبى ضایع ایدوب چارشیده بازارده: «کیم بولورسه یولاریله، سمریله مژده اوله رق ویره جکم.» دییه ندا ایدرمش. «خواجه افندی! طاقیميله باغشلا دقن صوکره ها تکرار آلیکه کچمش، ها بوسبتون غائب ایتمشین. بوندن سن نه قازانمش اوله جقسین؟» دیمش. «عفو ایدرسکز (بولق) ذوقی او قدر اهمیتسز می طوتیورسکز؟» دیمش.

﴿لطیفه﴾ خواجه «جر» [۱] ایچون بر مملکته کیدوب بر کبار خانه سنه مسافر اولمش. صباحلین خانه صاحبی خواجه یی یانه چاغیروب برشی اوقومش، کندیسیده عینله اوقومش. بر یازی یازدیرمش. کندیسیده عینی یازمش. و دیمش که: «ایشته سن اوقودیک، بنده طبقسی کی اوقودم. سن یازدیک، بنده عینی یازدم. دیمک که سندن فرقم قالمادی، بو صورتده سکا ده احتیاج یوقدر.» خواجه دیمش که: «آرا ده بویوک بر فرق وار. بن بورایه اوچ کونلک یولی یایان یورویه رک کلدیم، بونجه مشقته قاتلاندیم، نه وقت که سنده بنم احتیاجه دوچار اوله رق بزم مملکت مزه کلیرده بویله بر جواب رد ایله نو مید اوله رق خائب وخاسر دوزسه ک او وقت مساوی اولورز.»

﴿لطیفه﴾ بر کون قومشوسی: «خواجه افندی؛ سزده قرق ییلق سرکه وارمی؟ خسته مزه علاج ایچون لازم اولدی.» دییه صورمش. «وار!» دیمش. «جانم خواجه افندی! بر پارچه ویرسه ک نه.» دیدیکده: «ویرم!»

[۱] «جر» چکمک معناسنه عربیدر. طلبه علومک تعطیل آیلرنده کویلره کیدوب وعظ ایله دیکنه، نماز قیلدیردیفنه قارشیلق اوله رق زنکینلردن پاره، ذخیره طوبلامه سیدر که اونی طوقوز آی نفقه ایدره رک علم تحصیل ایلر.

دیش. « نه ایچون؟ » دینجه : « اکر شوکا بوکا طایغیتسه یدم قرق یسلدن سیرکه قالیرمیدی ؟ » دیش [۱] .

﴿ لطیفه ﴾ بر ظالم زوجه سینک غایت شنیع برغدرینه دوچار اولوب بوتون قادینلرد عداوت ایدهرک او زماندن بری علمادن ، عرفادن هر کیمی ایشیدیرسه چاغیرر قولاغنه برشی سویلر، طبعنه موافق، دردینه چاره اوله حق بر جواب آلامانجه بوینی اورور ایش . بوبلانک بر چاره - نه باقار دییه بیلمه یهرک بیچاره خواجه یی اوگه سورمشلر . خواجه یی تایینه اوتورتوب قولاغنه : « اولمیسین ، بیکارمیسین؟ » دییوب خواجه : « بو یاشده آدم بیکار اولورمی؟ » دینجه : « تمام سن ده اونلردن سین . اورک بونک ده بوینی . » دینجه خواجه مسئله نك دهشتی آکلایوب درحال دیرکه : « عجله ایتمه ، برکره صور باقالیم ، بیراقدیم ده تکرارمی آلدیم ، اولدی ده بردهامی اولدیم ؟ یوقسه بری باشیمده ایکن بردن زیاده می تأهل ایتدیم ؟ هر ناصلسه بر خطادر ایتدیم . بو بر ورطه درکه دوشمه دن بیلنمز . مشهور مثلدیرکه : بر سورچن [۲] آتک باشی کیسلمز . » خواجه نك بو حاضر جوابلی اوظاملی حقسنر جلالقدن واز کچیرمشدر .

﴿ لطیفه ﴾ برکون حرمی خواجه یه : « افندی ! آبدست ابریقنک دبی دلیندی . ایچنده صوا کلنمه یور . نه یاپالم ؟ » دیش . خواجه : « آقاری ! نه وار بونک چاره سنی بولامایه حق ؟ اسکیدن آبدست بوزار ، صوکره طهارتله نیردک . بوندن صوکره طهارتله نیرز . صوکره آبدستمزی بوزارز . » دیش .

﴿ لطیفه ﴾ زوزکک بری خواجه مرحومه : « خواجه افندی ! دمن بر لنگرده هندی طولمه سی کیدیوردی . » دیش . خواجه : « بکا نه ؟ » دیش . « غالبا سزه کوتوردیلر ! » دیش . « سکا نه ؟ » دیش .

[۲] بو حکایه باشقه لرینه ده اسناد ایدلیکی کوزولشدر .

[۲] سورچک = حیوانک آیای قایماق .

﴿لطیفه﴾ خواجه مرحومه : « سزك خانم چوق كزیور . »
 دیشلر . « اصلی اولماسه كرك ! اوله اولسهیدی برده بزم اوه کلیردی . » دیش .

﴿لطیفه﴾ خواجه برکون حمامه کیدر . حمامچیلر خواجهیه براسکی
 پشمال برده کیرلی حاولو و یروب اوقدر رعایت ایتمز لر . خواجه برشی دیمه یوب
 چیقارکن آینه یه اون آچّه براقیر [۱] . حمامچیلر هم سونیرلر ، همده براز
 صیقیلرلر . بر هفته صوکره خواجه ینه بو حمامه کلیر . بودفه حمامچیلر فوق العاده
 رعایت ایدرلر . صیرمه لی حاولولر ، ایپکلی پشماللر ویررلر . خواجه ینه برشی
 دیمه یوب چیقارکن آینه یه بر آچّه براقیر . حمامچیلر بوسفر تعجیله برابر بخشیشك
 آزلغندن ناشی حدت ایدوب : « افندی ! بونه بیجیم معامله ؟ » دیدکلرنده
 خواجه : « بونده فوق العاده بر حال یوق . بوکون ویردیکم بر آچّه کچنکی حمام
 حقیدر . کچنکی ده بوکونك اجرتیدر . » دیش .

﴿لطیفه﴾ احباسندن بری مرحومه کلوب : « بکا بر مکتوب یاز .
 بغداده بر دوستمه کوندره جکم . » دیدیکده خواجه : « بیراق الله عشقنه !
 بنم شیمدی بغداده کیتمه و قتم یوق . » دییه آلمش یوروی ویرمش . حریف
 مراق ایدوب قوشمش ، خواجه بی یاقلامش و : « قوزوم خواجه افندی !
 بر مکتوب یازمقله نه دن بغداده کیتمکلک لازم کلسین ؟ » دیدکده خواجه
 دیمشکه : « بونی بیله مه یه جك نه وار ؟ بنم یازیم غایت فنا ، آنجق بن اوقویه بیلیرم .
 بو صورتده یازدیغم مکتوبی ینه بن اوقومه لی یم که مندر جاتی آ کلا شیلسین [۲] . »

﴿لطیفه﴾ خواجه مرکبی بازاره کوتوروب دلالة ویرمش . دلال
 کز دیررکن : « بومر بک اشکینی آچیق ، راهوان یورورکن اوستنده قهوه
 ایچیلیر ، باشی یوموشاق ، کنج ، دینج ، قیل عیسنر . » دییه ثنا ایتدجه

[۱] هر بر آچّه بر پاره و هر پاره بر غرو شلق قدر کوموش اولقله اوزمانده
 بوپاره بی مملکتک اک متمول اغنیایی ویره بیلیردی . چونکه زمانم زده ، یوز یوز الی
 غروش رواجنده بر پاره در .

[۲] بو حکایه دخی باشقه لری حقنده ده کورولشد .

هر کس باشلامش بر بری آردنجه پی سوروب آتیرمه. خواجه قارشیدن بوتوصیفاتی
ایشیدره که : « وای! مرکم بوقدر کوزل ایمشده، بن نه ایچون المایورم ؟ » دیه
کمال شوقله کندی ده پی سورمکه باشلامش. نهایت صوک پی اوزرنده قالمقه
پاره لری بالتام دلاله صایوب کوتورمشدر . کیجه حرمنه مسئله پی آکلامش .
حرمی ده دیمشکه : « افندی! بنم باشیمه بوکون تحف برایش کلدی . قاپونک
اوکندن قایماقچی کپیوردی ، چاغیردم . طارتارکن قایماق زیاده کلسون دیه
حریف کورمه دن یواشجه بیله زیکی ترازینک درهم قونولان کوزینه بر اقدم .
هان قایماق طباغنی طولو طولو آلوب صاووشدم . »

قاریسنگ معرفتی دیکله یین خواجه « رحمه الله علیه » دیمش که : « ها باقالم
باجی سلطان ! بن طیشاریدن سن ایچریدن ال برلکیله غیرت ایدمه ده شو اوک
اداره سنی یولنه قویه لم . »



﴿ لطیفه منظومه ﴾


مکر کیم خواجه نصرالدین برکون اوی طامنه چقمش برایش ایچون
آیاغی سورچوب آنک یره دوشمش احباسی کلوب باشینه اوشمش
دیمش لر کیم نه یاتورسین نه درحال جوابنده دیمش اول دخی فی الحال
نه صورارسین بنم حالم ، کورورسین اکر سن دخی دوشد کسه بیلیرسین [۱]

﴿ لطیفه ﴾ خواجه مرکه یم ویرمکدن بیقوب حرمنه : « آرتق
بوندن صوکره مرکه سن باق . » دیر ایسه ده قادین قبول ایتمز . آره لرنده
منازعه اوزایوب نهایت ایکیسی ده سکوت ایله : « کیم اول سویلرسه مرکه
اویم ویرسون . » دیه قرار ویرلر . خواجه برکوشیه چکیلوب ساعتلرجه
سوز سویله مه مکه اصرار ایدر . حرمک جانی صیقیلوب باشینی اورتدیکی کبی
قومشویه بیراقیر کیدر . آقشامه قدر قومشوده اوتورور . اذان یاقلاشیر ،

[۱] بو حکایه (طامدن دوشن خالین بیلیر) مثلنک منشای اولمشدر . دها
تفصیلاتیلیسی آشاغیده کله جکدر .

حرمی ماجرای قومشو قالدینہ نقل ایدرک : « بر عنادجی آدمدر . آچلقدن اولور ، لاقیردی سویله مز . شوکا برطاس چوربا کوندره لم . » دیر . چوجغک الینہ برطاس چوربا ویروب خواجہنک اوینہ کوندریرلر . مکر قالدین قومشویہ کیتدیکی وقت اوه خیرسز کیرہرک پاره ایدہجک نہ وارسہ ہبسنی طوپلار . خواجہنک اوطوردیغی اوطہیہ کیرہر . باقارکہ خواجہ گوشہدہ اوتوریور . بوقدر کورولتی یہ هیچ اہمیت ویرمیور . اولجہ فنا حالہدہ شاشالارسہدہ خواجہنک هیچ فتور ایتہدیکنی کوروب کندی کندینہ سس چیقارمادقدن باشقہ خیرسزک کم کوم ایتہسینہ بیلہ جواب ویرمہیہرک برہیکل جامدکی طوردیغی کورونجہ : - بو آدم مفلوج ومنزولدر - دیہ کوزونک اوکندہ ایشہ یارایہجق شیرلی طوپلار . خواجہنک حالا آدیرمادیغی بس بللی خیرسزک بیلہ سیکیرینہ طوقونمش اولمالی کہ (باشندن قاووغنی آلہیم . باقایم ینہ سس چیقارمایہجقمی ؟) دینہ قاووغنی دہ آلیر . اشیانی صاللا صیرت ایدر . براقیر کیدر . او اثنادہ چوجوق کلوب گوشہدہ طاش کی ساکت اولان خواجہ افندیہ : « سزہ چوربا کوندردیلر . » دیمشہدہ خواجہ مرحوم سرقت مسئلہسنی آکلاتوب حتی قاووغی بیلہ چالندیغی اشراب ایدرک قاریسنک چابوق کلہسنی کویا چوجوغہ لاقیردی سویلہمدن اشارت ایلہمک اوزرہ آغزلیہ ایصلیق چالیدیغی حالہ الینی اوچ کرہ دائرہ واری دوندوروب پارماغیلہ باشینی کوستیرر . چوجوق بواشارتدن : (چوربا طاسینی اوچ کرہ باشیمک اوستندہ دوندیر . صوکرہ باشیمہ کچیر .) آکلایوب ہان اویلہ یاپار . خواجہنک باشی ایجہ خاشلانیر . چوربانک صوبی ، دانہسی یوزینی ، کوزینی ، صاجینی ، صاقلانی عجیب برحالہ صوقارسہدہ خواجہ ینہ عنادینہ هیچ طینمز . چوجوق دوزر کیدر . ایدیلن سؤال اوزرینہ قابولری ، باجالری ، حتی دولابری ، صاندقلری آپ آچیق ، خانہنک ایچی قارمہ قاریشیق ، اشیا اورتایہ دوکولمش صاجیلشمش اولدیغی وجوربا کیفیتنی آکلاتیر . قالدین ایشک وخامتنی آکلایوب قوشہرق کلیر . فلاکتی کورونجہ گوشہدہ کولونج برحالہ پوت کی اوتوران نازنینک کال ہیجانلہ اوزرینہ قوشوب : « آمان

افندی ! ندر بوحال ؟ « دینچه خواجه : « هایدی کیت مرکه یم ویر .
عنادک صوکی ایشته بویله اولور . « دیمشدر [۱] .



خواجه مرحومك چوربا كاسه سی باشندن دوشدیکیدر

﴿ لطیفه ﴾ خواجه مرحوم باغنه متصل یکیدن یکی به آغاج توخوملری
اُکر ، کورپه فدائیلر دیکرمش . احباسندن بری کورروب : « افندی بونلر نه
وقت بویویه جك ؟ نه وقت یمش ویره جك ده سزده بیه جكسکزر ! « دیمکله

[۱] توفیق بك بوجز وُلرنده کی فضله حکایه لرك ا کثریسی شوکا بوکا اسناد ایدیلن
وپك قدیم زمانده باشقه لرینه عزو ایدیلن فقره لردر . ایشته بو حقیقه تحف اولان حکایه
ایله بالاده اشارت ایدیلن وبو حکایه عقبنده کان لطیفه لرده بوقیلدندر . خواجه نامه
روایت ایدیلن ومندرجانی پك ثقیل اولمایان حکایاتی بوراده جمع ایلدیکز جهتله بونلریده
یازیورز . مع ذلک اخطارندنده کری طورمایورز .

خواجه جوابنده : « بزدن اول کلنرك ديكدكلرينك ميوه سنی شيمدی بز ييورز . بونك ميوه سنی بز دن صوكره کلنر ييسون . » ديمشدر [۱] .

﴿ لطيفه ﴾ خواجه بر کون مسافر لکه کيتمش . او کون غایت صيحا ق اولغله قوجه بر کاسه بوزلی خوشاف کتيرمشلر . خانه صاحبي خوشاف تقسيم ايدیلن بويوك معدن قاشینی آلوب خواجه يه زرکردان ، کوچوك ، يايوان برقاشيق ويرمش . خانه صاحبي قوجه کچه ايله بوزلی خوشافی آتار ، برده (اوخ... اولدم) . ديرمش . خواجه ايسه قاشینی دالديرير ، فقط ايجی برشی آماديفندن يالکنز يالارمش . خانه صاحبي ينه (اوخ... اولدم) ديمه سنده بردوام . خواجه باقش که اوله جق شی دکل . خانه صاحبه ديمش که : « اقدم ! . رجا ايدرم . شو اليکزده کی قاشینی بکاده ويریکزده بر کره ده بن اولهيم [۲] . »

[۱] بو حکايه خواجه نصرالدينک ظهورندن نجه عصرلر مقدم يازيلش عربجه کتب ادبيه ده (نعمان بن منذر) ايله برکويلی آراسنده کچديکی مسطور اولدینی کبی نوشيروان عادل ايله برکويلی آراسنده کذران اولدینی دها شایعدر . ديمک که (قبل الاسلام) دن منتقل اولمش بر حکايه در . حتی شويله نقل ايدرلر که : نوشيروان پک بکنديکی برشيته زانک کسری وهانک سکونی ايله (زه = ياشا ، آفرين) ديرمش . هر کيمه (زه) درسسه اون بيک غروش احسان ويريليرمش . برکويلی تارلاسته اوراق فدان ديکرکن کورمش : (بابا ! سن بير فانيسين . بو فدانلرک ميوه سنی ييه جککه امينيسين؟) ديمش . (کچمشلر عيزک بير اقدیقليريندن بز استفاده ايتديک . بز م بير اقدیغمز دن ده کله جکلر مستفيد اولسونلر) . جوابی ويرنجه پادشاه بکنوب : (زه) ديمش . اون بيک غروش احسان ويريلش . اختيارجق بو برچوق پاره يی کورونجه پک سوينوب : (کورديکرمی پادشاهم؟ فدانلرم درحال محصول ويردی .) ديمش . پادشاه بو جوابی دها زياده بکنوب : (زه) ديمش . بر اون بيک غروش دها ويريلش ، کوييلنک صاف ذهنی سوينجه دها زياده پارلايوب هان : (هر آغاج سه ده بردفعه عيش ويريرکن يمن قدوم پادشاهی ايله بنم فدانلرم ايکی کره عيش ويردی) . ديمک پادشاه بو جوابی ده پک بکنوب : (زه) ديمش . خزينه دار اون بيکی صايديقدن صوکره : (پادشاهم ! هايدی بورادن کيدهلم . بويکويلی خزينه کزی افلاسه اوغراته جق) . ديمک صورتيله کوييلنک وسعت افکار حکيمانه سنی تقدیر ايله مشدر .

« اگر مصادره يه اوغرامه ديسه کويلی بابا شاهانه عمر سورمشدر . »

[۲] بوقره ولی افندی زاده ايله دال قاووغی مياننده جريان ايله من اولوق اوزره

﴿لطیفه﴾ خواجه اودون کسمکه کیتدیکی ائنده طاغده برطاوشان
 یاقلامش. او آنه قدر طاوشان کورمه دیکی جهته: «بو عجیب بر حیواندر!
 باقلم، مملکتلیه کوسترهیم، بلکه ایچلرنده بیلن واردز.» دیسه طوربه سنه
 قویوب آغزینی صیم صیقی باغلامش، خانه سنه کتیرمش. حرمنه حکایه ایدوب:
 «صاقین اوله که طوربه نك آغزینی آچه! کیدهیم مملکتلی بی چاغیرهیم ده کوسترهیم.»



خواجه طاوشانی کوستریرکن آریا قوطوسینک طوربه دن چیقدیغیدر

دیهه تنبیه ایله مشهده، انسان منع اولوندیغی شیئه حریص اولمغله قادین یالکز
 قالجه: «ینه بو حریفک برمناسبتمزلیکی وار. باقیم شونه در؟» دیوب طوربه نك
 آغزینی آچدیغی کی طاوشان فیرلامش. باجه دن قاجمش کیتمش. قادین شاشه لایوب
 باشقه بر چاره ده بیله میوب آینه کچن آریه قوطوسنی طوربایه قویه رق

ینه آغزینی باغلامش ، نتیجه یه منتظر اولمش . قادینک فیکرنجه خواجه یا ایکی هرزه وکیل کتیره جک ، یا سوزینه اویمایوب اونلرده کلیه جکله . مسئله خفیفجه قاپاناجق ، حال بوکه عکسی بویا ، خواجه سوقاغه چیقدینی وقت مملکتک اعیانی ، اشرافی ، مأمورینی بر دعوتدن عودت و خواجهنک خانه سی اوکندن عزیمت ایدیورلریمش . خواجه یه تصادفلرنده مسئله یی کندیلری خوش بش ائساننده میدانه چیقارتمشله . « ناصل شیدر؟ باقه لم بر کره . » دییه هپسی خواجهنک خانه سنه طولمشله . خواجه الک بویوک اوطه سنه بونلری حلقه واری اوطورتوب ، مخلوق عجیبی قاجیرماق اوزره هپسی اللرینی قالدیره رق آلسته [۱] بر حالده طورمه لرینی تنبیه ایلدکن صوکره همان یوکه مراجعت ایدره رک هزار اهتمامله طوربه یی اورته یه کتیرر . هر کس مهم بر مراقله کوزلرینی طوربه یه دیکرلر . خواجه همان طوربه نک آغزینی چویروبده بوشالتدینی کبی : « پات! .. » دیمش آرپه قوطوسی اورته یه دوشمش . خواجه فوق العاده شاشیروب نه دییه جکنی بیله میوب آغزندن شو سوزلر دوکولمشدر : « افندیلر! .. ایشه بو قوطونک اون کره طولمشی بر کیله ایدر . »

﴿ لطیفه ﴾ خواجه بر کون بازاره کیدوب آلدینی سبزواتی هکبه سنه تولدیرمش ، هکبه یی ده اوموزینه اورمش ، اشکنه بینمش کیدیورمش . یولده بریسی : « افندی! . نه یه هکبه یی مرکبک ترکیسنه قویوبده راحت راحت کیمه یورسین؟ » دینجه خواجه دیمش : « انصاف به یا هو! بیچاره حیوانجغز هم بزم آیاعیزی ردن قالدیروب بزی طاشیسین ، همده فضله اوله رق برده هکبه مزای یوکه ته لم ! بو ؛ عدالته صیغماز! انصاف ایمانک یاریسی! . »

[۱] آلسته = فارسی (آراسته) یعنی سوسلنوب حاضرلنش ؛ مهیا بر حالده مناسنه

اولان کله دن تورکجه لشدیرلشددر .

توفیق بک نشر ایله دیکی ایکی جزو (لطائف خواجہ نصرالدین) دن
انتخاباتز بوراده بیتدی . اورادن آمادقلریمز یا اصل کتسابده مسطور و یا خود
نشری تصویب ایلمه ین مناسبستمر فقره لردن عبارتدر .



خواجہ مرحومك هكبه فی اوموزینه آتوب مرکه بیندیکیدر




ينه (توفيق بك) مرحومك صوكره نشر ايلديكى (خزينة لطائف) دن خواجه يه متعلق فقره لر بروجہ آتی التقاط ايدلشدر [۱]:

﴿لطيفه﴾ خواجه مرحومه: «كونشمى دها فائده ليدر، آيمى؟»
دييه صورمشلر. «آى!...» ديمش. «نچين؟..» ديه سببى صور دقلرنده:
«— چونكه — ديمش — كونس ذاتا كوندوزك ايدىلغنده طوغار. اونكچون
ها اولمش؛ ها اولامش: اما آى؛ كيجه نك قرانلغنده طوغار. اورته لى
كوندوزه چويرير!.. باقىكز!.. كيجه يولجىلى؛ دورت كوزله مهتابى بكارلر.»

﴿لطيفه﴾ نصرالدين مرحوم بر خصوصك تسويه سيجون بر صباح
ايركن جوار كويلردن برينه كيتمك اوزره خاه سندن چيقار. مكر او كيجه
محلجه بر اكلنجه وضيافت ترتيب ايدلش اولغله مجلسك طوزى بوبرى اولان
خواجه يى عزيمتدن واز كچيرمك ايجون كنجلر بر اويون ترتيب ايدرلر.
شويله كه: خواجه كينوب قوشاوب مر كه لوازمى يوكلتهرك يوله روان اولديغى
اشنده بر قاچ كشى خواجه نك يوله چيقوب زويه كيده جكنى صورارلر.
خواجه: «بر ايش ايجون بر قاچ كونلكنه فلان كويه كيده جكم.» جوابى
ويرر. بونلر: «آزواللى! بوندن صوكره سن بر يره كيده مزسين. چونكه
وفات ايتمشين، شيمدى سنى كوزلجه تجهيز وتكفين ايتك بز محللنك
بورجيدر. چونكه كيميزك بالذات خواجه سى، كيميزك اقرباسى، كيميزك
بابا يادكارى دوستى، كيميزك احبابيسين.» كى غيره بوغهرق ذاتا اولوم

[۱] (كنجينة لطائف) صاحبي كندى كتابندن (خزينة لطائفه) بك چوق
فقره آلينديغى سويله مشدر. هر شى اويله ايسه ده خصوصاً لطائف و فقرات ايجون
وثوق آرامق بك بيهوده در. همان كندى عصر عزمده بعض ذواته اسناد اولئان فقره لر
تحقيق ايديلنجه تا قبل التاريخه قدر اوزار كيدر. هر قوم بر برندن آلمش؛ هر ملكت
حلق، هر دورك آدملىرى كندى مشاهيرينه اسناد ايله مش. صوكره بو بولده كتاب
تأليف ايدنلرده يكديكرندن نقل ويا ترجمه ايدرك آرتيق اورته مالى اولمش قالمشدر.

لاقیردیسندن اودی قویوب سیکیرلری کوشه‌ین زواللی خواجه‌ی چال یاقه‌ایدرك
 محیه مسجدینه سوروکلرلر . هر نه قدر خواجه مرحومك خفقانلری قالقوب :
 « آمانك چوجوقلر ؛ براقك شو فنا شاقایی ! بر آزدها اوزریمه واریرسه کز
 لطیفه کز حقیقت اوله جق . بنم کر چکدن بك مهم ایشم وار ؛ براقك ده وقتيله
 یولجیلره یتشه‌یم، صوکره یالکز کیدلمز بیلیرسه کز . » کبی رجالر ایله مشسه ده
 دیکله مزلر ، متصل کورولتی‌یه بوغارلر . زواللی خواجه آرتق لاقیردی سویله‌یه مز



خواجه مرحومك تابوتلده تنه شیردن باشنی قالدیروب
 جماعت ایچندن برکیمسه‌یه لاقیردی سویله‌یه سیدر

بر حاله کلیر . اونلرده خواجه‌ی یاقه پاچا تابوتلده طیقارلر . تام بو ائنده
 احبابلرندن برینك ده بر طرفه کیمك اوزره اولدیغنی کوروب : آیول،
 باقسه‌کآ ! خواجه‌مز وفات ایتدی ؛ طبیعی تهیز وتکفیننده بولونملیسین .
 دیه ابرام ایدرلر . حریف بك عجله ایشی اولدیغدن بخله یاقه‌سنی قورتارمق

ایچون هر نه سویله مشسه قبول ایتدیره مز . بونلر بو جنکده ایکن یاری بایغین
تہ شیر اوستنه کوسولش اولان خواجه باشنی قالدیروب حریفه دیر که : « نافلہ
چابالامہ . تکلیفہ اطاعت ایت . بنم ایشم سندن ده عجلہ ایدی . نہ چارہ کہ اجل
کلش ، جماعت طوبیلاغش کیتمکدن بشقہ چارہ یوق ! »

﴿ لطیفہ ﴾ برکولینک کچیسی او یوز اولمش . قاطران سورمه سنی
توصیه ایتشلر . کویلی کچی بی آلوب خواجه یہ کتیره رک : « افندی ! سنک نفسک !



کچیسنی نفس ایتدیرمکه کلن کویلی ایله خواجه نک محاوره سیدر

او یوز علتہ برہ بر ایشم . شو کچی یہ بر نفس ایت . « دیمکله مرحوم :
» نفس ایدرم ، لکن علتک بر آن اول حیواندن دفع اولسنی ایسترسه ک ، بنم
نفسه سنک طرفکندن ده بر مقدار قاطران علاوه ایدیلہ لیدر . « دیمش [۱] .

[۱] صتمہ ایچون اوقونمغه کلنلر ده (کاهیا زاده) مرحوم بر پارچه صولفاتو علاوه سنی

تکلیف ایدرمش .

﴿لطیفه﴾ خواجه مرحوم وفاتنه یاقین دوستلری دعوتله بر طاقم وصیتلر ایتدیکی صبرده ینه طبیعتی مقتضاسنی بیراقایه رق : « أولورسم بنی مزاره تپه سی اوزرینه کومکز. » دیش . سببی صور دقلرنده : « یارین قیامت قوبوبده دنیا آلت اوست اولونجه طوس طوغرو قالقهیم . » دیش .

﴿لطیفه﴾ خواجه مرحومک حرمی صانجیلانیر . « آمان افندی ! بکا بر حکیم کتیر . » دیر . مرحوم حکیمی کتیرمک اوزره اوك قابوسندن چیقارکن حرمی پنجره دن باشی چیقاروب : « افندی ! چوق شکر ، صانجی دفع اولدی . حکیم ایسته مز . » دیر . خواجه مرحوم همان حکیمک دکاننه قوشارق حکیمه : « بزم قاری صانجیلانمش ایدی ، بنده سنی کتیره جکدم ؛ فقط اوك قابوسندن چیقارکن قادین پنجره دن باشی چیقاروب ، چوق شکر حکیمه احتیاج قالدیغنی سویله دی . اونکچون زحمت ایدوبده کله یه سین ، دیبه قوشه قوشه خبر ویرمکه کلدیم . نافله زحمت چکوبده تا بزم اوه قادار کله یه قالقدیمه ! » دیش .

﴿لطیفه﴾ خواجه نصرالدین افندی بر کون ائنه بر قازمه آلوب باغچه سنده بر چوقور قازمقله اوغرا شیرمش . قومشولرندن بری کلوب خواجه یه مشغولیتنی صورونجه : « محله لی سویله نیور . سوراق اورتیه سنده تعمیردن ییغیلوب قالان مولوزی کومه جکم . » دیش . « یا بورادن چیقان طوبراغی نه یابه جقسین ؟ » دینجه خواجه حدتله نوب : « یوق !..... باق بن او قدر اینجه آله یوب صیق طوقومغه کله نم . » دیش .

﴿لطیفه﴾ خواجه یه قاچ یاشنده اولدیغنی صورمشلر : « قرق یاشندهیم . » دیش . آره سی اون سنه کچدکدن صوکره بالتصادف ینه صورمشلر . خواجه ینه : « قرق.... » دینجه : « افندی ! سن بوندن اون سنه اول [قرق یاشندهیم] دیمشدک . شیمدی ینه [قرق....] دیورسین . » دیمرلیله خواجه مرحوم : « آر اولان سوزندن دونمز . سوز بر ، الله بر ، یکریمی سنه صوکره صورسه کز ینه سویله یه جکم بودر . » دیش .

﴿ لطیفه ﴾ خواجه بر کون بدستانده کز رکن دلالک اوچ بیگ غروشه
 بر قیلیج کز دیر دیکنی کوروب شویله بر قیلیجی کوزدن چیرر . اوچ بیگ
 غروش ایده جگ برشی کوره مز . اوراده اوتورانلره صورار : « دشمنه حواله
 ایدیلدیکی ائنده بش آرشین اوزار . » دیرلر . خواجه مرحوم ایرته سی کونی
 اودن اوجاق ماشانی قایدینی کبی طوغرو بدستانه کلیر : « ماشام اوچ بیگ
 غروشه » دییه باشلار کز دیر مکه ، بعضیلری مراق ایدوب آلرینه آلیرلر ،
 اویرر چویرلر ، باقارلر که عادی بر ایکی غروشلق اوجاق ماشه سی : « خواجه
 افندی ! بونک نه کبی بر قیمتی و مزیتی وار که یکدن اوچ بیگ غروشه دییه
 فریاد ایدیورسین ؟ » دیدکلرنده چارشیلیرله دیر که : « سز ده ا دون بایاغی
 بر قیلیجه (اعدایه حواله ایدنجه بش آرشین اوزار .) دییه اوچ بیگ غروش
 ایسته یوردیکز . حالبوکه قاری بکا قیزوبده ماشانی فیرلاتدیغی کبی اون آرشین ،
 بلکه ده ا زیاده اوزار . »

﴿ لطیفه ﴾ تیمورلنک بر کون خواجهیه : « انسانلر بویله نه وقته قدر
 طوغار ، اولور ؟ » دییه صورمش . خواجه : « جنت ایله جهنم طولونجهیه
 قدر . » دییه جواب ویرمش .

﴿ لطیفه ﴾ نصرالدین خواجه مرحوم حرمنی آلوب دورت کونلک
 محله بولونان بر احبابه کیتمک اوزره شهردن چیقارلر . ده ا بر قاچ دقیقه
 آریلوبده هنوز شهر کورونمکده ایکن خواجه حرمنه نه قدر یول آلدقارینی
 سؤال ایدر . حرمی بوکون یارین کیدرسه ک ایکی کونلک یول آلمش اولورز .
 دینجه خواجه مرحوم : « دیسه ک آ ! یولی یاریلادق . » دیمش .

﴿ لطیفه ﴾ خواجه مرحوم کنجلیکنده بر کویه جرّه کیدوب خسته لانیر .
 مرضی شدله نوب کویلی باشنه طوبلانهرق : « شاید سکا بر امرحق واقع اولورسه
 مملکتده وارنک وارمی ؟ » دیدکلرنده خواجه مرحوم : « واقعا مملکتده بر
 والدهم وارسهده پدرم حال حیاتده کندیسنی تطلیق ایلدیکی جهته بو صورتده
 هیچ وارثم یوق دیمکدر . » دیمش .

﴿لطيفه﴾ خواجه نصرالدين مرحوم بر حاله يوك يوكله توب يولده كيدر كن حامى غائب ايدر . آرار آرار بولامز . آرادن اون كون كچر . بر قاج احبابيله كيدر كن بريسي: « ايشته سنك آرادينك حال . » دينجه خواجه سيويشير [۱] . تكرر بولوشد قلدن ده: « حامى آله كچرديكك حاله نه يه حريق ياقالامه دكه قاجدك؟ » ديمه ليله جواباً: « ناصل قاجايه يم . بن حامى غيب ايده لي تمام اون كون اولدى . حال بنى طوتارده [اون كوندري يوككي طاشيورم . يوميه مي ايسترم .] ديه رك اون كونلك اجرت طلب ايدرسه نه ياپارم؟ » ديمشدر .

﴿لطيفه﴾ مرحوم دن كيم نه ايسترسه او كون ويرمه بوب ايرتسي كوني ويرمك عادتي ايش . سبني سؤال ايتمشلر: « ويره جكم شينك قدرى بيلنسون ايچون بويله ياپارم . » ديمش .

﴿لطيفه﴾ خواجه مرحوم كوروك ايله آتش ياقدق دن صوكره آغزيني طيقار ، اويله آصار . سبني سؤال ايدنلره: « ايچنده او قدر هوا وار ، طيقامه يم ده ضايعى اولسون ؟ بن اسرافدن خوشلامام . » ديمشدر .

﴿لطيفه﴾ خواجه مرحومك حرمى وفات ايتمش . خواجه ده هيچ تأسف علامتي كورولمه مش . آرادن بر زمان كچوب مركي اولمش ، خواجه بك زياده كدرلي كورولنجه بعض دوستلري: « حرمك وفات ايتدى ، بويله كونلرجه محزون كزمه دك؛ حالبوكه اشك مرد اولالي اون كون اولدى ، حالا قاشيكك چاقينلغى ، صومور تغانلغك كچمه دى . » ديمه ليله خواجه مرحوم: « حرم وفات ايتديكي زمان قومشولرم باشيمه طوبلانوب: « خواجه افندى! اسف ايمه ؛ بز سكا اوندن اعلاسنى بولورز . » ديه سوز ويرديلر؛ فقط مركب اولديكندن برى هيچ كيمسه كلوب ده بويله تسليده بولونمادى . تأسف ايتمكه حقم يوقى؟ » ديمشدر .

[۱] سيويشمك - حس ايتديرمه دن (صاووشق) در . ديلزك فلسفه سندن دركه قالبن صائلي كله نر اينجه صائله تلفظ اولونجه معناسى دخى رقت پيدا ايدر . استانبول ليلر بوني (صويوشق) طرزنده يا كليش استعمال ايدرلر كه بوكله (صوا) اصلندن جيويق ، ماي برشيئك بولاشمه سى معناسنه در .

﴿لطیفه﴾ بر کیجه هوا غایت صیجاق اولمغله - آنا طولینک اکثر
محلنده عادت اولدینی اوزره - حرمی یاناغی أولک طامنه یاپار [۱]. خواجه
فراش استراحته چکیلنجه - اکثر قادینلرک عادتق وجهله - زوجہ سی عالمه
غالمه سنک هپسنی بر آرایه کتیروب آجی طاتلی لافلرله خواجهنک اویقوسنی
قاجیروب آرلرنده بر کورولتی چیقمش. خواجه مرحوم - کنديسنی أولک ایچنده
ظنيله - « سندن یاتاقده ده راحت یوق. » دیه آلب یورونی ویردیکی کبی پالدر
کولدور طامدن آشاغی دوشر. بو کورولتی بی ایشیدن - خواجه کبی طامده
یاقمده بولونان - جوار قومشولر باشنه اوشر. وجودی یاره بره ایچنده ایکله یه
صیزله یه کندينی طوبلایوب اوه کیرمک عزمنده اولان خواجهنک اطرافنه
طوبلانه رق: « افندی نه اولدی؟ افندی نه اولدی؟ » دیه اوحالنده صیقی صیقی
حوادث المق ایسته یلره قیصه جه: « سن حیاتکده طامدن دوشدکمی؟ طامدن
دوشدکمی؟ » دیه مقابله ایدرمش. بریسی: « افندی! . نهن ساده طامدن
دوشوب دوشمه دیکمزی صورو شدور یورسین؟.. » دیمه لرینه جواباً: « طامدن
دوشن حالدن بیلیر. » دیمشدر [۲].

﴿لطیفه﴾ حریفک بری صوغوقدن شکایت ایدرمش. باشقه بریسی ده
ایشیدوب: « جام بو انسانلرده نه عجائبدر؟ صوغوق اولسه (صوغوقدر) دیه
شکایت ایدرلر. صیجاق اولسه (صیجاقدر) دیه سویله نیرلر. » یولنده
هر کسک سویله کلدیکی لافی اورتایه آتار. بو سوزلری بر کوشه دن لاقیدانه
دیکله ین خواجه افندی، باشنی قالدیروب اوآدمه دیرکه: « افندی! سن او یله
سویله یورسک اما، بهار هوا سنه کیملک نه دیدیکی وار؟. »

[۱] آنا طولینک اکثر محللرنده اولر طوپراقدن، طاملری دخی دیرکلر دیزیلوب
اوزرینه قامیش سریلوب ده اوزرینه طوپراق چکمکه و اوستندن طاش یووارلاق
چکوب دوب دوز قیلمقله حصوله کلیر. یازین اوستنه صودوکوب سوپورورلر. تر
تمیز کچه یایوب یاناغی بیراقیرلر؛ کوکده کی ییلدیزلره باقه باقه اویورلر.
[۲] بو حکایه نك مختصری منظوم اوله رق بالاده کچدی.

﴿لطیفه﴾ خواجه مرحوم بر کون محله مسجدنده خلقه وعظ ونصیحت ایتک اوزره کرسی به چیقار. خلق طویلانوب: «خواجه افندی نه دیه جک؟» دیه بکه شیرلر. خواجه مرحوم کرسیده بر زمانلر اوطورور، خاطرینه سویله جک بر شی کلز. جماعتک انتظارینی کوردکجهده بوتون بوتون صیقلمغه باشلار. صیقیدقجه نطقی طوتولور. الحاصل بر شی سویله یه مه یه جکینی عقلی کسنجه جماعته: «ای اهالی! سز بزم سوز سویله مکدن عاجز اولمادیغمی بیلیرسکز.



خواجه نك مخدوميله محاوره سیدر

حال بویله ایکن، بو کون کرسی به چیقدیغم کبی خاطریمه هیچ بر شی کلمسه بکنیرمیسکز؟» دیدیکی صیرهده مکر مرحومك اوغلی کرسی دیننده اوطورورمش. پدرندن بو سوزی ایشیتدیکی کبی باشنی قالدیروب: «بابا! هیچ برشی خاطریکه کلمه یورسه، کرسیدن اینمکده می کلمه یور؟» دیه رك بو کلاميله هم صحیحاً باباسنک

اوغلی اولدیغنی اثبات ایله مش هم ده خواجه بی بویوک برصیقینتیدن قورتارمشدر [۱].
 ﴿لطیفه﴾ خسیسک بری خواجه مرحومه : « پاره بی سن ده می
 سویورسین؟ » دینجه : « انسانی بر طاقم وجدانمز، خسیس آدملره محتاج
 ایتهدیکی ایچون سه وسه مده بری وار. » دیمشدر [۲].

﴿لطیفه﴾ خواجه مرحومک بولوندیغی بر مجلسده عربستاندن هنوز
 کلش بر قاق سیاح اورالک احوالندن بحث ایدوب : « عربستانک بعض محللری
 غایت صیجا قدر . اکثر بلادک اهاالیسی چیریل چیپلاق کزرلر . » دیدکلرنده
 خواجه : « عجبا اوراده قادین ارکک ناصل بللی اولور؟ » دیمشدر.

﴿لطیفه﴾ خواجه مرحوم بر شهره کیدر. چارشوده کزرکن حریفک
 بری یانسه صوقولوب : « افندی! بو کون نه؟ » دییه صورمقله مرحوم : « آی
 اوغل! بن بو مملکته دها بو کون کلدیم. هنوز بورانک کونلرینی اوکره نه مدم.
 سن اونی بر یلیدن صور. » دیمش .

﴿لطیفه﴾ خواجه مرحومه : « شهر مزده محرم اسرار اوله بیله جک
 کیمی طانیرسین؟ » دیدکلرنده : « خلقتک سینه سی بنم آنبارم اولمیدیغنی بیلدیکم ایچون
 شیمدی یه قدر کیمسه یه سریمی آچادم. » دیمش . (علیه الرحمة و الرضوان .)



(لطائف خواجه نصرالدین) نامیله اسکیدن خلقك أئده تداول ایدن اصل کتابدن اون سکر دانه حکایه بی منافی ادب بولدیغمزدن و خلقمزدن آراسنده شایع، ضرب مثل اولش ظریف نکتہ بی ده شامل بولونمادیغندن درج ایله مه مشدك. بالاخره تطبیقات ائساننده و قتيله علی العجله چیزلش اولان شو برقاچ حکایه نك درجندہ بأس کوره مدیکمزدن بورایه الحاق ایله دك :

﴿لطیفه﴾ خواجه مرحوم یاتسو وقتی برجامع آبدستخانه سنه کیرمش. مکر آبدستخانه موصلنی آچیق قالمش ایش. خواجه آبدستم بیتمه دی دیبه او یله بکلمش. بر آدم کلوب قاپی بی اوره رق: «حریف! او یودکمی؟ بر ساعتدر اوتوریورسین!» دیبه هایقیرمقله: «ایشم بیتمه دی که قالقیم.» دیمشدر.

﴿لطیفه﴾ بر کون خواجه بی اغفال ایدوب یالانچی شاهدلکنه کوتورورلر. مدعی حضور قاضیده خصمنندن بوغدای دعوا ایدر. خواجه بی چاغیریرلر. آرپه دیبه شهادت ایدر. «افندی! یا کلدك؛ بوغدای دیبه جکدك.» دیدیکلرنده خواجه: «بهی جاهلر! یالان اولدقن صوکره ها بوغدای اولش، ها آرپه.» دیمشدر.

﴿لطیفه﴾ بالقجیلر آق شهر کولندن آغ ایله بالق چکرلر کن خواجه ده سیر ایدرمش. طالعینقله آیاغی قایوب آغك ایچنه دوشمش بالقجیلر: «خواجه افندی! نه یابدك؟» دیدکلرنده: «بنده ایچلرنده یونس بالغی اولایم.» دیمش.

﴿لطیفه﴾ خواجه نك طاووغی غائب اولور؛ برر مقدار سیاه بز پارچه لرینی دلوب پیلچلرک بوغازینه طاقوب صالی ویرمش. «خواجه افندی! بو نه در؟» دینلره: «آناری اولدی ده قاره لر کیوب یاس طوتارلر.» دیمش.

﴿لطیفه﴾ بر کون خواجه چوربا یرکن آغزی یانمقله باغیره رق سواقه فیرلایوب: «صاوولک قارداشلر، قارنمده یانغین وار!» دیمش.

﴿لطیفه﴾ خواجه چیت سوررکن بر قابلومباغه یه تصادف ایله مش. ایپه طاقوب قوشاغه باغلایه قویمش. قابلومباغه چابالاندقجه: «آی اوغول! نه تلاش ایدیورسین. قنای سن ده چفتجیلک اوکره نیرسین.» دیرمش.



خواجه قابلومباغه یی یاننه آسه قویوب چیت سورردیکیدر

﴿لطیفه﴾ بر کون خواجه نیک آچه سنی چالمشله. خواجه مسجده کیدوب صاحبله قدر جناب حقه یالواره رق پاره لرینک احساننی تمنی ایله مش. مکر مملکتک تجارتدن برینک بئندیکی کمی فیرطنه یه طوتولوب آکر سلامت بولورسه خواجه یه بیک آچه اعطا ایله مکملکی نذر ایله مکله هفته سنده سلامتله کلوب خواجه یه نذرینی اعطا ایله مش و شرگذشتنی نقل ایله: «همت و امدادیکزله پک غریب بر صورتده خلاص بولدق.» دیمش. خواجه برمدت طالعین طالعین دوشوندکدن صوکره: «سبحان الله! بر آدمه بیک آچه ویرسم بئم باره می کری اعاده ایتک

ایچون بو درجه غریب و طولامباجلی بریول دوشونه مز. جناب حَقِّ حَکمت
واسرارینه عقللر ایرمز. اذعان اولانه بوندن بیوک معجزه اولماز. بزم پاره
نزدن باتدی، نزدن چیقدی؟ شکر یاربی لطفکه احسانکه! « دیمشدر.

﴿لطیفه﴾ خواجه نك مملکتی اولان سیوری حصارك بکری بر قاضیسی
وار ایش. بر کون باغده سرخوش اولوب یاتمش. قاووغنی، بینیشنی شورایه
بورایه آتمش. خواجه ده تلیندی عمام ایلہ او کون سیرانه چیقمش ایش.
قاضینك او حالنی کوروب بینیشنی آتمش صیرتنه کیمش کیتمش. قاضی آییلوب
بینیشنی بولامانجه محضره: «باق کوز قولاق اول، کیمده بولورسهك آل، کتیر.»
دیر. محضر خواجه نك صیرتنده کوروب محکمہ یه کتیریر. بر محاکمه زمانه
تصادف ایدر. خواجه قاضی یه: «دون عمام ایلہ کز مه یه چیققد، باقدق که
بر باغده بر صاریقلی آدم سرخوش اولمش، قرصمش. یاتیور. بن ده بینیشنی
آدم. صیرتمه کیدیم. بوکا شاهد و اماره ده کوستره بیلیرم. بولک صاحبنی
ویریم.» دینجه قاضی: «کیم بیلیر. هانکی سفیدر! هله سن عافیتله کیدیککه.
باق بن قاریشمام!» دیمشدر.

اصل کتابدن بالآخره علاوه ایلہ دیکمز بر قاچ حکایه بوراده ختام بولدی.



[بالاده متن لطائف ده کچن بر حکایه شویله ده مسموعمز اولمشدی .]

﴿لطیفه﴾ خواجه یه : « ضررسز خواجه سین اما فارسی بيلمه دیکک ایچون وعظک نشئه لی وظریف اولمایور. دیمشدر. خواجه : « نه دن آکلادیکز فارسی بيلمه دیکمی؟ » دیوب : « بیلیرسه ک بزه بر بیت او قو باقم. » دیمه لریله شو بیقی انشاد ایتمش :

مور منکشه بوینن اکمش او یورست کافر صوغان قات قات اوربه [۱] کیرست
« خواجه افندی [بونک زه سی فارسی ...؟ دیدکلرنده : « نه ایقتمده کی (است) لری کورمه یورمیسین؟ » دیمشدر . خواجه نک : « بوکا قانحیق فارسی دیرلر . » دیدیکی ده روایت ایدیلیر .

﴿لطیفه﴾ ینه اکاردن بر ذات لطیفه پردازدن ایشیتدم که : « برقیش خواجه غایت زو کورت قالمش . کندی کندینه : « عجب اشک آرپه تعینی براز ایندیرسم اولورمی؟ » دیوب هر زمانکی قوطودن براز اکسیک ویرمش . باقش اشک ینه اسکی نشئه سنده . بر آز زمان صوکره بر آووج ده اکسیلتمش . اشک ینه آلدیرماش . بویله بویله یاری یه ایندیرمش . اشک بر سکونت کلشسه ده ینه ضررسز کورمش . بر ایکی آی صوکره قوطو یاریدن آشاغی یه اینجه اشک سکونته برده محزونلق علاوه اولمش . والنهایه چوق یاتار وصامانی دخی آ زیر اولمش . چونکه آرپه ده طوپی بر آووجه اینمش . بر صباح خواجه آخیره کیرمش باقش که اشک مرد اولمش . دیمش که : « اشکی تام ریاضته آلیشدیریوردق آما اجل مساعده ایتمه دی . »

[۱] خالص تورکنجه ده (ر) ایله بدأ ایتک شیوه یه موافق کلمه دیکندن (روبه ، راقی ، رجب) کبی کله لری (اوربه ، اراقی ، ایره جب) تلفظ ایدرلر . بناءً علیه (اوربه) غلط اولمایوب تورکجه لشدیرلش، بزه حقیقی مال ایدلمش برکله در. واقعا دیگر ایکسی استانبولده قوللانیمایورسه ده (اوربه) شایعدر .

﴿لطیفہ﴾ خواجہ نصرالدین قاپوسنک اوکنہ برسکود آغاچی دیکوب
دینہ بر آبدست بوزہرق : « ایشته صو نامنه کوروب کوره جکک بوندن
عبارتدر . دیمش .

﴿لطیفہ﴾ نصرالدین افندی مرحوم کوندوز باغچہسنہ بر قاچ فدان
دیکر ، آقشام چیقاروب ایجری آلیرمش . « خواجہ افندی ! بو ناصل ایش ؟ »
دیه سورانلره : « ای . . . چوجوقلر . اورتلوق بوزولدی . نه اولور ،
نه اولماز . هرکسک مالی باشی آلتنده کرک . » دیمش .



ظرفاده بر ذات طرفندره اهدا ایلدیر :

﴿لطیفہ﴾ خواجہ مرحوم ایکنیدی آبدستی آلمق ایچون خانہسنہ
کلیر . خواجہ همان جماعته یتشمکه چالشمشسهده حرمی خیلی مشغول ایتدکدن
صوکره اوستی باشی پک کیرلندیکنندن بختله حمامه یوللار . « افندی ! صاقین
کچ قاله ! بیلیرسک یا ! همشیره مک عقدی وار ، سن اوراده بابالق وظیفهسی
کوره جکسک ، بولونمازسهک کری قالیر ، دعوتیلره قارشی عیب اولور . »
دیهرک صیقی تنیه ایلر . خواجہ بو وقتسز استحمای عاجلاً اجرا ایله یوب
همان خانہسنه قوشمق ایسته مشسهده طیشاریده پک صیقی یاغمور یاغمقده اولدیغنی
سویلرلر . پخیره دن باقارکه بوتون اطرافی قابالی . یاغمورک طورمق احتمالی یوق ،
آلبسه سنی کیسه یکانه قافتانی ، بینیشی صوجوق کسپله جک . همان آلبسه سنی
درله یوب طوپلایوب چیریل چیپلاق یوله دوزولور . یاغموردن مکمل ایصلانیر .
مکر قاپوسی اوکنده دخی دعوتیلر طوپلانوب خواجہنی بکله یورلرمش .
خواجہنی بو حالده کورونجه : « افندی ! نه در بو حال ؟ » دیمه لرله خواجہ

مرحوم : « شیطانہ او یوبده وقتسز حمامہ کیدن بویله ہم صیجاق بانیو ، ہم صوغوق بانیو ، ایکسنی بردن ایدر . » دیمشدر .



یاغمورلی هواده خواجه نك حمامدن عودتیدر

﴿ لطیفه ﴾ خواجه مرحوم باغندن اشکسہ ایکی کوفہ اوزوم یوکلہ توب کلیرکن شهر ایچندہ محلہ کنجلری : « خواجه افندی ! بزه اوزوم ویر . » دیبہ طاقیلیرلر . خواجه مرحوم جماعتی بر کره کوزدن کچیریر . هپسنه حرمتلیجه ویرسه چوغه قاچه جق . ایستیه نه برر چنٹیک [۱] ویریر . چوجوقلر : « افندی ! بونه قدر جق شی ؟ » دیبہ آزینسہ مالری اوزرینه : اولادلرم !

[۱] چنٹیک = صالقیمک اجزاسندن بر جزؤدرکه طوبی اوچ درت دانہ بی شامل اولور . آناتولیده (جینکیل) دیرلرکه یعنی یکلی ، خفیف دیمکدر . فی الاصل پک کوچوک قطعه اولان صالقیمه ده دیرلر . طوغروسی (چنٹیک) برنجی معنایه (جینکیل) ایکنجی معنایه تخصیص ایدلک مناسب اولور .

هېسنگ طادی بر . شو کوفه لرده کی اوزومك لذتی بر دانهك لذتنگ عینیدره .
بناءً علیه آزمونکله چوق یمک بپنده هیچ بر فرق یوق . « دیمشدر .

﴿لطیفه﴾ خواجه مرحوم بر روز کارلی هواده دوه اوستنده قاووت [۱]
یرمش ؛ فقط آغزینه آتدقجه یل آلیر کوتورور ، هیچ بوغازینه کیتمک
قسمت اولمازش . آرقداشلرندن بری : « خواجه افندی ! ندر او یدیکک؟ »
دیدیکده خواجه مرحوم : « بویله کیدرسه هیچ . » دیمشدر .
خواجه مرحومک : « دوه اوستنده قاووت یمه پی بن ایجاد ایتدم اما بن ده
بکنمه دم . » دیدیکی واردر .



بر ذات طرفندره اهدا ایدمشر :

﴿لطیفه﴾ خواجه رحمة الله علیه یاغورلی بر هواده خانه سنده اوتورور
سوقاغی سیر ایدرکن یاغوردن ایصالنامق ایچون سرعتله کیدن بر قوموشونه
نهدن قوشدیغنی صورار ؟ او آدمده رحمتدن ایصالنامق ایچون قاچدیغنی سویلر .
خواجه : « واه واه ! تأسف ایدرم ! آخر زمان ظاهر باق نه کونلره قالدق .
ایول ! هیچ تا کری تعالانک رحمتدن قاچیلیرمی ؟ » دیمکله بیچاره آداجغز
اوتانوب آغیر آغیر یولنه دوام ایدر . خواجه ده یاپدینی معذبلیک اثرینی
قیدسزجه سیر ایدرمش . آداجغز صیر صیقلام کسیرهك خانه سنه جان آتار .
تصادف بویا ! بر یاغورلی کونده معهود آدم نجره سندن باقارکن کورورکه
دها هنوز یاغور برر دانه دوکولمکه باشلادیغنی حالده خواجه مرحوم ایلریدن
سوکمش . معتادی وجهله جبه سینگ ایتکنی آرقیه چهره مش . ییلدیریم کی

[۱] قاووت = بولغور چکرکن الکقالینه یارمه ، ایکنجیسه بولغور ، اوچنجیسه
دوگو (اوتو - وزننده) ، دردنجیسه دوکوجک ، بشنجیسه - که اون کی انجه سیدر -
قاووت دیرلر .

خانه‌سنة طوغرو قوش-ارمش . قومشو هايقيروب : « افندی ! بکا اخطاريکی اونوتدکی ؟ اللهک رحمتدن قاجيليرمی ؟ » دیدکده خواجه بر دقیقه بيله طورمايه رق : « اوغلم ! بن الله تعالى نک يره دوکولن رحمتی آياغمله چيکنه مهيم ديه قوشيورم . » دير و خانه‌سنة قاپاغی آتار :

[حق واریا ! شهه سز رحمتدن قاجيلمز اما ياغموردن قاجيلير .]



خواجه مرحومك قومشوسی ایله محاوره سیدر


نجیب عاصم بك الهرا المشرر :

﴿ لطیفه ﴾ خواجه مرحوم اوجاق یاقه جق اولش . اوفلر اوفلر یانمازمش . همان یوقاری چیقوب قاریسنک خوتوزینی آلمش ، باشنه کیمش . او حال ایله اوجاغه : « پوف ! . . . » دینجه خارلامش . خواجه : « مکر اوجاق ده بنم کی قاریدن ییلارمش ! » دیمش .

جینکل کو بندہ مانیا طورہ می (کرفت یازیلدیغندره اسمنی اوقوبه ماردیغمنز)

افندی طرفندره : [۱]

﴿لطیفه﴾ «عیدکاهه وارہم، دولابہ دلبرسیرینہ. کورہم، آیینہ دوران
نہ صورت کوستریر؟» منظوقنجہ بر بایرام کونی شهر خارچندہ کی میدانلغہ
کیدوب چوجوقلرک ادیونی طالغین طالغین سیر ایدرکن برکنج، خواجہک
قاووغنی باشندن قادیغی کی حلقہیہ آتار. قاووق الدن الہ آتلا یوب قوشمغہ



سیر یرندہ چوجوقلرک خواجہک قاووغنی قاپہ لریلہ الارندن آلمغہ چالیشمہ سیدر

[۱] بر چوق مقصد الجاسیلہ هرکس کندینہ مخصوص بر امضا تاصارلار. فقط
بینلرندہ معارفہ اولمایان بر ذاتہ یازیلان کاغددہ نامنی کتمہ لزوم کورولمہ دیکی تقدیردہ
امضانک اوقوناقلی یازلامسی چوق مناسبدر.

باشلار . خواجه هر نه قدر قاووغنى اللرندن قامقى ايسترسده موفق اوله مز .
 كنجلار خيلى خير پالارلر . « چوجوقلره ، ايتمه يك اولاد لر . شوقاووغنى ويركده
 كيدهم . » ديه هر نه قدر نياز ايتمشده آلايدن ، قهقهه دن ، شوق وشطارتدن ،
 غغله دن كيمسه نك قولاغنه كيرمز . باقار كه ساعتلرجه بگله سه بوش . خواجه
 (لاحول ...) ديه رك اشكنه بينوب خانه سنه كيدر كن چشم آشارلر دن برى :
 « افندى ! هانى قاووغ شريف ، بويله باشى آچيق نره دن تشریف ؟ » ديمكه
 خواجه جواباً : « كوچوكلى خاطرينه كلشده سيرانكاهده چوجقرك اچنه
 قارىشدى . اويون اوينيور . » ديمش .

﴿ لطيفه ﴾ بركون خواجه يه : « يا هو ! سن اولدجه عالمسين ، شو
 بزم مشكلمى حل ايدى وير : عجباً دنيا قاچ آر شيندر ؟ .. » ديرلر . او ائنده
 بر جنازه كوتور بيورلر مش . خواجه مرحوم تابوتى كوستره رك ديمش كه :
 « بو سؤالك اربابى شو كيندر . او كا صوريكز . بايكنز ، دها او شيمدى
 اولچمش ، كيديور . »



« بر قارئكز » امضالى ذات على طرفندن :

﴿ لطيفه ﴾ خواجه مرحوم بركون بازارده كوكرچين قدر بر قوشك
 اون ايكي آلتونه صايتليغنى كوروب كندى كندينه : « ديمك كه پياسده
 طور انواعنك رواجى وار . تام صيراسى ؛ بنده شو بزم بابا هندى يى يارين
 صايتلغه چيقاره يم . » ديه تصور ايله دى . ايرته سى كون قوجامان بابا هندى يى
 قولتوغنه آلدى . حيوان كرداننده كى (قلاده مرجان) ايله بالا فتخار بورى
 شيشيروب كنديسك قولتوغه كلير طاقندن اولديغنى پك اظهار ايدىوردى .
 خواجه مرحوم بو وضع ايله بازار يرينه كلدى . خيليجه بر پاره الده ايتك
 سوداسيله نتيجه يه منتظر ايكن برده خراج مزاد بابا هندى - اوده خواجه نك
 خصوصى بسله مه سى اعتباريله - غايه الغايه اون ايكي آچه ده دا ياندى ، قالدى .

فضله برپاره دها دین اولمادی . خواجه مرحوم حدتله نوب دلالله ، چارشی
 خواجه کیلرینه خطاباً : « بوناصل ایس اللهی سورسه کنز !. دها دون کوزیمک
 اوکنده کوکرچین قدر بویالی برقوشی تام اون ایکی آلتونه صاندیکیز . هم
 هیکیزده یوکسک یوکسک پیلر سوردیکیز . او بویانمشه باقیکیز بونکده
 بوینده ، بورنده لعل مرجان رنکنده قدریدن زیتلر وار . صیرتک تویی
 (بوقلمون = یانار دوز) رنکنده اولوب کونشه قارشی طوردیغی وقت



خواجه نك هندی قولوغنده چارشیلیرله محاوره سیدر

پاریل پاریل یانار . علی الخصوص ایصلیق چالینوبده قبادردیغی زمان خورطومنی
 شیشیر ، قانادینی قویروغنی چادیر کی اچار برقوزو قدر جته پیدا ایدر .
 اوحالده حولیده نازان نازان طاووس هندستان کی خرامان اولنجه تماشا سنه طوبولماز .
 احتیاج سوقیله صاتمغه مجبور اولویورم ؛ یوقسه اودن آیریلرکن قاری ، بن ،
 هندی اوپله بریأس ایتهمز واردی که اوحال حزینمزه طاعلر طاشلر دایانماز .
 بز (اوهو .. اوهو ..) دیه کریان اولدجه اوده بز (قل قل قل ..)

دیه تشویق ایدردی . آه ! .. احتیاجك كوزی کور اولسون . « دیه
خواجه نك كمال حرارتله چیقیشمه سی چارشیلیری برمدت اکلندیردکن صکره
ایچلرندن بری : « خواجه افندی ! . براز مستریخ اول ! سن حقیقتدن
غافلسین . بر کره اوقوش ؛ عادی بویلی بر مخلوق دکل . نقاش قدنك رنگا-
رنگ طوناتدیغی مشهور طوطی قوشیدر . « دیمشدهده پاره جهندن امیدی
منکسر اولمقدن نشئت ایدن بر حدتله کوکلره اوچورولسه دخی او آنده
خواجه نك کوزینه کورونمهدیکندن : « ای آجانم ! آکلادق . طوطی
قوشی . . . نه اوله جق ؟ غایه سی ینه قوش دکلې ؟ بونك هنری نه ؟ « دیمکه
مخاطبی خصمی الزام ایتك حسنك ویردیکی برشطارتله : « هاه ! ایشه بونك
هنری وارده اوندن ؛ چونکه بوغایت ای لاقیردی سویلر . « دینجه خواجه ده
قولتوغی آلتنده بر خموشی فیلسوفانه ایله نظر توجهنی قاپامش اولان بابای
هندوستانی اشارت ایله یه رك : « او ، آئی لاقیردی سویلر سه ، بوده غایت آئی
دوشونور . . . دیمش .

﴿ لطیفه ﴾ خواجه مهتابلی کیجدهده طامده یاتارکن آشاغیه دوعرو
آبدست بوزمغه باشلامش . سواقندن - حالندن شبه لندیکی - بری کچورمش .
خواجه کسمش . « نه یه کس دك ؟ . دیمش . « کسمه یه دیمده ایپ کی
طوتوب چیقابیلیرمدك ؟ « دیمش .

﴿ لطیفه ﴾ بر وقت آنا طولوی شدت سیاستیله دهشته القا ایدن
تیمورلنك آنا طولیده هراوغرادینی شهرك علما و عرفاسنی چاغیروب : « بن
عادلیم ، ظالمیم ؟ « دیه صورارمش ، « عادلین ؟ « دینی ده کسرمش ،
« ظالمین ! « دینی ده کسرمش . عاجز قالمش لر . خواجه مرحومك صیتی
اوطرفلره شایع اولمغله خلق مراجعت ایدوب : « آمان خواجه افندی !
بوایشه سندن باشقه کیسه برچاره بولاماز . هر نه یاپارسهك یاپ ، شو ظالمك
قیلجنی بیکناه عباداللهك اوزرندن قالدیر . « دیه یالواریرلر . خواجه مرحوم :
« چوجوقلر ! بوایش نم ایچون دخی ظن ایتدیککنز قدر قولای برشی
دکلسدهده مظلومینك حق یار دیمجیسی اولدیغندن دعا کز برکاتیه بلکه موفق

اولورم . « دیه‌رک هزار احتیاطله تیمورک اقامتگاهنه کلیر . » سؤال‌کنزه جواب ویره‌جک خواجه‌کلدی . « دیه خبر ویریرلر . تیمور حضورینه جلب‌ایدوب خواجه‌یه دخی مذکور سؤالی ایراد‌ایدنجه خواجه دیرکه : « سز مجرد برملک عادلده دکلسیکیز ، برباغی ظالم‌ده دکلسیکیز . ظالم بز . سز سیف‌ع‌التسکیز جناب قهار ذوالجلال مستحق جزا اولان بز ظالم‌ره سنی حواله‌ایله‌مشدر . » لطف حق باتو مدارها کند - چونکه ازحد بگذرد رسوا کند [۱] . »

مرویدرکه : تیمورک بکله‌دیکی جواب صواب‌ده بوایمش . بناءً علیه بوندن طولانی خواجه‌دن غایتله خوشلامش . ندیم خاصی قیلمش . اودیاردده بولندجه یانندن آیرمامش . خواجه مرحومک حرمتنه آقشهر وحوالیسی وبلکه بلاد قارامان تیمورک تیغ قهرندن وعسکر جرارینک یاغماسندن مصون قالمشدر : جمله دانایان همین گفته همین - هست دانا رحمة للعالمین [۲] .

﴿ لطیفه ﴾ خواجه‌نک ایکی حرمی وارمس . بر کون ایکیسی بردن یانه کلوب : « بنی می چوق سورسین؟ » - « بنی می چوق سورسین؟ » دیه خواجه‌یه طاقلاشمشدر . بیچاره خواجه مضطر قالوب هر نه قدر : « ایکیکیزی‌ده! .. » کبی سوزلرله بحثی کچیشدیرمک ایسترسده قانع اولمایارق خواجه‌بی خیلی صیقارلر . حتی کوچوک حرمی او ائناده دیرکه : « افندی! مثلاً ایکیمزده آقشهر کولنده قایقده کلیرکن قایق دوریسه ، ایکیمزده دوشسهک ، سن قاره‌ده اولسهک هانکیمزی اول قورتاریردک؟ » .

خواجه مرحوم بی اختیار اسکی حرمنه دونمش‌ده دیمش‌که : « یاهو ! . سن آزیجق یوزمه بیلیرسین دکلکی ؟ »

[۱] مثنوی شریفدن اولان بو بیتک معناسی : (حقا لطفی سکا قارشی اداره‌لی برصورتده معامله‌ایله ؛ فقط قباحتک حدینی کچرسه سنی رذیل ورسوای‌ایدر) . دیمکدر .

[۲] بو بیت‌ده مثنوی شریفدنر . معناسی شودر :

هپ عالم‌ره ؛ هان آنجاق شونی سوبله‌مشدردرکه : عالمک وجودی عالمه رحمتدر .
[بر تک عالمک بوتون خلق عالمه ایکیکی طوقونور .]

﴿لطیفه﴾ خواجه مرحوم اوغلی ایله برکویه کیدیورمش . اوغلی
 اشکه بیندیرمش ، بعض کیمسه لر کوروب : « هی کیدی زمانه کنجلی ! .
 آغزینک علمیه شو اختیار باباسنی یایان یوروتیورده کندیمی راحت راحت
 اشکه بینوب کیدیور . دیمش لر . چوجوق : «باق بابا! بن سکا اصرارایتمه دیمعی؟
 هایدی آرتیق ، دها زیاده عناد ایتمه ، شو اشکه بین! .» دیمش . خواجه اشکه
 بینمش . برآز کیتمش لر . برقاج کیشی تصادف ایدوب : «آبول! سنک میکک
 قارتلاشمش . هم ایشته کلدک کیدیورسین . بوتازه فدانی بوقدر زحمته قوشوب ده
 قاوورمق لایقمی؟» دیرلر . خواجه طوتار ، چوجغی ده آرقاسنه بیندیرر . برقاج
 آدیم کیدر کیتمز ، بر بولوک هرزه وکیلله دها تصادف ایدرلر . بونلرده باقوب :
 «اما انصافزلق ها!.. بر اشکجه ایکی کیشی بردن بیزده اوزون یوله کیدرمی؟
 باقک شو حریفه! خواجه ده اولاجق! » دیرلر . خواجه آرتیق قیزوب اشکدن
 کندی ده اوغلی ده اینرلر . اوکلرینه قاتارلر . چوق کچمز بالتصادف برقاج آدمه
 دها راست کلیرلر . «الله الله!.. بونه بودالالق . اشک اوکلرنده بوم بوش خوپلایه
 صیجرایه قوشسون ده کندیلری بو صیجاقده توزه طوپراغه بولانه رق قان تر
 ایچنده یایان یوروسونلر . دنیاده نه شاشقین آدملر وار؟» دیدیکلرینی ایشیدنجه
 خواجه دیمش که : «لکن یاهاو! بو خلقک دیلندن قورتوله بیلن وارسه اوکا
 عشق اولسون [۱] .»

﴿لطیفه﴾ بر مجلسده هر کس کندی بینجیلکنه دائر حکایه لر
 سویله یورمش . خواجه یه ده هوس گلش دیمش که ، فلان چفتلکده ایدم . کاهیا
 برآت کتیردی . قیش باشنه قدر هارینلاشمش ، اله آووجه صیغما یوردی . کویک
 بابایکیتلرندن بری بینمک ایسته دی . یانه یانا شدیرمادی . بریسی اوزرینه آلادی .
 اونی ده قالدیردی یره ووردی . بر دیکری دها کلدی . اوده بینمه دی . باقدم که
 هپسی نافله . بکا بر غیرت کلدی . دها او وقت کنجم . همان اتکلریمی بلیمه
 چرده دم . قوللریمی صیوادم . ال چابوقلغیله حیوانک یله سندن طوتوب بر پرتاو
 ایتدم... [دیرکن چفتلکده حاضر بولونانلردن بری او اشناده ایچری کیری
 ویرنجه خواجه مرحوم]... بن ده بینمه دم . « دیمشدر .

﴿لطیفه﴾ خواجهك ايكي زوجه سى وارمش. هرايكيسنه ده يكدىكرندن
 كيزلى برر ماوى بونجوق وىروب: «صاقين بونى اورتاغكه كوسترمة! بو بنم
 نشانه محبتمدر.» ديمش. بركون ايكي سى بردن اوزرينه هجوم ايدوب: «هانكىمى
 چوق سورسين؟ كوكلك اصل كيمده در؟» ديهه صور دقلرنده: «ماوى بونجوق
 كيمده ايسه بنم كوكلم اونده در.» ديرمش. قادينلر هر ايكي سى ده قلباً: «بنى
 چوق سويور.» ديهه متسلى اولورلر مش [۲].

﴿لطیفه﴾ قومشولرندن برى پرتلاش: «آمان خواجه افندى! بزم
 اوده قارىمله بالديزم فنا حالده غوغا ايدىورلر. بربرينى بوغيورلر. رجايدرم، كل
 شونلره نصيحتى ايدە جكسين، نه يابه جقسين؟ چاره لرينه باق. بن عاجز
 قالم.» دير. خواجه صورار: «غوغاك اساسى ياش اوزرينه مى؟» او آدم:
 «خير افندى! ياشدن بحث ايتدكلرى يوق.» دينجه خواجه: «هايدى
 اوغلم، هايدى! . تلاشده معنا يوق. كيت اويكه! . شيمدى يه قدر اونلر
 باريشمشلردر بيله! .» ديمش.

﴿لطیفه﴾ خواجه سيورى حصار قاضيسى ايكن ايكي آشفته خانم
 خواجهك حضورينه چيقوب برى: «افندم! بن بو خايمه باياغى ايب
 ايصارلادم. او، شو صاچيم كى اينجه اينجه شيلر بوكمكه باشلامش. نمونه سنى
 كوستردى. بويله يابه جقسه بن سوزمدن دوندم. وىرسين پاره لرىمى! ..»
 ديهه نيجه عشوه و نازله يوزينى نيم آچوب صيرمه صاچلرينى خواجه يه عرض
 ايله دى. خواجه: «سبحان الله! ..» دىوب ديكر خانمه توجهله: «سن
 نه بويورورسين؟ ..» ديمكه ديكرى سسنه پراعتراز بر حرارت ويره رك —
 صانكه پك حدتلمش كي: «افندم! .. بزم مقاوله من شوپارماغم قالينغنده باياغى
 چاشير ايب ايدى. يوقسه [قولنى صيوايوب] بيله كيم قالينغنده كندير بوكمك

[۲، ۱] بو حكايله باشقه لرينه ده اسناد اولونور. خواجهك زوجه سى وفات ايدوب
 تكرار تاهل ايتديكنه وزوجه سنك خواجه يه غدر ايله ديكنه دائر حكايله وارسه ده ايكي
 قادينى برزمانده جمع ايلديكى شايع دكلدر. بناءً عليه ايكي قارىسى اولديغنه دائر حكايه
 دوغرو اولماسه كرك.

دکدر!... « دینچه متبسمانه هرایکسینی ده باشند آياغه قدر سوزوب: «هایدین قیزلم! اوزلاشین. « دیدکدن صوکره مدعا علیهایه خطاباً: « سنده برآز قالینجه طوت. او قدر ایخیلتمه که خواجه کزک کوکلی کبی چابوجاق اوزولمه سین! « دیمکه فنانه لر کولوشه رک چکیلوب کیتمشلر در .

﴿لطیفه﴾ خواجه نك معادی افطاردن صوکره مختصراً آقشام نمازینی قیلوب طعام ایدرمش. بر آقشام افطاره چاغیرمشلر. مرتب اوله رق امامه تنبیها ت لازمه یی ویرمشلر. شاعرک: «صور صفت زدیک صغیر از پی اشباع سین — یک دوسه ساعت کشیدمد ولا الضالین [۱]» طرزنده تصویر ایلدیکی وجهله امام تجویده صوکره درجه رعایتله کله لری اوزانه رق سورۀ فاتحه یی اوقومش. خواجه ایجه اوفکه لشمش. تام فاتحه بیتوب ده امام (یس!...) دینچه خواجه: «علم الله تحمل ایده م.. هر شیئک بر صیره سی وار.» دییه جماعتدن فراغت ایده رک منفرداً قیلیمق اوزره صفدن کری چکلمش. امام (والقرآن الحکیم... الله اکبر) دییه رکوعه اکیلنجه: «باق بوکا دییه جک یوق!...» دییه رک چابوجاق تکرار اقتدا ایتشدرد.

﴿لطیفه﴾ خواجه مرحوم بر ایش ایچون آقشهردن مملکتی اولان سیوری حصاره کیتمش. فنا حالدۀ آچیقمش، پاره سی ده یوقش. چارشیدن کچرکن باقش که بر فروندن تازه تازه اکمک چیقور. مسک کبی قوقوسی اطرافه یاییلور. کوشده اوطوران اکمکچی یه: «اکمکچی بابا!... بو اکمکلر سنکمی؟» دیمش. اکمکچینک غایت طبیعی صورته: «اوت بنمدر!...» دییه سنه خواجه هیجانله تکرار بتکرار: «قرزوم اکمکچی بابا!... کرچک بونلرک هپسی سنکمی؟. آياغنی اوپیم، شوراده نه قدر صیجاق پاموق کبی صومونلر وارسه هپسی سنکمی؟ هپسی!...» دییه زورلاینجه اکمکچی: «نه

[۱] (ایک نستعین) ده کی سینی اشباع ایتک اوزره (نس س س...) دییه (سین) حرفی مخرجندن چیقاریرکن اوله بر ایصلیق چالدی که اسرافیلک (صوری کبی اوتدوردی. (ولا الضالین) دیرکن (ضا) حرفی ایکی اوچ ساعت چکدی.

قدر زور لاسهك ! . هپسی ده بنمدر . « دیمكه خواجه كمال اهتمامه : » نه باقوب
 طور ییورسین اوپله ایسه ؟ . یه سهك آ ! . . « دیمشدر [۱] . »

﴿ لطیفه ﴾ ولی افندی زاده کی او زمانك کبارلرندن بری خواجه یی
 افطاره یاغیرمش . کوندوزدن جلب ایدوب جامع جامع طولاشدیره رق حدندن
 زیاده آجقیدیرمش . افطار زمانی یمك او طه سنه کیریلوب ده موضع مخصوصنده
 هندی طولماسی ، باقلاوه ، بورهك کی شیلری خواجه کوز اوجیله تماشا ایدیجه
 صبر وقراری آلدن کیتمش . آغزینك صوی آقغه باشلامش . صوفریه
 اوتورمشلر . اعلا بر اشکنه چورباسی گلش . خانه صاحبی هزاران وقارله بر
 قاشیق آلوب « آ ! . . های الله مستحقکی ویرسون . کاهیا افندی ! سکا قاج
 کره تنیه ایتدم که شو آشجیه سویله ؛ چوربايه صاریمساق قوماسین دییه .
 قالدیرك ، قالدیرك ! . « دیر . چورباي کاسه دن بر قاریش کوپوکی طاشمش
 اولدیغی حالده قیریته قیریته قالدیریرلر . خواجه کوز اوجیله تشییع ایدوب
 حقیقجه ایچنی چکر . خانه صاحبی : « افندم ! » دییه تصدیق ایدرلر . دیرکن
 هندی طولماسی کلیر . نار کی قیزارمش . اطرافه مسك کی رایجلر صالمش ،
 حشویاتی اولان قویو رنك پیرینج ، فیستیق کی شیلر خارجه طاشمش . افندی
 کمال نزاکتله بر لقمه آلیر ، پر آتش کسپله رك : « باش آغا ! . کچن کون سکا
 سویله مه دمی ؟ بو حریف بهارات قوللانمیین دییه ! بکا قصدیکز می وار ؟
 سن اولسون طوقوندیغنی بیلزمیسین ؟ اوتوز سنه در قابومده سین . الله هپکزك
 لایقکزی ویرسین . قالدیرك قالدیرك ! . . « دیر . کمال عظمتله هندی طولماسی
 لنکری ده کیدر . بیچاره خواجه کرچکدن حزین بر صورتنده درونی بر
 (آه ! . .) چکوب آرقه سندن باقه قالیر . بر حرم آغاسی صیره ره رعایه
 باقلاوه یی کتیریر . افندی خشمه بر کره یوزینه باقوب : « به سرسم عرب ! . .
 آج قانونه طاتلیدن باشلانیرمی ؟ ییقیل اورادن ! . . « دینجه بیچاره عرب ییدیکی

[۱] بو حکایه بر فقیرك بر بقاله : « اوسته ! بالک ، یاغک ، یومورطه لرك وارمی ؟ »
 دییه سؤال ایدوب : (اوت ! . .) جوابی آلنجه : (اوپله ایسه نه یه قایغانه یاپوب
 یاپوب ده ییمه یورسین :) دیمه سی صورتیله ده منقولدر .

قامچیرك واهمه سیله ده اُنی چکمدیکی باقلاوه طاباغنی قاپدینی کی بر نفسده قاپوی بولور . کندینی طیشاریه طار آتار . خواجه باقار که اک نفیس یمکدر هپ بر بهانه ایله کری کیدیور . همان قاشینی یاقه لادینی کی موضع مخصوصنده طوران طبله نك باشنه چوکر ، دومانیه مسکدر ، عنبرلر نثار ایتمکده اولان مولوزلی پیلاره قاشیق آتمغه باشلار . خانه صاحبی سفره دن : « افندی ! . کل ! .. نهیه صاووشدك ؟ . » دییه هایقیرنجه : « آمان بکم ! بکا بر آز مهلت



خواجه مرحومك طبله باشنده پیلاره قاشیق آتدیغیدر

ویرك ! . او بر یمکدرك برر جریم وکناهی تعداد ایدیلوب جزاسی تعیین ایدیلنجه به قدر بنده کز شو بزم اسکی دوست ایله بر مقدار کوروشیم . حال خاطر صورهم . دروتنی یوقلایهیم . سز ایشیکزه دوام ایدك ! . « دیمکله حضاردن قهقهه لر باشلا یوب کولوشه اویناشه کمال انبساطله طعامه ابتدار ایله مشلدردر .

﴿لطیفه﴾ خواجه مرحوم بریره مسافر لکه کیتمش، بر آز کچ
 قالش. خانه صاحب لری یمکاری یمیش اولقله برابر خواجه یی ده طعام ایتمش ظن
 ایله مشلر. خواجه یه شربت اکرام ایله یوب طاتلی طاتلی بر مدت قونوشد قن
 صوکره: «الله راحتلق ویرسین!..» دیهرک چکیلوب کیتمشلر. خدمتچی
 غایت مکلف بر یاتاق پاپوب اوده بیراقش کیتمش. خواجه تنها قالنجه آجلنک
 تأثیرینی ده زیاذه حس ایدوب او یقواله کچیرمک ایسته مش ایسه ده قابل دکل، موفق
 اوله مامش. آرتیق بوسبتون سیکیرینه طوقونه رق او طه اوزته سنده دونمکه
 باشلامش. باقش که اوله جق شی دکل، چیلدیره جق. همان کیتمش، مابین قاپوسنی
 وورمش. ایچریدن تلاشله قوشوشوب: «نهر او؟..» دیدیکلرنده خواجه
 بر طور استرحامکارانه ایله: «افندم!..» بنم ایچون تکلف ایتمشسکز. غایت
 مکمل بر یاتاق پامشسکز. حال بوکه بز فقرالقدن یتشمه بر آدمز. بوکی
 مکلف یاتاقلر بزم او یقومزی قاجیریر. سز بکا لطف ایتسه کزده بر کول پیده سی
 احسان بیورورسه کز. دها ممنون قالیرم. بر مقدارینی باشیمک آلتنه یاصدیق،
 باقیسنی ده اوستمه یورغان یاپار، آلتنده میشیل میشیل او یوردم. «دیمشدر.

﴿لطیفه﴾ خواجه نك قاضیلنی هنکامنده بر حریف خصمنی یاقه سندن
 طوته رق حضورینه کتیروب: «افندم! بو آدم بندن رؤیاده شیقیر شیقیر یکر می آچه
 آلدی. شیمدی ایسته یورم. پاره لری می ویرمه یور.» دیر. خواجه مرحوم ابرام
 ایدوب مدعی علیهدن یکر می آچه یی تحصیل ایدر. اوکنده کی چکمه جهیه شیقیر
 شیقیر پاره لری صایدقن صوکره مدعی یه: «آل شوشیقیر تی لری!» مدعی علییه:
 «آل سنده پاره لریکی!.. هایدی بر بریکزك حقته تجاوز ایتمهك؟» دی یوب
 حریف لری صاومش و بو حکمیله حضاری حیران ایله مشدر.

﴿لطیفه﴾ تیمورلنک رؤیاسنده کنیدیسی بیحضورایدنی اولدورورمش.
 خواجه بونی ایشیتدیکی کبی پیلینی پیرتی یی طوبلانیجه طوغری کویسه فرار
 ایتش، اوته کی بریکی: «جانم خواجه افندی!.. بو حریفک ییلدیزی یالکزر
 سنکله باریشه ییلدی. نه یاپسهك، نه دیسهك سکا قیزمایور. مملکته ده فائدهك

طوقونور . نه به بیراقدك كلدك ؟ » دیدکارنده خواجه مرحوم دیمش که :
 «اللهك عنايتله اویانیق ایکن هر نوع معامله سنه ایجابنه کوره مقابله ایدرك اداره
 ایده بیلیرم . هیچ اولمازسه ممکن مرتبه اجتناب واحتراز و احتیاط ایدرم؛ فقط
 رؤیاسنه کیرمامك ، رؤیاسنده آرزوسی وجهله حرکت ایتمك ألمده دكل كه!..»
 ﴿لطیفه﴾ بر مسافرلکده یاتاغی اوزرینه قوجه مان برپاموقلی کیجهلك
 قاووغی [۱] قومشملر . خواجه شویله بر باشنه کچیره جك اولمش . تاغیرتلاغنه قدر
 اینمش . کیجه لكسز یاتمهده آلیشقین اولمادیغندن چوره سنی [۲] چیقاروب



خواجه مرحوم باشنده کی کیجهلك قاووغی اورته سندن بوغوب
 خانه صاحبیه محاوره سیدر

[۱] اسکی زمانده آنالریغز باشلرینه غایت ایری و یوکنن معمول کلاه ویا پاموقلی
 قاووق کییوب اوستنه جسیم هیبتلی صاریق صاردقلری معلومدر . او جسیم سرپوشه
 آلیشان باشلر چییلاق طورده بالطبع تحمل ایده مزمش . بونکچون برده کیجه قاووقلری
 اولوب یاتیرکن باشلرینه کیرلرمش . حالا باشنه کیدنلرمن نادر دکل .
 [۲] (چوره) اطراف کناردیمك اولوب دورت گوشه سی صیرما ویا ایک ایشلنمش
 بیاض مندیله دیرلر .

اورته سندن باغلايه رق کندی کندينه: «يارين چوزر، ينه حاليله بيراقيرم.» ديمش ياتمش. خانه صاحبي خواجه قالمه دن او طه يه طالوب: «اما اويقوها!... خواجه افندی! کوندوزی کيجه يه می اولاشدیردک؟ اصحاب کهفه می قاریشدک؟ ...» دیه رک لا بالیانه ایچری کیرمش. خواجه نک باشنده عجیب الشکل نسنه یی کوروب برآز دقت ایله آکلایه بیلدکدن صوکره: «آ!... خواجه افندی! قاووغی بوغمشسین!..» دینجه خواجه: «نه یاپیم اولاد!.. بن اونی بوغماسه یدم، اونی بوغه جقدی.» دیمش.

﴿لطیفه﴾ بریسی خواجه نک یاننده اوتورورکن قضارا سسلیجه یلنمش. صوکره اکنی بللی ایتمه مک ایچون آیغیله تخته یی غیجیرداتیرمش. خواجه مرحوم دیمشکه: «هایدی سسنی سسسه بکزه تدک دیه لم. یا قوقوسنی نه یاپاجقسین؟»

﴿لطیفه﴾ خواجه مرحومک بقاله الی اوچ آچه بورجی بیریکمش. اوزون زمان ویره مه مش. بر کون خواجه احبابیله برابر چارشیده بر محله اوطورورکن بقال قارشیسنه کچمش، ایکی آیلله اشارت یاپه رق: «پاره لری ویرمرسه ک سنی احبابک یاننده رذیل ایدرم! ..» معناسی آکلاتمق ایسترمش. خواجه باشی اوبرطرفه چویرنجه قارشیسنه کچه رک ینه اشارت یاپوب حاليله طوريله خواجه یی تهدید ایلرمش. خواجه مرحوم بر ایکی دفعه باشی صالایوب دروندن (لاحول) چکمشه ده قارشیسنده کی (لاحول) ایله دفع اولور شیطانلردن اولمادیغندن برتورلو دفع اولوب کیتمز. خواجه آرتیق سسلیجه: «یاربی! سن صبر ویر. بنی شوچیرکفه مسلط ایتمه.» کبی سویله نمکه باشلا یجه احبابی مسئله یی حس ایدرلر. بقال یه اصلیر. آرتق خواجه نک صبری توکهنیر. پرحدت بقالی چاغیریر: «بقال!.. بنم سکا قاچ آچه بورجم وار؟..» - «اللی اوچ!..» - «پک اعلا. یارین کل، یکریمی سکز آچه سنی آل!..» اوبریسی کون کل یکریمسنی ده آ. ایتدیمی قرق سکز!.. کریه نه قالیر؟ طوی بش آچه جغز!.. به تربیه سز، حیاسز حریف!.. بش آچه جغز

ایچون اوتانمازمیسین؟ چارشیده بازارده، یارواغیاره قارشی بی رسوای ایتدکه!
 یازیق سکا! .. دییه اوست پرده دن چیقیشنجه بقال آ کلا یامادینی بوکرفت
 حسابک جهالتندن نشأت ایتدیکنه ذاهب اوله رق محجوبانه چکلش کیتمشدر.



خواجه مرحومك آله جقلیسی ایله غوغا ایتدیکیدر

﴿لطیفه﴾ مشهور تیمورلنک اردوسنده فیلار اولدیغی وحق انکوری
 محاربه سنده برچوق فیلار قولاندیغی معلومدر. بوفیلاردن بریسی ده خواجه نك
 کویته بسله مك ایچون کوندرلش. فیل کویده نه قدر اکیلش شی وارسه
 سیلش سوپورمش، برشی براقماش. بوتون کوبلی آیاقلانوب خواجه بی
 اوکلرینه قاتهرق حضور تیموره شکایت کیتمشلر. ظالمك قورقوسندن یولده بر
 ایکیشر سیویشوب خواجه حضوره داخل اولورکن برده باقشکه کیسه قالماش.
 خواجه کندی کندینه: «سزی طبانسزلر سزی! بی کونده دن آتمقلغی سزه
 کوستریم!» دییوب همان سله سرپه حضوره داخل اولور. تیمور سبب تشریفی

صورنجه : « افدم ! . کویلی قوللریکز کویمه کندی خاص فیللیریکزدن برنی مهمان بویوردیغی کزدن دولایی بنده کزی کوندردیله . بو وسیله ایله مظهر التفات اولدقلرینه عرض شکران ایله یورلر . آنجاق بیچاره دیار غریبده اشی ، کندینه انیس اوله جق بردیشی بولمادیغنی جهته آه وایینی بزی دلخون ایدیور . کویلی قوللریکز بنده کزله برابر کملشله رسده حضوره داخل اولمغه جسارت ایده میورلر . تبشیر داعیانمه انتظار اتمکده درلر . بو وسیله ایله بزی همان خصوصی و تکلیفمنز تبعه کزدن عد بویورورسه کز حشره قدر متدارلغمنز دوام ایدر . « دیمکه پادشاه پک زیاده محظوظ اولوب خواجه یی خلعت وهدایا و احسانه تلطیفاته مستغرق ایش . کویلی یه ده بول بول قورو سلاملر کوندرمش . اراده ایش . درحال خواجه نك کویته بردیشی فیل کوندرلمسی تقرر ایله مش . خواجه بو خبری آلوب اوسته لقله تهلکه یی آتلاتدیغندن و احسانه قوندیغندن دولایی کال نشئه و نشاطله کویه وارنجه کویدیله بریکوب : « آمان خواجه افندی ! نه یاپدک ؟ بزه بر خیرلی خبر ویر . « دیمه لریله خواجه مهم برورطه یی کمال موفقیتله آتلاتانلره مخصوص برغرورله : « مزده ! دیشیمی ده کلییور ! . » دیمشدر [۱] .

﴿ لطیفه ﴾ خواجه زماننده قونیه ده رشوت یمکه مشهور بر قاضی وار ایش . خواجه بر اعلامی تصدیق ایچون قونیه یه کوندروب آیلرجه بکله دیکی و آجی طائلی تا کیدانده بولوندیغنی حالده بر تورلو اعلامی چیقارته مامش . کندیمی قونیه یه کیتمه کجور اولمش . قوجه مان برچوملکی ده هدیه اوله رق تقدیم ایله مش . قاضی چوملکک آغزینی آچوب اعلا رواق بال ایله مالی اولدیغنی کورنجه سلامغه چیقوب خواجه یه غایتله حرمت ایش ودرحال اعلامی تصدیق ایدوب آله ویرمشدر . خواجه اعلامی قوینته صوقوب قاضی یه معنیدار بر نظرله وداع ایدرک کیدر . بر ایکی کون صکره قاضی افندی یه باشقه بریسی طرفدن

[۱] بو حکایه لره هپسی ده باشقه لرینه دخی اسناد ایدیلشدر ؛ فقط اکثریسی ملی اولوب باشقه قوملردن منقول اولمادیغندن خواجه مرحومک اولاسی محتملدر . والعلم عندالله تعالی .

قایماق اهدا اولونمغله همان بال چوملکینه مراجعت ایدر . کیچه بی صالیدیغی کبی
ایکی پارمق بالک آلتی صاپ صاری قویو بالچیق اولدیغی آ کلاشیلیر . قاضی
فنا حالدہ حدتله نوب همان محضری چاغیره رق : « کیت ! چابوق شو کائناتک
مسخره سی نصرالدین دینلن حریفی آلدانه رق ویردیکم اعلامی آل کتیر ! . »
دیر . محضر خواجه بی آقشهره عزیزمت ایچون چارشیدن اوتہ بری آلیرکن بولور .
کمال تعظیمله انکله دکن صوکره : « افندی حضر تلی ! . ناصلسه اعلامک سبک
و ربطنده بر بوزوقلق اولمش . ویریکز قاضی برادریکز همان اصلاح ایدوب
ینه عیناً اعاده ایله یه جکدر ! . » دینجه خواجه بر تبسم مستهزیانه ایله : « بوزوقلق
اعلام شرعیده دکل ، سزک قاضینک عقیده سنده ! [۱] . بزم اعلامی - الله راضی
اولسون - معیتنده کی صلحای مأمورین اصلاح ایله مشدر . جناب حق اونک
کندیسنی اصلاح ایله سون ! » دبیوب همان شهردن چیقمشدر .



[۱] علی روایة «بوزوقلق اعلامده دکل : بال چوملکینده!...» دیمش .

آرد به حمام هوارنده بلبلچی ضانی او طه بائسی (فلک علی افندی)

ارسال الهمشدر :

﴿لطیفه﴾ آق شهر فقراسندن بری آله کچبردیکی قودرو ا کمکه بر قاتیق
تدارکنی دوشونورکن بر آشچی دکانی اوکنه کلیر. باقارکه ات تجربه سی فقییر
فقییر قاینایور. قوقوسی اطرافه غنبرلر نثار ایدیور. همان تجربه باشنه چوکوب



خواجه نك مدعی آشچی به پاره نك سسنی ویردیکیدر


قوباردینی لقمه لری یمک بوغوسنه طوته رق نمندکجه آغزینه آتارمش. آشچی
بو نوع طعام ایدیشه شاشوب اولا کمال سکونتله سیراید. فقیرک اکه کی بیتدیکی
کی یاقه سینه صاریلوب یدیکی یمک پاره سنی ایستر. فقیر، ماده آشچینک بر

لقمه سنی بیه آلمادیغدن بخله پاره ویرمکدن امتناع ایلر . او اشناده خواجه مرحوم آق شهرده حاکم ایش . آشچی فقیری ، حضور حاکمه کوتورور . خواجه مسئله یی دیکله دکن صوکره جیندن بر آوج پاره چیقاروب آشچی یی یاقیننه چاغیریر : « قولایگی ایجه بکاویر ! » دیوب پاره یی شیقیرداتیر . « آل سسنی ! » دیر . آشچی شاشقین شاشقین : « افندی ! بونه بیجم معامله ؟ » دینجه خواجه دیرکه : « تام عدل و حقانیته موافق حکمدیر ! یمکک بوغوسنی صاتان پاره نک سسنی آلیر ! »

﴿ لطفه ﴾ بایرام کیجه سی زوجه سی خواجه نک سهودیگی بر طاتلی یی پیشیرمش . قاری قوجه کولوشه ، اویناشه طاتلی یه مشلر . بر مقداری آرمش . صباحه صاقلامش . براز قونوشوب کیف چاندقن صوکره — صباحلاین ایرکنجه او یانمق اوزره — طاتلی او یقویه طالمش . او اشناده همان خواجه تلاشه زوجه سنی دورتوب : « آمان قاری قالی ! خاطرمه غایت مهم بر شی کلدی . اونوتمغه ، کچیکدیرمکه کلز . زحت اوله جق اما آرتیق مسئله نک اهمیتنه باغشلا ! . آیانگی اوپیم ، شو طاتلی بقیه سنی چابوق کتیری ویر . » دیمکه قادین : « نهدر تلاشک ؟ بویه صبقی فبقی نه اولوبورز ؟ » دیمکه بیله میدان بوله مایوب همان قوشه رق طاتلی طاباغنی کتیریر . خواجه طاتلینک باشنه چوکوب قادینک ده اتکندن چکوب یاننه چو کرته رک ایکی طرفنه باقه دن آیشدیرمغه باشلار . طاتلی یی بیتروب : « اوخ ! . » دیه کنیش بر نفس آلیر . حرمی : « افندی ! . نهدر بو کیجه یاریسی علی العجله طاتلی یمککک ؟ » دیمه صورمش . خواجه دیمش که : « آقشامدن طاتلی بقایاسی قالدی . خیالی دایما ذهنمی طیرمالادیغی جهتله راحت و حضوره او یقو طومادی . دوشوندم طاشیندم . (طعامک خیزلیسی بوغازدن آشای کیده نیدر . یمه یه نک مالی رلر .) قرارینی ویردم ؛ درحال موقع اجرا یه قویدم . هایدی شیمدی عافیتله او یویه لم . » دیمشدر .

(علی رضا) امضائی بر ذات طرفندره :

﴿ لطیفه ﴾ خواجه مرحومك قونیه قاضیسنه یابدیغی اویونی قومشولرندن
بری ده خواجهیه یامش . شویله که : خواجه شهره کیدن بر قومشوسنه بر پارچه
زیتون یاغی ایصهارلامش . حریف شیشهیه ادرار طولدوروب اوسقنه بر پارچه
زیتون یاغی قویهرق کتیرمش . خواجهك اوینه بیراقش . بری طرفدم



خواجه مرحومك كندیسنه اویون ایدن قومشوسنه بالمقابله انفییه دییه
نجاست قوقلاتدیغیدر

خواجهده پاظلیجان آلوب حرمنه ویرمش . یاغ کنبه قالدین طساوایه قویوب
اوجاغه بندیرمکه چتیر چتیر چاتلایو غایت متعفن بر قوقو اشرب ایلر . برده
باقارلرکه صاپ صاری ادرار . خواجه : « خوش ایمدی کلخانی !! » دیسوب

آرمہ سی بر قاچ کون کچر . بر برینہ بکیزر ایکی انفیہ قوطوسی تدارک ایدر .
 برینہ انفیہ قویار . دیکرینہ نجاست توزی قویار . مذکور معذب قومشو غایت
 انفیہ تیریا کیسی ایمش . خواجہ مناسب بر محلدہ طوروب قومشو قارشیدن
 سوکدیککی کبی خواجہ کمال اشتہا ایلہ بر انفیہ چکوب بعدہ اوزون ، درونی بر :
 « اوخ !.. آمان نہ عنبر ایمش . کل کیفم کل ! .. » کبی اشتہایی قابارتہ حق
 سوزلرلہ قومشونک بورنی شپیر شپیر طاملاتوب : « آمان افندی ! ویر باقہ لم
 شو سنک عنبرینی بردہ بز قوقلایہ لم !. » دیمشہدہ خواجہ : « جانم ؛ حاکم
 افندیہ بر پارچہ ہدیہ گلش ، اودہ شو قوطومی طولدوردی ویردی . »
 دیہرک کوسستروب قوینہ قویمش . تریاکی قومشونک بر چوق اصرارندن
 صوکرہ خواجہ قوینندن دیکر قوطوبی چیقاروب طایامش . قومشو پارماغنی
 اولجہ کوکسندہ کی دوکمیہ باصوب چوقورلتش اولغلہ چوقجہ آلوب کمال شوقلہ
 تا بینہ قدر چکنجہ تعفک شدتندن باییلہ حق بر حالہ کلوب پک عجایب بر
 صورتلہ : « اللہ لایقکی ویرسین ، خواجہ بو نہ ؟ » دینجہ خواجہ مرحوم :
 « کجسکی یاغک طورتوسی !... » دیمشدر [۱] .



(مخلصی) امضای بر ذات طرفنرہ :

﴿ لطیفہ ﴾ احبابندن بری بر دعواسنک عاقبتی آ کلامق ایچون خواجہ
 افندیہ کلیر ، مسئلہی اوزون اوزادی آکلاتیر . نہایتندہ : « ناصل افندی !
 حقم یوقی ؟ » دیر . خواجہدہ : « حقلیسین برادر ، حقلیسک ! » دیر .
 خصمی دہ خبری اولمایہرق ایرتہسی کونی خواجہنک خانہسنہ کلیر . اودہ ایشک
 نتیجہسنی آکلامق اوزرہ مسئلہی بالطبع کندندن طرفہ چکہچکہ آکلاتدقدن
 صوکرہ : « خواجہ افندی ! نہ دیرسین ؟ بن حقلی دکلیم ؟. » دیر . خواجہ
 اوکادہ : « های های ! البتہ حقلیسین ! » دیر . تصادفاً قاریسی ہرایی خصمک

لا قیردینسی ده ایشیدوب خواجه نك هرايکینسی ده حقلی چیقاردیغنی طومغله :
 « افندی ! دون قومشو قورد اوغلی کلدی . ایشنی آ کلاتدی ، (حقلیسین!)
 دیدک ؛ خصمی اولان سنجر باشه کلدی ، اوده مرانی آ کلاتدی ، اوکاده
 (حقلیسین!) دیدک . بو ناصل ایش ؟. سن قاضی ایسه ک بن ده بونجه سنه ک
 قاضی قاریسی یم . عین مسئله ده هم دعواچی ، هم خصم ایکیسی بردن حقلی
 اولورمی ؟ » دینجه خواجه مرحوم غایت فتورسزجه : « صحیح قاریبغم ! سن ده
 حقلیسک !.. دیمش .

﴿ لطیفه ﴾ بریسی آقشهر کولنده غسل ایده جک اولور . اوراده
 بولنان خواجه افندی یه : « غسل ائناسنده نه طرفه دونه یم ؟ » دیدکده خواجه
 مرحوم : « البسه ک نه طرفه ایسه او طرفه دون !.. دیمشدر .

﴿ لطیفه ﴾ قاین والدہ سی چاشیر ییقارکن آیاغی قایوب ایرماغه
 دوشدیکنی وهنوز بولنه مدیغنی خواجه مرحومه خبر ویرمشلر . خواجه ایرماغه
 کیروب منبعه طوغرو آراشدیرمغه باشلار . دیرلرکه : « افندی ! هیچ جنازه
 ایرماغک یوقاریسنه طوغرو کیدرمی ؟ صویک آقینتینسنه کوره آلت باشه طوغری
 آراسه ک آ ! » خواجه باشنی صاللا یه رق دیرکه : « آه ... سز اونک نه عکسی
 اولدیغنی بیلمز سکز . اونک هر ایشی ترسدر . بنی بکا براقک ، بن اونک خوینی
 تماميله اوکرندم [۱] . »



نافعه نظارتی مأموریندره مرحوم فکری بکک (لطائف نصرالدین) ده
 نظم ابدیه کی مطایره اولوب نمونه اولور اوزره بذات طرفندره ارسال
 ابدیله ایکی مطایره :

وضع حمل ایلرکن اهلی بر سحر موم طوتارمش خواجه دستنده مکر
 دم کلور مولود مشهودی اولور ذاته بادی خوشودی اولور

[۱] دیگر اوچ حکایه ده وار ایدی که اونلر باشقه سی طرفندن یازیلوب اولجه
 درج اولونمشدر .

دیرکن اول ائشاده مولود دیگر کوردک زاییده بی تعقیب ایدر
 خواجه بو حالی کورنجه ناکهان (بوف..) دیمشده مومی سوندرمش همان
 قومشوقادینلرکه هپ موجود ایش طاریلوب هر بری خواجهیه دیش
 نوری شمسک ویرمه دن آفاقه فر بویله نازک دمدده هیچ مومی سوز
 خواجه دیرکه: بویله یانسه طورسه موم ایده جک شوقی کورن طاشره هجوم [۱]

﴿لطیفه﴾ خواجه مرحومک یمک طولابنه قارینجه لر اوشمش. قاری
 قوجه آیقلامقدن عاجز قالمش. او ائشاده خواجه آبدست آلوب او یله نمازینی
 قلمش. آرادن بر ساعت کچوب ایکندی بی قیلمق اوزره تکرار آبدسته قیام
 ایش. حرمی: «افندی! بش وقت ایچون بش آبدستی آلیئر؟» دینجه
 خواجه مرحوم: «سن او طولابک بر چاره سنه باقازسه ک بر وقت ایچون بش
 آبدست ده آلدیغمز اوله جق!» دیش. [صوکره بو محاوره شویولده تعقیب ایدلشدور].
 حرمی: «ای اما اون قولاج قویودن صو چیقارنجهیه قدر بن نه چکیورم؟
 سنک اوندن خبرک وارمی؟» دیمه سنه دخی خواجه مرحوم: «أوت افندم!
 درونمده کی شیشی ایندیرمک اوزره تنه ایرلر آرامق خصوصنده بن ده نه لر چکیورم.»
 دیش.



(فارسه بکزدنه بیسی) عنوانده آلدیغمز بر طایفه در:

﴿لطیفه﴾ بر آقشام حرمی: «افندی! اوغلاننه اولدی بیلیم. طورماز
 آغلار. نه یاپسه صوصایور. بن عاجز قالدیم. باق، سن بر او یقو نسیخه سیمی
 ویره جکسک؟ یوقسه (اصحاب کهف) دعاسیمی او قویا جقسک! نه یاپا جقسک
 یاپ. هو پلاتوب صیچرا تمه دن قوللرم قویدی. هانده ایسه شارق دوشوب
 بایله جغم.» دییه هیجانله هجوم ایدر. خواجه: «طور باقه لم آیول! او قدر

[۱] دیگر بر حکایه منظومه ده وار ایدی؛ فقط اصل منشوری درون کتابده
 مسطور اولدینی جهته یازیلادی.

تلاش ایتمه. بر چاره‌سنه باقارز. هایدی سن شو کتابی آلدده اوکنه آچیویر. آره صره یاپراقلینی چویر. «دیه آله بر کتاب طوتوشدیرر. قادین غفریت کیسلوب: «افندی! بن اولسم غالبا سکا آلائی کله جک. اوپله یا! سزک ایچون دها اعلا. یکی بر خانم آلیر، بر مدت ده اونک ذوقنی چقاریرسین. اوستده باشده یوق. اوتوز سنه در صاجیمی سوپورکه ایتدم، بو آوه حیاتی صرف ایله دم. بنم اولادم ایسه سنک ده یابانجیک دکل آ. هروقت آلائی سوکمز. «دیه آتشر صاچنجه خواجه: «قاری اگر بنم ده بر بیلدیکم وارسه دیدیکمی یاپ. یوقسه نه یه اوستیمه کله رک نافله کوکلی قیروب حضوریمی بوزیورسین. «دینجه قادین: «پکی بو کتاب نه در؟. نه اوله جق؟ «دیمکله خواجه: «هاه سویله! پشین سببی آکلا؟. صوکره فکریکی سویله. بو (قدوری) کتابیدر. هر نه زمان جامعه درسه باشلارسم بزم ملالر باشلارلر اویوقلامغه. حتی بعضلری ده خورلایوب صایلامغه. بالطبع عقلی باشنده، خیرینی، منفعتی بیلیر، صاچلی صاقلالی، قوجه مان قوجه مان آدمیره سحر کبی تأثیر ایدن بر کتاب؛ مینی مینی چوجوغنی آفیون کبی صیدیره جق. «دیر قادین ناچار قالمقله دیدیکی کبی یاپار. حقیقه خواجه نک برکات انفاسیله چوجوق ده درحال اویور.



سو ایکی مطایبه عسکر یوز باشلارمنده ناظم بک افندی نک همدیه سیر:

﴿لطیفه﴾ خواجه پنجره دن سوقاغی سیر ایدرکن اوزون مدت دربورجی اوده یه مه دیکی آلاجقلیسی قارشیدن سوکدیکنی کوروب حرمنه: «قوزوم خانم! هایدی شو حریفه سکا سویله دیکم وجهله قاپی آرقه سندن جواب ویرده بلکه بر اوزون مدت تعجیزندن قورتولورز. «دیمشده ینه طوره مایوب نه قونوشدقلینی دیکله مک اوزره آرقه سندن کندیسینه کیدر. آلاجقلی قاپی نی چالار. قادین قاپی یی آراتق ایدوب آرقا سندن نه ایسته دیکنی صورار. آلاجقلی: «خانم! ظن ایدرم که آرتق شیمدی یه قدر سسمدن بنم کیم اولدیغم آکلا شیلمشدر.

بو یوزنجی کلیشه سببده ینه شو آلاچق مسئله سیدر . آرتق ایش عیبده کجدی . سن اونی بکا چاغیر ، بر ایکی چفت سوزم وار . « دیمه قاتی قاتی سویله مه سنه مقابل قادین کال رفقله : « افندم ! افندی بوراده دکل . مع مافیه هر نه سویله به جکسه کز بکا سویله به بیلیر سکز . شکایت کزده ده تمامیه حقایق کز ؛ حتی



خواجه مرحوم قای آرقه سندن حرمنک اوموز باشندن باشنی
اوز اتوب آلاچقلی ایله محاوره سیدر

بو کونه سوز ویرن ده بنده کزم ؛ فقط مع التأسف هنوز حاضر لایه مادیق اما یاواش یاواش تدارک ایتمه چالیشه جغز . افندی قابومک اوکنه بر صیره چالی دیکه جک . کویک سورورلری دایما قابومزک اوکندن کچر . اونلر سورندکجه بر خیلی یوک حاصل اولور . اونلری آلوب اکیزه جکز ، بوکه جکز ایلیک یاپوب صاتا جغز . پاره سیله ده بورجمزی اوده به جکز . بر کیسه جکلرک حقنی یمیز . « دینجه حریف پاره سنک تحصیلی قابل اوله مایه جغنی آ کلامقله برابر شوصورت تسویه خوشنه کیتمش اولمالی که اختیار سز کولمکه باشلامش . خواجه

صورتتمز آلا جقلیسنك كولر یوزینی کورونجه طایانامایوب قادینك آرقاسندن
باشنی اوزاته رق آلا جقلی به خطاباً : « کیدی کوفته خور . ایشکی صاعلام قازیغه
باغلادكده شیمدی کیفکدن کیس کیس کولرسین ها !... » دیمشدر [۱].



(همدل مطبعه سی) مؤسسه ندره عاصم بك افندی برادریمز

اهل ایلدیمشدر :

﴿ لطیفه ﴾ خواجه مرحوم قونیه ده ایکن حاکمك حضورینه چیقوب
برقاضیلق طلبنده بولونور . هر طرفك قاضیسی دها یکیدن تعیین اولوندیغندن
آجیق قاضیلق اولمادیغنی سویلر . مرکزده مناسب بر مأموریت ایستر . هر نه
طلب ایله دیسه حاکم افندی برهانه ایله امتناع ایلر ، نهایت خواجه دیرکه :
« افندی حضرتلری ! مادام که بکا بویوک بر حسن توجه کوستریورسکزر .
مادام که مناسب بر ایش اولورسه همه حال اعطا بویوره جفکزی قویاً تأمین
ایله یورسکزر . سزدن بر ایش ایسته یه حکم که آچیقدر . هیچ طالبی ، رقیبی
یوق . حکومت ، اهالی یه ضرری دوقونماز . سزه یاردیمی اولور . حل
ایده مه یه جککزر مشکل ایشلردن سزی قورتاریر . » حاکم افندی : « پکی ! .
نه ایسه او وظیفه سویله ده تعیین ایده ییم ! » دیمکه خواجه : « بنی معیتکزده
کولکه قاضیسی یاپیکز ! .. » دیر . بو عنوان ؛ افندینك ومعیترینك خوشنه
کیدر . افندی : « هایدی سنی کولکه قاضیسی تعیین ایده ییم ! شوراسی ده او طه کدر .
دیهرک براو طه کوسترر . خواجه کال جدیتله کچر کوشیه او طوریر . او کنه
بر چکمه جه قویوب اوزرینه یازی طاقیمی ؛ برخیلی اوراق وضع ایلر . هر کون
وقتیله او طه سنه دوامه باشلار .

بر کون حاکمه بر حریف خصمنك یاقه سندن طوتوب سور وکله یهرک کتیریر .
دیرکه :

[۱] دیگر برحکایه دها وار ایدی که بالاده کچدی .

— افندم ! بوآدم بنم حقمی ویرمه یور .

حاکم — حَقِّک نه در ؟ نه ایسترسین بوآدمدن !

مدعی — بوآدم اغنیادن سراج الدین افدینک اوتوز چکی اودونی یاردی . او هر بالطه یی اوردجه بنده قارشیسنه کچدم ، « هینغ هینغ ! » دییه قوت ویردم ، تشجیع ایتدم [۱] . بو صورتله یاردیم دوقوندی . شیمدی کندیس یاره لری آلدی . بنم خدمتمه مقابل هیچ برشی ویرمه یور . حاکم مدعی علیهدن (هینغ) دیمک ماده سنی سؤال ایدوب جواب تصدیق آلدی . فقط نه کبی بر معامله یاباغنی بیله مده دی . متحیر قالدی . دوشونورکن عقلنه (کولکه قاضیسی) کلدی . بونک اوزرینه مدعی یه :

— بز بوایشه قارشیمایز . بوکبی احکامی شو قارشیکی اوطه ده اوتوران (کولکه قاضیسی) کورور . دیوب محضر باشی ایله اورایه کوندریر . حاکم کندیس ده قاپی پرده سی آرقه سندن معامله یی غایت مراقله دیکله مکّه باشلار .

خواجه دعوائی دیکله دکن سوکره مدعی یه :

— اوت ! حقکدر . نه دیمک ؛ سن قارشیسنده طور . هر بالطه اورولشده بو قدر یورول . تکمیل پاره یی او آلسین . بو اولورمی ؟ مدعی علیه — آمان افندم ! اودونی بن یاردیم . او قارشیمده سیر ایتمکله نه حق اوله بیلیر ؟ .

خواجه — صوص ، سنک عقلک ایرمز . چابوق بکا بر آچه تخته سی کتیرک . آچه تخته سنی کتیررلر . خواجه اودون یاریجیدن پاره لری بالتام آلیر . یوکسکدن برر برر تخته اوزرینه صایار . اودون یارانه : « آل شوپاره لری . » هینغ دینه ده : « هایدی سنده پاره لک سسنی آل . » دیوب بو غریب فصل دعوائه حضاری حیران ایله مشدر .

[۱] بعض ذوانک وقفیه لرینک فوق العاده مکمللکندن بحث ایله دکلی صیره ده دیرلرکه : اوقدر چوق وظیفه لر یامش که قهوه دوکنک « هینغ » دیخیسنه بیله بر مقدار وظیفه تعیین ایله مش . بوندن طولای هرکسه طاقا ووقلق ایتک ، یارانق ایچون اولور اولماز هر نوع کلاملرینی تصدیق ایله بن برکیمسه یه : « قهوه دوکیچینک هینغ دیخیسنی » دیرلر .

﴿لطیفه﴾ ینه بر کون حضور حاکمه ایکی کیشی کلوب شو یوله
دعوا ایدرلر :

مدعی — اقدم ، بو آدم صیرته اودون یوکلنمش کلیوردی ، آياغی
سندله دی ، دوشدی ، ییقیلدی . اودونلر صیرتندن دوکولدی . بکا اودون
یوکنی آرقه سنه قالدیرمقلغمی سویله دی . بنده بو خدمتمه مقابل نه ویره جکنی
صوردم : « هیچ ! . » دیدی . « پکی ! » دیدم ، راضی اولدم . اودوننی
یوکلتم . وعد ایلدیکی « هیچ » ی ایسته دم ، ویرمه دی . شیمدی بوندن
هیچمی ایسترم . بنم حقیقی حق ایدیکز ! .

حاکم بونلری ده ، بو نوع دعوائی فصل ایله مکده حذاققی مجرب بولونان
کولکه قاضیسنه حواله ایلدی . خواجه مرحوم مدعینک دعواسنی دیکله دکن
صکره : « های های ! حقکدر . البته بورجنی ادا ایلمه لی . » دنیوب اوتوردینی
میندر اوزرینه سریلن سجاده بی کوستره رک :

— کل یاوروم ! . یانمه کل . شو اوتوردیغ سجاده بی قالدیر ! نه وار اوراده ؟

— هیچ ! .

— همان آله کیت ! . هایدی هایدی ، هیچ دورمه ! آل حقکی

کیت ایشیکه ! [۱] .



[۱] خواجه مرحومک بو یوله فصل دعوی ایله دیکنه داثر ایکی حکایه دخی

بالاده کچمشدر .

(فارنگزده عزیز) امضایله وارد اولده مطایه لرور :

﴿ لطیفه ﴾ قضارا خواجه مرحومك خانه سنده آتش ظهور ایتمش . قومشولردن بری قوشوب خواجه یی بولش : « امان افندی قوش ! اوك یاتیور . قابوی چالدم ، چالدم هیچ سس ، صدا یوق ؛ یتیش ! » دید کده خواجه هیچ تلاش اثری کوسترمه یه رك : « واللہی برادر ! .. بزم خانمله امور بیتیه یی تقسیم ایله دك . شیمدی بك راحتم . بن خارجدن قازانوب کتیرمه یی درعهده ایله دم . امور داخلیه او بافار ، نه قدر زحمت ایسه کیت حرمه خبر ویر . بن اوخصوصه قاریشمام ! .. » دیمشدر .

﴿ لطیفه ﴾ متصلفلردن بری بر مجلسده بلافاصله دیردیر دیسویله نیرمش . وحضار مجلسك مجهولی اولمیان برچوق دیدی قودی یی بربری آردینه دیزرمش . یچاره خواجه ده بر کوشیه چکیلوب متصل اسرمش . ختام مجلسه قریب او حریف آلا ی ایدر کبی : « افندی حضرتلری ! .. سز هیچ آغز یکنزی آچایورسیکنز . » دینجه خواجه : « آمان برادر ! نه سویلیورسین ؟ متصل آغزیمی آچییوردم . کورمه دکمی . » دیمشدر .

﴿ لطیفه ﴾ برکون بر قادین یانسه کلینی آلوب خواجه نك زیارتنه کلهر ك یانه یاقیله چوققلری اولمادیغندن بحث ایدرمش . کلین ده حزین بر طورله اوکنه باقارمش . قاین آنا : « آه افندی حضرتلری ! .. صباح اولدیمی . قوجه سی بر طرفه ، قاریسی بر طرفه چکیله رك او یله محزون محزون اوتوروشلری وارکه ، یورکلر پارچه پارچه اولور . اورته ده جیویل جیویل متصل سویله نیر . قوشار تیندیر ، بر اکلنجه ، بر جانی ببك اولمایچه اوك نشئه سی کله یور . اوك ایچی صوی چکلمش دکیمن کیدر . سز چوق شی بیلیرسیکنز . الله عشقنه اولسون بر عزیمت می اوقویه جقسکز ؟ بر توتسومی ویره جکسیکنز ؟ بر علاجی تعریف ایله یه جکسیکنز ؟ حاصلی بزم بر چاره منی کور . » طرزنده

سوزلرله خواجهی حقیقه متاثر ایتشلر . خواجه مرحوم آشانی یوقاری بیان
ملاحظه دن صوکره یوزینی کلین خانمه دونه رک : « قیزم ! عجباً بو حال سزه
مورتمیدر . والده کزکده هیچ چوجوغی اولمادیمدی عجباً ! » دیمشدر .



(فندقبیره محمد ضیا) امضاسیده کلن لطائفدر :

﴿ لطیفه ﴾ خواجه برای تحصیل قونییه کیتدیکندن آرقداشی اوزمانه
قدر کورمدیکی مناره لری کوروب کمال حیرتله : « عجباً بونی ناصل یاپارلر ؟ »
دینجه خواجه مرحوم : « بيلمه یورمیسین آیول ؟ قویولرک ایچنی طیشنه
چویریرلر ! » دیمش [۱] .

﴿ لطیفه ﴾ خواجه مرحوم بر مجلس صحبتده ساقیزن چیکنه یورمش .
« یمکه بویورک ! » دیمشلر . هر کسله برابر خواجهده یمک او طه سنه کیدرکن
ساقیزی آغزندن چیقاروب بورننک اوچنه یاپیشدیرمش . « افندی ! . نهیه
اوله یاپدک ؟ » دیدکلرنده فقرانک مالی کوزینک اوکنده طورمالیدر . «
جواب حکیمانہ سنی ویرمشدر .

﴿ لطیفه ﴾ خواجه مرحوم مملکتی اولان سیوری حصاردن آق شهره
ایلک کلدیکنده او قوجه مان کولی کورنجه : « باقیکز، شوراسی کویک طاوارلرینی
اوتلاتمی ایچون نه اعلا مرعا ایش . نه فائده که بوتون صوباصمش . » دیمش .
﴿ لطیفه ﴾ خواجه بریلکن سفینه سیله سیاحت ایدیورمش . یولده
شدتلی بر فیرطینه چیقمش . یلکنلر پارالانمش . طائفه لر دیره که طیرمانوب

[۱] عمید زاکانی لطائفنده دیرکه : ایکی قزوینی بر شهره کیدوب مناره لری
کوردیکلرنده بریسی : « آتالریمک بویلی آلتمش آرشین اوزون دیدکاری حقیقه
طوغری ایش باقیکز شونلری یاپانلر طبیعی نه قدر اوزون بویلی اوله جقلا ؟ » دیکله
آرقه داشی : « به بودالا هیچ او قدر بوی اولوری ؟ بونلری اولا یاتیق اوله رق یرده
یاپیشلر . صوکره بو صورتله دیکه قویمشلر . »

یلکسنلری باغلامغه اوغراشدق لرینی خواجه کورنجه : « آیول ، بوکمی دینندن
زیلایور . سز تپه سیله اوغراشیدورسیکیز . کینک صالاناماسنی ایسته یورسه کز
دینندن باغلا ییکیز ! » دیمشدر .

﴿ لطیفه ﴾ خواجه مرحومک بریسنده آله جفی وارمش . بر صباح
خیلی اوزاق محله اولان خاه سنه کیدوب مطلوبی ایسترسده حریف
اون پاره سی دخی اولدیغنی بیان ایدر . خواجه خائب و خاسر دوزر .
یولده فنا حالد آجیمیر . بر اکمکی دکانه تصادف ایدر که نار کی قیزارمش
صیجاق صیجاق اکمکر یایلمش . اچلقدن کوزی دوشمش اولغله کنارده بولونان
بر اکمکی آلوب ایلریده بر سوکود آغاچک کولکه سنه اتورهرق کوزینی
سوی سباه دیکوب : « الهی بیلرسک که آجم و بر پاره یه محتاجم . ینه بیلرسین که
فلان شخصده شوقدر غروش آله جغم وار . سن عالم الغیسیین وهر شیئه
قادر سین ، آرتیق او حرفده کی آله جغمه محسوباً ایکی پاره آلده شواکمکی به
ویر . » دیه نیاز ایله دیکدن صوکره کمال تهاکله قوجه قوجه لقمه لری معدیه
ایندرمکه باشلامشدر [۱] .

اکمکی مسئله نی اوکره نجه خواجه یه بر مقدار یاردیم ایدرک نمون ایله مشدر .

[۱] بو حکایه کتب لطائفده شو یولده مسطوردر . بر بکتاشی فقیرینک الله بر
یکرمی پاره لق متالیک کچمش . بقالک اوکنه فیلاتوب اون پاره لق پینیر ایسته مش .
آلمش ، کری اون پاره طلب ایله دیسه ده : (سن بکا اون پاره ویردک) . دیه درویشی
قوغمش . درویش رجا اتمش ، عین وقسم ایله مشه ده بقال اینانامش . بیچاره النده پینیرله
قالمش . (آه کاشکه اولجه اکمک آله یدم) . دیه دوشونورکن عقلنه برشی کلمش .
کوزلری پارلامش . قارشیده کی فروندن اکمک چیقور ، هرکس ماحشر الله قاپیشورمش .
هان بوده او غلبه لغه قاریمش کمال جسارتله اکمکی به : (ویر اورادن بر اکمک ؟) .
دیوب ایله پاره فیلاتیر کی یامش . آلمش یوروی ویرمش . اکمکی : (درویش
بابا ؟ هانی اونلق !) دیدیسه ده شدتله : (ایسته ویردم یا !) دیمکه اطرافدن :
(ویردی ، ویردی ، بزده کوردک) . دیمشدر . ایش بتمش . شیمدی فقیر بکتاشی
قارشیک دیوارک کولکه سنه چکیلوب هم پینیر اکمکی طیقینیر . همده دیرمش که :
« یاربی ! ایشک حقیقتی سن بیلرسین ! بقالدن آل ، اکمکی به ویر . »

﴿ لطیفه ﴾ خواجه نك صوفته لني زمانده بر آرهلق سلاح طاشمه سی
 شدیداً منع ایدلش ایمش. ناصلسه او آرهلق خواجه مدرسه یه کیدر کن جبه سنك
 آلتنده قوجه مان قولاقلی بر یاتاغان بیجانی ظهور ایدر . خواجه نی چال یاقه
 صو باشینك حضورینه کوتورورلر . صو باشی غضوبانه : « افندی ! سن
 حکومتك یاساغنی ایشیتهمه دکمی ده بویله کوبه کوندوز بو قوجه مان علامتی
 طاشیدیر سین . » دیمکه خواجه مرحوم : « افندم ! بن بونکه درس باقار کن
 کتابك یا کاشلرینی دوزلتیورم . » دیمش صو باشی دها زیاده غضبه کله رك :
 « بنمله اکه نیورمیسین ؟ هیچ بو قدر علامتله یا کاش دوزلتیلیر می ؟ » دینجه
 خواجه دیمش که : « آه آغا حضر تلی ! . بعضاً اویله یا کاشلر اولیور که بویله
 آز کلیور [۱] . »

﴿ لطیفه ﴾ بر قاچ پاپاس کلوب برمشکلری اولدیغندن بحث ایلده دکلرنده
 خواجه مرحوم : « سویله ییکز ! . الله کریمدر ! . » دیمکه پاپاسلر : « سزك
 پیغمبر ییکز معراج ایچون کوك یوزینه ناصل چقیدی ؟ . » دیمه لر یله مرحوم
 هیچ تردد ایتمکسزین : « سزك پیغمبر ییکز دردنجی قات کو که چیقار کن
 قورولان زردباندن ! » دیبه رك خصمی الزام ایله مشدر [۲] .



مکتبی (م . نراد) انعامیلده وارد اولمشدر :

﴿ لطیفه ﴾ خواجه مرحوم مرکنه اودون یوکلتمش، اوستنه بنبوب،
 آیاقلرینی اوزنکی یه صوقه رق آیاقدہ دیم دیک طورورمنس . محله چو جوقلری
 خواجه نی بو حالدہ کیدر کن کوروب بر برینه کوستره رك آرقه سنه طوبلانمشلر
 قهقهه ایلہ کولرلر مش . ایچلرندن بری : « خواجه افندی ! . نه یه حیوانك

[۱] بو حکایه ده لطائف کتابلرنده بر صوفته یه اسناد ایدلشدیر .

[۲] بو حکایه نی بر بکتابشی یه ده اسناد ایدرلر . علی روایتہ فؤاد پاشا مرحوم

پارس سیاحتنده قرالچہ نك سؤالنه جواباً سویله مش ایمش .

اوسته اوتوروبده راحت راحت کیتمه یورسین ! . « دیمکه خواجه مرحوم دیمش که : « اولادم ! انصاف ! حیوانک صیرتنده کی یوک یتیشمه یورمش کبی برده اولانجه آغیرلغمی اوزرینه می یوکه تهیم ؟ آیاغمی یردن قالدیردینی نه مروت ! »



خواجه نك يالکز آياقلىنى اوزنكى يه باصوب مرکب اوزرنده آياقده طورديغيدر

عشاقه دېونه عموميه مأمورى اسماعيل حقى افندى زاده

مسين هاجد بك كوندرمىشر :

﴿ لطيفه ﴾ خواجه مرحوم بر مجلسده قونوشورکن سوز حلوا صحبته منجر اولمش . خواجه : « بر قاچ سنه دنبری جانم بر (لوزينه [۱] حلواسی) ایستر . بر تورلو پیشیروبده بیه مه دم . « دیمش . « بو اوقدر مشکل

[۱] (لوز) بادم معناسنه اولقله (لوزينه) بادم حلواسی دیمک اولور .

بر شی دکلدی . نه به پیشیرمه دك ؟ « دیدکلرنده زواللی خواجه : « اون بولوندیسه
یاغ بولونمادی ، یاغ بولوندیسه اون بولونمادی . « دیش . « ای جانم ! . بونجه
زماندر بونلری بر آره به کتیرمه دکی ؟ « دیه صورمالرینه جواباً دخی : « واقعا
هپسی بر آرایه کلدیکی ده اولدی اما ، قدر بویا ! او قتده بن بولونمادم . «
دیش .

[محرر فقیر استادمدن بو حکایه بی شوبله ضبط ایتشدم :

خواجه مرحوم یوغوردی پکمز قاریشدیروب ده یه سنی پک سه ورمش [۱] .
کندی کندینه آره صره : « یوغورت بولونور ، پکمز بولونماز . پکمز
بولونور ، یوغورت بولونماز . ایکسی ده بولونور ، فقط او وقتده بن بولونمام . «
دیرمش .]

❖ لطیفه ❖ خواجه مرحوم یازک صیجاغنده اشکنه بینمش بر کویه
کیدییورمش . یوله بویوک بر جویز آغاچک آلتنده مرکبدن اینوب حیوانی
بر داله باغلامش . کندیسیده آغاچک دیگر بر جهته قویو بر کولکویه چکلمش
قاووغنی باشندن چیقاروب کوکسی ، باغریخی آچهرق هم سرینله یور ، همده
ترینی قوروتیورمش . او ائنده تارلاده کی قوجه قوجه حلواجی قاباقرینه باقش ،
بر آراق باشی قالدیروب جویز دانه لرینه ده کورمش . کندی کندینه : « یاربی ! .
شو ایپ اینجه چک اوتده قوجه مان قوزوکی قاباقر خلق ایتمشین . شودالری
کوک یوزینه چیقمش ، چادری بر ئه ولهک [۲] یری قابلامش اولان ؛ بدنی
ایکی کیشی قوجاقلامه دن عاجز بولونان جویز آغاچنده ده جئنه سنه کوره افاق
یمیشل یار ایتمشین . باقیلسه بو قوجه قوجه قاباقر جویز آغاچنده ، جویز
دانه لریده قاقاق اوتندن بیتمه سی مناسب اولوردی . « دیرکن مکر او ائنده بر
قارغده بر جویزی او یوب ایچنی یمکه اوغراشیورمش . جویز قابوغندن فیرلایوب
سرعتله اینرکن ناصلسه تام خواجه نک آئنه راست کلیر . خواجه نک کوزندن

[۱] یوغوردی پکمزله برابر ایجه قاریشدیرمقدن حاصل اولان شیئه : « صاقصاغان

بنی « دیرلر .

[۲] (ئه ولهک) بر ئه ولیک یعنی بر او یاهه جق قادار عرصه دیمکدرکه بر

(دونوم) ک دورته بریدر .

دهشتلی بر شیمشک صیچرار . بر کره : « وای !.. » دیوب ایکی ایله قفاسنی
طوتار . همان قاووغنی بولوب صیقی فیقی باشنه کچیریر . قلبنی شدتلی بر الله
قورقوسی قاپلایوب : « توبه یاربی !. برداهاسنک ایشکه قاریشمام . هر نه یار اتمشه ک
هپسندہ بر حکمت وار . الله صاقلاسین ! شیمدی آغاجده جویریرینه قاباق



خواجه نك باشنه جویر دوشوب تالم ایله دیکیدر

بولونمش اولسهیدی بزم توپسز یالین قات قفا طوزلان بوز اولوردی !» دیمشدر .
رحمة الله علیه .

[بو حکایه نی بر بکتاشی یده اسناد ایدر لر .]

سلاطینکی (احمد نیازی) بک افندی اهدا ایلمشدر :

﴿ لطیفه ﴾ خواجه مرحوم بر کون باغنه کیتمکده ایکن یولده ایکی چوجوغنک بر قارغه ایچون غوغا ایتمکده اولدقلرینی وآره لرنده بی چاره قارغهنک جان چکیشدیکنی کورور . یانلرینه یاقلاشهرق : « عیدر اوغللرم !.. سوقاق اورتہ سنده غوغا ایتمیک . هم نه در او بیچاره حیوانی چکیشدیریورسکز ؟ » دینجه ذاتاً دائماً کندیلرینه عقل خواجه سی ، کوشه قاضیسی اتخاذایده کلدکلری سومیلی ، کولونچ یوزلی خواجه بی قارشیلرنده کورمه لرله ایکیسی ده سوينوب : « هاه ، تمام خواجه افندی !. شیمدی سن الله ایچون سويله . بو قارغہ بی شو آغاجک اوزرنده کوردک . بن مردیوه نلک ایتدم . بو چیقدی . حاضرجه آلی ویردی . شیمدی بکا : « قارغہ بی بن طوتم . سنک نه حقلک وار ؟ » دیبور . بن صیرتمه باصدیرمه سه یدم . بونک شو آغاجه چقمه سنک امکانی وارمیدی ؟ دکلکی خواجه جغم . « دیر دیمز آرقه داشی اورادن آتیلوب : « عفو ایدرسین سن اونی !. سن بی بیلیرمیسک ؟ . بن طیشندن مناره یه چیقارم . سن حاضر مردیوه نلک ایتدک !. بن ده بیندم ، چیقدم . هم اصل ایش اوراده دکل !. بر قوش طوتمق ، بر یمش قوبارمق دیمک دکل . آواناقلنک لزومی یوق ! او پیررررر دیر اوچی ویرر . آکلادکی ؟. بن قارغہ بی کوردم . کندی آتماجالغمه کووئندم . یاواشجه یاپراق قیمیلدآتمه دن ییلان کبی دالره صاریلدم . دالک تا اوجندن شکاریمی یاقلاادم . سن یردن قورباغه بیله طوتمغه قادر دکلسین !. » دینجه خواجه مرحوم کولونچ صورائیلہ ذکی چوجوغنک چاچارونلغنی حیران حیران بر مدت دیکله دکن صوکره کوله رک : « سنک افاده کده بیتدیمی ؟ . پشین شو بیچاره حیوانی چکیشدیرمه یک . بکا ویرکده بنم حکممه راضی اولویورسه کز سوزیمی دینلہ یین !. هله سن آووقات افندی ! قارغہ بی حق ایتک ایچون بر طوربه لافی جویر بوشالدر کبی غیر غیر غیر غیر بر نفسده بیتیردیکک حالده هیچ کندی سوزینه دقت ایتمه یورسین . قارغه یمیش دکل ایش . یمیش دکلده بوستان پاظامی جانمیدرکه بر اوجندن سن ، بر

اوچندن او بری صیم صیقی طوتمش چکیشدیریورسکز . بن یتشمه سه یدم ، نه سکا قاله جقدی ؟ نه اوکا . شو دیوار دینده قیدسزجه اوکله اویقوسی چکن قاره باشه نصیب اوله جقدی . بو قارغه نه سنک ، نه اونک . آتی یتمز که ایکی به تقسیم ایدیم . بو قارغه خواجه کزه لازمدر . هله سز آلك شو پاره لری ده بونی بکا صاتک . « دیهرک ایکسینک ائنده برر پاره ویرنجه چوجوقلر هوپلا یه رق ؛ صیچرایارق چارشینک یولی طوتدیلر . خواجه زوالی حیوانی



خواجه نك چوجوقلردن آلدینی قارغه ایله مانده بی اولادیغیدر

صالی ویردی . حال بو که قارغه جغز ؛ یا ایکی ساعت مینجیقلامه دن ویاخود باشقه بر عارضه دن بی تاب قالدینی جهتله بر مقدار اوچه بیلوب حتی ایلریده کی آغاجه بیله یتشمه میهرک اوراده یا یلقده اولان مانده نك ایکی بوینوزی آره سنه قونار . دروننده کی نشئه ونشاط ایستیمنی فوران ایتدیرمکه بهانه آرایان خواجه افندی یوندن ده نشئه یاب اولوب : « آه بزم آرسلان شاهینم ! . آفرین سکا ! . باق

نه كوزل شكار ياقه لادی ! » ديه سوينه رك كيدوب بر آله خسته قارغهي آير،
 ديكر آله بر آغاچ آلوب اوكنه مانده بي قاتهرق خانه سنه طيقار. بو حالي كوره ن
 قونوقومش-و طرف طرف مانده بي آرامقدين بونالمش و مالي بولمقدين مأيوس
 قالمش اولان مانده صاحبي خبردار ايتمه لريله درعقب خواجه نك خانه سنه كيدر
 قاپويي چالار ، خواجه قاپويي كنديسي آچوب : « نه ايسترسين ؟ . » ديه
 سؤالنه حريف حدتله : « ايسته ديكم شئي بك اعلا بيليرسين ! نه حقله بنم
 مانده مي سوردك ، كتيردكده آقشامه قدر آره يه جنم ديه طابانلرمي پاتالتمغه ،
 باشيمي دوندورمكه سبب اولدك ؟ » دينجه خواجه اوندن ده ا شديد برطورله :
 « باقسه كا بكا! . بوراسي طاغ باشي دكل . بوراده محكمه وار، حاكم وار، بندن
 بر مطلوبك وارسه حاكمه شكاييت ايده بيليرسين . دنيانك هر كوشه سنده آوجليق
 مباحدر . بن چوجوقلردن تمام ايكي پاره يه معلم برقارغه آلدن . شكاره صالدم .
 اللهك صحراسنده بر مانده ياقالادی . شيمدي سن كلوبده بر لافله مانده
 بنمدر . دير ديمز بن خينبلمي يم كه آل ديه يمه وي ري ويره يم . هايدي ايشيكه ! .. »
 ديه رك حريقي اوغرا تدي ، خيزله قاپويي اوزرينه قاپادی . مانده صاحبي ايرتسي
 كون حاكمه مراجعت ايله مكله حاكم خواجه بي جلب ايدر . خواجه اولديني
 كبي تفصيلاتيله آكلاتير . آنحق بر چوملك مانده ياغي كوندره جكني اثنای
 كلامده حاكمه اشراب ايلر . حاكم خواجه نك لهنده حكيم ايلر . واقعا ايرتسي
 كون خواجه طرفندن دورت قوللي قوجه مان بر چوملك كلير . حاكم كال
 اشها ايله ياغك نمونه سني كورمك اوزره باشقه بر يردن هديه ايدلن يومورطه لري
 قيره رق نفيس بر صباح طعامي ياپار . كيلاره دخي ويره رك صباح آقشام
 غدا سنده كندی ايله چوملكدن چيقارمقدين دخي باشقه ذوق طويار . آنحق
 اوچنچي كوني صباحلن قاشيني صالديرديني كبي ياغك آلتنده قويو يشيل غايت
 لزوجتلي مانده پيسلكي چيچنجه قاضي افندي پر آتش كسيلوب همان محضري
 جلب ايدرك : « شيمدي خواجه نصرالدين بولوب بكا كتيرمه لي ! . » امري
 ويردي . خواجه ذاتاً منتظر اولديغندن در حال اجابت ايتدي . حاكم غضوبانه :
 « افندي ! بن بوكونكي كونده بو بلده نك حاكمي اولديغ حالد سنك نه حقل
 واردركه بكا پيسلك يديريورسين ؟ » دينجه خواجه غايت سرين قانليغيله :

« افندی حضرتلری ! . او قدر تلاش ایتمه . سن او ... نی بوکون ییمه دك .
 بوندن اوچ کون اول ییدك . هیچ ایکی پاره لق بر طوپال قارغه ایله مرعاده
 اوتلایان ایکی یوز آقچه لق قوجه مان مانده آولانیرمی ! . سن اونی هانکی
 شریعتیه اویدوردكده بنم لهمه حکم ایتدك ؟ » . دییه مکمل حقیقیشوب قاضی بی
 فنا حالد بوزمشدر .

[قارغه حکایه سی مملکتده شایع اوله رق باشده قاضی افندی اولمق اوزره
 چوق کیمسه لر بو وقعهدن عبرت المشردر . بالطبع مانده بی ده صاحبته تسلیم
 ایدرك کولکنی خوش ایتمشدر .]

﴿ لطیفه ﴾ تیمورلنکه بریسی کوسترشی ایری بر اشك هدیه ایدر .
 تیمور محظوظ اولوب اطرافنده بولونان مدهنلرده هر بری برشی سویله یهرك
 اشکی دنیاده مثلی کورولمدهك بر مخلوق عجیب مرتبه سینه چیقاردقلری صیره ده
 نوبت کلام خواجهیه کلوب : « بن بو مخلوق زیاده بویوک بر استعداد کور یوزم .
 اومارم که تعلیمله اوقومه بیله او کرمنك قابل اوله جق ! » دینجه تیمور :
 « خواجه اگر سویله برهنر او کرده بیلیرسهك سنی احسانه مستغرق ایدرم . یوق
 اگر سعدینك کلهستاننده سویله دیکی وجهله : « بر وقت تحفردن بری اشکه
 لاقیردی او کرتمکی مراق ایتمش . بوایشه او غراشدیغنی بر حکیم ایشیدهرك
 دیمش : (سن بهایمه لاقیردی او کرده مزسین . انسان ایسهك سن اوندن
 سکوت او کره ن [۱] .) فقرسنه ماصدق اولورسهك یالکنز سنك احمقلگی اورته یه
 قویمقله قلام . سکا بر اشك جزاسی ترتیب ایدرم . « دیوب خواجه مرحوم :
 « حضور سینه کزده باطل دعواده بولونمق یا احمقلغه ، یا خود دلیلکه دلالت
 ایدر . بن ایسه هنوز نه حیاتیله اویون اوینایان احمقردنم ، نه ده دلیلرك تیمار
 خانهك صویندنم . البته بر بیلدیکم واردركه عرض ایدیورم . آنجق بکا اوچ
 آی مهلت و یروب شو قدر آقچه ده مصرفه بذل همت ایله مهلی ، آلت طرفنی بکا
 بیراقالی . » دیمکله هر حالده تحف بر نتیجه یه واصل اوله جق اولان بوایش

[۱] خری را ابلهی تعلیمی داد
 حکیمی گفتش ای احق چه کوشی
 برو بریست آن کس عمر دایم
 درین سودا بترس از لوم لایم
 نیاموزد بهایم از تو گفتار
 تو خاموشی پیاموز از بهایم

ایچون خواجه نك ایسته دكاری ویرلدی. خواجه مرحوم تام اوچ آی بول بول
 ییوب ایچوب مرکه صباح آقشام لازم کلن تعلیمی اجرا ایله دی. مدت ییشجه
 مناسب بر میدانده خواجه نك ترتیبیله مجلس قورولوب معین ساعتده زر دوزپالان
 وسیم دوز غاشیه ایله سوسلنمش اولان حمار عجوبه کردار یولاری خواجه نك
 آئنده اولدینی حالد هرا یکی طرفه التفات ایدرك اورتیه قونولان اسکمله نك
 اوزرنده کی دفتره متوجه اولور. همان عجله دلیلله صحیفه لری چویرمکه باشلا یوب
 بر محله کلنجه خواجه یه یوزینی چویروب حزین بر چهره ایله: « انکرا صوات »
 اولان سسیله آکیرمغه باشلامغه حضار تعجبله قاریشیق برقهقهه صالی ویردیلر.
 امیر تیمور پك زیاده اکلنوب خواجه یه خیلی عطیه احسان ایله دكدن صوکره
 اشکه بوهنری ناصل او کرتدیکنی صورمغه خواجه بوجه آتی تشریح ایلدی:
 اشکی بزم اوه کوتوردیکم کون همان چارشی یه کیدوب یوز قدر تیرشه
 کاغدی آلم [۱]. مجله کوتوروب قوجه مان بر دفتر یاپدیردم. هر صحیفه نك
 آره سنه آرپه دوکدم. بش اون کون کونده برقاچ دفعه صحیفه لری کندم آچهرق
 کوستردم. او آرپه لری طویلادی. اون بش کون صوکره بعض کره آچقیدوروب
 دفتری اوکنه قویدم. بر قاچنی بن آچدم. حیوان عجله ایدوب کندیسیده
 آچغه باشلادی. فقط بعض کره اشک کی طوتدینی جهتله کندی کندینه
 آچنی برتورلو ادراک ایدمه یوردی. محجوبیتی موجب اولماسون دیه بافی زمانی
 ادمانه صرف ایله دم. آچقیدینی زمانلرده اوراقی دلیلله غایت منتظم آچار اولدی.
 بعض وقت ایسه آرپه قومادیغمدن صحیفه لری قاریشدیروبد بوشه چقیدینی وقت
 آچلق زوریه ظیرلامغه باشلاردی. هنرمی بن ده بکنهرك آخیره کندی کندیمه
 کولردم. بنمچون بواعلا بر اکلنجه اولدی. علی الخصوص که بو وسیله ایله
 برخیلی پاره آله کچوب کمال رفاهله ینیلوب ایچیلوردی. ایشته حضوریکزده
 ویردیکي الك صوك امتحان ایکی کونلك آچلغك اثریدرکه بوتون اوراقی
 قاریشدیروبد آرپه بولامانجه بکا باقارق جان و کوکلدن ظیرلادی. میدانه
 چیقاریلان یازیلی دفتر صنعتکارک تنویر صنعت ایچون یازمغه مجبور اولدینی

[۱] (تیرشه) دریجک دیمکدرکه کاغذ احداثدن اول جیلان دریسندن دباغله

حصوله کلن غایت انفس کاغددر .

دفتردر . آخیره کی دفتره شکلاً بکزر سده بالطبع اونده یازی یوقدی .
یالکزر سطره بکزر قارغه جق بورغه جقلردن عبارتدی .

[ذیل . اومجلسده : « بونه بیچیم اوقومه در ؟ بز بوندن برشی آکلایه مادیق .
اشک دفترك صحیفه لرینی آجدی . بر محله کلنجه اوراده ظیرلادی . نه چیقدی
بوندن ؟ » دیدکلری خواجه نك مسموعی اولنجه : « اشک اوقوماسی بوقدر
اولور . بوندن زیاده آکلامق آرامزده نسبت جنسیه بولونمغه ! توقف ایدر . »
جواب حکیمانه سنده بولونمشدر .

﴿ لطیفه ﴾ تجارلردن بری دیگر بر مملکته کیدرکن یول اوغراغی
اولان برکاروانسرایه [۱] اینر . اوآقشام خانجی بوکا بر طاووق ایکی یومورطه
یاریم اکمک ویرر ، آینه ده بر طوتام اوت دوکر . صاحبین ایرکندن یوله
کیده جکشدن خانجی به : « حسابمزی عودتده کورورز ! » دیر قالقار ، کیدر .
اوج آی صوکره عودتده خانه اوغرایوب ینه تاجره طاووق یومورطه ، آینه
اوت ویردکن صوکره ایرته سی کون کیدرکن : « ای کل باقلم خانجی بابا ! .
بورجمز قاچ پاره ؟ » دینجه خانجی : « والله ؛ حسابمز براز اوزونجه اوله جق
اما اگر سز بره بشه باقمازسه کز قولایجه اویوشورز . هایدی حاللندن ایکی
یوز آچه ویرده یوزیکک آقلغیه چیق کیت ! شوشرطله که هرکیدیش کلیدشه
بز اوغرامالی ها ! .. » دینجه پاره نك اولدیغنی وپاره ناصل قازانیلدیغنی
پك ای بیلن تاجر حیرتده قاله رق : « آمان خانجی بابا ! عقلنیمی بوزدک ،
یوقسه بر سوء نیتکمی وار ؟ . ایکی طاووقله دورت یومورطه ایکی یوزآچه !

[۱] (کاروانسرای) — کاروان آوی دیمکدرکه غایت ایشک جاده لرده اصحاب
خیرات طرفندن دوه آیاغیله هرطوقوز ساعت مسافده اولان محله کارگیر اوله رق غایت
محکم وبویوک برطام یاییلمشدر . درونی آخیر ایله مهمان اقامت ایده جک بر ایکی اوطه
اولقی اوزره بولونمشدر . بونلرک اکثریسی لزوم عسکریه بئه طرف حکومتدن بنا
ایدلمشدر . یوله تیپی به ، فیرطینه به دوچار اولانلر ایچون عادتاً حیاتی محافظه ایدن بر
ملجأ مبارک حکمنی آلیر . محرم حقیر بالنفس تجربه ایله مشدر . کاروان - ده قاطر
قطاریله یوک طاشیپانلره ، اشیاسی طاشیپانلر تجار قافله سنه یرینه کوره اطلاق اولنور .
بو مقامده معلم ناجی مرحومک (باقک شمندوفره ، برده کاروانی کورک) مصرای
خاطره کلیر .

بونه دیمک ؟ . « دیمه سنه جواباً خانجی ده : « حسابك براز اوزونجه اوله جغنی سویله مشدم آ ! شیمدی عرض ایده یم . مسئله آینه کبی میدانه چیقسین ده او وقت بکا طاریلغه حقکیز اولمادیغی آ کلاشیلیر . سزك بوندن اوچ ای اول ییدیککیز طاووق هر کون بر یومورطه یومورطلاسه آیده شوقدر یومورطه ایدر . اونلر قولوچقه یه یاتیرلقله بوقدر پیلیدچ اولورکه بالطبع اونلر ده طاووق [۱] اوله رق ینه یومورطه یومورطلازلردی . عودتده یسدکلریکزده بونلره علاوه ایدیلوب آرادن اوچ سنه کچمه سی فرض ایدیلنجه عظیم برطاووق ماندیره سی اولورکه بوندن یوزلرجه آچه قازانیله جغنی سزك اعلا حساب ایده بیلیرسکیز . بن ایشی قیصه کسوب ایکی یوز آچه یه راضی اولدم که بو حسابجه سرمایه سی بیه دکلدیر . سز طاووقلری ، یومورطه لری ییوب تلف ایله مکله بوتناسلی قطع ایلش اولدیکیز . ایشته اونك اذدن اجرتی بالطبع بوقدر اولسون طوته جغنی درکاردر ! » دینجه بحث اوزایوب ایش محاکمه یه طایندی . خانجی ؛ شهره بابانجی ، فقط غایت سمیز شاشقین بر قاز کلدیکی جهتله مشترکاً استفاده ایللرینی حاکمه لسان مناسبله آ کلاتمش اولغله اثنای مرافعه ده حاکم تاجر : « سن ییدیکک طاووقلری ، یومورطه لری خانجی ایله بازارلق ایتدکمی ؟ . دیدی . تاجر : « بک دکر سز رش ی اولدیغندن ، عودتده ینه اورایه اوغرایه جغمندن بازارلغه لزوم کورمه دم : « دیدی . حاکم : « عودتده ییدیکک وقت بازارلق ایتدکمی ؟ « دیمکه تاجر ینه : « خیر ! » جوابی آلدی . حاکم : « عودت ایچون مدت تعیین ایله دکمی ؟ « دیوب : « خیر ! » جوابی آلدی . حاکم معین اولمایان بر مودته ایکی طاووق آتی یومورطه دن بیکلرجه طاووق ، بیکلرجه یومورطه الملق قابلی ، دکلی ؟ « دیدی . تاجر : « شبه سز ! . » دیدی . مع ذلک تاجر بعض اعتراضلر سرد ایله مشسده صاعلام اولمادیغندن حاکم طرفندن چوروتولدی . بیچاره ایکی یوز آچه محکوم اولونجه اتکلری طوتوشدی . حاله مرحمت ایدنلردن بری تاجر خواجه

[۱] بزه بو حکایه لری کوندن ذات (طاووق) ی (طاووق) یازمش ایسه ده . تورکجه مزده وسطده همزه هیچ قوللانیلماز . آخرده بر ایکی صوت طبیعی یه مخصوصدر . بوکله نك اصلی (طوار ، طاوشان ، طاووس) کبی (طاولانق ، بسلامک معناسندن حیوانات اهلیه ، یاخود (طاووشق) یعنی آیاقلرینی سورومک صورتیه آیاق سسی چیقارمق کبی بر اصلندر . کذلک (صوغوق) کله سنی ده (صووق) یازمق خالص تورک اولمایانلرک لهجه سیدر . مردوددر . استانبول شیوه سنج (صووق) یازمق اوله بیلیر .

نصرالدین افندی بی صاغلق ویردی . همان قوشه رق خواجه افندی به مسئله بی بر تفصیل آکلاتدی . خواجه مرحوم اصولی وجهله دعوائی اعاده به موفق اولوب اوچ کون صوکره به تعلیق ایتدیردی . او کون وقت معینه خواجه اثبات وجود ایله مدی . بر ساعت کجدی . ینه کورونمهدی . نهایت محضر کیدوب خانه سندن جلب ایله مدی . خواجه به بالطبع قیزمش اولان حاکم حدت وشدتله : « نه ایچون وقتیه کله دکه ده مجلسی انتظارده بیر اقدک ! بوقدر ذوات کرامی معطل بر حالده بکله تدک ! » دیدی . خواجه هیچ فتور ایتمه دن : « تلاش ایتمه افندی حضر تلی ! نام کله جکم ائنده اور تاق کلدی ، تار لایه عاد ی بوغدا ی ا که کفنی ایشیتدیکم جهتله چا غیر تمشدم . قالدقم ؛ انباردن بولغور یابدیر مق ایچون قایناتدیغم دوه دیشی کبی بوغدایدن مقدار کافی چواللره طولدوردم . نه یاهیم ، اهمیت ویرمه سه م حریف اک عاد ی ، دلجه لی ، اوت توخوم لی ، قاتقیسی بوغدا سندن چوق نسنه بی سرنی ویره جک . بالطبع ای محصل ویرمه یه جک . اونکده یاریسی اور تاقلغه بر خیلپسنی ده کویا اک اعلا توخوم اجرتنه مقابل آلاق . باقی قالانی ده عشره کیده جک . امیدمیز بر هوا اولاق . ایسیمی ، قیشین بولغور پلاوینی آز بیرمده کله جک سنه ده آدام عقلی محصل آلیرم . اونکچون الجکزمله قایناتدیغم هر بری نوخود کبی بولغور لغمدن تخمیناً ایکی چووال قدر تخملق ویردم . ایشته کچ قالدیغمه سبب بودر . » دیمکله خصیمنک ضعیف طرفنی بولانلره مخصوص بر چهره ایله حاکم مجلسه متوجه اولوب : « افندیلر ! طویدیکز آ . بو آدم قاینامش بوغدا یی تار لایه ا کدیریور . هیچ قاینامش بوغدا ی چیقارمی ؟ بو عقلده آدم لک سوزی بویله بر مقامده مسموع اولورمی ؟ » دینجه خواجه دیرک : « یا ! قیزارتیلیمش طاووق دن ، پشمش یومورطه دن قوجه مان بر طاووق ماندیره سی حصوله کلیرمی که ایکی طاووق دورت یومورطه دن طولانی بومسلمانی ایکی یوز آقچه به محکوم ایتدیکز ! » دیهرک حاکمی حبط ایتش ، دعوائی ده چور و تمشدر . بوتون محکمه بی طولدوران خلق ؛ خواجه نک بو عرفان وکالی آقیشلامش لر در .




(بحر بی بر قارئین) عنرائی ، (عمر) ربا (عثمانه) اوقرنمسی محفل

بر امضای هادی کوندریلین بر لطیفه در :

﴿لطیفه﴾ قیشین اربعینک الشدید آیازینه تصادف ایدن بر کیجهده
 قومشولر قول وقرار ایدرک : « بر بهانه ایله خواجهیه بر ضیافت یاپدیرهلم . »
 دیوب انئی صحتده : « خواجه افندی ! . قومشوجاق سنکله بر بخته کیریشه جکز .
 اکر قازانیرسهك بز مکمل بر ضیافت چکه جکز . غائب ایدرسهك سن بزه اعلا
 بر صوفته پیلاوی ایله غازیلر حلواسی پیشیریرسین . آلت طرفی مروتکه حواله ! . »
 دیرلر . خواجه : « ندر او باقلم ! . نیم آمدن کلیر برشمی ؟ . » دیوب بریسی :
 « البته الکیدن کلز . کله جک اولسه بخته نه حاجت ! . » دیوب صیقینیلی خواجه :
 « ای آجانم ! سویله کورهلم ، ألمزدن کله میه جک نه بیچیم معرفت ایمش ! » دیمکله
 مخاطبی : « بو کیجه تابصباح شهر میدانده طورده جقسین ! . صباحلین بویوک
 جامعهده برله شه جکز . بونی یاپه بیلیرسهك ضیافتی حقلا رسین ! . فقط دوشون که
 مرمری چاتلاتان بو آیازده آچیقلق بر محلهده ، بر نقطهده آتسه دلالت ایدرهیچ
 برشی اولقسزین دیم دیک طورمق هر یکیکت کار ی دکلدرد ! . بر طرفه بوزولوب
 صوکر ا میدانه چیقماق امکافی ده یوقدر . چونکه فلان فلان افندی لرك خانه لری
 میدان ناظر در . تابصباح غائله جک سنی بکله یه جکدر . » دیبه اوزاندجه خواجه
 قیزیوردی . « آجانم آکلادق ! ایسترسه بر طابور عسکر بکله سین . بن یاپارم .
 دیدیکمی یاپارم والسلام ! » دیمکله ایچلرندن بریسی مستهزیانه بر تبسم ایله :
 « ای ناصل قهرمان ! بوایشه کیریشه بیهل جکمیسین ؟ اولدیغک نقطه نك بر طرفی ده
 عمان مزارلق . اونی ده دوشون . صوکره شویله بویله دیبه ، چولوق چوجوغکله
 حالالاش . بریسنده آلا جفک ، بر طرفه کومولمش پارهك وارسه بکا سویله .
 بورجکی ، دردیک ده شوافندی یه حواله ایت ! . اونک صبرتی قالیندر ، اوقالدریر . »
 دیدکده خواجه : « بویله بودالاجه ایشه کیریشم اما ، سکا عناد اوله رق چوقدن
 قبول ایتدم کیتدی . باق سکا خواجه نك نه چلیکدن بروجوده مالک ، نه مرمردن
 یورکه صاحب آدم اولدیغنی کوستره یم . بن ضرورتدن یتشمش بر کیمسه اولدیغمدن

کراتله بویله جاتی آيازلرده يوللرده بللرده ياتديغ اولدی. مملکت مزده نه وار؟ چوق شکر. قورد يوق حایدود يوق. اوسویله مزلر محله سی اهااليسنه کلنجه : اونلرله هر کسدن زیاده باغدا شیرم . بلکه بیک کره مزارلقده یاتدم . وداع وصیتله ده آلیش ویریشم يوق. نه آرقه مده فراقنه قاتلانامیا جغم کیمسه م وار ، نه ده یارینه بیراقلمش بر ایشم وار. هله پاره مسئله سنه کلنجه: هیکز بیلیرسکز که بن اونک بایاتی سهومم. تازه دن تازه ، کله لی ، کیمه لی . دیوبوب خواجه نك او کیجه بی



خواجه نك قازانی آغاچه آصوب قندیلله ایصیتمه سیدر

بر نقطه ده آیاقده کچیرمه سنه قرار ویردی لر . صباحلین خواجه دیب دیری کمال نشاطله کوله رك بونلرك یانه کلدی. نه یولده وقت کچیردیکنی صوردی لر . بیانات اناسنده : « هر یر بیاض ! بورانك ، فیرطینه نك مدهش ، مهیب صدا سندن باشقه سس صدا يوق . آغاچلرك قیریلیرجه سنه یاتوب قالقمه سندن ، یکدیکره چارپیشه سندن ماعدا برحرکت مشاهده ایدلمز . هله ایشیق نامه بر میل اوزاقدن

هیچ تخمین ایدم مدیکم بر یرده بر قندیل ضیاسی کورولیوردی . « دینچه
ایچلرندن بری : « او!... اولمادی . اولمادی . بزم مقاوله من آتسه متعلق برشی
اولمایه جقدی . حال بو که سن اوایشیقدن مکمل ایصنمشسین ! مقاوله بوزولدی .
دیدیلر . او برلری هپ بردن تصدیق و تأیید ایدوب مقاوله یه رعایت ایله مدیکندن
طولایي خواجه یی ضیافته محکوم ایله دیلر . خواجه هر نه قدر بو صاحبه ادعایي
جرح ایله منک ایسته مشسه ده مغالطه یه بوغوب سوز سویلمه دیلر . چاره سز : « بکی ! »
دیدي . او کیچه دعوتیلر هپ کلدیلر . نمازلر قیلندی ، صحبتلر ایدلدی ، ساعت
ایکی بی کچدی ، حالا طعمادن اثر یوق . زیاده صبر ایدم یوب : « آمان افندی
حضر تلی ! بز پیشه جکدن واز کچدک . پیشنی کتیر . » دیدیلر سده خواجه :
« جانم اولورمی او یله شی ؟ هله بر از صبر ایدک . » دیبه رک بر ایکی دفعه ده
بو صورته اگله مشسه ده ساعت اوچی کچمکه باشلادیغی جهته مسافرلر آرتیق
درشت بر لسان ایله شدید اصراره باشلادقلرندن : « طور او یله ایسه ! » دیوب
کویا کتیر منک اوزره خواجه کیدر . بر مقدار دها بکلرلر ، خواجه ده کله یچه :
« بو زوزه ک حریف بزده بر او یون اوینادی . طور ، شونه باقلم ! » دیبه رک
خواجه یی مطبخده آرارلر . نه یمکدن ، نه خواجه دن نشانه بولامازلر . برده
حولی یه چیقار باقارلر که خواجه بر آغاجه قوجه مان بر قازغان آصمش . آلتنه
بر کور قندیل قویمش . کندیمی ینه او طور مضحکیله او یله حیران حیران
باقیور . « خواجه افندی ! بو قدر آدمی آچلقدن قیردک کچردک . شاقه نک
بو نوعه : « قاقا ! » دیرلر . ندر بو حال ، نه یاپیورسک ؟ » دیمه لرینه جواباً :
« نه یاپه جغم ؟ سزه بالذات یمک پیشیری سورم . ینه می یارانهدق ! » دیدي .
« آیول کوک یوزینه بر قازان آصمشسین ، آلتنه بر کور قندیل یاقشسین . هیچ
بر قندیلدن ، حتی مشعله دن بو مسافه ده کی قازان قاینارمی ؟ . » دینچه خواجه
دیمش که : « افندیلر نه چابوق اونوتدیکز ؟ هانی سز اوچ کون اول کیجه نک
آیازنده بزم برفرسخ مسافه ده کی کورون قندیلدن ایصیندیغمه حکم ایدیوردیکز !
او نسبتله بو ؛ حمام کلخانندن دها صیجاق صایله بیلیر . بر فرسخ محله کی

قندیلدن ایصینمق ممکن اولورده ، اوچ آرشین مسافده کی قازانی قندیل
قایناته مزمی ؟ [۱]

[بر روایت کوره : خواجه محبه لیره بویه بر او یون اوینایوب اونلری
تام الزام ایتدکن صوکره مکمل بر ضیافت کشیده ایدرک غایت نشته لی بر عالم
چکیر مشلردر .]



(عموالدين) امضای بر ذات طرفندره :

﴿ لطیفه ﴾ بر کون خواجه مرحومک حرمی اوکده قوشارق قاجمه
صاواشیر . خواجه مرحوم : « یتشیر آرتیق ایتدیک ! . سکا مکمل بر طایق
آتامده اوتوز ییلاق اوفکمه آلام . صوکره سن بنی وار بکندیک کیمسه یه
شکایت ایت ! . » کبی اوست پرده دن صوکره درجه چیقیشور ، آنده قوجه مان
بر صوپا اولدینی حالد قوغالا یوردی . حرمی ایسه : « آمانک امت محمد !
بو حریف ینه چیلدیردی ، جانمی قورتارک ! » دیه فریاد ایدردی . جوارده کی
دو کون اویندن بو فریاد وغغله یی ایشیدنلر سوقاغه فیرلایوب اولجه قادینی
حرمه آشیردقن صوکره : « خواجه افندی ! . ایتمه کیمه ! . قالدینلر صاحی
اوزون عقلی قیصه اولورلر . هیمزک باشمزده در . خصوصاً سن اوقومش آدامسین !

[۱] بو حکایه (انجیلی چاوش) حقنده شایعدر . فقط اونک اولوبده بونک
اولدیغنه الیزده احتیاجه صالح بر سند اولدیغندن وارسال ایدن ذاتک البته استناد
ایله دیکی بر جهت اولدینی محتمل بولندیغندن درج ایله دک . برده بو حکایه نک طرز
آخری وار . بر طول قادینه عارسز ، یوزسز بر قومشو قادین مسلط اولمش . تام یمک
وقتی کلیر : « نه تحف تصادف ، قسم چکمش . » دیر ، صوفریه چوکرمش . بر ،
بش . یمک زماننی عجله ایتش ایرکن کلکه باشلامش ، کیکیدیرمش ، بکله مش . بر
کون بالالترام تاوانه بر ایپ آصوب تجره یی باغلامش ، آلتنه ده بر مانقال قویمش .
قومشو ایرکندن چوکرمش . قادین بکله مه نک بیوده اولدینی اثراب ایچون : (پیش آشم
پیش ! قارلر یاغینجه .) دیمکه عارسز قومشو دخی : (بنده صبر ایدرم لیلک کلنجه ! ..)
جوانی ویرمشدر .

بوجاهللكی بز یاپوبده سن نصیحت ویره جك ایكن سكا یاقیشیری ؟ . « یولنده حدتی یاتیشدیرمغه چالیشدیلر . دیگر طرفدن ایسه خانه صاحبی او که کچوب : « امان خواجه افندی ! . بو، قهر یوزندن لطف اولدی . ذاتاً دعوتده قصور ایتشدم . برازده مجلسمز کنجلره مخصوص کی اولدیغندن بلکه صیقیلیرسکز دیه ملاحظه ایتشدم . اصابت اولدی . هله آزیحق تشریف ایدك باقلم . ذات مسئله یی آکلایه لمده ایجابنه باقق قولای . « طرزنده خواجه یی براز دها یوموشاندی . خواجه



خواجه نك قوجه صوپا ایله زوجه سنی قوغالایوب دوکون اویته التجا ایله مه سیدر

آتشلر پوسکوره رك ، باغیره رق ایچری داخل اولدی . یمك زمانی اولمغه صوفریه ایندیلر . خواجه قادیله غوغاسنی تفصیلاتیله آکلاته رق مجلسی کولمکدن قیردی ، کچیردی . او ائنده باقلاوه کلدی . خواجه مرحوم کال عشق وشوقله کندی او کنده اولان فاصله لری خوره کچیردکن صوکره برطرفدن حکایه سنه دوام ایله مکده اولدیغی غوغانك تمانندن اولق اوزره : « آه کیدی ،

کلخانی قارینک طالعی وارمش. بورایه جان آتدی ده قورتولدی. اکر یاقه سی
برکره آله کچهیدی. شویله قولاغندن طوتدیغم کی طوپاچ مثللی چویره جکدم! «
دیهرک باقلاوه طاباغنک قارشى جهتی کندی اوکنه چویره رکینه آتشدیرمغه
باشلادی. بومناسبتله حضاری کولدوردی. « حدت زمانده بیله آلایدن واز
کچمه یورسین! » دیدیلر. نفیس طعاملر ختامه ایروب قهودلر ایچلدکن
صوکره خواجه کمال انبساط و اعتدالله حضاره متوجهاً: « افندیلر! شو
قومشو افندی دوکون یاپدی. بزى دعوت ایتمه دی. اک نفیس یمکار یاسیله جغنی
باقلاولر، بورکلر پیشه جکفی بیلدیکم جهتله قاری ایله برابر دوشوندک
طاشیندق، ضیافته اشتراک ایتک ایچون بوغوغا اویونى اویدوردق. یوقسه بن
قاریجغزمدن خوشنودم. اللهده خوشنود اولسون. هایدی حرمه خبر ویرک.
بز کیده لمده سز آرتیق صفا کزه باقک. « دینجه خواجهنک آلایه بودرجه
جدیت شکلی ویرمه سنه حیرتله ایچنده قالمشلردر.



﴿ لطیفه ﴾ متغلبه دن برى آقشهرده ایکن عسکرلرینک مسافر اولدیغی
کوبی دوره چیقمش. بر هفته قدر کزمش. عودنده خواجه مرحوم قدومى
تبریکه کیدوب: « ناصل باری اکلنه بیلدیگز می؟ » دیدکده، او ذات: « پک
اکلنجه لی وقت کچیردم. بالتصادف بازار ایرتسی کونی کویده بر یانغین ظهور
ایتدی. اونی سیر ایتدم. انسانندن ده تلفات وار. حق بریسنک قاین والده سی
غائب اولمش، پک تلاش اثری کوستریوردی. صالی کونی بر قودوز کوبک
ایکی آدام ایصیردی. حریفار قودورماسین دیه قیزغین شیشله داغلادیلر.
مانده کی باغیریورلردی. چارشنبه کونی سیل کلدی. برخیلی اولری ییقدی.
صو اوزری اشیا و انقاض ایله طولو ایدی. حتی ایچنده چو جوغی ایله برده
بشیک صو اوستنده صندال کی یوزیوردی. اینک، طانه، برده دوهی سیل آلدی
کوتوردی. آقشامه قدر اونکله مشغول اولدق. پنجشنبه کونی بر بوغا بوشانوب
بش آلتی کیشی بی یارالادی. بریسنک کوزی پاتلادی. برینک قارنی دشدی،

حیاتی تهلکه ده دیورلردی . جمعه کونی برکویلی قاره سودا کتیرمش چولوغنی
چوجوغنی قیتیر قیتیر کسمش . بنده قیزدم . کرانه بی الکجیع اولومله اولدورتدم .
کچ وقت قدر ایشم او اولدی . جمعه ایرتسی کونی بر بویوک، اسکی خانه بقته
ییقیلوب قادین ارکک ، چولوق چوجوق برقاچ کیشی انقاز آلتنده قالدی .
باغروب چاغیرمه لری کونی طولدوردی . انقازی چارچابوق قالدیرتدم ایسه ده خانه
طوپراقدن وانقازی غایت بطل شیرل اولمغه مجروحلرک منظره سی حقیقه دهشتلی



متغلبه دن برینک سیلی تاشا ایله مه سیدر

ابدی . قورتارماسه قدها ای اوله جقمش . پارچه پارچه اولمشلر . اکثریسی چاغیریشه
چاغیریشه هلاک اولدیلر . بازار کونی برقادین کندینی اریک آغاجنه آصمش ، اونک
سیرینه کیتدک . بشیکده برقیزی قالمش . حاصلی بوتون هفته هر کون برا کلنجه
ایله وقت کچیردم . « دینجه هر وقعه نک استماعنده سیکیری بوشانوب بایلمق
درجه سنه کلش اولان بیچاره خواجه خلجانی ، تیره ک برسسه : « لکن یا هو!

برکت ویرسون که چابو جاق عودت ایتدک . اکر برهفته دها قالسه بدک قدومک
برکاتیه . آژ دها کویده طاش طاش اوستنده قالمایه جقمش ! « دیمش .



مشهور دلبندی محی الدین افندیك مخدومی ماضم بك طرفندره :

﴿ لطیفه ﴾ خواجه مرحوم خرما یکن حرمی دقت ایتش که افندی
چکیدکنی چیقارمایور . « آ ! . . افندی ! سن چکیدکنی چیقارمایور سین
غالبا ! « دینجه خواجه دیمش که : « البت چیقارمام پا ! . بن اوئی صاتین
آلدیغمده یمشچی چکیدکنی طاره یه چیقارمادی که . اکر چکرده کی آتیلی
ویره جک اولسه یدی پاره ایله صاتیلمازدی . بن اوکا بوز کبی بیاض پاره لر
صایدقن صکره سوقاغه آتی ویررمیم ؟ بنی سکا (سفهدر) دیه کیم خبر
ویردی ؟ پاره ویردم آلدیم . عافیتله یدم . والسلام [۱] . »



(عزیز) امضاسیده مطایر کوندره ذات طرفندره :

﴿ لطیفه ﴾ خواجه مرحوم برکیجه تلاشله حرمنی اویندیره رق :
« آمان قاری ! چابوق او یقوم آچیلمه دن شو کوزلکمی ویر ! . کوزیمه طاقایمه
اولیه یاتهیم . دیمش . حرمی کوزلکی ووروب فقط بودرجه تلاش واهتامنک سببنی
سؤال ایدنجه : « بر کوزل رؤیا کورسیورم . بعض یرلرینی سچه میورم . اونک
ایچون کوزلک طاقوبده یاته جغم . دیمش .

﴿لطیفه﴾ خواجه تاهل ایتش . حرمی اوچ آیده طوغورمق
 اماره لری کوستروب چابوق بر آبه ایسته مش . خواجه شاشالا یوب : « بزم
 بیلدیکمز انسانلرک دیشیمی طقوز آیده دوغورور . طوپی اوچ آی ظرفده
 بوناصل شی ! .. » دیمکله قالدین حدتله نوب : « نه دیمک ؟ . طقوز آی اولمادیمی ؟
 والله تحف ! . آ حریف ! بن سکا وارملی نه قدر اولدی ؟ اوچ آی دگلی ؟
 ای ! . سن بنی آلهلی ؟ .. اوده اوچ آی ایتدیمی آلتی آی ؟ . ذاتاً اوچ آیده
 سن کندک اعتراف ایدیورسین . ایشته سکا قاپاق کبی تام طقوز آی ! .
 دینجه خواجه مرحوم بر چوق دوشوند کدن صوکره : « حقک وار قاری !
 بنم بو ایجه حساب عقلمه کله دی . عفو ایدرسکز یا کلشم ! .. » دیمش .



بوده قارندریکزدنه بری اعضا سید کلمشدر :

﴿لطیفه﴾ خواجه مرحوم زوجه سنک وفاتی اوزرینه بر طول قالدین
 آلبیر . خواجه آره صره مرحوم حرمک محسناندن اوزون اوزادی به بحث
 ایدرمش . بوندن مغبر اولان قاریسی ده اسکی قوجه سنک فضائلندن بحث ایتمه
 باشلار . نهایت بر کیجه خواجه نک حسب الایجاب مرحومه سندن بحث ایتمه سی
 اوزرینه ، قالدین نه اسکی افندیسنک فضیلتلرندن اوزون اوزادی به بحثه قالقیشمغله ،
 خواجه نک جانی صیقيله رق سدر اوزرینه سر یلش اولان یاتا قده قالدینه بر تکمه
 اوروب یره دوشورور . قالدینک قولی ایچینیر . فنا حالد جانی یانار . ایرتسی
 کونی زیارته کلن باباسنه شکایت ایلر . حریف پیشکین آدام اولدیغندن قبزینک
 صیرلانمسنه اهمیت ویرمیه رک خواجه دن مسئله یی صورار . خواجه دیرکه :
 « شیمدی بن عرض ایده یمده سز انصافله حکم ویریکز . بنده کز بر ، بزم
 مرحومه ایکی ، شیمدیکی خانم اوچ ، اونک رحمتلی ایلک افندیسی ! . ایتدیمی
 درت . مرحمت ایدک ! . بنم کبی بر قلندر خواجه نک یاتا غنه درت کیشی .

صیغاری؟. بالطبع صیغیشه مادیق . بو اوجده بولونمش . پالدر کولدور دوشدی .
 نیم بونده نه قباحتم وار ! . »



« همدل » مطبعه سی مؤسسه ندره عاصم بك افندی اهدا الیمش :

﴿ لطیفه ﴾ خواجه مرحوم طلبه لکنده بر قصبه یه جره کیدوب جامع
 شریفده وعظ ایلدیکی اناسنده بالمناصبه حضرت عیسی علیه السلامک دوردنجی
 قات کوکده بولندیغی سویله مش . جامعدن چیقدیغی ائاده اختیار بر قادی
 یانه یاقلاشوب : « جانم افندی حضرتلری ! درسه بر نقطه بك زیاده مراقی
 موجب اولدی . حضرت عیسی علیه السلامک دوردنجی قات کوکده اولدیغی
 سویله دیکز . عجبایکی کوزوم اوراده نه یر ، نه ایچر ایدی؟ . دینچه خواجه نك
 تپه سی آتوب دیش که : « به حدی ، وظیفه سنی بیامز قادی ! بن شورایه
 مملکتکزه کله لی برآی اولور . بر کون اولسون شو زواللی خواجه عجبای
 نه یر ، نه ایچر؟ دیه صورمه دیکز . شیمدی بندن تا دوردنجی قات کوکده تا کری
 ضیافتنده بولونان ، هر کون تورلو تورلو جنت طعاملریله بسله ن قوجامان بر
 ذات شریفی می صوریورسین ؟ . »



هنرمندان عسکریه مزدن وارکان حرب میرلو الغندن متقاعد آتش زاده محمد عزت پاشا - و قتیله عربجه به « حجا الرومی » دیسه ترجمه ایدیلن - نصرالدین خواجه لطائفی تور کجه به ترجمه ایله مش اولمالریله مملکتیزک تکمل نشریاتنه بر معاونت اولقی اوزره مذکور رساله لرینی ارسال بویورمشلردر . اشبو کلیاتمزه مسطور اولمایانلر مذکور رساله دن اخذ اولونمشدر :

﴿ لطیفه ﴾ خواجه جینه شفتالی طولدیروب راست کلدیکی آردا شلرینه جینی کوستره رک : « شونک ایچنده کنی کیم بیلرسه اک بیوک شفتالی بی اوکا ویره جکم . » دیمکله : « شفتالی ! . » دیمش . خواجه کال استغرابله : « بونی سزه هانکی قجه دولی [۱] خبر ویردی ؟ . » دیمش .

﴿ لطیفه ﴾ خواجه کم آلز بر قاطیره بیمش ، باشی پک سرت اولدیغندن ممکن دکل کیده جکی جهته چویره مه مش ، بوصیره ده احبابندن بری راست کلوب : « خواجه ! نره یه کیدیورسین ! . » دیدکده : « قاطیرک ایسته دیکی یره . » دیمش .

﴿ لطیفه ﴾ خواجه د کیرمه بوغدای کتورمش . اوراده بولنان دیکر بوغدای چوواللرندن آووجنی طولدورور کندی چووالنه قویارمش [۲] . د کیرمنجی : « نه یاپورسین ؟ . » دینجه : « بن بودالا بر آدام ! . عقلمه کنی ایشلم ! . » دیمش . د کیرمنجی : « بودالا ایسه نه یه کندی چووالکده کی بوغدایلری خلقک

[۱] (دول) کوز وزننده سیلاه نسل معناسنه در . (قجه دولی) روسی چوجوغی دیمکدر .

[۲] د کیرمن اکثریا غلبه لق اولدیغندن هر کس د کیرمنده بر قاپ کون نوبت بکله مکدن ایسه بوغدای چوواللرینی اورایه بیراقیرلر . بر تخمین اوزرینه برایی کون صوکره تکرار کلوب - اوصیره ده نوبتلی کلش بولونقله - اولرینی اوکوتورلر ، کوتورورلر : ع - آسیاب دهه کلدک شیمدی نوبت بکلرز .

چو والته طولدورمايورسين ؟ . « دينجه خواجه : » شيمدى على العاده براحق
ايكن اوصورتده قاتملى احق اولقلغم لازم كليز ! . « ديمش .



خواجه نك خلقك چو والندن كنندى چو والته بوغداي طولديرديغيدر

﴿ لطيفه ﴾ خواجه نك كنجلكنده والده سى بر صباغ او غلم ملا نصر الدين !

بن قومشورله كول كنارينه كز ميه كيده جكم . كوره يم سنى ! . سوق
قبوسنه صاحب اول . صاقين آيرلما ! . « ديه شدتله تنبيه ايله مش . ملا نصر الدين
قابو اشيكنده اوتوره رق والده سنك وريدكى قايسى قوروسنى ييوب طورور كن
انشته سى كويندن كلوب والده سنى ايجريده در ظيله : « او غلم ملا ! آقشامه
تيزه نك ، بن سزه كله جكز . كيت آنه كه خبر وير ! . ديمش . كيتمش ملا نصر الدين
قابوي سو كوب صيرتنه آله رق كول كنارينه قوشار . والده سى كوروب :
« بيره او غلان ؟ ندر بو حال ؟ . « دينجه : « سن بكا قابودن آيريلما ! . ديدك .

حالبوکه انشتم آقشام بزه کله جکمش . کیت آنه که خبر ویر !. دیدی . بن
هرایکیزکده امریکزی اجرا اتمک ایچون بشقه نه یاپایلیردم ؟ . « دیمش .



خواجه نك سوراق قاپوسنی صاللا صیرت ایدوب سیر محلنده کی
والده سی ایله محاوره سیدر

﴿ لطیفه ﴾ آقشهرک صوباشیسی حرمنه غایت طوتغون ایمش . قادین
امور حکومتده قاریشهرق عزل ونصب ایشلرینه ده باشلامش . بعض اکابر
خواجهیه مراجعتله : « امان شوکا بر چاره بول ! » دیمه لرله خواجه بر قاج
صحبت ائناسنده بر طاقیم دلیلر کتیروب مثالر کوستره رک صوباشی قادینه
او قدر یوز ویرمکدن واز کچیرمش . شماریق قادین قوچ سنه قارشی الیشدینی
تحکمدن محروم اولنجه تکمه یی نره دن ییدیکنی آراشدیروب خواجه طرفندن
اولدینی تحقیق ایله مکه یولنی بولوب خواجه نك حرمنی الده ایدر . خواجه
هر یاز چیقدینی کویدن کلوب معتادی وجهله صوباشینک خانه سنه مسافر اولمغه

صوباشینك حرمی مناسبت حاضر لایوب خواجهك حرمی ده کتیریر . خواجه
برکون حرمیله کندی او طه سنده شاقه لاشیرکن قادین ناز و عشودیه باشلابوب
خواجه بی سرمست ایدرك : « جانم افندی ! کیت طیش-اریده دیوار دینده
بر پالان کوردم . کتیر . بر اویون چقه-اره جغم . » دیر . آرتیق خواجه ده
قارشی طور مق کرته سی کچمش اولمغله همان کیدر ، کتیریر . قادین بونسنونی
بوکوب یالوارنجه بالانی صبرته اورور ، برده کم اویدورورلر . قادین بیزه ، خواجه
یکشنه یهرك سوکیلی راکبی قوشدیردینی ائنده صوباشی به حرمی بو منظره بی
آناختار دلیکندن سیر ایتدیرر . خواجه نعره آتوب ایکی طرفه چیفته لر صاوو-
ره رق قوشدقچه صوباشی کولمکدن قاتیلیر . نهایت صبر ایده میوب قاپوی آجاز :
« خواجه افندی ! واه واه ! ندر بو حال ؟ » دینجه خواجه هیچ بوزمه یوب
« هاه . تمام . . . شویم حلی رأی العین کوردك آ . . . ایشته بن سنی بو
درکبه دوشمکدن وقایه ایچون او نصیحتی اجرا ایله دم . اما بزه کلنجه : بز
آحاددن آداملرز . نظام عالمك زمامی بزم المیزده دکل . بزم حکممز آنجاق
کندی حرممز داخلنده در . بز هر بویاه بویانه بیلیرز . کیمسه به ضرریمز
اولماز : فقط سز بویله نیم کبی یولاری قارینك آله ویریرسه کز بوتون مملکت
هرج و مرج اولور . » دیمکه صوباشی بونصیحتدن بر قات دها عبرت آلمش .
قادین ایسه برکنارده خائب وخاسر باقه قالمش .

﴿ لطیفه ﴾ خواجهك خانه سنه اوبور برآدام مسافر اولمش . صوفرای
دوشه یوب اکمککری دیزوب یمک کتیرمکه کیتمش . گلش ، باقش که صوفرا ده
بر دانه کمک قالمش . هیچ سسنی چیقارما یوب ا کمک آلمغه کیتمش . بوکرده
کورمش که یمککری بتمش . بوش یخنلری آتوب یمک کتیرمکه قوشمش . عودتده ا کمکدن
اثر قالمش . والحاصل تجربه ده یمک ، چوملکده ا کمک قالمایچه به قدر
کیتمش ، گلش . ایکسنی بر آرایه کتیرمک میسر اولماش . مسافره نره به
کیدییور اولدیغنی وسبب عزیمتی صورمش : « اشتها سزلق مرضه مبتلایم .
بروسه به کیدیوروم . حکیمه باقدیروب علاج آتوب همان عودت ایده جکم .
ان شاء الله نهایت بر آی صوکره کوروشورز . سزی پک سودیم . نیم عودتده

بر آي سزده مهمان اولوب مملكتكزك آب وهواسندن استفاده ايتك ايسترم .
 دينجه خواجه مرحوم : « واه واه ! تأسف ايدرم . بن يارين ، او بر كون
 كويه عزيمت ايتك نيتديم . ظن ايدرم كه عودتده ملاقات ميسر اولمايه جق .
 هله پشين الله سكا خيرلى سلامتلى ورسين ! » ديهرك حريقى آشرمشدر .



خواجه نك اوبور مسافره بيهكك طاشيمه سيدر

﴿ لطيفه ﴾ زوجه سى هر كيجه خواجه بنى خانه ده بكجي براقوب
 قومشو ، قومشو كزرمش . بر طاقم مناسبتسز قادينلرله دوشوب قالدقدينى
 خواجه به اخطاره باشلامشدر ، ينه بر كيجه حرمى بيك تورلو بهانه ايله چيقوب
 كيتدى . كچ وقت كلهرك قابويي چالمشده ده خواجه قيزه رق آچماقده اصرار
 ايتدى . قادين نه قدر يالوارديسه فائده سى اولمادى . قادين : « اويله ايسه بنده
 كنديمى شو قويويه آتايده آلكدن قورتولايم ! » ديهرك قوشوب او آنده
 كيتدى قويويه قوجامان بر طاش آتدى . كنديسى ديوار دينه كيزلندى .

خواجه بك نادم اولوب : « ای واه ! . . كیده می ، شودلی بی قورتاریم . »
 دییه قاپویی آچوب طیشارییه چیقنجه قادین همان ایچری کیروب قاپویی
 آرقه سندن قاپادی . یوقاری چیقوب خواجه نك اولجه اوطوردیغی نچرمدن باقغه
 باشلادی . شیمدی ده خواجه قاپویی آچاسنه اصرار اتمشده فائده ویرمه مکه
 یالوارمغه مجبور اولدی . قادین ایسه آوازی چقیدی قدر باغیره رق : « بیقدم
 آرنق الله ! . . ندر بوایتدیکك ؟ . هر کیجه قومشویه دییه کیدرسین ! .
 کیم بیلیر ، هانکی اوروسی ايله محبت ایدرسین . بیچاره حاللکه کنجلکنی
 حرام ایتدك . سنی کیدی اق صقلندن اوتاماز ، ذالتدن اوصاماز حریف ! .
 بن ده سنی عالمه رسوای ایدیم ده کور حالکی ! . بردها هر کیجه بیراقوب ،
 بیراقوب کیتمکی سکا کوستریم ! . » دیمکه خواجه قادینك کندی خباتنی
 باشقه سنه یوکلتمك خصوصنده کی مهارتسه حیران قالب و اطرافنه طوبلانان
 قونوقومشودن صقیلوب نطقی طوتوله رق آنجاق : « بیلنر الله ایچون سویله سین ! . »
 دییه بيلمشدر .

﴿ لطیفه ﴾ خواجه بر آراق زیتون ساتارمش . بر قادین ککش .
 زیتونی بکهنوب فقط فیاتی براز زیاده جه بولدیفندن اعتراض ایتمکه خواجه :
 • خانم ! . بو اويله خام ، چوروك زیتونلردن دکلدر . کالنده طوبلانوب
 خصوصی اوله رق اعتنا ايله یایلمشدر . اینانمازسه ك بردانه بی ده باق ! بونده کی
 حلاوتی هیچ عمر کده باشقه زیتون دانه لرنده کوردکمی ؟ . بونده اويله آجیلق
 ککره لك آراما . یاغی ده اك برنجی یاغلردندر . انسانك آغزنده برمدت اك
 نفیس بر لذت حاصل اولور . چاشنیسی حاللدر ، چکیمه ! پاره ویره جکسین .
 دیدکده قادین : « سن بی بیلیر سین ! . آرقه سواقاده ، باغچه سی سزه بیتیشك
 مرحوم بك تمیر اوغلی حاجی صاتی نك حریمی . بزم افندی ايله بك ای کوروشوردیکز .
 اونکچون اگر اعتماد ایدرسه ك ویره سی المق ایسترم . » دیمکه خواجه : « ای
 آجانم ! اونك چاره سنه باقارز . هله سن بر کره مالدن خوشنود اول ! . » دییه
 النده کی زیتون دانه سنی قادینه اوزاتمغله قادین : « عفو ایدرسکز . اوچ سنه
 اول رمضانده خسته لاتوب یدی کون اوروجی ییدیکم جهته شیمدی حاضر
 قیشك قیصه کونلرنده اونی قضا ایدیوروم . » دنجه خواجه دیرکه : « یاوروم !

سن ویره سی زیتون آلق ایسته یورسین . حال بوکه بر قول بویه خالقنک
قرضی ادا ایتمه یوبده سنه لرجه صاللا رسه خلقه اولان قرضه [۱] نه قدر
اهمیت ویریر ؟ »



خواجه نك - ییدیکی طاووق قیزارتمه سندن ویرمه مک ایچون
قارشیسنده کی آدامه اعتذاریدر

﴿ لطیفه ﴾ خواجه طاووق قیزارتمه سی ی رکن بریسی کلوب : « افندی
ایمره ندیم ، برازده بکا ویر ! . . دیمکله : « واللهی برادر ؛ بنم دکل ، زوجه
مکدر ! . . دیدی . حریف : « آی ! ایشته سن ییورسین آ ! » دینجه :
« نه یاهیم آرقاداش ؟ بکا زوجهم (یه ! .) دینه ویردی . . دیمشدر .

﴿لطیفه﴾ بر کون خواجه بی حاکم افندی دعوت ایدوب یاننده
 آسجیه قائم اقلی انجیر طاتلیسی امر ایتش . یمک بیتمش ، انجیر طاتلیسی
 کلمهش . خواجه محزون اولمش . فقط سسنی چیقار مامش . یاتسی نمازندن
 صوکره حاکم افندی : « خواجهم ! . تبرکاً » بر حزب اوقویکزده صفای
 روحانی حاصل ایدلم . « دیمش . خواجه بعدالبسمله « ... والزیتون الخ »
 دییه باشلامقله حاکم سریردن : « افندی ! (والتین [۱]) بی اونوتدکمی ؟ . »
 دینجه خواجه : « اونی بن دکل ؛ سز اونوتدیکز . » دیمکه مجلسک انبساطنی
 موجب اولمش ، خواجه بر دعوت دها قازانمشدر .

﴿لطیفه﴾ « اوپله بر شهلا کوزلره مالک که انسانی جین چارپار کبی
 مسخر ایدیور . » دییه خواجه بی قولاقدن عاشق ایدوب برشاشی قادین آلمشدر .
 خواجه آقشامه بر طباق قایماق آلوب کتیرمش ؛ صوفریه قویمش . قادین :
 « بزم کیمیمز وار ؟ . بر طباق قایماق آلسیدیکز آل ویرردی . بو ایکی طباق
 اسرافدر . » دینجه : « بزم اوده طعامک برینی ایکی کورمک فنا برشی دکل .
 بنم ایشمه کلیر . » دییه لطیفه لسه رک طعامه باشلایه جقلری صیره ده قادین : « افندم !
 عفو ایدرسکز . بنی سز ناموس سز ظن ایدرسه کز یا کیلیر سکز . او یانکزده کی
 خواجه کیمدر ؟ » دییه خواجه بی ده ایکی کورونجه : « خواجه یو ... ق ! باق
 قادین بزم اوده هر شینی ایکی و دها زیاده کوره بیلیر سین . فقط قوجه کی
 بر . » دیمشدر .

﴿لطیفه﴾ خواجه احبابندن برینک خانه سنه کتدی . بال وقایماق اکرام
 ایتدیلر . قایماغی ، اکمکی بیتیرد کدن صوکره باقی قالان بالی پارمق پارمق یمکه
 باشلادی . خانه صاحبی برطاس بالک کوچور و لمه سندن متأثر اوله رق کویا کنایه
 ایله واز کچیرمک امیدله : « اکمک سز بال ایچکی یاقار . » دینجه خواجه هم
 کاسه بی سنتله مهیه غیرت ایدوب هم ده : « کیمک ایچی یاندیغنی الله بیلیر . » دیمشدر .

[۱] (والتین) ده کی (تین) انجیر معنا سنده در .

﴿لطیفه﴾ خواجه قومشوسنك دوكون اوندە يىك يىنلىمكدە اولديغى
تخمين ايتدىكى بر زمانده بر كاغدى دوروب بوكوب بر ظرفه قويه رق قاپوي
چالدى . « نه ايسترسين ؟ » ديدكلرنده : « خانه صاحبنه مكتوب كتيردم . »



مكتوب كتيرمك بهانه سيلاه خواجه نك دوكون سفره سته چوكديكيدر

ديمكه اوشاق ايجرى بيرقادى . خواجه، همان سلام ووروب خانه صاحبنه كاغدى
طوتوشدير مغله برار صوفريه ده چوكدى ، يىكى آيشيديرمغه باشلادى . خانه
صاحبي : « بونك اوزرى يازىلى دكلدر . » دينجه خواجه : « افندم! قصوره
باقايبكز . عجله يه كلديكندن اونك ايجى ده يازىلى دكلدر . » ديمشدر .

﴿لطیفه﴾ خواجه مرکب ايله کیدرکن حیوانك اکیلوب قوقلادیغی
مرکب تزکلرینی یم طور باسنه طولدوروب آقشام بوینته آصدی . حیوان

خویشزلق ایدوب باشی سیدکه رک طور به بی چیقارمغه چالشدیغنی کورونجه :
 « بکا قهرک نه ؟ . سن بکندهک، بن طولدیردم ! . » دیدی .



خواجه مرکب ایله کیدرکن قوقلادینی مرکب تزکلرینی طور باسنه طولدیردیغیدر

﴿ لطیفه ﴾ خواجه برآراق طور شو جیلغه باشلادی، بر طور شو جینک
 مرکبی واشیاسنی طور شولریله برابر صاتین آمشدی. حیوان - آلیشیق اولدینی
 وجهله - طور شو آلان خانه لرك اوکنه کلدکجه و غلبهلق سوقاق آرالرینه اصل
 اولدکجه خواجهیه : « طور شو ! » دییه هایقیرمه یه میدان ویرمه رک آکیرمغه
 باشلارمش . بیچاره نک هوسی قارنده قالمش . ینه برکون غلبهلق بر محله خواجه
 حاضر لانتوب صوت بلند ایله : « طور شو ! » دییه باغیره جفی آنده ینه اشک دها

اول ظیر لامغه باشلايخه خواجه آرتیق قیزوب : « باقسهك آء آرقداش ! .
 طورشونی سنی صاته جقسین ؟ . یوقسه بنی ؟ . » دیمشدر :



خواجهك طورشو صاندیغیدر

﴿ لطیفه ﴾ اشكنه (كهون) [۱] یوكله توب كندی كندینه : « عجیا
 یاش كهون قوروسی كبی بردن بره خارلایوب یانارمی كه ؟ . » دییه برطرقدن
 آتئی كوستری ویرنجه غایت سرت اسمكده اولان روزكار اعانه سیله بردن بره
 هر طرفی آتش صاری ویردی . دهشتلی بر چاتیردی قوبوب شعله سی كوك
 یوزینه دیرك كبی اوزادی . زواللی مركب چیلدیروب قوشار ، هم آگیریر

[۱] (كهون) اكثر یا امك تانديرنده ، كلخانده طوتراق اودون مقامنده قوللانيلير .
 چاپوق طوتوشور بر ديكندر .

همده متصل شرطه چکر ، چفته آناردی . خواجه مرکبه یتشه مهیه جگنی ،
یتشه بیله یاناشامه یه جغنی آکلایجه آوازی چیقدینی قدر هایقیره رق : « عقلک
وار ایسه طوغری کوله قوش !... » دیمشدر .



مرکبک اوزرنده کی که وهن خارلایوب یانغه باشلادیغدر

﴿ لطیفه ﴾ صو باشینک مرکب غائب اویش . آداملری خواجه بی
باغه کیدرکن کوروب : « افندی ! بز هممز بر سمت طایلوب آرایه جغز ،
حاضر کیدیورسین ، سنده باغلیر آراسنه باقی ویر . » دیمشدر . خواجه تورکی
سویله یه رک باغلیر آراسنده کزرمش . بری راست کلوب ایشی آکلادقدن
صوکره : « بونه بیچیم اشک آرایش ؟ » دینجه خواجه : « ایل ؛ ایلک اشکنی
تورکی چاغیره چاغیره آرار . » دیمشدر .

﴿لطیفه﴾ والده سی خواجه بی بر قازاز یانه چیراق ویرمشدی . ایکی سنه - علی الدوام - کیدوب کلدکدن صوکره بر کون والده سی : « ای اوغلم ! نهر او کرندک باقلم ؟ » دیمکله جواباً : « والده ! دعا کز برکاتیله صنعتک یاریسی او کرندم ، یعنی بو گلش شیرلی چوزه بلیورم . شیمدی او بر یاریسی قالدی که بو کمکدن عبارت . همتکزله بر قاچ سندهده چابوجاق اونیده الده ایدرم . اولدی بیتدی . » دیمش .

﴿لطیفه﴾ کیلیمدن قوجامان برمندر یوزینی بازاره صاتمغه کوتوروب معاینه ایدن مشتریلر : « بودلیک ، دشیک بر شیدر . نافله پاره ایتمز . » دیدکلرنده : « سبحان الله ! آلمغه مرامکنز یوق . باری بر مسلمانک مالنی خلقه قارشى لکله مه یك . بونک ایچنده کی پاموغی والدهم ده شیمدی بوشالتدی . بردانه سی بیله دو کوله مشدی . » دیدی .

﴿لطیفه﴾ خواجه آقشام اوزری خانه سنه کیدرکن محله سنک چو خوقلرندن بری کلوب : « خواجه افندی ! شو چو جوق بنم قولاغمی ایصردی . » دیه شکایت ایلیدی سیره ده او چو جوقده : « خیر ! بن ایصیرمادم ، کندی ایصردی . » دینجه : « صوص حشاری ! بو زواللی دوه می که کندی قولاغی ایصیره بیلین » دیمشدر .

﴿لطیفه﴾ خواجه نك جانی چوربا ایسته دی . « شیمدی اوستی نانه لی نازی بر چوربا اولسه ده ییسم . » دیه تخیل ایدوب طورورکن قاپو چالینه رق قومشو چو جوغی بر طاس ایله ایچری کیروب : « آنام خسته در ، بر پارچه چوربا ویره جکسکز . » دینجه خواجه : « بزم قومشولرده مالیخولیدان قوقو آلیورلر ! » دیمشدر .

﴿لطیفه﴾ خواجه کیلارده برشی آرارکن رافدن صوغان طولو قالبور باشنه دوشدی . بینی صارصیلوب کوزی قارادره رق همان برتکمه اوریم دیرکن قضارا کنارینه راست گلکله قاصناعی دیز قاپاغنی فنا حالده آجیتدی .

همان حدتله قالدیروب یره چالدى . قالبور صیچرایوب آلنى بارالادی . خواجه
همان ایچری قوشوب قوجامان یاتاغان بیجاغنى کتیره رک : « شیمدی نه قدر
قالبور وار ایسه چیقسین قارشیمه ؟ » دیمشدر .



خواجه نك کیلاردن برشی آرارکن رافدن صوغان طولو قالبور باشنه دوشدیکیدر

﴿ لطیفه ﴾ خواجه بر آرقاداشیله کول کنارندن کیدرکن آرقاداشی
صویک اوزرینه صیچرایان بالقلری کوروب: « خواجه! باق شوبالقلرك کیفنه ! »
دیمکه خواجه ایلریده کی سوقاغه دوغرو باقدی. آرقاداشی : « بن سکا بالقلری
کوستریورم . سن کوله باقایوب قارهیه باقیورسین ! » دیمکه خواجه : « سن
بكا [باق شو کولك ایچنده کی بالقلره ! ..] دیدکی که بویله سرزنش ایدیورسین ؟
بنم کرامتممی وار ؟ » دیمشدر .

﴿لطیفہ﴾ باباسی نہ سویلر سہ خواجہ - چوجوقلغندہ - عکسفی
 یاپاردی . باباسی آرتیق مقصودی نہ ایسہ اونک عکسفی سویلہ مکہ یولنی بولشدی .
 برکون دگیرمندن عودتلرنده بر چایدن کچہ جک اولدی لر . کو پرو وارسہ ده
 حیوان کچہ مز بر حالده ایدی . باباسی : « اوغلم ؛ ملا ! . بن کو پرودن
 دولاشہ جغم . سن چایک کچید یرندن حیوانی کچیرمہ . » دیدی . ملا نصرالدین !



خواجہ نک چوجوقلغندہ مرکب اوزرنده کی چووالہ طوقونور [طوقونز]
 ہان چاہہ یووارلا نمیدر

حیوانی کچید یرینہ سورمشہ ده اون چوالی برطرفدن میل ایتدیکنی باباسی
 کورمکہ ہایتیرہ رق : « ملا ! . چووال بکا دوغری اکر یلہ مش ، چاہہ
 دوشمہ جک . صاقین طوغرولتمہ دہا ایتیری ویر ! . » دینجہ خواجہ :
 « والہی بابا ، شو یاشہ کادم . نہ دیدگسہ عکسفی یاپدم . بوسفردہ امریکزی

عیناً اجرا ایدہ حکم ! . « دیہہ باغیر ماسی عقبندہ چووالہ دوقونور ، دوقونماز
ہمان چاہہ یووارلاندی ، کیندی .

﴿ لطیفہ ﴾ آقشہرہ ماہر بر خطاط کلدی . خواجہ مہر قازدیرمق
ایستہ دیسہدہ ہر حرفنی اوچ آقچہ یہ قازدیغندن خواجہ دوشوندی اسمی اولان
(حسن) گلہ سنی ، مخلصی (نصرالدین) ی و عملکتی اسمنی حساب ایلہدی .
خیلی چوغہ قاچاق . یالکز نامنی حکایتدیرمکہ قرار ویردی . ہم دہ
اوجوز قازدیرمق ایچون شویلہ بریول دوشوندی . حکاکہ کیدوب : « بکا
بر مہر قاز ! . » دیدی . حکاک اسمنی سؤال ایلہ مکملہ خواجہ : « خس
دیدی . حکاک : « بونہ بیچیم اسم ؟ . » دیمکملہ خواجہ : « نہ گہ لازم ! . ایشتہ
اولہ براسم ! . سن قاز ! .. » دیہرک بردہ مضمون صرف ایلدی . حکاک :
« خس » حرفلرینی یازوبدہ تام نقطہ یی قویہ جفی صیرہدہ خواجہ : « رجا
ایدرم ؛ نقطہ یی باشہ قویمہدہ سینک کاسہ سنہ قوی ! . » دیمکملہ حکاک خواجہ نک
ظرافتنی تقدیر ایدوب مہری ہدیہ اولہرق تقدیم ایلہ مشدر .

﴿ لطیفہ ﴾ خواجہ باشقہ سیلہ مشترک اولدینی یاریم خانہ حصہ سنی
صایتلیغہ چیقاردی . دلال : « شیمدی صیرہ سی دکل ؛ نہیہ بویلہ عجلہ صاتمق
ایستہ یورسین ! . » دیدکدہ خواجہ : « مشترک مالی عمرمدہ سہوم ! . اون
سنہ دنبری بوخانہ نک دیکر نصف حصہ سنہ مشترک اولان آدامک کوکلنی ناصلسہ
شیمدی یاپایلدیم . حاضر اولمشکن اونک حصہ سنی صاتین آلاجم . آرادن
اغیاری قالدیرہ جغم ! » دیمش .

﴿ لطیفہ ﴾ احبابی : « افندی ! . سن آرہ صیرہ شعرده سویلردک ، شو
کونلردہ یکی محصول یوقی ؟ . » دیدکلرندہ شویلہ جواب ویردی : « کرچک ؛
آئی کہ صوردیکز . سزہ دومانی اوستندہ بر بیت اوقویہیم . بو صباح آنام
یوغورت چالمق ایچون سوت قایتیوردی . مکرسہ بالتصادف دونکی کبی
بوکوندہ سوت کسیلیمش . بوصیرہدہ نشانیم کلدی . آتش اوستندہ کی تجربہ
باقدی : « بسوت کسیکدر ! . » دیدی . اوئانادہ درحال خاطریمہ شو بیت

طلوع ایتدی . اما یوزینه قارشى اوقومغه صیقیلیم : اوقوسهم ده مزایاسنه
 واره مایاجق ، یازیق اوله جقدی یا ! هله سز دقتله دیکله ییکیز :

دلبر بکا جور ایلمه لانه الم ویرر
 یوغوردنا هذالذی لایکون دوندن بری

﴿ لطیفه ﴾ خواجه صحبت انسانده اولیالقدن دم اورمغه باشلادی .
 « سنک اولیالغکی نه دن بیهلم ؟ » دیدیلر . « هانکی طاشی ، هانکی آغاجی
 چاغیرسه م کلیر . » دیدی . « اوله ایسه شوقارشیکی پلید آغاجنی چاغیر ؟ باقالم ! »
 دیدیلر . خواجه طور مخصوص ایله اوچ کره : « کل ، یا مبارک ! . » دیمشسه ده
 آغاج یاراغنی بیه قیملداتمه یخه خواجه کوس کوس آغاجک یانسه کیتدی . « هانی ؟
 آیغکک کتیره جکدک ! . » دیدیلر . « بزم طائفه مزده کوکول کبر اولماز .
 طاغ یورومزسه آبدال یورور . » دیدی .

﴿ لطیفه ﴾ خواجه آرقاداشیله قورد آوینه کیتمشدی . غایت اوزون
 تویلی قوجامان بر قورد کوروب - کورکنه طمعاً - قووالادیلر . براینه صوقلدی .
 آرقداشک کوزی قاراروب اوده همان صوقلدی . خواجه بر ساعت طیشاریدم
 بکله دیکی حالد حریفک قیملداتمادیغنی کورونجه چکوب چیقاردی . حالبوکه
 بدنده باشی کوره مدی . برمدت تفکره واروب صوکره قوشارق شهره کیتدی .
 آرقداشک خانه سنه کیدرک حرمنه شو یولده بر سؤالده بولوندی : « سزک آغا
 صاحیلین اودن چیقادیغنده بدنده باشی ده برابر می ایدی ؟ دیکلمیدی ؟ ! . »

﴿ لطیفه ﴾ بر قیز ، تاهلنک اوچنجی آینده طوغوردی . قادینلر
 طوبلانوب : « بوکا نه اسم قویالم ؟ » دییه مذا کره ایله دیکلری صیراده خواجه
 افندیدن صورمغه قرار ویردیلر . نتیجه مراجعتلرنده خواجه « ساعی » [۱]
 قویسکیز دیدی . قادینلر : « هیچچه بویله اسم ایشتمه دک ! . » دینجه خواجه :
 « طوقوز آیلق یولی اوچ آیده قطع ایدنه [ساعی] دن باشقه نه اسم ویریلر ؟ . »
 دیمشدر .

﴿ لطيفه ﴾ اوچ ارقداش سوت ييولردى . خواجه ايله بريسي سوته
 امكك طوغرامقله مشغول ايكن ديكري - اخطارلرينه رغماً - متصل بونلرك
 طوغرا ديفنى امكى قاشيق قاشيق آتشدريپ-وردى . نهايت خواجه قيزوب
 سوته امكك باصدينى كيچيني « يا ستار! .. » ديهه حريفك بيننه اينديرديكى



سوت يكله مشغول اوچ ارقداشدن بريسه خواجه قيزوب يا ستار ديهركدن .
 كيچه ايله حريفك بيننه اينديرديكىدر

كبي حريف درحال موس مور اولوب اورايه ييغلي ويردى . خواجه حريفك
 بويله برچهره عبوس ايله خاموش اولديقنى كورونجه كال تعجبله : « نه طوغرار ؟
 نه باصار ؟ نه آلنى چاناقدن كسر . بر كيچه اورورسهك ايشته بويله كوسر . »
 ديمشدر .

﴿لطیفه﴾ بر قاضی ایله تجارتدن برکیمسه ، اورته لرنده خواجه یولداس اولمشلر . لاقیردی اولسون دییه قاضی خواجهیه : « چوق سوبله یین چوق یا کیلیر، دیرلر . هیچ وعظ ائساننده یا کیلیدیگک واقعمیدر؟ » دیدی . خواجه : (اوت ! بر کره « قاضیان فی النار » دییه جک یرده آغزمدن قاض فی النار » چیق و یردی . بر کره ده دهها زیاده خطا ایتدم . « ان الفجار لفی جحیم ... » دییه جک ایکن « ان التجار ... » دیمشم . « دیهرک ایکیسینده خجیل ایله دی .



خواجه بر قاضی ایله تجاری خجیل ایله میسدر

قاضی : « سکا لاقیردی یتشمزکه ، ایسترسهک او یله قورناز کسلیرسین که اک یامان مزورلری حبط ایدرسین . دیلرسهک یابانک او کوزندن دهها شاشقین کورونیرسین ! » دینجه خواجه : « یوق آجانم ! . مبالغه ایدیورنسین . » ایله قاضی به اشارت ایدوب : « نه او قدر مزور » دیکر ایله تاجر ه اشارتله : « نه ده بوقدر او کوزم . ایگینسک آراسنده صایلیرم . » دیتشدر .

﴿لطیفه﴾ تیمورلنک آتشهرده ایکن بر دهری کلوب ترجان واسطه سیله:

« بر قاج سؤالم وار . ا کر حاذق و ماہر عالملیکز وار ایسه امتحان اولالم! .»

دیدى . تیمور اشراف بلده یی طوبلا یوب : « مملکتکزه اجنبی بر عالم کلدی . علوم طبعیه دن و فنون مادیه دن امتحان اولمق ایسته یور . بونلر سیاح آداملر در . ا کر قارشیمنه فنون شتایی احاطه ایله مش بر عالم چیقارمزسه کز آنا طولیده علمک انقراضه اوغرامش اولدیغنی کزدیکی یرلرده اشاعه ایدر لر . بوده سزک دولتر ، ملتر آراسنده حیثیتکزی ازاله ایدر .» دیمکه اشراف بر اوطه ده استشاره ایدوب اولا مملکتلرنده علمانک کرچکدن معدومیتنه برمدت تأسف ایتدکن صوکره : « بویله لکله اولماز . بر چاره دوشونه لمده شوافتی باشیمزدن صاوا لم! .» دیوب برچوق مذاکره وقونیه دن ، قیصریدن علما جلبی خصوصی مشاوره ایله دیلر . نهایت ایچلرندن بری : « خارجدن علما جلبی اوزون وقته محتاج اولمغله برابر امیر تیموره قارشى حقارتمزی موجب اهالی بلده یاننده ده کوچوک دوشمککمیزی داعیدر .» دلدن اوصولو خبر « دیر لر . هله بوبابده بزم خواجه دانانک رأینی آلام . بلکه اونک برتدیر غریبله دیل بیلمز اجنبی یی آتلاتیرزه .» دیمکه پک مصیب بولوب خواجه یی جلب ایده رک مسئله یی آکلاتدیلر . خواجه : « سز اونى بکا ییراکیکز! . ا کر موافق بر جواب ایله صوصدوره . بیلیرسم نه اعلا! . ا کر موفق اولامازسم : (او دیوانه مشرب بر آدمدر . کندی کندینه داخل مجلس اولدی . او صایلمز؟) دیرسکزه . باشقه اوقومش بر آدمی قارشیمنه چیقاریرسکزه؟ . ا کر موفق اولورسم هیکزدن آیری آیری مکفاتی ایسترم . امیرک احسانی ده جابا! .» دیمکه : « آمان خواجه! . سن بزم یوزمیزی اجنبیه قارشى آغارتده هر نه دیلرسه ک الله کریم! .» دیدیلر . نهایت بریوم مخصوصده شهرک میدانلغنده چادیرلر قورولوب امیر تیمور و اتباعی صیرمه لره غرق اولمش وآلات حرب واسباب جنک ایله اورته لغه هیبت صالمشدى . بعده قیویرجیق صاچلریله عجیب الشکل اولان دهری دخی کلوب قرب سلطانیده بر موقعه قورولدی ، اوتوردی . هر کس خواجه نک ورودینه انتظار ایله دیلر . الهایه خواجه ده باشه قوجه مان بر صاریق ، صیرتنه کنیش قوللی بر بینیش

کیوب آرقه‌سنة شا کردی حماد ایله‌دیگر برایکی طلبه ده‌اطاقوب مجلسه داخل اولدی . پادشاهک صاغ طرفنده بر موقع احراز ایله‌دی . شربت‌لر ایچیلوب استراحت حاصل اولدقدن صوکره دهری اورته‌یه کلوب کمال اعتنا ایله بردأره چیزدی . جوابی طلب ایله‌مک اوزره خواجه‌نک یوزینه باقدی . هان خواجه قالقوب عصاصی ایله دائره‌نک تام اورتاسندن بر چیزکی چکوب ایکی‌یه تقسیم ایله‌دکن صوکره دهرینک یوزینه باقدی . بعده مقابلنده بر چیزکی دخی چکوب دورده تقسیم ایتدی و آلله اشارت ایدرک اوچ بولوکنی کندینه طوغرو چکر کبی یاپوب بر بولوکنی دهری‌یه طوغرو و آلنک آرقه‌سیله ایتیرر کبی یاپدی و تکرار دهرینک یوزینه باقدی . دهری آلله اشارت ایدوب تحسین و آفرین ایله‌دی، کانه بیلدیکنی سوله‌دی . بعده دهری آچیلش لاله کبی آلنک اوستنی یره طوغرو ، پارماق‌لرینی آچیق و طویل اوله‌رق هوایه طوغرو بر وضعیتده طوتوب بر قاچ کره یوقاری‌یه طوغرو صالادی . خواجه‌ده اونک عکسی اوله‌رق آلنک اوستی هوایه پارماق‌لری آشاغیده اولمق اوزره بر اشارت یاپدی . دهری بونی قبول ایتدی . بعده دهری کندیسینی آلله کوستروب پارماق‌لریله برده حیوان یورومه‌سینی تقلید ایدوب صوکره قارنی اشارت ایدوب بر شی چیقار کبی اشارت یاپدی . خواجه‌ده جیندن چیقاردینی یومورطه‌یی کوستردکن صوکره ایکی قول‌لرینی صالایه‌رق اوچار کبی یاپدی . دهری بونی تحسین ایله‌دی . قالدی، کمال تعظیم ایله خواجه‌نک قارشیسینه اکیلوب اللرینی اوپدی و بویله نادره روزکاره مالک اولدقلرندن طولانی پادشاهی و اشراف بلده‌یی تبریک ایله‌دی . حضار مجلس پک‌زیاده محظوظ اولوب مملکتک یوزینی آغارتنی ایچون خواجه‌یی آری آری تبریک ایله‌دیله و هرکس احتیاطاً حاضرلادینی هدایایی، نقودی خواجه‌نک باشنه سرپدیلر . کذلک امیر تیمور دخی قیمتمدار هدیه‌لرله خواجه‌یی ثروته مستغرق ایلدی . هرکس طاغیلدقدن صوکره پادشاه و مقبرلری و بعض اعیان بلده دهری‌یی بر طرفه چکوب ترجمان واسطه‌سیله : « بز سزک اشارت‌لشمه‌کزدن برشی آ کلا یامادق . سز نه دیدیکز ؟ خواجه نه یوله جواب ویردی که طبع‌کزمه موافق بولوب تسلیم ایله‌دیکز ! » دیدکلرنده دهری شو یوله بسط مرام ایله‌دی : خلقت عالم حقنده حکمای یونانیه علمای بنی اسرائیل

مختلفدر. بوبابده علمای اسلامیہ نك رأی نبجہ معلوم اولمادیغندن بونی او کر نمکلی
 بك ایستردم. بناءً علیہ ارضك کرویتی و مدوریتی اشارت ایتدم. افندی حضرتلری
 بونی تسلیم ایتد کدن باشقه چکدیکی خطوط ایله اول خط استوائی فصل ایدوب
 نصف کره شمالی و نصف کره جنوبی یی تفریق آیلهدی. بعده مقابلندن بر خط
 دها چكرك اوچنی کندینه و برینی بکا طوغرو اشارت ایله مکله دنیانك اوچی
 د کیز، بری قاره اولدیغنی یدی اقلیم دورت کوشه یی بیان بیوردی. صوکره
 انواع موالیدی و اسرار خلقتی تحقیق آیلهمك اوزره پارماق لری می هوایه طوغرو
 صالایه رق یردن نباتات، اشجار، منابع، معادن حصولنی سوله دم. بوکا
 مقابل خواجه افندی حضرتلری اللری یوقاریدن آشاغی به طوغرو صالایه رق
 بونلرك حصولی کو کدن یاغورك نزولی، انوار شمسك نفوذی و سائر آثار علویه
 سماویه نك تأثیراتی یرده کی موالیدی و مولداتی پرورده آیلهدیکنی حکمانك الك
 صون تحقیقه مطابق صورته ایضاح ایلدی. بعده کندی می کوستروب و المله روی
 زمینده تکیون ایدن مخلوقاتک یکدی کیرندن تجزی ایله مکله تکثر ایله دیکنی اشارت
 ایتدم. حال بوکه ذی روحلردن بویوک رقصی می مهم بیر اقسام. جینندن یومورطه
 چیقاروب کوستره رك و آلیله اوچار کی اشارت ایدرك اصناف طیوری ایضاح آیلهدی.
 بو صورته خلقت عالم و تکثر اصناف و امم حقنده مجمل و احاطه لی بر جواب و یردی.
 بوندن آ کلام که عالمکز حقیقه علوم سماویه و ارضیه یی - تعبیر دیگر بالجه
 علوم محسوسه و معقولیه یی - ذاتنده جمع و احاطه آیلهمش برداهی ذوقوندر.
 بناءً علیہ؟ خاصه همشیریلری، عامه و طنداشلری بویله بر عالم حکمت نهاد ایله
 نه قدر افتخار ایتسه لر لایقدر. دهری یی عزت اکرام ایله تشبیع ایتد کدن
 صوکره خواجه نك باشنه طویلانوب بر کړده مسئله یی اوندن استیضاح آیلهدیلر.
 خواجه شویله جواب و یردی: آ جانم؛ بو آدم ها پازان، آج کوزلی،
 جوع الکلبه [۱] اوغرامش بر خسته در. بکا: «عالمدر!» دیه سوله دیکنز،
 پهوده تلاشه دوشور دیکنز. وقتا که کلام. کوردیک کز و جهله آلیله بر دائره
 چیزدی: «آه بر تپسی بورك اولسه!...» دیدی. اولای یکی به بولیم.
 قارداش پایی یاپدم. باقدم که آلدیردینی یوق. دورده بولدم. اوچنی کندی می

آدم . برنی اوکا ویردم ، زوالی راضی اولدی . باشی صاللا دی . کانه :
 « بکا او قدری ده کافیدر . » دیدی . مکرسه دها مطلوبی وارمش . صوکره
 اشارته : « بر تجربه پیلاو قایناتلسه ده قورتاریلسه یسه ! » دیدی . بنده اشارته
 اوستنه طوز ، بورده اکیلک ، فیصتیق ، اوزومده قونق لازمدر .
 دیدم . او مسئله ده حل اولدی . صوکره ایلک کندیسی وقارتی اشارت ایدوب
 و ایلک یورومک اشارتی یاپوب اوزاق یولدن کلدیکی ، نیجه زماندر مکمل طعام
 ایتمه حسرت اولدیغی سویله دی . بنده اشارته بیلدیردم که : بن سندن ده
 آجم . قارمک بوشلغندن او قدر خفیم که قوش کبی او چاق بر حالدیم .
 صباحلین قالدیم . قادین قاتیق اولق اوزره طوی بر یومورطه ویردی . سز
 خبر کوندر دیکز اونی ده یمکه وقم اولمادی . احتیاطاً جیمه قویدم ، کلدیم
 دیدم . مسئله بوندن عبارتدر .

دیمکه حضار : « بن نه صوردم ؟ سن نه فهم ایتدک عجب افسانه در ! . »
 منظوقجه بو تفاوت حسیاته برابر بو سؤال وجوابک هر ایکی طرفی ده خوشنود
 ایلهمه سنه حیران اولمشلردر [۱] .

﴿ لطیفه ﴾ بر ییل کورد عشرته رمضان اماملغه کیتمشدی . بالطبع
 اوکه کجوب نماز قیلدیر مقده ایسه ده کورد بکنک اوغوللری بر کون کلوب :
 « خواجه ! . واقعا آغزیک اورو جیلک کولکی قیرمق ایسته مه یز اما سنده
 پک آشیردک ، طاشیردک . بر دکیل ، بش دکیل . هر وقت سلمه السلام نمازده
 بک بابامزک اوکنه کچیورسین ! . بز صایما یورسین دیهلم ؟ فقط بک بوکون :
 « هایدی ! . » دیدیکی کبی امرینه حاضر ، بر سلاح بش بیک آتلی به حکم
 ایدیور . بویه بر قهرمانک پالدر کولدور اوکنه کچیلیری ؟ . سن اونک اویله

[۱] بو حکایه بکار بکندن (م . آ) وفیزیل طور اقدن توفیق بک زاده (غیاث الدین)
 واسکدارده هدای افندی سواغنده (محمد بسم) و بروسه مکتب ملکیسنده (علی حق)
 وعشاق دیون عمومیه مأموری زاده حسین حامد بک افندیلر طرفندن دخی کوندرلکه
 جمله سنک مزاج وتوفیقیه حصول بولمیشدر . بر چوق قارئلریز طرفندن کوندرله سی
 حسیله اونلرک تطییی ایچون درج ایدلمیشدر .

سلسلہ دیکھنا باقیہ! عکس زمانہ غضب ایدر سہ سنی الندن کیمسہ قورتارہ من! دینہ مکمل پایلار لر . خواجہ ہرنہ قدر نمازک اقتضاسی اولدیغنی آکلاتمق ایستہ دیسده مرکب یالاماش یادکار لر کیندکجه شدتی آرتیردقلرندن خواجہ : « هله ایجابنه باقارز ! » دینہ باشندن کوجلہ صاووب مسئلہ یی بکے آکلاتمغه ، بو صورتله بکزاده لرك تعرضندن قورتولمغه قرار ویریر . آقشام افطار ایدیلوب کیفلر چاتیلدقدن صوکره خواجہ زمین ، زمان حاضر لایه رق : « افندم ! . کنج بک زاده لر ، محضا سزک شانکزی کوزتمک قصدیلہ ، عییلانماز ، ایجاب شرعی یی دها بیلمدکلرندن ... » دینہ سوزہ باشلارکن بکک قاشلری چاتیلوب : « ندر ؟ خواجہ ! شو جماعت مسئلہ سیمی ! دیوب زواللی خواجہ سوزی آچدیغنه بیك قات پشیان اوله رق ، ازیلوب بوزولہ رک : « اوت افندم ! . حاشا مقصدم شکایت دکل . محبتہ وسیلہ ... » دیمکله بک : « خواجہ ! .. اونلر خلط ایتشلر اما — سندن جانم خوشلاندیغنی ایچون سویله یورم — سن ده پک ایلری کیدیورسین ! .. » دینجه — اولانجه قوت قلیله بکے کوودن بیچاره خواجہ بو طرزده معاملہ یه معروض اولمغه — هر حالده رمضان بی تیروب عوائدی آلاق کیتمک ایچون کچینمکے قرار ویردیکندن شو یولده جواب ویردی : « افندم حقلیسکیز ! . آنجاق هر شیئک اوکنه دکیل ، صوکنه باقیلیر . اک صوکنده یوزیمی سکا طوغرو چورمه یورمییم ؟ . او وقت بنم اوکده وقارشیمده سز بولونما یورمیسکیز ؟ . اک آرقده تک بن قالمایورمییم ؟ . » دینجه کورد بکی برخیلی دوشوندی . فقط قاشلری ده آچیلدی . کولر یوزله خواجہ یه دیدی که : « آخواجہم ! . کوریورسک مملکتلردن اوزاقده یاشار آدملرز . بویله اینجه علم مسئلہ لرینه ناصل عقلمز ایرر ؟ »

﴿ لطیفه ﴾ خواجہ بر جوق بیلدیر چین اولایوب تمیزله مش ، قیزارتمش تجره نک اغزینی قاپامش ، احباب لرینه بر ضیافت چکمک ، آجیلغنه معترض اولانلری بر طائلی دلیل ایله اسکات ایتک اوزره اونلری دعوتہ کیتمشدی . بر دیگر ی کلوب قیزارتمش بیلدیر چینلری آلاق رینه جانلی بیلدیر چین قویمش ؛ کیتمش احبابلر حاضر اولوب تجره اورته یه کلوب خواجہ کمال فخر ایله قباغنی آچدیغنی

کبی بیلدیر جینلر چیرپینه رق اوچدیلر ، کیتدیلر . خواجه کال حیرتله باقه قالوب
نهدن صوکره آغزندن شو سوزلر دوکولدی :

« یاربی ! طوتهلم که بیلدیر جینلرک یکیدن حیاتلرینی اعاده ایله دک . اوسه ویملی
مخلوقلری سوسیندیر دک ! . یا بنم یاغم . طوزم ، بورم ، اوتم ، اوجاغم ، پاره لرم ،
بونجه امکارم نه اوله جق ؟ بونلری نره دن آرایه جغز ؟ »



خواجه نك هامدن چیریل چییلاق چیقوب عطار دكانه کیتمه سیدر

﴿ لطیفه ﴾ « حشیش [۱] سرخوش ایدر . » دیهه ایشیدوب مراق
ایدرك عطاردن بر مقدار آلدی . استعمال ایدوب عقبنده حمامه کیرمشدی .
یقانیرکن عقلنه کلدی . کندی کندی نه : « آدام سنده ! . نه سکر ویردیکی وار ،

[۱] (حشیش) اسرار دیدکلری مسکر در . کنه ویر ، کندیر اوتندن استحصال

ایدر لر .

نده عقله طوقوندیغی وار. لاف! اونی بهانه ایدهرک مسخره لق ایدیورلر. یاخود عطار بنی آلدادی. کیده میم شونی عطار دن تحقیق ایدهم. « دهرک چیریل چپلاق سوقاغه اوغرا دی. راست کلنر: » خواجه ندر بوحال؟ « دیدکجه ماجرای بر تفصیل آکلاتیردی. ایشیدنلر کولمکدن قاتیلرلردی.


﴿لطیفه﴾ خواجه صباحلین اوچ اوقه ات آلب خانه سنه بیراقدی، تکرار ایشینه کتیدی. قالدین دوستلرینی طوپلایوب آتله مکمل رضیافت چکدی. خواجه آقشام کلنجه اوکنه ساده صویه بولغور پیلاوینی سوردی. خواجه: « آتدن بریمک یاغمه وقتک اولماسه بیله شو پیلاوه بر قاچ یاغلی پارچه سنی آتوبده بر آزلدتلندیرمه سنی دوشونه مه دکمی؟ » دیدکده قالدین: « بر پارچه مانع اولدی. بن اونکله مشغول ایکن سنک پک سهو دیکک تکیر کدی کاملاً یمیش. برده کلدم، نه باقیم؟ یالانیوردی. » دیمکله خواجه همان قوشوب قانطاری کتیردی. مانعاً آلتدن کدی بی چیقاروب طارتدی. تام اوچ اوقه کلدی. قاریسنه دیدی که: « به ایمانی یوق! اگر بو طارتدیغ ات ایسه، کدی زهیه کتیدی؟ اگر کدی ایسه، هانی ات؟ .. »

﴿لطیفه﴾ خواجه هم اذان اوقور؛ هم آلابیلدیکنه قوشاردی. سببی صورت قلرنده: « باقم سسم زه لره قدر ایریشه بیلیور، و زه لر دن ایشیدیلر بیلیور؟! آکلامق ایسته یورم. » دیدی.

﴿لطیفه﴾ خواجه بی آلداته رق برچیرکین قالدین آلمشلردی. صباحلین خواجه کینوب سوقاغه فیرلایه جغی ائنده نازنین قیریتهرق: « اقدی! اقربا کزک ارککارندن هانکیلرینه کورونوب، هانکیلرینه کورونمه یه حکم؟ .. » دیدنجه خواجه: « بکا کورونمه ده هانکیسنه ایسترسه ک کورون! » دیمشدر.

﴿لطیفه﴾ خواجه طاغده اودون کسرکن اولدیغی ره طوغری قوجه مان برآی کلدیکنی کورونجه قورقوسندن همان بویوک بر آغاچه چیقمش. مکر او آغاچ آخراط ایمش. آبی ده گلش، آلتنه یا تمش. خواجه بکله مش، بکله مش. حیوان کیتمه مش. آقشام اولمش. او کیجه مهتابه تصادف ایلدیکندن

آینك هر وضعیتنی آغاچدن سیر ایدرمش . نهایت آبی آغاچه چیقهرق آرمود
 ییمکه باشلامش . اولمش آرمود آرامق ایچون حیوان تبهیه طوغری چیقده
 خواجهده یوقارییه چیقارمش ، نهایت اك تبهیه چیقمش . آبیده آلتنده کی
 داله چیقمش . خواجهنك بوسبوتون عقلی باشندن کیتمش . اولوم فلا کتنی
 دوشونهرك خزان یاپراغی کی تیره مش . آبی کندی ایشیله مشغول اولارق
 آرمودی قوپاریر، مهتابه طوغری طوتار، اولمش ایسه یرمش . ینه بردفعه سنده



خواجهنك آیدن قورقوب آغاچه چیقمسی ، آیدنكده آرمود ییمک اوزره آغاچه چیقمه سیدر

ایستنده کندنن کچمش برحاله طالمش اولان خواجهنك تا اغزی حداسنه قدر
 قالدیرنجه خواجه کندیسه آرمود اکرام ایدیور ظن ایدرك جان قورقوسيله
 « بنیه مه ! » دییه دهشتلی بر صیحه اورنجه کندی ایشیله مشغول اولان آبی
 نهیه اوغرا دیغنی بیلمه یوب اودی قوبه رق کندی آغاچدن آشاغی بیراقی ویرمکه

او قوجه کووده داللری قیره رق ، سیوری محللردن پارچالانه رق : « پاف ... »
 دییه یره دوشدی . جانسز اوله رق سریلدی . خواجه صباحلین نهن صوکره
 آینک کبردیکنه حکم ایدوب آغاجدن دورتوشدیره رک یقین حاصل ایله دکدن
 صوکره اینش . کچیردیکی اُک مدهش قورقولی کیجه نک مکفاتی اولق اوزره
 اری وتویلی پوستنی یوزوب مملکتلینک اک غلبه لقلی محللردن کمال غرورله
 کچهرک دوستلرینک بول بول آفرینی قازاندقجه ایچندن کیس کیس کولرمش .

﴿ لطیفه ﴾ خواجه نک مونس ، شاقلابان ، کوزل برقوزوسی واریمش .

پک سه ویدیکی ایچون آله کچی بیدردیکندن حیوان یورویه مه یه جک برحاله شیشمش .
 هاپازان قومشولرینک کوردکجه آغزلری صولانوب ایکیده برده : « جانم خواجه !
 شوقوزی بی کسه لمده کوزل بر اکلنجه ترتیب ایده لم . » دییه مسلط اولدقجه :
 « چوجوقلر ! طوقونماک ، شو حوان بزم اکلنجه م . بکار حیوانی چوق
 کورمه یک ، سزک مسلط اولوشکزدن بیزار اولیورم . » یولنده سوزلردن
 خواجه کولکله بو حیوانی فدا ایتمه یه جکچی آکلامه لرله بر کون بیتیشیک
 قومشوسی قوزوی قوردکی قاپار ، خواجه یه طویورمه دن بیرلر . قورناز
 خواجه کیمک چالیدیغی وناصل یسدکلرینی آکلار . فقط هیچ سزدرمز .
 ایکی سنه صوکره قوزوی چالان قومشونک برقتیک کچسینی بر کون آله کچیرر .
 خواجه اونى عافیتله جنبشله نیر . فقط قومشو غایت جیمیری بر حریف
 اولدیغدن قیش باشنه قدرهان هر مجلسده کچسندن بحث ایده رک : « شویله سمیز
 ایدی ، بویله یاغلی ایدی ، بوی شو قدر ایدی ، تویی شو درجه اوزون ایدی . »
 دییه حددن آشیری وصف ایدوب کچی بی بیلمه نیر بونی خارق العاده بر شی
 ظن ایدرک عین حقیقت کی دیکله دیکه خواجه نک سفیرینه طوقونمه باشلامش .
 ینه بر کیجه خواجه نک خانه سنده طوبلانیلوب حریف بر مناسبت کتیره رک
 کچی بی دوه قدر بویولتمک ، تویی آلتی اوقیه چیقارمه قالقیشمغله برابر سیاه
 رنگده ایکن : « قارکی بیاض ایدی . ایپکدن یومشاق تویی واردی . » دینجه
 خواجه ناصلسه بوش بولونه رق اوغله خطاباً : « دلی کوکلم دیرکه : کیده م
 کیلاردن شو حریفک کچسنگ پوستنی کتیروب اورته یه آتیمده . سیاهمی ،

بیاضی؟. کدی قدرمی، فیل قدرمی؟. میدانہ چیقسین. حجابندن یرلره
کچسین. بزده کچی ماصالندن قورتولالم!..» دیی ویرمشدر.

﴿لطیفه﴾ غایت خسیس اولان صوباشی برآراق خواجهیه: «افندی!
سنگ آوه مراق واره. آوجیلرله کوروشورسین. بکا طاوشان قولاقلی کییک
باجاقلی، قارنجیه بللی بر تازی ایصارالا.» دیمش. خواجه برمدت صوکره.



خواجه نك صو باشییه تازی یرینه قویون کوپکی کتیردیکیدر

مرکب کچی بر قویون کوپکینک بوغازینه بر کندیر طاقوب کتیرمش صوباشی:
«بونه در؟» دییه صورونجه خواجه: «آو کوپکی ایصارلامادکی ایدی؟» دییوب
صو باشی: «بن سندن طاغ کچیمی کچی اینجه، خفیف تازی ایسته دمدی.» دیمکله
خواجه: «مراق ایتیه ک افندم!.. سنزك دائره کرده آرزمانده بوده دیدیککز حاله
کلیر!..» دیدی.

﴿لطیفه﴾ خواجه نك قاضی اُناسنده بریسی كلوب : « افندی !
 قیرده صیغیر یاییلیر کن بر آلاجه اینك - غالبا سزك اولملی ! - بزم اینکی قارنیدن
 قاقوب اولدورمش . بوكا نه لازم کلبیر ؟ » دینجه خواجه : « بونده صاحبك
 نه قباحتی وار ؟ حیواندن قان دعواسی ایدلمز آ ! » دیمش . بوسفر حریف
 بن یاکلش سویلهدم ! . بزم اینك سزكکنی اولدورمش ! » دینجه خواجه :
 « ها ! .. او وقت مسئله چاتاللاشدی . بكا شو رافده کی قاره قابلی کتابی
 ایندیری ویرك باقیم ! » دیمشدر .

﴿لطیفه﴾ خواجه بر آقشام یورغون ، ذهنی طورغون ، بر حالده
 خانه سنه كلوب نشئه لئكه محتاج اولدینی بر صیره ده زوجہ سنی بر معتاد قاشی چاتیق
 کورونجه : « کولمز سلطان ! . ینه نه وار باقم ؟ محضا سزك معیشتکنز ایچون
 آقشامه قدر چالیشدیغمزك مكافاتی اولق اوزره باقیکنز نه ییچم بر وضعیتله
 قارشیلایورسکنز ! » دیدی . قادین : « الله الله ! البتده بر سببی وار ! احبابم
 بر يك تازدسی چوجوق اوزرینه کیدی ویرمش . اوکا (باشك صاغ اولسون) ه
 کیتدم . دها یکی کلدیم . آکلادکمی شیمدی سبینی ؟ » دینجه خواجه :
 « بن سنك دوکون اوندن کلدیکینی ده بیلیرم آ ! » دیمش .

﴿لطیفه﴾ خواجهیه احبابندن بری مسافر کلش . ییدیرمش ، ایچیرمش .
 ساعت درده قدر صحبت ایتشلر . تام یاتیله جفی اُناده مسافر :
 بزم ایلر ، بزم ایلر ، یاتارکن اوزوم یرلر
 دییه برده قهوه آتی چیقار یلماشنی آکلاتمق ایسته ینجه خواجه بالبداهه :
 بزده اويله عادت یوقدر . صاقلارلرده کوزون یرلر
 دییه لطیفه ایله حریفی یاتا جیفنه یاتیرمش . « الله راحتلق ویرسون » ی چکوب
 صاووشمشدر .

﴿لطیفه﴾ انهای سیاحتده برکویك امامنه مسافر اولوب خانه صاحبی :
 « افندی ! اویقوسزمیسك ، صوسزمیسك ؟ » دییه یمکدن هیچ بحث ایتمه ینجه
 خواجه : « بورایه گلزدن اول پیکار باشنده اویومشدم ! » دیمشدر .

﴿لطیفه﴾ بریسی خواجه بی کمال اشتها ایله یمک یرکن کوروب :
 « نچون بش پارماغکله ییورسک ؟ » دییه صورمغله : « آلتی پارماغم اولمدینی
 ایچون . » دیمش .

﴿لطیفه﴾ خواجه بر خانه یاپدیره جق اولمش . قومشولری ، احبابی
 کلوب هر بری بر شکل تعریف ایتمش . هم هپسی ده تعریفک اجراسنده - بر
 معناد - اصرار ایله مش . « سن یاپدیرمزسهک بن ینه زورله یاپدیره جغ . »
 دییه خواجه بی مجبور ایله مشلر . آرتیق خواجه بيقوب کیم نه دیدیسه اويله
 یامش . خانه دن بشقه هر شیئه بکزه بن تحف برنا وجوده کلش . انشاءت
 بیتد کدن صوکره رسم کشاده دوستلری چاغیرمش . « نصل بکندیگری ؟ . »
 دیمش . هیچ بکنمه دکلرینی سویله مشلر . خواجه دیمش که : « هاه !. ایشه بو
 سزک تعریف ایتدیکنز وجهله یاپیلدی . شیمدی بی کندی حاله بر اقیق .
 بو سفرده کندی بیلدیکم کی یاپدیره م . »

﴿لطیفه﴾ بر وقت آقشهره هاپازان بر صو باشی کلش . « هرکس
 بیلدیکی یمکک نه یولده پیشیرلدیکنی یازسونده بر کتاب وجوده کتیره لم . »
 دییه ملککتک وجوهنه سویله مکله بو سوز خواجه به عکس ایتمش . خواجه
 ایرتسی کون اوزاتی کوروب : « بو کیجه تابصباح دوشوندم . هیچ ایشید
 یله دیک نادر بر یمک کشف ایتدم . غایت بسیط ، غایت لطیف !. » دییوب :
 « نه در ؟ » دیدکده : « باله صارمصاغی باتیروب باتیروب یمک !. » دیدی . حریف
 ذهنی بوش بر آدم اولغله ودر حال صو باشی تصادف ایله مه سیله : « افندم !. بزم
 بلده مزک چوق کورمش ، چوق بیلمش تحف مشرب بر خواجه سی وار . سویله
 غریب بر طعام تعریف ایتدی !. » دیه آکلاتیر . صو باشی ده اوندن یوکسک
 سویه ده بر آدم اولمادیغندن : « عجائب !. » دییوب همان خانه سنه کیدنجه آقشام طعامنده
 تجربه سنی یاپار . بالطبع ایکرنج بر شی اولور . حریف بوکا حدتله نوب صباحلین
 بو طعامی روایت ایدن معرفتله دیوان او طه سنه خواجه بی جلب ایدر . « بال
 ایله صارمصاق یمه بی ایجاد ایدن سنمیسک ؟. » دیمکله خواجه محویتله : « اوت

افندم! من غیر حد داعیکز!.. دیر. امر ایدر. صباحلین آچ قارننه خواجه نك اوکنه قویارلر. خواجه صارمصاغی باله باتیروب چیکنه نیجه طعمنك فنالغندن ناشی غایت عجیب بر صورتله ایکی طرفنه باقنیر. صو باشی: «نه باقیورسك!.. ایجاد ایتدیکك طعامی طویه طویه عافیتله یی.» دیمکله خواجه: «افندم! صادقسکز، آنجق داعیکز بو ایجادم بر نظریه دن عبارت اولوب هنوز تجربه سنی یاپمه مشدم. شیمه دی یادم اما نظریسی عملیسنه اویمادی.» دیمکله بونکته لی اعترافندن طولای یاقه یی قورتارمشدر.

﴿لطیفه﴾ صو دستیسنی طولدورمق اوزره چایه طالیدیروب طولدیغی ائنده آلندن قورتولنجه دینه اینمش. خواجه بکلر مش. بریسی: «آ خواجه! صویه نه باقیورسین؟» دیدکده: «دستی صویه کیردی. چیقنجه بوغازندن یاقه لایه جغم!» دیمش.

﴿لطیفه﴾ یولده آرقه داشیله مشترک یوغورت آملار. یسه جکلری ائنده آرقه داشی اورته دن چیزوب: «بن حصمه شکر توزی دوکه جکم!» دیمکله خواجه دیرکه: «جانم! بو مایع بر شیردر. البته بنم طرفه ده طادی بر پارچه کلیر. عجیب برشی اولور. دوکه جکسه ک باری هر طرفه دوکده آغیز طادیله یسه لم. حریف: «شکرم آذر. سکا ویرمه مجبور دکلم!» دیمکله خواجه قیزوب الی طاغارجنه اوزانه رق زیتون یاغی شیشه سنی چیقاروب هان دوکمه شروع ایتدی. حریف: «بره آمان!.. هیچ یوغورته زیتون یاغی قونورمی؟» دیدکده خواجه: «سن نه قاریشیرسین!.. بن کندی حصمه دوکه جکم. کیفمک که یاسی دکلسین آ. سن کندی بولوکیکه قاریش.» دیدی. حریف: «آجانم!.. هیچ بر مایعک بر طرفه برشی دوکولورده اوبر طرفه بولاشمز اولورمی؟» دیجه خواجه: «خلط ایتمه اوپله ایسه!.. دوک شکری اورته یه!» دیمشدر.

﴿لطیفه﴾ خواجه یه چوجوق ایکن: «سن می بویوکسک، قارداشیکمی؟» دیمشدر. «والدهم کچن سنه برادرک سندن بریاش بویوک دیمشدی. بو حسابجه بو سنه ایکمز بریاش اولمازن لازم کلیر.» دیمشدر.

﴿لطیفه﴾ خواجه بر مملکت کدوب اورانك اهاپسندن بر کیمسه:
 «افندی حضرتلری! سزی پك سودم! بویورك بزده طوزا مك ییهم. همدم
 صحبت ایدم!» دیمکله خواجه مع الممنونیه قبول ایله دی. بر مدت صوکره حقیقه
 اورته یه طوز ایله اك مك قومقله خواجه آج اولدیغدن ناچار یمکه باشلادی .
 او ائنده قاپویه بر دینجی کلوب بر چوق دعالرله ییه جك ایستهدی . دهشتلی
 خسیس اولدیغی نمایان اولان خانه صاحبی پنجره دن باشی اوزاتوب : « هایدی
 دفع اول اورادن! شیمدی کلیرسم بلکی قیراریم ! » دیدیکی حالده دینجی
 ینه تضرعائنده دوام ایله دیکنی خواجه کورونجه اوده باشی اوزاتوب دینجی یه:
 « یاقسهك آ آیول ! سن افندی بی باشقه لرینه قیاس اتمه ! اوپله یالانی ، شاقاسی
 یوق ! سوزینك آریدر . یاپار . » دیمشدر .

﴿لطیفه﴾ احبابندن بری یکی برخانه یاپدیرمشدی . خواجه بی دعوت
 ایتدی . صباحدن آقشامه قدر اوزون اوزادی کزدیروب خانه یه متعلق دیدی
 قودیلرینی دیکلندیکی حالده یمك خصوصنه اصلا یانا شاددی . خواجه نك آچلقدن
 صافراسی قاپاروب کوزلری قارارمغه باشلادی . او ائنده خانه صاحبی بتکرار
 سوزه باشلایوب : « یمك اوطه سنی تیز کچدیکز . نظارتنه ، کوشه سنه ، بوجاغنه
 دقت اتمه دیکز . بونی پك اعتالی یاپدیردم . » دییه بتکرار کزدیرمکه کوتوردی .
 خواجه هر طرفنه کمال اعتنا ایله باقدقدن صوکره اُ کینی ، بونی اولچمکه ،
 جیننده کی دفتره بعض چیز کیلر چیزمکه باشلادی . خانه صاحبی نه یاپدیغی صورمقله
 اوطه نك رسمنی آلدیغی سوبله دی . خانه صاحبی : « کوردیکز می افندم؟ ناصل
 خوشکزه کیتدی . اومارم که کندی یمك اوطه کزی ده بو یولده تعدیل
 ایتدیره جکسکز ! » دیمکله خواجه : « نه شبهه ! پك خوشمه کیتدی . غایت
 اداره لی؟ . انسانك یقیغی بوغاز مسئله سیدر . حال بوکه سزك یمك اوطه سنك
 صورت تشکیلندن اولمیدر که یمکه متعلق هیچ برشینك وجودی بوراده ایجاب
 اتمه یور ! » دیمشدر .

﴿لطیفه﴾ بر مسئله دن طولانی کویلیسی خواجه بی قاضی به شکایت ایلهمه لریله قاضی خواجه بی جلب ایدوب : « کویلی سنی ایسته میور . باشکک چاره سنه باق ! » دینجه خواجه : « اصل بن کویلی بی ایسته م . وارسون اونلر



کویلینک خواجه بی قاضی به شکایتیدر

هانکی جهنمه ایسترلرسه کیتسونلر . اوقدر خلق نزهه کیتسه بر کوی تشکیل ایده بیلرلر . فقط بن بر باشمه شوپاشمدن صوکره چقتمی چوبوغیمی طاغیتیم ده کندیمه هانکی طاغ باشنده مسکن تدارک ایدیم ؟ » دیمشدر .

﴿لطیفه﴾ خواجه مرحوم اوزون بریولدن کلیرکن پک زیاده یورولور . کندی کندینه : « یاربی ! نه اولوردی ؟ ضعیف بر مرکبم اولایدی ده هیچ اولمازسه آباغمی یردن قالدیرهیدی ! » دیرکن اوتهدن بر سپاهی آتی قوشدوره رق

کلوب آرقه‌سندن آلتی آلیق قولونی کوستره رک خواجهیه خطاباً: «ای..دانی! بویه تنبل تنبل آغاچک کولکه‌سنه چکیلمکه اولماز. چالیشمالی!.. هایدی باقم! شو طای یورولدی؛ برازصیرتکه آلدده شو قارشیکی کویه قدر کوتوری ویر!» دیوب خواجه: «آمان افندم!.. بن قیمیلدایه مادیغمدن طولایی...» دیرکن لاقیردیسنی بیتیرمک بیله میسر اولمایوب شیمشک کبی بر قامچی صیرته اینمکه برابر: «قالق کراته!.. اولیه شو چام آلتی سنک، بو پیکار باشی بنم؛ دییه آغیرازکی، فیستیقی مقام، قونه‌رق کوچه‌رک، سوموکلای بوجک کبی بر قوناقلق مسافه‌یی بر هفته‌ده قطع ایدهرک طاغلرده، قیرلرده صفا ایتیه انسانی هر وقت براقزلر!..» دییه باغیربجه بچاره چاره‌سز طایی صاللا صیرت ایدوب آغاچک اوکنده قوشمغه باشلادی. آره صیره اینجکلرینی قامچی اوقشادقجه هوپ هوپ هوپلاردی. زواللی؛ کوی قارشیدن کورونجه‌یه قدر اون دقیقه‌لق مسافه‌یی قطع ایدوب نهایت طایله برابر یوزو قویون قاپاندی. مرمر یورکلای حریف آرتیق زیاده اصرار ایتیه‌وب: «آیرانچی حریف سنده!..» دیوب کچدی، کیتدی. زواللی خواجه قان تر ایچنده یاریم ساعت قدر قیمیلدانه‌مایه‌جق بر حالده بیهوش یاندقدن صوکره‌عقلی باشنه کلوب سورونه‌رک بر آغاچ دینه‌کلدی. باشی کوک یوزینه قالدیره‌رق دیدی که: «یاربی! بسبلی دیشلرم دوکولدیکی جهته بن لاقیردی آکلاته‌مز اولدم!.. بن ایستدم بر آشک، سن کوندردک بینه‌جک!..»

﴿لطیفه﴾ خواجه قیزی بر کویه کلین ایتیمش. کوییلرخیلی اوزادقدن صوکره خواجه قوشه‌رق بر بوجوق ساعتک یوله قان تراچنده بونلره یئتیدی. همان قادینلری بر طرف ایدرک قیزینک یانه صوقولدی. هرکس کال حیرته باقیوردی. خواجه قیزینه دیدی که: «قیزم. دیکیش دیکرکن ایکسنه صاپلادیغک ایپلکک اوجنی دوکومله‌مه‌سنی اونومه!.. چونکه اکر دوکومی اولمازسه عجله ایله ایپلک چیتی ویریر. ایکنه آلکده دیکله قالیر!..»

﴿لطیفه﴾ خواجه مرحومک جمله کراماتندن بری ده کویولوره پویراز صاتمه‌سیدر. شویله که: بر سنه بر کویه امام اولور. رمضان آیی ختام بولنجه

کویلوړ محصولک ځیتلغنی بهانه ایدرک خواجه ایچون هر سنه مقنن اولان بوغدای ویرمه مکه قالقیشیرلر . خواجه ده بونلره قیزوب تام خرمن زمانی اولمغله: «اویله ایسه بنده سزه روز کار ویرم . بولک روز کاریکزی صاوورک خرمنکزی ! دیهرک خرمن یرینه ناظر برتپه یه قوجه مان بر حصیر کرر . حقیقه کونلرجه پویراز خرمن یرینه اوغرامز . بر طرفدنده قالین قالین بلوطلر هواده کورونمکه باشلاینجه کویلوړی تلاش آلیر . بر معتقد کویلو: « افندی ! بن کچن



خواجه نك خرمنجیلره روز کار صاعاسیدر

سنة کی خواجه حقیقک ایکی مثلنی ویره جکم . « دیمکله خواجه کوزینک اوکنده اونک خرمننه طوغرو حصیره پارماغنی صوقوب بر دلیک آچار . برده حریف خرمن یرینه کیدنجه مکمل روز کار بولور . باشلار صاوورمغه ، آز زمانده منتظم روز کارله هپ چچلرینی ، ییغینلرینی بیتیریر . سوبنه سوبنه بوغدای صامانی چواللره طولدورور ، قاغنی یه یوکه تیر ، خانه سنه درآنبار ایدر . بونی کورن

قومشوری ده عجله خرمن یرینه کلیرلر . یانی باشنده اولدقلری حالده روزکاردن
 اثر بولامازلر . دیگر خرمنچی دیرکه : « نافله یورولما ! کیت خواجهیه حقنی
 وعد ایت . روزکار صاتین آل . چاره سز اوده کیدر . خواجه اونک خرمنی
 طرفه ده بر دلیک آچار . اوکویلی ده درحال ایشنی کورور . بونی کورن
 کویولر تپیه هجوم ایدوب هپسی خواجهدن روزکار صاتین آلهرق حقنی بول
 بول ویره جکلرینی وعد ایدرلر . خواجه : « کوییلر ! . صاقین خواجهیی
 قاندریرزده ایشیمز بیتدیکی وقت سوزیمزدن دوزز کی خاطریکزه فنا براعتقاد
 کله سین ! صوکره جناب حق خرمنکزی صاوورور . اووجیکزده برهواقالیر .
 دیمکه کویلی قورقوب خلوص وجدانله عهدلرنده طورورلر . کوزل کوزل
 خواجهنک حقنی وعد ایلرلر . خواجهده هرکسک خرمنه برردلیک آچار . هپ
 صاوورورلر . برکتلی محصول آلیرلر . خواجهنک حقنی ایکی مثلی اولهرق
 اوده لرلر . کویلی دخی مالنک برکتنی بولور . خواجهده بر سنه فریح فخور
 کچینه جک ذخیره سنی درآنبار ایدر . خواجه ذخیره سنی قاغیلره یوکه توب
 کوی خارچنده آریلق چشمه سنده وداع طعمانی ایدرک دعا ایلدکن صوکره
 آریله جنی صیره ده کویلیه متوجهاً : « تا کری تعالی حق صاحبنک حقنی آل
 ایله آلامازسه ایشته بویله یل ایله آلیر ! . » دیمشدر .

مرویدرکه اوکویده حالا روزکار مقاطعه سی جاری ایش .

رحمت ایتسون روح نصرالدینه حق
 اولدی بزدن بودعایه مستحق
 هر سوزی شایسته تقدیردر
 هر رموزی قابل تفسیردر
 صانه کیم ایله ایدی اول خرده دان
 هر سوزی بر نکته ایلردی بیان
 هم کولوب هم یازمه دوشدی عزته
 ایردی (۳۱۸) ده غایته

عزت پاشا حضرتلرینک رساله لرندن بوکلیاته نقل ایله دیکمز حکایه لر بوراده
 ختام بولمشدر [۱] .

بر سه مكتب ملكيسنده حافظ على مذهبى افندى طرفندره :

﴿ لطيفه ﴾ بر كون آقشهره مباحثه ي سه ور بر سوخته كلوب :
« شهر ي كنزك اك عالمى كيمدر ؟ » ديه صور مقله خواجه مرحومى تعريف
ايدر لر . آرار ، بولور : « خواجه افندى ! سكا قرق سؤالم وار . قرق سؤالمه
سندن بر جواب ايسترم . » دير . خواجه قيدسزجه : « سويله باقالم سؤاللىكى ! »
ديوب قرقنى ده جان قولاغيله ديكه دكدن صوكره : « لادرى كلها ! » يعنى
هپسنه بردن : « بيلم ! . » كه سيله بر جواب ويروب معارضنى صوصدور مشدر .

﴿ لطيفه ﴾ بر كون خواجه مرحومه : « بورنك هانكى طرفده ؟ . »
ديمش لر . اكسه سنده كى : « عقدۀ حياتيه » موضعى كوسترمش . « خواجه
افندى ! . تماميله ضدنى ومقابلنى تعريف ايتديكر ! » دينجه خواجه :
« هاه ! .. كورديكى ؟ . عكسى تعيين اتمه دجه اصلى تقرر ايتز ! . » ديمش .



قيزيل طويراقده (نوفيور بك زاده غياث الدين بك) طرفندره :

﴿ لطيفه ﴾ خواجه مرحوم قيزينك آلنه دستى ي ويروب صور اته
ايكى توقات عشق ايدرك : « صاقين دستى ي قيرما ها ! . » دير . يا وروجغزك
معصوم ياناغدن اينجى دانه لرى دو كولديكنى كورنلر : « افندى ! بو بيكناه
معصومه بغير حق اشكنجه روايدر ؟ . » ديدكلرنده : « اصل دستى ي قيرمادن
عاقبتك وخامتى كوسترمليدر كه دقت ايتسون ، يوقسه دستى قيريلدقدن صكره
جزا ويرمكه يرينه كلز ! » دير .



بر کوهرک قاهر طرفندره ورود ایدمشر [۱] :

﴿لطیفه﴾ خواجه مرحوم زوجه سنک ا کیردیکی ایپلکی بازاره
 کوتوروب غدار اصنافلر برچوق حیلّه و بهانه ایله خواجه نك آلدنن یوق بهاسنه
 آلق ایستلر . خواجه کندی کندینه : « سزه ارتکاب ایتدیککز اویونه
 کوره معامله ایتک یارار . « دیه رک کوللکده بولدیغی قوجه مان بر دوه باشی
 خانه سنه کتوروب ایپلکی اوزرینه صارار . غایت ایری بریوماق حصوله کلیر .
 ینه چارشی به کیدوب دیگر تجارلره کوستیر . بریسی یوماغه نسبتله آشاغی
 بر فیأت ویررسده خواجه دوشونور ؛ داراسی چیقنجه تام ایپلکک بهاسیدر .
 همان : « صای پاره سنی ! » دیر . حریف بوقدر ایری یوماغک بو فیآنه
 ویرله سنه شه لئوب : « افندی ! بو یوماق سزک خانه محصولیدر ؟ یوقسه
 باشقه سنکمی ؟ . صاقین ایچنده برشی اولماسون ؟ » دینجه خواجه کمال جدیتله :
 « دوه نك باشی ! » دیر . مشتری امنیت ایدوب پاره سنی صایار ، خواجه ده پاره
 ایله صیقینتیسنی دفع ایدر . مشتری دکاننده یوماغی چوزوبده ایچنده قوجامان
 بر قفا کورونجه همان خواجه یی بولوب : « افندی ! بو سزه یاقیشیرمی ؟ بکا
 یوماغک ایچنده برشی یوق دیدک . بنی آلداتک ! » دینجه کوله رک دیرکه :
 « اکر سن قیمتنی بیلسه ک نیم سکا ویردیکم درس ؛ سنک حیلّه ایله قازانه جغک
 بر قاچ پاره دن بیک قات فائده لیدر . بر کره شو بیچاره زوجه مک کوز نوری
 دوکهرک وجوده کتیردیکی ایپلک سکا حاللدن مقدار کافی کار کتیرر .
 پیاسه یی بیلورم . ایکنجیسی بن سکا یالان سویله مه دم . « یوق ؛ دوه نك باشی ! »
 دیه حیلّه یی عیناً اعتراف ایله دم . سن ده او حالیه صاتین آلدک . اکر بویه
 یاماسه یدم ده دکر فیآنی بولمغه عناد ایده یدم . یا آلمده مالم اولدیغی حالده ناچار
 قالدیغ بر ضرورت دفع اولمایا جقدی ؛ یا خود اولو بهاسنه مالمی سزک قوجاغکزه
 آتوب مغبون اولدیغ حالده خائب وخاسر چکیلوب کیده جکدم . نیم مالم
 ویردیکک پاره یی چیقاروب حتی سکا ده بر قاچ پاره قازاندر مرزه دنیا غائب اولور .
 خواجه نصرالدین غائب اولماز . بن هر وقت بورجی اوده مه به حاضر م .

﴿ لطیفه ﴾ خواجه مرحوم بر قاج کیشی ایله بر محله اوتورب محبت ایدرکن خواجه ایله شویله بر معارفه سی اولان بر کیمسه کلوب : « قوزوم افندم ! شو آلتونی بوزی ویر ! » دیدی . خواجه رسمی کوروشدیکي آدم لر ایچنده ناصلسه « پاره یوق ! . » دیمکه صقیلوب : « شیمدی صیره سی می یا ! . » دییه باشند صاموق ایسته دیسه ده حریف شدت لزومندن ناشی ابرام ایله دی . ناچار خواجه بر بهانه یامغه مجبور اولوب : « ویر باقایم آلتونی ! . » دیدی . آله آلوب اویردی ، چویردی . آووجنده وزنی تخمین ایله دی . نهایت : « اوغلم ! بن بو آلتونی بوزه مم . اکسیکدر ! » دیدی . « جام خواجه افندی ! . سن بوز ، قاج پاره اُکسیک آلیرسه ک بن راضی یم . » دیدی . خواجه کندی کندینه میرالدانوب بعده : « آبول ! چوق اکسیک چوق . نافله بن بوزه مم . » دیمشسه ده حریف آلرینه صاریلوب : « قاج آقچه ویریرسه ک ویر . صوکره آلتونی آلدیغ یره اعاده ایدرم ، سنک پاره کی ده کری ویریرم . بکا بویوک بر دوستلق ایتیش اولاجقسین . » دییه یالوارمغه خواجه بر طرفدن ترمکه ، دیگر طرفدن ده فنا حالد قیزمغه باشلایوب نهایت یاقه بی قورتارمق ایچون آنده بر از دها دوندروب آقناردقدن و آووجنده بر مدت صیچراتوب هوپلاتدقدن صوکره : « حساب ایتدم . بو آلتونی ویردکن باشقه سزک دها اوسته آلتی بوچوق آقچه ویرمه کز لازم کلیور . بویله بر مادر بازلق ده بنم آلدن کلز . » دیمشدر .



قونیده آقشهرلی مرانغوز احمد امضاسیده ارسال اولومشدر :

﴿ لطیفه ﴾ رؤیاسنده قومشو قادینلر خواجه نک اطرافنی آلوب : « افندی ! سکا بک مناسبدر ! . » دییه بر قادینله ازدواج ایتدیرمکه اوغراشیورلر مش . خواجه خلیجانله اویانوب همان حرمنی دورتوب اویانیدر رق : « قالق ! به غیرتسز قادین ، اما فتورسز سین ها ! . یانی باشمده اولدیغک حالد هیهچ آدیرمایور سین . »

قومشو قادینلرینی زور ایله اولندیریورلر . اوستکه اورتاق کلیور . هایدی شو قادینلری دفع ایت ، یوقسه سن بیلیرسین . بنی سویله مه دی دیمه . اسکی به اعتبار یوق ها ! .. « دیمشدر .

﴿ لطیفه ﴾ قومشولردن حیا سزلقده مشهور بر قادین بر کون خواجه نك یانه کلوب : « جانم افندی ! شو بنم دلی قیزه [۱] بر نفسمی ایده جکسین ؟ موصقه [۲] می ویره جکسین ؟ بر شی یاپده بر از عقلانسن . هر کون بنله پنجه پنجه ! یامادیفی دلیلک یوق . هانده ایسه بکا دایاقده آتہ حق ! « دینجه خواجه : « خانم ! اوکا بنم کبی اختیاریک نفسی تأثیر ایتمز . بنم نصیحتمی دیکلر سهك سن اوکا یکر می بش ، اوتوز یاشنده کنججه ، دینجه ، نفسی ، نفسی صاعلام بر آدام بولده اوکا هم خواجهلق ایدر ؛ هم قوجهلق ایدر وعائله غائله سی ، چولوق چوجوق تلاشه سی اونی مومه دوندورور . ملک کبی اولور . « دیمشدر .

﴿ لطیفه ﴾ زواللی خواجه نك بر یورغانی اولوب قیش کونی بینیشنی فلانی ، حاصلی آلرینه نه کچر سه اورتونور یاتارلر مش . ینه زیاده جه قاریاغدیفی بر زمانده کیجه ؛ قاریسی : « افندی ! هیچ قازانماز سین ! . اولور ایله قناعت ایده جکز دیه فضلہ بر یورغانه بیله مالک اولامادق . شیمدی ایکی یورغانمز اولسه یدی ده راحت راحت اورتونسه یدک نه اولوردی ؟ بنم ده اوستمه شونی بونی اورتک ضد م . بری اوزون کلیر ، او بری قیصه کلیر . دیر کن بری بر طرفه قایار ، او بری باشقه بر جهته طویلانیر . آه یوقسوللغک کوزی کور اولسون ! ای نه یاپلم . بر وقت بنم بابام ... « دیه رک خواجه نك سنه لردن بری دیکله دیکی وقاریدن ده اایی ازرله دیکی ماصللره باشلا پنجه خواجه : « یو ... قباق ! بن هم اویقوسزم . دیر دیر ایسته م . کوزل کوزل اویقوکی اویو باقیم ! « دیدیسه ده قادینک بر کره ماقاره لری آچیلمش اولغله صوصمه سی قابل اولامای پنجه خواجه : « طور قاریجغ ! سکا قیامت قدر پاموق کتیره م . ایسته دیکک قدر

[۱] گویا عارسز ، تربیه سز ، شیاریقلغندن کنایه اوله حق .

[۲] نسخه نك تورکجه لشمسی .

یاقاب یاب ، یورغان یاب دییه قالقوب خاراری اوموزلادیگی کبی طوغر و حاولی یه اینه رک قارلری طولدورمغه باشلادی . قادین پنجره دن سیر ایدرک : « به آدام ، بو آیازده قار ایله اوینه یایارق کندینی خسته ایدوب ده باشمه بر درد دهای چیقاره جقسین ؟ نه یاپه جقسین اونلری : « دیمکله خواجه : « ایشته سکاخدایی نابت بر چوق پاموق ! دیمش . « قادین : « آول ! هیچ قار آدامی ایصیتیرمی ؟ » دینجه خواجه : « ایصیتیایه جق اولسه بابالریمز ، دده لریمز آلتنده یوشاجق ، صیجاق یاتیر ، میشیل میشیل اویورلری ؟ » دیمش .

❖ لطیفه ❖ خواجه بر کوک (آره او طه سنه) [۱] مسافر اولمش . کاهیا هر اودن متصل قاباق حاشلاماسی طاشیرمش . قاباق یمکدن خواجه نك جانی چیقه مش . بر کون کوک جامعده کرسی یه چیقوب : ای جماعت ! ابجدك معناسی بیلیر میسکمز ؟ باقك سزه سویله یم : (ابجد) غافل کویلونك قولاغنی بك چك (هوز) اونلر مسافر آغیرلاماسنی بیلمز . (حطی) بیچاره خواجه هر کون قاباق یو طدی . (کلن) بن بو ایشه کله نم . (سعفص) بو معامله کتابك بر یرینه صیغمز . (قرشت) خواجه کزه یوقی لئکریده بر قاریش ات . (ضغلا) بونده ییدر آخرته کیت ازیغیلن [۲] ! « دینجه کویلی متأثر اولوب : « عفو ایدرسین خواجه افندی ! . بز ییدر روب ایچیرمه نك بو درجه فضیلتی بیلمه یوردق .. » دییه اعتذار ایدوب کیدنجه یه قدر خواجه نی قویون آتیه ، طاووق قیزارتمه سیله بسله مشلر دییه منقولدر .

[۱] کویلرک بر ویا ده ا زیاده آره او طه سی نامیله مسافر خانه سی اولور . هر هانکی ملتدن اولورسه اولسون بر مسافر کلنجه - امام و مختارک هر تورلو ایشده بولونان و کویلی طرفندن اعاشه ایدان - کهای هر اودن نوبته مسافره صباح ، آقشام طعای طاشیر . زنکین اولانلر باشلی باشنه کندی سلاملقی مسافره آچوب کلنی کچی آیلرجه مهمان ایدر . مسافره قطعاً استقلال ایدلز . بعض حاجی آغالر فقیر دوشدک لری حالده ینه سلامقلرینی قاپامالرز . کندیلری یمه یوب ، چوجوقلرینه ییدیرمه یوب : « بن بابامدن بویله کوردم . » دییه مسافر لرینی آغیرلارلر . هم اکثریسی بالنفس آقاده طوروب کندی مسافرینه خدمت ایدر . محور فقیر طوقسانلق پیر فانیلری ، علمادن کیمسه لری بویله خدمت ایدر کوردم .

[۲] (آزیق) یولچینک یول ایچون یاننه آلدینی طعامدر . (ازیغیلن) یول طعای ایله . دیمکدر .

﴿لطیفه﴾ خواجه مرحومك حرمی خسته لایر . هر کون ایشندن
 عودتده باش او جه کچر ، آغلارمش . خاطر صورمغه کلن قومشولردن برقادین :
 « افندی او قدر اوزوله ! قورقوله جق بر شی یوق . ان شاءالله بر مدت
 صوکره صاووشدیرر . دیدیکنده خواجه : « خانم ! . بن مشغول بر آدام
 یارین قالقار ، کویلره کیده رم ؛ یاخود باشقه بر ایشم اولور . بلکه بن کویده
 ایکن وفات ایدر . شیمدیلک ألم بوش ایکن آغلایهیم . نه یاپایم ؛ بلکه صوکره
 ألم دکمز . زواللینک بندن باشقهده آغلایاجق کیمسه سی یوقدر . » دیش .



مذکور مرانغوزك قایین برادری نیوغراف ماکنه میبی
 حسن محمود افندی طرفندره :

﴿لطیفه﴾ خواجه نك بر اوغلی اولمش . قادینلر : « افندی ! کل
 آدینی قوی ! » دیمشدر . قولاغنه اذان او قودقدن صکره : « یا عاتکه بن
 نصرالدین ! » دیسه چاغیرمش . بر قوجه قاری ایلریدن آتیلوب : « امان
 افندی ! هیچ تحلفی بیراقازسین . طوغرو طوغرو شوچوجو غك آدینی قوی ! »
 دیر . خواجه : « قویدم ایشه یا ! . » دییوب قادین : « آبول ! . چوجوق
 ارکك ! ارکك ! سکا سویله یین اولمادیمی ؟ . » دیمکه خواجه : « بیلیرم ارککه
 قادین اسمی قوماقله ارکککلکی غائب اولماز آ ! طوغروسی قاریمی سه ورم .
 شاید اوله جك اولورسه یادکار قالسین . اوغلمی چاغیردجه قاریمی خاطر لایهیم
 دیه اهلیمك آدینی قویدیم ! » دیمشدر .



شهرزاده باشند « بر قارئه » عنوانه اولی بر تطیف نامه اید بر ابر خطبه
ارسال بوبورانه ذات عالی قدر طرفنده :

﴿ لطیفه ﴾ آذربایجان عوامندن بر ایرانلی به فارسی اوله رق بر مکتوب
ککش . خواجه به تصادف ایدوب : « شو مکتوبی بکا اوقو ، هم آکلات ! . »
دیمش . خواجه اُله آلوب ده شکست تعلیق ایله فارسی العباده اولدیغنی کورونجه :
« سن بونی باشقه سنه اوقوت ! . » دیوب اعاده ایتک ایسته مش ، فقط ایرانلی
اصرار ایدنجه خواجه بالجبوریه : « بنم فارسی ایله او قدر باشم خوش دکل .
خصوصاً اونلرک بو یازیر یله تورکجه بیله یازیلسه بن چیقارم . » دینجه ایرانی
حدت ایدوب : « به آدام ! . فارسی بیلمز سین ، اوقومه بیلمز سین . اوصورته
خواجه یم دیه بولغور دیبکی قدر قاووغکله ، دکرمن طاشی کی صاریغکله
کندی نه به میدانه آتیور سین ؟ . » دیمکله خواجه قیزاروب هان قاووغی باشند
بینیشنی صیرتندن چیقارهرق اوکنه قویوب : « اگر قاووقله ، بینیشله اوقونورسه
هایدی سن کی ده مکتوبک ایکی سطرینی اوقو باقلم ! . » دیمشدر .

﴿ لطیفه ﴾ خواجه آفیون قره حصارنده ایکن اورایه بر ایرانی ککش .
صحبت اُتاسنده ایرانی شهرک اوزرنده کی سیاه قایایغینی کوستره رک نه اولدیغنی
صورمغله خواجه درحال : « بوستان قویوسیدر ! . » دیمش . ایرانی : « پسکه
بو بویه سیب سیوری نیجه قویو اولوبدر ؟ » دینجه خواجه جواباً : « ایچنی
تمیزله یوب قوروسین دیه بویه ایچنی طیشنه چویر مشلر ! . » دیمشدر .

﴿ لطیفه ﴾ تیمورلنک آقشهره کلنجه درحال اشراف بلده و علمای
مجلسنه دعوت اُله مش . هرکس فرط ظلمندن تیره ره رک پوت کی مبهوت
طور یورلر مش . ایچلرنده بالطبع خواجه ده بولونیور مش . تیمورلنک دفع و حشت
ایچون اشرافله مکالمه به باشلار . بولرله اکراماً شربت ایصهارلر . اولاً تیموره
کتیریرلر ؛ ایچر مملکتک صو باشیسی اولان جاهل بر حریف تیموره : « عافیت

اولسون !. « دیمکلی قورار . خوف وتلاشه آغزندن بر : « مرحبا !.. »
 فیرلار . تیمور ؛ مجلسه ایلك دخولنده سویلنمه سی لازم کلن بر سوزك بویه
 بی وقت ایرادینه متحیر اوله رق نظر استفهامله حریفك یوزینه باقنجه عجز
 وجهله مرحمت ایدرك خواجه امداده یتشوب : « افندم !. بزم شهرک مرحباسی
 آغیز طاديله در ! » دیمشدر [۱] .

﴿ لطیفه ﴾ آقشهرده برطاقیم احبا تفرجه کیتمشلردی . طعام ایدیلوب
 اوراده بولونان بویوک حوضدن هرکس اللرینی یقیا یورلردی . محله امامی دخی
 النی یقارکن قضارا آياغی قایدینی کبی باش اشاغی یووارلامش . اطرافدن
 یقیشهرك هرکس کنارده یاری بلنه قدر صارقوب او قدر : « ویر الکی !.. »
 دیه هاقیرمشلرسده کندی کندینه چیمغه چالیشوب بر تورلو امدادجیلره
 آلتی ویرمزمش ، خواجه بو حالی کورمکه : « چکیلین اورادن !. سز اونک
 یولی بیلمز سکز . حریف بوغولور ، ینه سزک آمریکزه اتباع ایتمز . چونکه
 اونلر اصلا ویرمکه آلیشماشلر . باقیکیز بن ناصل قورتاریرم ! » دیوب جان
 هوليله کندی کنارده آتغه چالیشان امامک اولدینی حذادن آلتی صارقه رق : « بکر
 افندی !. آل الیمی ! » دینجه امام هان : « آمان برادر ! ههای الله راضی
 اولسون ! » دیوب شارپه رق خواجهنک بیلکندن یا قالامش ، خواجه بی ساحل
 سلامت چکمش . چیقارمشدر .

﴿ لطیفه ﴾ خواجه برکیجه ملاسی عماد ایله خانه سنه عودت ایدرکن
 بر قاچ خیرسزك بر خانه کلیدینی تورپوله دکترینی کورورلر . عماد قارا کلقدنه
 حریفك قابو اوکنده طوپلانمه لرندن ، ایچلرندن برینک آلی واروب کلهرك :

[۱] ککهمه لرك هر بری بعض حرفك تکلمنده ایجه کوجلك چکرلر ، شاعر
 مشهور یکیشهرلی عوفی بك مرحوم ککهمه اولوب (سین) حرفنی سویله یه مزمش .
 ذاتا هان هپسی ذکی اولان ککهمه لرك یابدینی کبی عوفی بك ده الدن کلدیکی قدر (سین)
 ایله باشلایان کله لری قوللانما یوب مرادفی استعمال ایدرمش . برکون بر مجلسه داخل
 اولوب ناصلسه (سلام علیکم) دیه جک اولمش . فقط آلتی کوکسه قویوب (س س س س س س س)
 سلام) دیمه دن تا صدر مجلسه قادار کلش . باقیش که اوله جق شی دکل . (مرحبا)
 دیمش ، کچمش اوتورمشدر .

«خیش خیش» یامسندن بر شی آ کلایه مایوب: «افندی! بونلر نه یاپیدر لر!» دیدی. خواجه: «ایقلیق چالییور لر! [۱]» دیدی. عماد: «یا سسی چیقما یور!» دینجه خواجه: «اونک سسی یارین چیقار!» دیمشدر [۲].

﴿لطیفه﴾ خواجه مرحوم زرزو اتجی دکانک یانندن کچر کن حریف خواجه یه بورجی تسویه ایلسنی اخطار ایلر. خواجه: «باقلم دفتره! نه قدر بورجهز اولمش؟» دیوب حریفه امید ویره رک بر تقریبه یاقه یی قورتارمه سنی دوشونور. زرزو اتجی دفتری قاریش دیرر کن خواجه ده نظر ایدر. باقار که بری بش یازه رق سنه لردن بری یوزلرجه آچه ک آیش ویریش ایدیش و محسوبانک صوکنده خواجه نک اوتوز بر آچه بورجی بریکمش. قارشیکی صحیفه ده امام افدینک یکر می آتی آچه بورجی اولدیفنی کورمش. زرزو اتجی یه دیمش که: «باق اوغلم! نم بوراده اوتوز بر آچه بورجه اولدیفنی کورولیور. امام افدینک ده یکر می آتی آچه بورجی وارمش. بزم اونکه آره مزده تکلیفمز یوق. بزاونکه امیش قامیش اولور یکر می آتی ی صایشیرز. قالدیمی بش آچه! او بش آچه یی ده بکا ویریر سین، شو ایکی خواجه نک حسابی ده بوصورتله تمیزله مش اولور سین.» دینجه ایکی حسابک بردن شو صورتله تمیزلندیکنه حریف سونوب ایش بیتمش اولوق ایچون کال ممنونیتله اوسته بش آچه دخی ووروب خواجه یی کوله کوله اوغورلامشده کندی کندینه قالنجه درین بر دوشونجه یه طالب بر تورلو بو طولامباج حسابک ایچندن چیه مامشدر.

﴿لطیفه﴾ خواجه نصرالدین افندی «رحمة الله علیه» بر کون تیمورلنک حضورینه داخل اولوب کال جسامارته آقشهر بلده سی نامنه بعض مطالباده بولونور. خیلی آغیر آغیر مطالبات و تکلیفاتدن چکینمز. تیمور یکپاره آتش

[۱] (ایقلیق) رباب دنیان اوچ تللی چالغیدر که یای ایله چالیر. قباغی علی الاکثر هندستان جویری اولوب اوستنه دری کریشدر. بعضاً برنوع قباغی اولور. کیریشدر.
[۲] بو حکایه نک مثنوی شریفده موجود اولماسنه نظر آخواجه یه اسنادینه امکان قالمز.

کسیله رک: «سن بنم کبی بویوک، معظم، صاحبقران بر سلطان جهان مطاعه قارشی نه جسارته بویله عظیم مطالبانده بولونه بیلورسین؟» دیمکله خواجه: «سن بویوکسه ک بزه کوچو کز!..» دیمشدر.

﴿لطیفه﴾ تیمورلنک آقشهر صو باشینک زنکینلکنی ایشیدوب، ویرکودن برخیلی پاره اختلاس ایله دیکنی بهانه ایدرک اموالی مصادره [۱] ایچون حضورینه جلب ایدر. حریفک ابرازایله دیکنی (علی قورنا) [۲] کاغدی اوزرینه یازیلش اولان حسابات دفترینی ییرتوب ییرتوب زورایله حریفه یوتدیریر. ونهات بوتون مالی مصادره ایدرک جاس جاولاق صویار، فلس احمره محتاج بر حاله قویار. خواجه مرحومی چاغیروب استقامتندن ناشی ویرکو تحصیلنه نظارتی امر ایلر. خواجه نك اعتذارینی دیکله من. آی باشنده حصه دفترینی ایسته یوب خواجه نك کول پیده سنه یازدیغنی کورونجه تیمور زهر کبی کولر برچهره ایله: «خواجه! بونه؟» دیمکله خواجه: «افندم! نهاییه الامر بن یوته جق دکلیم؟» بنده کز سلفم کبی دیواشتهالی آدم دکلیم؛ اختیارم. بونی آنجا ق هضم ایده بیلیرم!» دیمشدر [۳].

[۱] (مصادره) سؤ استعمالی تحقق ایدنلرک اموالی خزینة دولت نامنه ضبط ایتک.
[۲] طوغریسی (لیقورینا) ایش. اوائله فرنکستاندن کلن صاغلام، قالین بر نوع کتان کاغددر.


[۳] بو حکایه اولجه شو یولده مسموم اولمشدی. یکی چری آغاسی صرافی اولان یهودی بی چاغیرتیر: «دفترلینی آلسین، کلسین؛ حساب کوردم.» دیر. بیچاره صراف: «بلکه آغانک کوکلی اولمشدر. بر آز پاره ویره جکدر.» دیبه سوینه سوینه دفترلینی اوموزلار، کلیر. آغا: «شو دفترلردن بنم حسابی بول، باقم!» دیر. صراف حسابی حاضرلار ویکونتی آکلادیر. غایت نافع وسریع برصورت تسویه بولدیغنی سویله بیخه صراف بول دعا به باشلار. آنجا ق شیمدی پک مستعجل و پک مهم بر ایشدن طولانی یکر می یدی بیک غروشه احتیاج اولدیغنی و بونی هان کتیرمه سنی سویله یوب برچوق تأمیناتلر ویریر. صراف ناچار کیدوب مبلغ مطلوبی کتیریر. یکون یوز بیکی بولور. بونک اوزرینه کمدینه عائد حساب کاغدلرینی دفترلردن ییرتوب چیقارملرینی امر ایدر. «آرتق بورج یووارلاق اولدی. مفرداته حاجت یوق. شیمدی سن شو کاغدلری برر برر یوت باقم.» دیر. یهودی: «آمان آغا!» دیبه جک اولدیه ده

﴿لطیفه﴾ تیمورلنک آقشهرده ایکن بعض امرای عسکریه سی ایلہ اشراف بلده بر مجلسده اوتوروب قونوشورلر مش . مجاهدین قدیمه دن بری : « قوصوه محاربه سنده شویله طوپلر آتیلدی، بویله محاربه ایدلدی، شو یولده تعقیب اولوندی ، بولغارستان بویله فتح ایدلدی . نیکبولیده اهل صلیب شویله تپهلندی . دیه مأثر ومفاخر ماضیه یی حکایه ایلرلر مش . تیمور امراسندن بری شو جلادتلره ایمره نوب : « بزمده آنقره محاربه سنده شو قدر فیلملریمز واردی . » تیمور اردوسنده طوپ یوقیکن : « شویله جسیم طوپلریمزده واردی . غومبور غومبور اورته لنی ولوله یه ویردی . عثمانیلیری تیر تیر تیتره ندی . » دیرکن حاضر بالمجلس اولان برچوجوق قضارا سسلیجه یلندی . حکایه یه دوام ایدن ذات بردن بره شاشالایه رق : « اونه ؟ . . » دینجه یالان دیکله مکدن بوغوله درجه سنه کلن خواجه بوندن بالاستفاده : « قصوره باقايک افندم ! آنقره صحراسنده آتدیغکز طوپلرک عکسی طاغلرده حالا دوام ایدیور . بوده حالا اوعکس صدالردندر . مراق اتمه یکزر . » دیدی .

﴿لطیفه﴾ ایلک بهارده عسکر اوق تعلیمنه حقیقه جقلری جهتله تیمور خواجه یی ده معتنه آلب کوتورور . صحبت اثناسنده خواجه مرحوم برآره لق کندیسنک اوق مشق ایتدیکنی سویلر . تیمور او یله ایسه کندیسیدی ده بر اوق

آغا بلند صورانیسی چیقاروب : « شیمدی سنی اصلیکه قاووشدیریرم ! . » دیه تهدید ایدنجه ناچار بیک کره اویروب چویرمکه سیم سیاه کیر پیدا ایتش اولان اوراق بیک حقه بازقله ، زورله بوغازینی صیغایه صیغایه یوتار . آغا : « هسی بیتدی ؟ » دیوب : « بیتدی » جوانی آلتجه : (اوخ ! .. هاه ، اشته . نه آلهجق ، نه ویره جک . غافیت اولسون ! » دیمشدر . یهودی (نه یاپایم آغا : الله سکا عمر ویرسون .) دیوب ایچندن نه دیمشه دیهرک چکیلوب کیتمشدر . آنجاق آغا ینه آرہ صره صرافه خبر کوندره رک پاره کتیرتمکده ، یهودی ایسه - هیچ براصناف آلدانز . قاعده سنجه - آغانک نفوذندن بالاستفاده خواجکان صنفندن کوچوک مأمورلری قاصوب قاووره رق آر زمانده اون مثلنی قازانقده اولقله بویینه آغانک مطلوباتی تسویه ایدرمش ، ینه برکون پاره ایسته مک اوزره صرافی جلب ایدرک حساب ایسته مکله یهودی کاغذحلواسنه یازلمش برچوق حسابات کوسترمش . یکی چری آغاسی کوله رک : (اولان یهودی ! یوناصل حساب کاغدی ؟ ! ..) دینجه : (آغا نهایت بن یوته جق دکلیم ؟ ! ..) دیمشدر .

آتمه‌سنی اراده ایدر . خواجه اعتذار ایلر سده جبر ایله مکه ناچار یایه بر اوق کزله یوب هدفه آتار . اوق اصابت ایتمه یجه خواجه هان : « ایشته ! سکیان باشی بویله آتار ! » دیر . بر اوق دها ویریر لر . اوده باشقه بر طرفه کیدر . « بزم صو باشی ده بویله آتار ! » دیر . بالتصادف اوچنجی تام هدفه اصابت ایدنجه خواجه غرورله : « ایشته خواجه حسن نصرالدین ده بونی بویله آتار ! . . » دییه مظهر آفرین اولمشدر .



خواجه‌نك اوق آتدیغیدر

﴿ لطیفه ﴾ تیمورلنک یوکسک بر مأموریتله معیتده استخدام ایلمک اوزره عثمانلی تورکلرندن جسور بر آدام ایستر . جسور آدام بولونسه بیله تیمور معیتده بولونمق دخی آریجه بر جسارت ، تعبیر آخرله کورونور قضا اولمغله کیمسه یاناشماز . « کیمسه یوقدر ! . » دیمکده هیچ بروجله قابل اوله مز .

هر وقت (جان قورتاران) وظیفه‌سی کورن زواللی خواجه‌یه مراجعت ایدرلر.
 « امان افندی ! تیمور شو مملکتده حقیقی اوله‌رق یالکزی سنی سه‌ور . سنده
 اونک پوندینی اوکره نمشک . هر وجهله اداره ایده بیلیرسین . رجا ایدرز ؛
 ذاتاً موقت بر مدت ایچون شو وظیفه‌ی سن درعهده ایت ! . باقه‌لم ؛ ایلریده
 چاره‌سی دوشونورز ! . » کبی بیک دره‌دن صو کتیره‌رک افندی مرحومی



خواجه‌یه نشانجیلردن برینک اوق آتدیغدر

قاندیریرلر . سوز ویریر . تیموره عرض ایدرلر . تیمور ؛ بک مناسب کورور .
 آنجق صورتا بر تجربه یاپیلما‌سی‌ده امر ایلر . شو صورتله بر تجربه یاپارلر .
 خواجه‌ی بر میدانلقده حضور تیمورده دیم دیک طور دورورلر . امر ایدر ؛
 نشانجیلردن بری باجقلری آره‌سندن کچمک اوزره بر اوق آتار . خواجه
 قورقارسه‌ده بالضروره سنی چیقارمز . زواللی بیلدیکی اعتصام دعالرینی اوقومغه

باشلار . بو صیره ده بر باشقه سنه امر ایدوب خواجه کنیش قوللی بینیشی اولدینی
 حالده قوللرینی دوم دوز کره . صول قولنک آلتدن بینیشی دلمک صورتیه بر اوق
 ده آتارلر . زوالی خواجه عجیب حاللر کچیرر . صوکره برده قاووغنک
 دوکمه سنی ده لوب کچمک اوزره بر اوق ده آتیلما سنی امر ایدنجه خواجه یه
 آرتیق بر فنالق کلوب کندینی بیلمه دن قازیق کبی قاتیلیر قالیر . هله نشانجینک
 فرط مهارتیه بو عملیه ده قضا سز کچر . ختام تجربه تبشیر ایدیلنجه خواجه ده
 کندینه کلیر . یورغونلغنی بیلدیرمه یه رک کولومسه مه یه باشلار . پادشاه خواجه نک
 بو ثبات وجسارته هزاران تحسین و آفرین اوقویوب مناسب عطیه ایله تلطیف
 ایله دکن باشقه بینیشنک ، قاووغنک دلیندیکی عرض اولونمقله یکدسی ویریله سنی
 امر ایدر . خواجه بو عنایتیه ده آریجه تشکر دن صوکره : « آمان افندم ! .
 فرمان بو یوریکزده برده چاقشیر ویرلسون . طاقم تکمیل اولسون ! » دیر .
 تیمور : « خواجه افندی ! . چاقشیریکزه بزم طرفزدن بر زیان ایدلمه دیکنی
 سویله دیلر . معاینه ایتشلر ؛ بر شی کورمه مشلر . » دیمکله خواجه دیمش که :
 « افندم ! حقلیسکزه سزک طرفکزدن بر زیان اولمادی . فقط بزم طرفدن
 خیل زیان وضیاعه اوغرادی . آله آلا جق یری قالمادی . اونلر ظاهرینه باقوب
 بر شی کورمه مشلر سده بنده کز دروننه باقه دن بیلوب طور یورم که هر حالده
 برباد و ملوث بر حاله کلدی . »

﴿ لطیفه ﴾ آقشهرده خواجه نک سپاهیلردن مسلکینه عاشق یکیت بر
 قومشوسی وار ایش . آقشاملری خانه یه کلنجه علی الا کثر آلت قانده بر نعره
 آتار ، اورته قانده بر نعره آتار ، اوست قانده - دائماً اوطوردینی اوطده -
 اوچنچی نعره یی آتار مش . بو حالک مطرداً تکرری خواجه نک نظر دقتی
 جلب ایدوب سپاهی آغاسندن استیضاح کیفیت ایله مش : « اوقدر مر ایتد کسه دوش
 آرقمه ! » دیوب اول خواجه یی طوغرو آخیره کوتورور . اوراده کونش یوزلی توانا
 برکیلان کوسترر . اوقدر کوزل ، اوقدر لطیف که تعریف اولونه ماز : « ایشته
 نیکبولی ملحمه کبراسنده بن بو آتله آقشهر سپاهیلرینک اوکنه دوشوب چویرمه

حرکتی یابارق اهل صلیک انهمانہ سبب اولدم . « دیر . نعره یی فیلاتیر .
خواجه حق ویرر . صوکره برنجی قاته چیقارلر . صوفهده بر اسلحه آرماسی
کوستیرر ، خارق العاده قیمتدار اسلحه دن متشکل . « ایشته بوسلا حلدن بر طاقی
اجدادیمک تورکستاندن کتیره رک روم ایلی فتوحاتندن ، ادرنه جوارنده صرب
سیندیغنده ، بولغارستان فتحنده ، قوصوه ملحه کبراسنده قوللانیدی سلا حلر
اولدینی کبی بر طاقملری ده قوصوده صربلیلرک تعقیبنده نیکیبولی ده بالذات
قوللانیدیغ سلا حلر ایله اهل صلیب جنکاورلرندن اغتنام ایله دیکم سلا حلدن
متشکلدر . . الی الابد احفادیمه یادکاردر . بنم ایچون دنیانک الک قیمتدار
اموالندن دکرلیدر . « دیر ، سرورندن بر نعرهده اوراده آتار . خواجه
کمال تقدیر ایله دیکلر . صوکره اوست قاته چیقارلر . فاملیاسنه سسله نوب
باشنی اورته رک کلیر . خواجه نک ألنی اوپمه سنی امر ایدر . خواجه باقارکه
آی چهره لی ، نور پارچه سی کبی بر آفت دوران . « بوقادین ییلدیریم بایزیدک
خاتونلرندن ماریچه نامنده صرب پرنسنگ اقرباسندندر . بن عسکرمله ماریچه
خاتونی پادشاهمز ییلدیریمه کتیریرکن اونک رفاقتنده ایدی . بنی کورمش ،
بکنمش . میدان جلادنده کی قهرمانلغمی ایشیتمش ! بکا شدتله میل ایتمش .
آیلرجه آغلایوب کیمسه یه دردینی آچاماش . نهایت ماریچه خاتون طویمش .
اراده اولدی . نکه ایتدم . علمی ، فضیلتی ، درایتی ، تربیه سی حسندندن
قات قات افزونددر . « دیوب اوراده عشقله درون دلدن بر نعره آنجه خواجه
مرحوم کندینی طوتامایوب : « هر اوچندهده یردن کوکه قدر حقک وار
ایمش اولاد ! . رجا ایدرم بعدازین بر نعرهده بنم ایچون آت ! ... » دیمشدر .

﴿ لطیفه ﴾ تیمورلنکک دیار رومی استیلاسی صره سسندنه آقشهرده
موغولر طولمشدی و بونلرک جاناوارجه مظالمندن شهرلر بوشالوب کویلر ،
صحرا ل بر چوق عالهلرله طولمش ایدی . خواجهده مرکه قاریسنی بیندیروب
اوغلنی یاننه آلوب هجری و صارب بر کویه کیتمش ایدی . بر کون شهردن

داغیلان اهایلی او کویک یرلیرندن بش اون کیشی بر چشمه باشنه
 طویلانوب موغوللرک مظلوم وحشیانه سنه متعلق شدتلی بختلر اولونورکن
 خواجه ده بحثه قاریشوب ظالمدر حقنده کی غضب اللهک قورقونچلغندن آخرتمه
 کوره جکلری اک مدھش عذاب وعقوباتدن صایوب دوکمکه باشلادی .
 اوراده قیدسزجه دیکله مکده اولان اوزون بویلی ، اسمر چهره لی ، کوپرولی



امیر تیمورک درویش قیافتنده خواجه نك طعننه اعتراضیدر

بورونلی، اوزون یوزلی ، خفیف صقاللی ، قاره کوزلی، کسکین باقیشلی، باشنه
 زلفه لی سیاه برتاج کیمش ؛ زلفه لر قاشلرینی ستر ایله مش؛ آرقاسنده برعبا آئنده
 برکشکول بولونان مهیب الشکل بر درویش بردن بره اولدینی یردن طوپ کبی
 پاطلا یوب: «خیر خواجه! او قودینگ آیت وحدیث طوغرو. فقط سیف انتقام
 الهی وتمثال عدالت ربانی اولان اصحاب خروج حقنده دکل؛ سزک کبی حمیت

و نجات قانی بوزولمش ، عرقنه عادی دامار قاریشمش ، همتسز ، غیرتسز ، اتفاق واتحادسز. قادین مشربلی مسکینلر علیهنده در. « دیه اڭ اوست پرده دن قورقونج بر سسله اعتراض ایله نجّه هر کس فنا حلاله شاشالایوب بر چوقلری اولدقلری یرده ییغیلی ویرمشلر ، بعضیلری ده شاشقین شاشقین - هیکل کبی دیم دیک طوران - درویشک یوزینه باقه قالمشلردی. خواجه مرحوم درویشی باشند آیاغه قدر بر نظرله سوزونجه عقلی باشندن کیدوب کندی کندینه : «عجبا!؟» دیدکن صوکر شاشقینلغک کندینه ویردیک آنی بر جرأته: «بابا ارنلر سز هانکی دیارک کلیسکز؟» مبارک اسمکزی باغیشلارمیسکز! « دیمکله درویش اولکی مهیب سسله: «ماوراءالنهر داهیة سییم! اسمم تیموردرد!» دینجه خواجه آرتیق بوسبوتون موازنه بی شاشیرارق: «آمان اولاد ، خانلی ، مانلی واری؟!» دیمه سنه او هیکل عضوب : « بلی!.. » دیه کومورده نجّه خواجه حضاره باشی چویروب : «امت محمد! اُرکیشی نیتنه بویورک جنازه نمازینه؟» دیمشدر .

﴿ لطیفه ﴾ آقشهره بر ایرانی کلش ، اصفهانده شاهک یوز، یوز اللی اوطه لی شوقدر بیک آرشون مربعنده متعدد سرایلری اولدیغنی کمال مبالغه ایله توصیف ایلمش . خواجه ده بوکا قارشى: « بزم پایتختمز اولان بروسه ده بویله نجّه سرایلر وار ؛ حتی یکی پایلان قاپدیجه نك بوی بش بیک آرشون!.. » دیرکن باشقه بر ایرانی مجلسه داخل اولوب هنوز بروسه دن کلکده اولدیغنی سوبله مه سیله خواجه اسکی حیزنده دوام ایده میوب : « آنی ده اللی آرشیندر!.. » دیر ایرانی : « پس بو نجّه اولوبدرکه آنی هرکز بویینه اویغون دوشمه دی! » ده نجّه خواجه : « بن اونک آنینی بویینه اویدوره جقدم اما پک عکسی بر زمانده شو عجم بابا مجلسمره قدم باصدی! » دیمشدر .

﴿ لطیفه ﴾ خواجه یه: « آدام اولمانک یولی ندر ؟ » دیمشدر. « بیلنلر سوبلرکن جان قولاغیله دیکله مه لی . سوبله دیک سوزی ینه کندی قولاغی ایشیتمه لی . » دیمش .

﴿لطیفه﴾ نصرالدین خواجه لمصلحة بروسه یه کلیر. چارشیده برچوخه شالواری اون بش آچه یه بازارلق ایدر. صادریرر. پاره سنی و یروب آلوب کیده جکی صرهدده کندی شالوارینک پک اسکی اولمدیغنی اونک یرینه خفیف بر جوببه آلماسی دها مناسب اوله جغنی دوشونور. دکانجی یه: «شالوار آله جق ایدم اما واز کچدم. اونک یرینه بکا اون بش آچه لک بر جوببه ویر!». دیر. دکانجی: «پک اعلا؟». دیوبوب خواجه یه کوره بر جوببه چیقاریر!. ویریر. خواجه آلوب کیدرکن دکانجی: «خواجه افندی!.. پاره ویرمه دک!». دیر. خواجه: «عجائب! اونک یرینه شالواری بیرا قدم آ!». دیوبوب دکانجی: «جانم اقدم!. شالواره پاره ویرمه دک ایدی که!». دینجه خواجه دها زیاده بر اثر حیرت کوستروب: «فسبحان الله!.. بو بروسه لیلر نه تحف آداملردر! شالواری آلامدکه پاره ویرمه!». دیمشدر.

﴿لطیفه﴾ خواجه نصرالدین افندی آقشهر کولنده ییقامق ایچون صویوندیغنی صرهدده جیبندن کوچوک بر (دیل مجموعه = جونک) دوشمش. یاننده کیلر مراق ایدوب ایچنی قاریشدر مشلر غسل اموات؛ تلقین، اسقاط کبی بعض معاملاتک صورت اجرایی مسطور ایمش. خواجه کیندکدن صوکره بو مجموعه یی نه یاپدیغنی صورمه لریله: «ها شونی بیلمیه ایدیکز! بالبع بونلر کوکل اکلندیرمک ایچون اوقوتمازا!..» دیمشدر.

﴿لطیفه﴾ نصرالدین خواجه نک مسافر اولدیغنی کویک آغاسی: «خواجه! پادشاهی بویوک یوقسه چیقتجیمی؟». دیمکله خواجه دیمش که: «آلبته چفتجی بویوک؛ چفتجی بوغدای ویرمه سه پادشاه آجیندن اولور!..»

﴿لطیفه﴾ خواجه یه: «حق زده در؟». دیمشدر. «حقک موجود اولدیغنی بر یر واری که آریجه بر یر تعییننه لزوم کوره لم!». دیمش.

﴿لطیفه﴾ خواجه برکون دیمش که علم طبک خلاصه الخلاصه سی شودر: آیاغکی صیجاق طوت، باشکی سرین، میکیکه دقت ایت؛ دوشونمه درین.

﴿ لطیفه ﴾ کوچلی قوتلی عارسز بر حریف وار ایدی که حجاب ، ناموس و حیای جالک و سینه‌سنی هر نوع تربیه و اخلاق نقوشندن پاك ایدوب کسب و کار جهتنه التفات ایتمز و کیردیکی خانه‌دن بر شی آلمقسزین کیتمزدی . خلقک کیمیسندن البسه ، کیمیسندن اطعمه ایستر . شاید قوغار ، ویا دوکر لرسه قطعاً متأثر اولمایوب حتی بر آز مدت صوکره ینه عینی کیمسه لره مراجعت ایلردی . کرات و مراتله زواللی خواجه‌نی ده تعجیز ایله مشدی . ینه بر کون



خواجه‌نك معجز ديلنجي‌يه تا گرينك خانه‌سنی کوستره سيدر .

خواجه خانه‌سنده اوتورورکن بی وقت کلوب قاپونی چالدی . حرمی اینوب : « سن کیمسین ! » دیه سؤال ایله مکله : « افندی بی کوره جکم ! » دیه جواب ویردی . خواجه دخی اینوب سسندن بو حریف اولدیغنی آکلامق‌له قاپو آرقه‌سنده یاواشجه زوجه‌سندن طعام صوروب سرت بر جواب آلتجه خواجه‌ده عارسز

حریفه: « نه ایسته یورسین؟ » دیدی . « تا گری مسافری یم ! » دینجه خواجه
هان: « کل آرقه یم صیره !. » دیوب طوغری جامع شریف قاپوسنه کوتوردی
ودیدی که: « آبول !. سن باککش گلشسین !. ایسته تا گری نک اوی بوراسیدر
[۱] .. »

﴿ لطیفه ﴾ خواجه مرحوم طلبه ایکن شهر ثلثه [۲] مناسبتیه جوار
کویلره جره چیقار . هر هانکی کویه واردیسه اعتذار ایدوب : « عفا کلدک
خواجه افندی ! اما بزم رمضان امامز وار . » دیوب قبول ایتمزلر . بویه
بش آلتی کوی طولاشیر . نهایت کویک برینه کلیر . مکر او کویه بر تیلکی
عارض اولش . کویده طاووق ، هندی بیراقماش . حریفلرک چاریقرینی ،
پاوجلرینی آشیرمش . حاصلی عقله گلز خسارات یامش . النهایه طوزاق قوروب
بیگ مشکلاتله یاقالامشیر . او کون کویلی طوبلانوب نه ییچیم بر عذابله تلف
ایله مک ایچون مشاوره ایدرلرمش . خواجه یانلرینه کلوب مسئله یی سؤال ایدرک
کویلیلر : « آمان خواجه افندی !. بو ملعون ؛ بر کوی خلقنه یامه دق زیان
بیراقادی . چوق شکر آله کپیردک . شیمدی ناصل بر دهشتلی عذاب ایدرک
انتقام آلام دییه مشاوره ایدیورز . » دیمه لرله خواجه : « همان سنر چکیلیک
هله باقیم . اونی بکا بیرا قیکز . » دیمکه کویلی : « بو آدام کورکولی بر
کیمسه در . آلبته بزدن چوق زیاده معلوماتی واردر . » دیه رک قارشیدن تماشایه
باشلارلر . خواجه همان صیرتندن جبه یی ، بلندن قوشاغنی چیقاروب تیلکی یه
کیدریر ، بلندن صیم صیق باغلار . قاووغنی باشنه کیدررب اوزرینه محکمه
صارینی صارار . قاپار قویی ویریر . کویلیلر : « بره آمان خواجه ! نه یابدک؟ ... »

[۱] بر وقت بر عارسز حریفده بر بکتاشی تکیه سنه طاداعش . ایکیده برده
طعام زمانی کیدر . (صوفره علینک . ایام هو !.) دیر ، ساطه چو کرمش .
بو حالندن بیزار اولان فقیر بابا ، برکون ینه حریفک بو کلامنه جواباً : (صوفره
علینک ارنلر اما لقمه بزمدر . ایسترسه ک بوش سفره یی یاله ، عزیزم !.) دیمشدر .

[۲] رجب ، شعبان ، رمضان آیلریدر که بو آیلرده مدرسه ده تحصیل تعطیل
اولونوردی . براز تحصیل کورن یتشمش موللار کویلره طاغیلوب بو آیلرده وعظ
ایدرلردی . کویلیلرده بوکا مقابل اونلره ذخیره وسائره ویریرلردی .

دیه حدتله خواجه به هایقربوب تیلکی نی تکرار آله کچیرمکه قوشمق ایسته نیجه
 خواجه اوکلرینه کچوب منع ایدرک دیمش که : « بنی دیکله یك کویلی داییلر !
 بن اوکا شیمدی او یله برایش یاپدم که قرق کوسه بر آرایه کلسه بو قدر قورقونج
 بر اشکنجه بی خیال لرینه بیله کتیره مزلردی . شیمدی او ؛ بو کسوه ایله هانکی
 کویه کیتسه نفرتلی بر چهره ایله دفع ایدیلیر . هیچ بر طرفدن نعمت قبوله مظهر
 اولاماز . »

شهمزاده باشی قازئمزک کوندردیکی حکایه لر بوراده ختام بولمشدر .



«م — نهاده» بك ايلكنجي دفعه كونه مشرد :

﴿ لطيفه ﴾ خواجه مرحوم چو جو قلغنده ملكى اولان سيورى حصاردن آقشهره كلديكنده مناره ده مؤذنك اذان او قوداغنى كورمكله آشاغيدن باغيره رق ديمش كه : « نه ياپام آ بابام ! . بك دالسر بوداقسر بر آغاجه چيقمشسين . بن سكا ناصل امداد ايده بيليرم ؟ »

﴿ لطيفه ﴾ ينه خواجه نك كنجلكنده ادعاجى بر چو جوق : « كيمسه بنى اينانديره مز ! . » ديه سويله نير طورورمش . بر قاچ كره بو دعواسنى ايشيدن ملا نصرالدين بر كون قيزوب : « سن شوراده طور . بن شيمدى كليرم . سنى اينانديرمه نك باق ناصل يولنى بولورم . » ديمش ، بيراقش كيتمش . چو جوق ساعتلرجه بلكه ديكي حالده ملا نصرالدين اثر كورونومه مش . جاني صيقلمش ، كندى كندينه متصل سويله نيرمش . او ائنده اقرانندن برى كلوب : « كچ وقت بوراده نه طور بورسين ؟ كندى كندينه نه سويله نيورسين ؟ » ديمكله مسئله يي آكلاتمش . او افندى آرقه داشنك بو درجه احملغنه كوله رك ديمش كه : « آبودالا ! . ايشته سنى آلداتمش آ . دها نه بچيم آلداتق ايسترسين ؟ [۱] . »

﴿ لطيفه ﴾ ينه چو جوقلنى ائناسنده ملكت ك خرابه بر محلنده چو جوقلره اويناركن آرقداشلرى بر نك چيزمه بولشلر . اويروب چويرمشلر . بر شيشه بكزه ته مه مشلر . كتيروب ملا نصرالدينه كوسترمشلر . درحال : « آبول ! نه وار بونى بيله ميه جك ؟ . قازمه قيلينى ! » ديمش .

[۱] بونك برده باشقه تورلوسنى وقتيله مطالعه ايتشدم . اكاردن بر ذات خانه سندن طاشره كيدركن پابو جلقده هر كس آياغنى كيديكي صيره ده : (دها شيمدى يه قدر بدن اونو تمقى واقع اولما مشرد .) ديوب عقبنده كوله سنى چاغيره رق : (كل ! .. پابو جيمى وير ! .) ديمكله كوله : (افندم ، شيمدى پابو جي كيزى آياغي كيزه كيمشدي كيز ! .) دينجه او ذات توبه ايدوب : (ايشته دعوامنك درحال جزاسنى چكدك .) ديمشدر .

« کمال الدین » امضاسید زارذ اولشدر :

﴿ لطیفه ﴾ ربسی، خانه سنک هیچ کونش کورمه دیکنی خواجه یه شکایت
ایتمش. خواجه: « تارلاک کونش کورویورمی؟ » دیه صوروب « اوت ! . »
دینجه: « اوصورنده خانه کی تارلایه نقل ایت ! » دیمشدر . .
خواجه نک شو جواب صافیانه سی صخی بر توصیه یی شاملدرکه صیق و کون
کورمز محله لرك صخته مضرتی بیان و شهر خارجنده کی کنیش باغچه لی مسکن
ایدنمه سنی توصیه دن عبارتدر .

﴿ لطیفه ﴾ خواجه یی بر دو کونه دعوت ایدر لر . خانه یه کیردیکنده
باقارکه مسافر لری قارشیلایه جق، پابوجلری محافظه ایده جک کیمسه یوق . کیمسه
کیمسه یی طانیماور. بوغارغاشه لقدمه پابوجلری چالدر مامق ایچون هان قوینندن
مندیلنی چیقاروب پابوجلری صارار ، صارمالار قوینته قویار . اوطیه کوروب
کوستریلن محله اوتورور . یاننده کی ذات قویننک قاباریقلغنی ومندیلك اوجنی
کورمکه : « افندم ! غالبا قوینکنزده نوادر دن بر کتاب وار ! . » دیمش .
خواجه : « اوت افندم ! . » دیمش . ینه اوزات : « افندم ؟ نه یه متعلق ؟ . »
دیمکه : « علم اقتصاده متعلق ! . » دیر . او آدام مکله یه مدار اولوق اوزرم
بتکرار : « صحافلردنمی آلدیکز ؟ . » دیمکه خواجه دخی : « خیر افندم ! .
قاوافلردن [۱] آلدیم ! . » جوابنی ویرمشدر .

[۱] (قاواف) عربجه (خفاف) کله سیندن تورکلشدر لشمشدرکه آیاق قابی .

پابویح صاتان دیمکدر .

﴿لطیفہ﴾ برقاچ چو جوق بر ایرماق کنارندہ باقلا رینی صویہ صوقوب
 « بنم آیاغم زہدہ ؟ - خیر او حینک آیاغدر ! .. ایشته آیاقلا ریمز قارمہ
 قاریش-یق اولدی . - بن سزہ بر یرہ طوپلانوبدہ صویہ آیاغمزی صوقایلم
 دیمشدم .. شیمدی ہر کس کندی آیاغنی ناصل بولہ جق ؟ ، دیہ غوغا
 ایدرلرمش . خواجہ دہ اورادن کچورمش ، بونلرک غوغالرینی ایشیدنجه » دورک



چو جوقلرک صو ایچندہ چیپلاق آیاقلا رینہ خواجہ نک عصایی اورمہ سیدر

چو جوقلر ! بن شیمدی ہر کسک آیاغنی صاحبہ اعادہ ایدرم . قاریشقلغہ میدان
 ویرہ نک جزاسنی ویریرم . « دیہ ائندہ کی عصایی صو ایچنہ صوقوب بونلرک
 آیاقلا رینہ حیزلیجہ پاپشیدرنجه ہپسی بردن جان آجیسیلہ : « آمان ! .. » دیہ
 صودن سرعتلہ آیاقلا رینی چیقاروب در حال ہر کس کندی آیاغنہ صاحب اولمش .

« امیر نامی » امضایید کلمه شد :

﴿ لطیفه ﴾ آتشهرده بر باغ غایت اوجوز فیأله صاتیلفه چیقاریلوب
 درحال دورت بش ذات طالب اولور . بونلردن بری خواجه مرحومه کلوب
 باغی کندیسنه المقلغه و فیئانده براز دها ا کرام ایدلمسینه دلالتنی رجا ایدره .
 خواجه بوخبری آلتجه درحال باغ صاحبنه قوشوب نه یایار ، یایار ایجابنه باقار .
 مشتری خبر آلفه کلنجه خواجه : « ایشی بچردم ، لکن صوک درجه زحمت
 چکدم . حریفک صاقالنه کولدم ، بیک دره دن صو کتیردم ، الحاصل مأمولنک
 فوقنده اوجوز اولماسی خصوصنده امرک وجهله سنکیچون چالیشدم . تنزیلاته
 عائد صرف ایلدیکم مساعی بی صرف سنک محترم خاطرک ایچون یاپدم . ناصل
 ممنون اولدکم ؟ . » دیمکله حریف بویوک بویوک تشکرلر ایلدهدی . سهوینچندن
 هوپ هوپ هوپلادی . بوآشاده خواجه : « ای شیمدی بوآزاده کندم ایچون
 مختصر برتشبشده بولونمقلغه برشی دیمزسین آ ؟ . » دینجه حریف : « نه دیمک
 افندم ؟ البته سنده اوندن آریجه برشی ایسته یه بیلیرسک ! بوکا کیم نه دیر ! »
 دیمکله خوجه : « ایسته بنده بوتون طلاقتمی آرزوکز وجهله فیأنک اهونیقی
 خصوصنه صرف ایلدکدن صوکره بو حقمندن استفاده ایدرک خاتمۀ کلامده
 کندم ایچون ایکی چفت سوز صرف ایدرک باغی کندم آلدم ! » دیمشدر .
 حریفده کی حیرت !

بردیگر کیمسه ده بوقورنازلنی بر قادین حقنده یامش . بوتون حذاقتنی ،
 طلاقتنی صرف ایدوب قادینی یوله کتیرمش اما صوک سوزینی کندیسینی ایچون
 قوللامش یعنی النهایه قادیندن کندیسنه زوجه اولمق اوزره موافقت جوانی امشدره .

استادی « سیاهی حاجی حافظ شکری » افندیده منقول اولور اوزره
« ابوبی اسماعیل حقى بك » طرفنده اهدا بوبوریلده مطایره لر در :

﴿ لطیفه ﴾ خواجه مرحوم بر کون تیمورلنکک معیترلندن برینه :
« اعتقادده مذهبک کیمدر؟ » دیش . حریف جواباً الی کوکسی اوزرینه قویه رق
متواضعانه : « امیر تیمور کورکان ! » دیش . حضاردن بری : « قوزوم خواجه
افندی ! . پیغمبری کیمدر صور باقم ؟ » دیش . خواجه : « نه صوره یم ؟ .
اعتقادده امامی طویال تیمور اولورسه پیغمبری مطلقاً جنکیز خوزیز [۱]
اوله جقدر ! » دیشدر .

﴿ لطیفه ﴾ آق شهرک اعیان و اشرفی خواجه مرحومک فضل و کمالی
بیلدکلرندن چوجوقلرینک بوذات عالی قدردن استفاضه ایله مه سنی آرزو ایله یوب
خواجه بی مکتب معلمی یاپارلر . مملکتک اعیان و اشرفی بوتون چوجوقلری
اورایه کوندیرلر . بر آقشام اشرافدن بری مکتبه دوام ایتکده اولان چوجوغی
اوقودینی درسلدن امتحان ایدوب موافق جوابلر ویرمه سندن فوق العاده محظوظ
اوله رق خواجه یه اوشاقله بر تپسی باقلاوه کوندیرمنس . تام درس اناسنده
باقلاوه مکتبه کلیر . کندیمی عجله بر جنازه یه کیتمک مجبوریتده اولدیغندن
عودتده ایجابنه باقق اوزره مکتبه ایلری کلن چوجوقلره خطاباً : « بن تپسی بی رافه
قویورم ! . صاقین اولمایه که ایچنده کفی یمک طمعنه دوشمه یه سکز . چونکه : بونک
کوندیرلشندن ، کوندرن آدامک بکا اولان عداوتندن امین دکم . بلکه ایچنه
زهملی بر شی قایلیمشدر . قاریشام ، صوکره هیکز زهرله نوب اولورسکز .
بی ده زندانلرده چوروتورسکز ! » دیر ؛ کیدر . خواجه نک برادرزاده سی اولوب
مکتبهده باش قلفه بولونان چوجوق بونک دیسه اولدیغنی آکلایه رق
کیدر کیتمز کندی یارداغی اولان چوجوقلری باشنه طویلار و یمک ایچون

تشویق ایدرسده چو جققلر : « زهرلیدر ، خواجه اولیه سویله دی . بزیمه یز . اولمکه و قتمز یوق ! » دیر لر . چو جق : « جانم اولافدر . ایشته بن ییورم . آرتق بر دییه جککز قالماز آ ! » دیر . چو جققلر : « پک ای اما خواجه یه نه جواب ویریرز ؟ » دیملریله سزنجی بیلیرسکز آ . بن اونی صوصدوره جق جوابی حاضرلادم ! هله بز شونی کمال عافیتله خوره کچیره لم . دیملکه آرقداشلی امینت ایدوب هپسی بردن باقلاوه بی در حال سیلوب سوپورور لر . کوله اویناشه جنبشله نیر لر .



بر قورناز چو جققلر یارد اقلری ده آذر یروب خواجه نک باقلاوه سنی ییدک لریدر

معذب چو جق قورنازلنی تا باقلاوه نک کلدیکی زمانده قورمش اولمالی که همان قوشوب درس کرسیسی اوزرنده طوران خواجه نک دیویتنک ایچندن قلمتراشی آلوب قیرار . خواجه ده قپودن ایچری کیره ، اوکنده قلمتراشی قیریش کورونجه حدتلی بر طور ایله : « بونی کیم قیردی ؟ » دییه هایقیریر . چو جققلر هپسی بردن برادر زاده سی اولان چو جوغی کوستر لر . خواجه چو جوغه :

« قلمتراشی نچون قيردك؟ بن ده سنك كميكلريني قيره يمي؟ . » ديهه باغرنجه
 قورناز چو جوق يالاندن آغلايه رق: « خواجه افندي! . قلم قيريلدي . قلمتراشله
 يونتق ايستدم . يونتاركن قلمتراشي قيرديم . بن ده شيمدي عموجه مك يوزينه
 ناصل باقاييم؟ اوكا ناصل جواب ويره يم؟ شيمدي خواجه كليرسه بنم كميكلريمي قيرنجيه
 قدر دوكر . بو عذابلري چكمه دن ايسه اولمك دها اهو ندر ديدم . كنديمي
 اولدورمك اچون چاره دوشوندم . مكيتك قويوسني ملوث ايمه سني لايق كورمه دم .
 دوشوندم ، طاشيندم . رافده كي سزك سويله ديككنز زهرلي باقلاوه عقليمه كلدي .
 همان تپسي يي اينديروب اوله كلمه شهادت چكدم . آرقداشلريمه حلاللاشدم .
 بابامه ، همشيرمه ، آه ... الا اوچچاره بكا دوشكون اولان زواللي آنامه خبر
 كوندروب حلالق ديه دم . بسم الله ديوپ كوزيمي يومدم . باقلاوه يي پيرپاك
 كوچوردم . حتى تپسي يي صييرمه يي ده اونوتامدم . آ ... ه . فقط ... فقط ...
 فقط ... مع التأسف ، طالعسرلكم دن اولمه دم . » ديمش . بر طرفدن جانندن
 طاتلي بيلديكي باقلاوه نك الندن كيتمه سي ، ديكر طرفدن بابا يادكاري قلمتراشك
 قيريله سي حسييله يوره كي يانان زواللي خواجه : « اولان ! بو ياشده بو قدر
 استادانه برتدير دوشونوشك بني حيرتده بيراقدي . بن ده هر سؤالك جوابي ،
 هر لافك قارشيلغني بولورم اما ، سن بندن ماهر چيچه جقسين ! . ظاهر ، بزم سلاله يه
 بو قورنازلق دادحقدر ! . » ديمكدن باشقه برشي ياپه مامشدر . « رحمه الله عليه »
 ﴿ لطيفه ﴾ دكمز يانا واتسز تعبير ايله ديكمز عوام كروه نندن بري خواجه

مرحومه مسلط اولوب تورلو تورلو ضرره صوقار ، ياماديني اذيت قالماز . ينه
 بركون كويا خواجه يي قيزديروب اكلنمك بودالانيله خواجه نك يكرم يدي
 سنه در طاشيديني طاش بادم دن معمول بر عصاسني قيرار . خواجه بو ناهمحل
 بارد معامله دن منكسر اولوب : « اوزون مدت بكا يولداشلق ايدن او عصا بنم
 اليم منزله سنده اولمشدي . سن بنم اليمي قيردك ؛ الهى سنك ده آياغك قيريلسين ! .
 بنم بو انكسارم البته بركون اولور ؛ اثريني كوستير . اما قرق كون قرق
 هفته ، قرق ييل . اوراسني جناب منتقم ذوالجلال بيلير ! . » دير . حريف
 نه سويله به جگني ييله من . قابا ، صابا براز هو موردانقدن صوكره دفع اولوب

کیدر کن دها اورا جقده آیانی سنده له یوب یوزی قویون قاپانیر . صول باجانی
 قیریلیر . فوق العاده قورقوب پش-یمان اولوب جانی یاندیغندن ناشی یاغمور کبی
 کوز یاشی دو کرک سورونه سورونه خواجه نك حضـورینه کلیر . قصورینك
 عفوینی استرحام ایله دکن صو کره : « افندی !.. هانی سن انکسارک تأثیری ،
 غایه سی قرق ییل اقلی قرق کون اوله جغنی سویله مشدک !.. » دینجه خواجه :
 « ینه اویله در . سنك کوردیکك بو جزا بوندن قرق کون اول باشقه بر یچاره نك
 دها جانی یاقدیغیکدن طولایدر . بزمنکی دها قرق کون صو کره حقیقه جق .
 صاغ باجاغك ده بزه ایتدیگکدن طولایی خورد اولوب سورونه جکسك . » دیمشدر .

﴿ لطیفه ﴾ خواجه نك اشکی چالینمش . ایرتسی کون احباب آراسنده
 یانه یاقیله آکلاتوب اونلردن بر چاره ایسته مش . جمله سی مسئله یی تفصیلاتیله
 دیکله دکن صو کره هر بریسی : « ای اما آ خواجه افندی ! آخرک قاپوسنه
 بر کلید آصمه لی دکلیدک ! — چینکانه تاخته سندن یاپیلان قاپویه کلید اورمق
 نه پاره ایدر ؟. ال ایله طوقونسه ک پارچه پارچه اولور . — یا دیوارلر نه دیر سین ؟.
 انسان خانه سنك دیوارینی براز یو کسجه یاممازمی ؟.. — آ خواجه م !.. اولومی
 ایدک ؟. حریف بالطبع بو قوجه مان حیوانی قوینونه قویوب چیقوب کیمه مشدر .
 آ ! — اشك آخیردن چیقاریلوب ده سوقاق قاپوسندن طاشره یه آشیریلنجیه
 قدر سز زده ایدیکز ؟ — باق طوغروسى بن سوقاق قاپومی کیجه آرقه سندن
 کلیدلر ، آناختاری باش یاصدیغمك آلتنه قویارم . او وقت بالطبع خیر سز
 کلیدی قیروب ده صیغیریمی ، صیپامی سله سرپه آلوب کوتورمکه جسارت
 ایده مز . » کبی او آنده هیچ ایشه یارامایه جق دیدی قودیلرله بویینه خواجه یی
 خیر پالامشدر . آرتیق خواجه نك صبری توکه نوب دیمش که : « افندیلر !.. آغالر !..
 پك طوغرو سویله یورسکز . بوکونه بر پاره لق فائده سی اولماق شرطیله
 سوزلریکزک هپسی طوغرودر !.. آنجاق ... سزده انصاف ایدیکز . هپ
 قباحت بنده می ؟ . خیر سزک هیچ صوچی کنهای یوفی ؟.. »

مرویدر که : بر وقت ینه اجزای وطنمزدن بر قسمی کسب استقلال
 ایله یوبده اونك ایچون آوروپا بلده لرینك برنده معاهده یاپیلدینی ائاده آوروپا

دولتلى مرخصلى كندى حركتلىنى حقلى كوسترمك اوزره دولت
عليه نك كونا كون قصور و مساحه سنى صايوب دوكمكه باشلامه لريله بزم
مرخصم زده جمله سنه مقابله و مدافعه اولمق اوزره غايت طائلى بر افاده ايله
بو فقره يي نقل ايله مه سيله منفعتمز خلافتنه حركت ايله مكه عزم ايتمش اولان
مرخصلره فوق العاده حسن تأثير ايدوب يوموشامشلىر ، عبرت آلمشلىر . بزم
حقوقى مأمولك قات قات فوقنده محافظه ايله مشلىر ؛ محترم خواجه مزك
بو فقره سى بر كرامت تأثيرىنى كوستردىكى سويله مشلىر :

نيكوان رفتند و سنتها بماند وزلثيان كفر و بدعتها بماند [۱]



كزبانه ارباب قلممده « عباس خاوري بك افندى » اسكى بر لطائف مجموعه سنك
ظهربنه سرخنده يازلمسه اولدىغى هالده كوروب بالاسنساغ اهدا بويور مشلىر [۲].

﴿ لطيفه ﴾ بر قاچ اعما بر قهوه نك پيگه سنده اوتورورلر مش .
خواجه يانلرندن كچر كن پاره كيسه سنى شانغير شونغور شاقيرداتهرق : « آلت
شو پاره لرى ده بول بول پايلاشين ! » دير و فقط هيچ بر شى و يرمه يوب
اوزافدن سیرجى اولور . اعمالر ايسه درحال : « سكا وىردى ! يوق بكا
و يرمه دى - حقمى ايسترم . - حصه مى وىرك . » ديهرك آلت آلت ، اوست اوسته

[۱] ايني آداملر كيتدى ، اولردن كوزل اصول وعادتلر يادكار قالدى . كوتو
آداملردن ده كافرلكلر ، بدعتلر قالدى .

[۲] بو حكايه يي ادرنه دن حسن خيرالدين بك افندى ده كوندرمىش . حتى رسمى ده
كندىلرى نقش ايدوب برابر اهدا ايله مشلردز .

پیکه‌دن آشاغی دوشرلر ، و صوپا صوپایه کلوب مجادله ایدرلر کن خواجه‌ده
کولمکدن بایلیرمش .



خواجه : اعمالره پاره غوغاسی یاپدیروب قارشیدن کولدیکیدر

عشاق دینوہ عمومیہ مأثوری زاده حسین مامر بك طرفینره :

﴿ لطیفه ﴾ هرزه وکیللردن بری کویا خواجه مرحومه اکلنک قصدیه
برياز رمضانک ساعت اون برنده ساعته باقه‌سنی تکلیف ایله‌مش . خواجه‌نک
او آنده بیک‌تورلو اندیشه‌سی اولمغله قیزوب حریفک سؤالرینه آقیری جوابلر
ویره‌رک هر تحف مشربلی یاراتیلان آداملر هر وقتنده هر کسک دالقاووغی
اولامایه‌جغنی آ کلامق ایسته‌مش . شو یولده قونوشمشر :
— خواجه افندی! . ساعت قاج!

- طوبی بر دانه ساعت وار !
- خیر افندم . اونی دیمك ایسته م . قاچه كلدی ؟
- والله ؛ كوستكیله ، دلایه سیله یوز سكسان ایکی آچه و ایکی پاره یه طوغری كلدی ایدی . الله اعلم .
- فسبحان الله ... افندم ؛ بن آكلاته مادم غالبا . آقشامه نه وار ، آقشامه !!..
- بزه افطاره می كله جكسین ؟ . تام صیره سی . ایسته نیم ذهنم ده اوکامتعلق شیلرله مشغول . سکا صایه م . اعلا آریا اكسی ، تازه صوغان ، قاوون ، خیار ، بلكه برده بولغور پیلاوی اولابیلیر .
- دكل آ خواجه م ! غالبا بنمله آلا ی ایدیورسین ! . شیمدی نه زمانده یز ؟ .
- تام اورتا یاز ! صیجاقلرك ییكینلك دوری .
- الله الله . نصرالدین خواجه یه اكلنجیه اولاجمی هیچ ده تخمین ایتیهورم . شیمدی چیلدیره جغم . به آدام ؛ زمان نه زمان دیورم .
- آ اولاد بونی بیله میه جك نه وار ؟ . آخر زمان !!!... —
-!!!... —



« علی رضا » امضاسیله کوندرلشیر :

﴿ لطیفه ﴾ خواجه مرحوم کنجلیکنده معذبلك ایتمکسزین بر آن طور -
 مازمش . برکون یولده کیدرکن محله ده اک خسیس ، اک بداخلاق ، تیتیز اولان قوموشونك قازلری دیوار کولکه سنه چکیلوب اویومقده اولدقلرینی کورونجه حریف براز قودوروب تدبیمه سنی ، محله یی باشنه کیمه سنی سیر ایتك اوزره برارکك قازی اوصوله یاقالایوب جبه سی آلتنه آلاق یورومکه باشلامش .
 ایجه کیتدیکی حالد قازك سس چیقارمادیغنه ، باغروب چیرپنمه دیغنه مراق ایدرك تنها سوقاغه کلدیکی صیره ده : « عجبا قاز هوا سزلقدن بوغولدی می ؟ »
 دیبه مراق ایدرك یاواشجه جبه سی آچوب قازك یوزینه باقنجه قاز باشی

قالديروب - معتادی وجهله - « صوص ص ص ص ... » دینجه خواجه :
 « آفرین قاز ! . خلط ایتش سکا قاز دین ، سن افندگدن چوق عارف ایشین .
 بنده سکا بونی تنیه ایده جکدم . » دیش .



در زنده مسی غیر الربی بک افندی طرفندہ رسمی دخی بایلدرو
 برابر اهدا ایلمشدر [۱] :

﴿ لطیفه ﴾ آنا تولیدہ علی الا کثر ایشیلرینی ایمهجه ایله کورورلر .
 مثلاً دکرمنده اون اوکوتمک ایچون هرکس حیواننه بوغدانی یوکلتہرک بش
 اون کیشی کونلرجه دکرمنده نوبت بکله مکہ بدل برسفرده ایچلرندن بری کیدر
 دوستلری ، قومشولری بوغدای یوکلی حیوانلرینی اوکا تودیع ایدرلر . برقاج
 کونده اوآدام اوکوتور ، کلیر . ایرتسی سفر باشقه بریسی کیدر . بوسایهدهده
 برقاج آدام - علی الا کثر - شهره برقاج ساعت اوزاقده اولان دکرمنده
 آچیقده سفیل وسرکردان قالماش اولور . بوقیلدن اولوق اوزره خواجه اوکنه
 سکیز دانه بوغدای یوکلی اشکی قاتوب ؛ بردانه سنده بینوب یولده کیدرکن -
 حاصل اولان شبهه اوزرینه - اشکلری صایق ایستر . صایار ؛ سکیز کلیر .
 غایت تلاش ایدہر . چونکہ سکیز دانه آدام کندیسنه حیوانلرینی تودیع
 ایلمشدی . حالبوکہ برده کندینک اولاجقدی . اشکلرک دوقوز اولماسی
 لازم کلردی . همان حیوانلری طوردوروب کندی یوکلی حیوانسندہ اینوب
 یولک بوکلومی رینی کچہرک ایلریه باقق ؛ یاخود مثلاً اوراده بولنان آغاجلرک

[۱] آقسرائیلی امام زاده حافظ فخرالدین افندی ده بو حکایه بی ارسال ایلمش
 ایدی . دها برقاج ذواتده کوندرمشلردی . بوقدر تواترله برابر بو حکایه خواجه نک
 اولمقدن بعید ، پک اسکی بر حکایه در . برچوق اسکی کتابلرده ، از جمله مثنوی شریفده
 غایت دلنشین برطرزده مسطوردر .

آرقاسنده آرامق اوزره بر مدت کریه دونوب بولامایه رق کمال یأسله عودت ایلهدیکی بر صیرهده حیوانلری بتکرار صایار ؛ طقوز « فسبحان الله » دیوب ینه مرکبک برینه بینه رک کیدر کن - آرتق شبهه عارض اولاجنی درکار اولمغله - ینه بردها صایغه باشلار ؛ ینه مرکبک سکز کلزمی ؟ . خواجه حیرتله دوچار اولوب کندنجه برشیلر خاطرلار کی اوله رق ینه مرکبدن اینر . کیریسین کیری برخیلی کیدوب کمال یأسله مرکبکری امیدسز بر صورتده صایار ؛ طقوز ؟ . . زواللی خواجه چیلدیره حق کی اولور . - دمر کی قوی بر اعتقاده معتقد اولدیغی برطاقم جنلر ، پرلر حکایه لرینی دوشونمکه باشلار . ایصسز چوللرده پرلرک آدم اوغلانلرینه نه کی او یونلر اوینادیغه دایر بر چوق کیمسه دن ایشیتدیکی منقبه لر هپ دماغنده قاینشیرلر . خواجه نک ذهنی پریشان ، عقلی تارمار اولور . بر چوق دعالر اوقویه رق ینه مرکبک برینه بینر ؛ یولنه ناچار دوام ایدر . فقط شیطان طورورمی ؟ مرکبکری بردها صایمق اوزره خواجه یی دورتوشدورور . خواجه عادتاً ایسته مه یه ایسته مه یه کویا اطاعتنه مجبور اولدیغی بر قوتک سوقیله مرکبکری بردها صایار ؛ سکز . آرتق اولانجه چیلغینقلاری وار قوتیله تیره شه رک مرکبدن آتلا یوب بر مدت کندی کندینه باغیریر ، تدبیر . باغیره باغیره اجیلره ، غول یابانلره قارشى اوقونان تعویذلری ، عزیمتلی [۱] سسلی سسلی اوقور . واهمه سی ده صوک درجه فعالیتیه باشلا یوب عجیب عجیب سسلر طویمقله قورقودن تیرتیر تیرره . صوکره باقار که حیوانلر چنزاره یاییلمغه طالمشیر . یوکلری ایندیرمکه بیله کندنده طاقت بولامایوب کندیسینی ده بر آغاجک سایه سنه آتی ویریر . او ائشاده ایلریدن بر یولجی بلیرمکه ارواح خبیثه نک او تضییقندن چیلدیرمغه رمق قالمش اولان خواجه حضره قاوشمشه سنه آدمه سسله نوب یانه جلب ایدر . حریفله آشنا چیقارلر . ذاتاً خواجه یی کیم بیلمز ؟ خواجه یی بیتاب و خراب بر حالد کورونجه مسئله یی سؤال ایدر .

[۱] (تعویذ ، عزیمت) انسانک دنیاده بر طاقیم مرادلری حاصل اولمق ایچون اوقونان دعالردر . بونلرک بعضلری جناب حقدن مناجات ، بعضلری انسانلره یاردم ایدن ملککردن ، پرلزدن ، خدام دینیلن دائماً کندیسنه ملازمت ایلرین اجسام لطیفه دن نیازدر .

زوالی یانه یاقلا ماجرای آکلایر . شهرده ابنای زمانک تعجیزاتی یتشمه یورمش
 کبی ایصمز چولده غول یابانلرک کندیسيله بالاتفاق ایتدکلری آلائی آکلایر .
 حریف : « جام خواجه ! . مراق ایتمه . او سنک کندی قورونتوگذرا . »
 دییه تأمینات ویردکجه خواجه - واقعا کندیلرینی بالطبع کورمه مشسه ده -
 سسلرینی ایشیتدیکنی یمینلرله تأمینه قالقیشیر . حریفه بيله تردد کلیرسه ده ینه
 خواجه بی بویینه تسلیده ثبات ایدر . انهایه خواجه : « آغانی اوپیم . بر
 مقدار مکث ایت . بی حیوانمه بیندیروب یولمه دوزلت ، صوکره سلامتله ایشیکه
 کیت ! . » دیمکه حریف آجیوب اوراده بر آزده قهوه آلتی ایدرلر . بوز
 کبی قاینق صوی اچرلر . خواجه یه ده مکمل بر اعتدال کلوب نشسته لهر ،
 شاقلا بانلیغنه باشلار . حیوانلری طوبلارلر . برینه بیز . « هله شواجنی دوستی
 اولان اشکاری بر دها صایه لم ! . » دیر . ینه صایار . ینه بر اکسیک ؛ یعنی
 سکز کلنجه آغلامسیق بر سسله یولچی یه متوجه اولوب : « کوردکمی برادر!
 ایشته ینه سکز اولدی . ندر بو بنم چکدیکم شو اشکلرک الندن ! . » دییه
 کرچک کرچک تظلمه باشلانجه حریف کوله رک : « آخواجه م ! . شو کندی
 بیندیکک اشکنی ، اوزنفسیکک راکب اولدینی مرکبی ده صایسه ک آ . » ذاتا بوتون
 یا کلشقلر کندی اشکنی اوز قارداشلرینک کیلریله برلکده صایماقدن چیقار .
 دینجه خواجه برمدت دوشونوب آلتی آلتی اوزرینه « شاپ... » دییه ایندیره رک
 شاقاقلرینی اووشدوردقن صوکره هان مرکبدن اینمش ، حریفک آلرینه
 صاریلش ، حریف - بو بدیهی مسئله ده بر مهمیت ، بر کوچلک کورمیدیکی
 جهته - حیران حیران : « امان افندی ! . ایتمه . استغفرالله ، دیدکجه خواجه
 یمینلرله یالوارمقلرله ایکی آلرینی اوپوب : « های اللهراضی اولسون . بی ارشاد
 ایتدک ! عقیمی حیاتی بکاعاده ایتدک . زیرا رmq قالدی که سنجه پک آجیق
 اولان معمانک حلی اوغرنده یا آژ دها چیلدیره جق ، یاخود یوره که اینوب
 هلاک اولاجقدم . دوشونولورسه طولامبا جلی ، اک حلی مشکل ایشلر ؛ پک
 بدیهی پک روشن اولان مسئله لرک بردن بره کوزلری نور بدهتیه قاماشدیروب
 انسانی صایینی ایله مه سندن نشأت ایدر . یوقسه حقک بو رتبه بدهته قارشی
 دنیاده انسانلری بر برینه قیردیروب کچرن شی ندر ؟ . فلاکت بشریه هپ

بو نقطه ده برله شیر . بو آ ناختاری ابدیاً غائب اولان کلید بر کره آچیلسه
سلطان حقیقت هر کسه تجلی ساز اوله رق بوتون قانلی ییچاقلی دشمنلر یکدیگریله
سارماش طولاش اولورلر . دنیاده جنت حیاتی یاشارلردی . « دیمشدر .



خواجه اشکاره بیر صایار سکز ، اینر صایار طوقوز ! . . .

مالیده « ابراهیم خلیل » افندی کوندرمشدر :

﴿ لطیفه ﴾ استادی ؛ صوفه لق اُتاسنده خواجهیه (نصر) نه کله ! .

دیمش . خواجه در حال : « مصدر ! . » دیمکه خواجه سی : « نه ایچون طوغر و جواب
ویرمه بورسک ؟ . » دیمه سی اوزرینه خواجه : « فعل ماضی - دیسه م ایش اوزایه جق .
چونکه معلومی وار ، مجهولی وار ، مثبتی وار ، منفیسی وار ، مذکری وار ، مؤنثی
وار ، مفردی وار ، جمعی وار ، وار ، وار ، وار . مصدر ایسه بویله شیردن

آزاده در . اويله دالی بوداغی یوق . (مصدر) دیرسین بر سوزله
قورتولورسین! ، دیمش .



منابع نفیسه طلبه مندره «رؤف بك» طرفندره :

﴿ لطیفه ﴾ بر بهار زمانی اقرانیله برابر خواجه مرحوم جوار کویلرندن
صوبی صولانغی چوق ، بوتون باغچه لرله ، انواع اشجار و سبزه زار ایله مالی ،
جنت مثالی بر کویه کیدر لر . چنزارده انواع نباتاتک چیچک لری آچیلمش ،
آغا جلر رنگارنگ چیچک لر ایله طونامش اولمقله بك زیاده محظوظ اولمشلر ،
ایچلری آچیلمش . فوق العاده نشئه ایله شطارتله وقت کچروب کتیردک لری صحرا
طعاملرینی طیفه باصه کمال اشتها ایله یمش لر . عزیزت زمانی کلش ؛ فقط بر تورلو
بو کوزل کلزاردن آیرملق ایسته مدکلرندن بر قاچ کون اوراده قالمغه قرار
ویر لر . ایچلرنده بر آرفانه [۱] ایله اسباب صفادن برینی درعهده ایدر .
کیمی باقلا واسی ، بورکی بنم اوزریمه ؛ کیمی قوزو طولمه سی بنم اوزریمه ؛ کیمی
زیتون یاغلی یا پراق طولماسی بنم اوزریمه ؛ کیمی صالاته سی پینیری ، پورتقال ،
الما ، آرمود کبی انواع یمش لر بنم اوزریمه دیدک لری صیره ده خواجه نك یوزینه
باقش لر . خواجه ده در حال : «بو ضیافت بویله اوچ آی دوام ایله سه بیله اکر
بنده بورادن آیریلیر سه م ، اللهمک ، پیغمبرک و بوتون ملک لریک لغتی ده بنم اوزریمه !»
دیمشدر .



[۱] بو کله نك اصلی (عارفانه) یاخود (حریفانه) اولق اوزره مختلف فیهدر .

برسد و « بر قارنگز » امضایید کلمه شد :

﴿ لطیفه ﴾ خواجه مرحوم بر مملکت کیدوب بر خاندن مهمان اولمش .
 بر کون او طه باشی بی چاغیره رق : « همشهری ! . بن بو او طه نك طاوانده ،
 کیریشلرنده آره صره قورقونج قورقونج چاتیر چوتور بر شیلر ایشیدییورم ،
 بر اوسته کتیرده شونی بر ایجه معاینه ایتدیر ! . » دیرسه ده او طه باشی کوله رك :
 « تلاش ایتمکز افندم ! بو بنا یقلماق اوزره یاپیلمشدر . او یله چاتیر تیلردن
 هایلاماز . او چاتیری پاتیری عصرلردن قالمه کهنه بر بنا اولدیغندن طولانی
 دکل . سز خواجه سیکز . البته بیلیر سکز که دنیا ده بوتون اشیا جناب رب العالمینی
 تسبیح ایدر لر . » دییه مغالطه ایله خواجه دیمشدر که : « ایشه بن ده اوندن
 قورقورم یا . بویله تسبیحی ، تهلی آرتیره آرتیره یانهیت وجده کلوب بر کیجه
 آتمزین سجده استغراقه قاپانیرسه ؟ ... »



بئیک طاسه ابتدائی معلملرنده م . نورالدین افندی کوندر مشدر :

﴿ لطیفه ﴾ خواجه مرحوم طلبه لك انسانده بر مملکت جره کیتمش .
 واقعا هر بلده ده : « خوش کلدك ، بش کیتدك . » کبی حال خاطر صور مق مثلی
 شیلر اکیک دکل سه ده بورا خلقی براز ده ایلری کیدرك صوینی صوینی ،
 اقر باسی ، آشین دوستی ، ایشنی کوجنی ده اوزون اوزادی صورار طور ورلر .
 مش . بر ، بش . خواجه بیقمش ، عاجز قالمش . بویله بر سؤاله معروض قالمه جفنی
 بالطبع اصلا خاطر لایمان خواجه افندی کندی آدینی بیله یکدن سویله مه به جک
 بر طالغینلده ایکن بویله اطرافیه استنطاقه چکیلنجه درست جواب ویرمکه
 کر چکدن مشکلات چکمش . جدی صورته صیقلمش . حال بو که معیشت
 مقتضاسی اولنره کوزل معامله ایتمک دخی کندیسی ایچون ضروری اولمقه بر کون

اوطه سته چکیلوب او آنه قدر کندیسنه سؤال ایدیله کلمکده اولان و سؤال ایدیله سی محتمل بولونان مسائلی اطرافلیجه مناسب براسلوبله برکاغده ثلث قلمله یازمش. آقشام کویلی طوپلانو بده هنوز خواجه یی یکی کورنلر حال خاطرله باشلادقلرنده و یا خود خواجه باشقه بر سمته کیدوب اورا خلقی سؤال لری ایراد ایدنجه خواجه مذکور صحیفه لری اویدوردینی غایت مضحک بر مقام ایله مناسب موضعلرده انواع تحفقلر ایجاد ایدرک بوتون کویلی به قارشی او قویوب هم مجلسده حاضر اولان لری نشه لن دیرر ، همده بو سؤال لرک تکررندن یاقه یی قورتاریرمش .



« همول » مطبعه سی مرمرنیزه دانی ارهم مظلوم افندی کونرمرمر :

﴿ لطیفه ﴾ خواجه مرحوم صباحلین خانه سندن چیقارکن حرمنه :
 « باجی سلطان! آقشامه اعلا بر بولغور پیلایو پیشبرده سنکله قارشی قارشی به کولوشه اویناشه ییه لم . » دیر ، کیدر . خواجه آقشام اوستی یورغون آرغین کلیر . صویونور ، دوکونور . قارنی ذیل کبی آج اولمغله همان سفره یه قوشار . باقارکه قادین صوفره یی حاضر لاش . پیلایو یانته برطاس یوغور قتی ایله یشیل صوغانی ده علاوه ایله مش اولمغله خواجه : « آفرین سکا ! بزم سوکیلی قاریجغم ! .. » دییه کمال شوق و شطارتله و بر او قدرده اشتها ایله اوتورور . قاشینی طولدوروب ، طولدوروب معدیه ایندیرمکه باشلار . حرمنه بیگ شاقلا بانقلر یاپارق قهقهه لر عیوقه چیقار . تام بو قیزغین اشتها و حرارت ، نشه و صفا ائناننده قومشو یتیم چوجوق بونی بوکوک ، طوری حزین برحاله کله رک : « آمان افندی عموجه ! یتیش ! آنهم سنی چاغیر سیور . سندن باشقه کیمسه مز یوق . » دیمکه مجسم رحم و شفقت اولان خواجه همان فیرا یوب قوشار ، کیدر . یاریم ساعت صوکره خواجه قاشلری چاتیق نشه سز برحاله کلیر . حرمی صفره ده دعوت ایدرسه ده رغبت ایتمز . مسئله یی صورونجه : « نه اولاجق ! . قرق ییلده بر کره کوله

اویناه قاری قوجه بر بولغور پیلایوی بیه جکدک . قومشونک اشکی قویروقسز
صیبا طوغورمش . . دیمش .

مکرسه زواللی قومشو قادین ؛ اولجه حیوان طوغورمه سنده بولونمادیغندن ،
هنوز صیبا تمیزلمه دیکندن قویروغنی کورمه مش . بام باشقه بر شی صامش .
خواجه بی چاغیرتمغه مجبور اولمش .

﴿ لطیفه ﴾ خواجه برکون یالین آفاق چفت سورر کن آياغه قوجه مان
بردیکن باتمش ، آياغنی پارچه پارچه ایتمش . بیچاره خواجه آياغنی صوغوق صو
ایله ییقایوب تمیزله دکن و صاروب صارمالادقن صکره : « برکت ویرسون که
کچن کونکی آدیغم پایوجلری کیسه مشدم . » دیمشدر .
[بزم کبی کویلری کزنلرک پک اعلا معلومی اولدیغی وجهله طشرده کی
فقرانک حال حزینته بو کوچک بر مثالدر .]



« متین » مطبعه سنده ما کنه بی محمود افندی کوندرمشدر :

﴿ لطیفه ﴾ خواجه مرحوم مرکبه سوار اولدیغی حالده بانچه سندن
خانه سنه عزیمت ایله دیکی صیره ده شدتلی بر حرکت ارض اولمش . همان حیواندن
اینوب سجده یه قایامش . آرقداشلری حکمتی سؤال ایله دکلرنده بویورمش که :
« بزم اسکی خانه بو شدید حرکتدن شه سز ییقلمش و اوتوروله مز بر حاله
کیشدر . یا معاذ الله بو ائاده بن اوده بولونسه یدم ؟ . خانه ییقیلوب بی پستیل
ایتمه سه بیه بزم چوقدا . . . ن یورکه اینر . اوته دنیا یه کیدردم و یاخود
بوسبوتون چیلدیردم ! . »



« علی » امضایید کوندرین مطایره :

﴿ لطیفه ﴾ زنکینلردن بری خواجه مرحومه طلبه لکنده بش یوز غروش و یروب : « خواجه افندی ! . بش وقت نماز عقینده بزه دعا ایت ! . » دیمکه خواجه مرحوم ایچندن الی غروش آیروب اعاده ایدرک : « افندم ! کیجه لر قیصه ، بوش بوغازلقلرک اوقه سی اونستده اوزون اولمقله - الله عفو ایتسون - داعیکز اکثریا صباح نمازینه قالمایورم . قوشلق زمانی قضا ایدیورم . بناءً علیه صباح وقتک اجر تتی تام آلمغه جناب حقن حیا ایدرم . » دیمشدر . [طلبه لك زماننده خواجه مدن ایشیتمش ایدم . قونیه ده تحصیلده بولونان بر ملا باباسنه یازدیغی مکتوبده : « دورت وقت نماز عقینده : دعا کزله مشغولم . » دییه یازدیغندن باباسی : « های کلخانی ! . حالا صباح نمازینه تبلیک ایدیور . » دیمش .]



سولانک دارالمعلمین معتمدینده محمد شوکت بك افندی الهام الهمشدر :

﴿ لطیفه ﴾ صورت ظاهرده خواجه مرحومه فوق العاده حرمت کوسترمکده اولان اشرافدن برکیمسه نك مکرراً واقع اولان اصرارلرینه قارشى مجبور قالوب برکون خواجه افندی زیارتنه کیدر . خانه صاحبنك پنجره دن باشقه بر جهته باقوب کری چکیلدیکنی ده کورور . قاپوی چالهرق : « راحتسز ایتزسه م افندی حضر تلرینك زیارتنه کلدیم ! . » دییه کمال امید وجسمارتنه سوبله مه سنه مقابل ایچریدن : « واه واه ! . افندی شیمدی چیقدی کیتدی . طویارسه بك متأسف اولاجقدر . » یولنده بر جوابه معروض اولنجه خواجه نك جانی صیقیلوب یوکسك سسله : « بك کوزل ! . آنجاق افندی کزده سوبله يك ده

بر دها خانه دن چیقوب کیتدیکی وقت اونوتوبده باشنی پنجره ده براقسون .
 برشی دکل ، خلق بيلمز . کندیسنی ده ایچریده ظن ایدر . کندیسندن کوردیکی
 جعلی التفاتلره آلدانهرق ایشنی بیراقوبده زیارتہ کلنلر بویله اومولمایان معامله
 نامردانه به معروض اولنجه هم سوکرصایارلر ، همدہ ابدیاً مرجایی کسرلر ! . »
 دیمشدر .

﴿ لطیفه ﴾ بر مجلس صحبتده آخرتدن ، قیامتدن بحث اولونوب خلقه
 محزونلق چوکدیکی ، کوکوللر یومشادیغی برزمانده خواجه یی تا یانه اوتورتمش
 اولان تیمورلنک ایچندن بر آه چکوب : « خواجه افندی ! . قیامت کوننده
 بزم حالمز نه اولاجق ؟ عجبا بزم مقامز صدز جتیمی اولاجق ، یوقسه جهنمک
 دییمی ؟ . » دییه سؤال ایدنجه خواجه دیمش که : « امان پادشاهم ! کرچک
 سزده بورالرینی دوشونیورمیسکز ؟ قلب هایونکیزی بو کبی شیرله متأذی
 ایله دیککزه کرچکدن متأسف اولدم . بکا قالیرسه سزهیچ تردد بویورمالمیسکز ،
 چونکه کونش کی عیان و بیاندركه دنیا به کوزیکزی قاپار قاپازم . همان طوغرو
 صولوغی معظم اجدادیکز جنکیز و هلاکو کبی محتشم پادشاهلرک یاننده
 آله جفکزر درکاردر . نمرود وفرعونک واسکندر و نهرون کبی امثال شهنشا هیلری
 ایله برابر صدر معالی عقباده مربع نشین احتشام اولاجقلری محققدر . »



شمس مطبوعه سی مرتبه نهمه « عبدالمطلب » افندی کوندره مشدر :

﴿ لطیفه ﴾ خواجه مرحوم مرض موتنده حرمنه : « هایدی قاریجغم ! .
 اک مزین البسه کی کیین . صاچکی باشکی دوزلت ، چهره کی صوک درجه
 نورلاندیر ، نه قدر سوسلنمک لازمه غیرت ایت . اوله جه قارشیمه کل ! »
 دیر . قادین : « آه افندیجکم ! . سزک بویله اضطرابی بر زمانکزده خدمتکزی
 بیراقایمده آلم سوسلنمکه ناصل وارسین ؟ ! . بن اوئی دنیا ده یاپهم . هم شیمدی

بو نہدن اقتضاً ایتدی ؟ . بنی او قدر وجدانسر ، نعمت قدری بیلزمی صاندک ؟ ، دیمکله خواجه : « خبر آقاریجیم ! . سنک عقلکله کلن شیر دکل ! . مقصدم بام باشقہدر ، کوروپورم کہ اجلم یا قلاشدی . عزرائیل دائماً اطرافده قیورانوب دوریور . سنی او یله البسۃ فاخره ایله ملک سیمالی ، طاووس کبی صالینیر بر حالدہ کورورسه بلکہ سنی آلیرده بنی براقیر دیبه آرزو ایدیورم . آکلادکمی شیمدی سر وحکمتی ! . » دیمشدر .

﴿ لطیفہ ﴾ مرحومک اک زیادہ قورقدینی اولوم ایمش . حتی تصویریلہ بیله سیکیرلری کوشر ، کندندن کچرمش . بو سبیدن طولانی اکثریا اخوان و یارانانی اولوملہ صاراقیہ آلیرلمش . نته کیم بو کلیاتده کی بعض فقرہ لردہ بوکا دلالت ایدر . حال بویله ایکن مرض موتندہ قطعاً تلاش ایتیمش . لازم کلن وصیتلرینی و دیناً اجراسی لازم کلن احکامی ادا ایتدکدن صکرہ باقی حیاتی صولک نفسنہ قدر اهل بیتلہ ، قومشوسیلہ یارانیلہ کولوشوب لطیفہلہ شہرک کچیرمش . بعضیلری بو حالہ تعجب ایدرک : « خواجه افندی ! سن اسکیدن اولوم قورقوسندن - لاقیردیسیلہ بیله - اولوم حالنہ کلیردک . شیمدی کوروپورز هیچ قور کتیرمه یورسین . بونک سبب وحکمتی نہدر ؟ » دیمشدر . خواجه بویورمش کہ : « اولادلرم ! اوزمانلر بزم بونجہ تلاشمز بو کر تہیہ کلمکدن ، بو یاتاغہ سربلمکدن قاجینمق ایدی . شیمدی اولان اولدی . عزرائیل قاپویہ دیکیلدی . بوندن بویله آخرت حاضر لغنی کورہلم . صرک نفسمزده ایمانمزک سلامتی چارہ سنہ باقہلم . »



قائمربکزدہ « ا . سری » امضاسیلہ کلمشدر [۱] :

﴿ لطیفہ ﴾ خواجه نصرالدین « رحمۃ اللہ علیہ » ک وفاتندن ایکی عصر صوکرہ برجمہ کونی بیکلرجه اہالی ؛ مملکتک قدیم اولو جامعندہ نماز قیلیمق

[۱] بو حکایہ آناتولیدہ محرر فقیرکدہ بر چوق کیمسہ لردن مسموعم اولمشدر . اورالردہ پک متواتردر . فقط باشقہ لرینہدہ اسناد ایدرلر .

اوزره طوبلاندیغی بر صیره ده ناکهان خواجه نصرالدین مرحومک طبقی
 حلیه سنه مطابق و صافلغنه ، شاقلا بانلغنه تمامیه وارث اولان تربهداری کسوه
 عجیبی و سیای مضحکی ایله جامعک اورتیه ، بویوک قابوسنده کورونوب بلند آوازله :
 « ای اهالی ! سزه غایت عجیب بر شی سویله یه جکم . آبدست آلم . جامعه کلک
 اوزره تربه قابوسنی کلیدلیه جکم ائنده خواجه نصرالدین مرحومی عین سیاسی ،
 عین چهره خندان ، عین طور عجیبی ، عین کسوه مخصوصه سی ایله کوردم .
 صندوقه سنه آت کبی ینمش ؛ اطرافی سیر ایدیور . بکا شیمدی اولو جامع
 جماعتنی چاغیر . کله ین اولورسه کندی جاننه قییمش اولور . دیدی . « دینجه
 خواجه مرحومه اعتقاد تامی اولان و - زهد و صلاحندن ناشی - تربه داره ده
 آریجه حسن ظنی بولونان بوتون اهالی تربیه قوشار . بالطبع خواجه یی کوره مزلر .
 ذاتاً بویله کراماتی کوروب آبا واجدادلرندن عنغه ایله ایشیده ایشیده حقنده
 صاعلام بر اعتقاد حاصل ایله ین اهالی هپ کولوشه رک : « های قوجه معذب ! آره صیره
 بزمله آلا ی اتمکندن ده واز کچمز سین . « دیسوب هپ بردن فاتحه اوقورلر .
 کولوشه رک جامعه عودت ایدرلر . برده باقارلر که جامعک قبه سی طاقیله کوچش .
 مرحومک اشبو کرامت جلیله سنه بو امداد قدسیسنه حیران قالیرلر .
 اعتقادلری قائم ره شیر .

رحمه الله تعالی رحمة واسعة و رفع الله درجاته واکرمنا بشفاعته آمین

مفتی الثقلین کمال پاشا زاده (قدس سره) بویورورلر :

ایکی عالمده تصرف اهلیدر روح ولی
 دیمه کیم بو مرده در بوندن نیجه درمان اوله
 روح شمیر خدادر تن غلاف اولمش اکا
 دخی اعلاکار ایدر بر تیغ کیم عربان اوله





مشروطيت مشروعه مزارك مقابر اكابره نشانه تعظيمي اولق اوزره
 اخيراً اجرا ايديلن تعمير مناسبتيله نصرالدين خواجه تربه سنك آلان رسميدز

خاتمه

خواجه نصرالدین افندی (رحمة الله عليه) كه اوته دنبری آلرده متداول اولان لطائف كتابی ايله اخواندن بری واسطه سیله الده ایستدیکم یازمه بر مجموعده مسطور اولان واصلک نصفی درجه سنده بولنان لطائف نصرالدین وسائر مجامع لطائف وسفاین ادبیهدن وبعض مؤلفاتدن التقاط ایلدیکم فقراتی دور سابقده یازمش ؛ بویله بر زمان حریت نشانه انتظاراً بر طرفه صاقلامش ایدم . جناب حقه هزاران حمد وشکر اولسون سبب اولانلر مکافات صوریه ومعنویه سنی بولسون که عون حقله وهمت مردان ايله ، کونمز دوغدی . ایستدیکمز اولدی . ایلک فرصتده نشره موفق اولدق . نان ونعمتیه پرورده ایلدقلى خاك پاك مملکته ایقاي شکران ايله مش اولق ایچون دور سابقده حکومتک انواع مظلمنه قارشى اعظم مجددينمزمك آثارینی نشره صوک درجه بذل غیرت بویوران ایرانلی کتابچی قرده شلریمزك الآن بو ارض مقدسده توالی ايله مکده اولان نشریات معارف پروانه لردن - موجودیت ادبیهمزه تأثیر بلیغ کوسترمش بولنان « کلیات لطائف خواجه نصرالدین » ایلک خطوه مشروطیتده حصه یاب اتقشار اولدی . ایرانلی طابعلرک محاسن شیم ومکارم وهمده اک ممتاز لردن اولان وعالم تجارتده معاملات ناموسکارانه و فعالیت مشکل براندازانه سیله جمله یه کنندنی سودیرن « اقبال » کتبخانه سی صاحبی حسین افندی برادریمز اشبو کتابک نشری خصوصنده لازم کلن هر نوع فدا کارلنی کمال شوق ونشاطله ابذل ایتمش ونفاست ومکملیتی هر نه یه متوقف ایسه جمله سنی درعه ده ايله مش اولمقله عون جلیل رب العالمین وامداد معنوی خواجه نصرالدین ايله اشبو عروس دلفریب ادب صوک درجه مکملیت ونفاستی حائر اولدینی حالده حله پوش زیور طبع اوله رق بزم انسا انس اصحاب عرفان وایقانده عرض دیدار ونشر انوار ایلهدی . علوم ادبیهمده احاطه تامه سی اولان وبو بایده بالاصاله ذی الیدبولنان اساتذة علمایه هویدا درکه اصطلاحات ، تعبیرات ، امثال ، فقرات دعایم ادبیهمک

اك مهملر ننددر . بونلره كسب وقوف ائمه ين حقييله اديب اولاماز . كيمسه آنك كلامنده آثار اساتذه يه مخصوص حلاوت وطلاوتى بولاماز . خواجه مزك فقرات اعجاز كارانه ، اجوبه سحرارانه سى ايسه دعايم مذ كوره نك قلوب عامه ده تأثير بليغ كوستر نلر ننددر . مقدمه ده عرض ايلديكمز وجهله خواجه مرحومك بو قوم ايچنده كي موقعه مشاهير سلف مياننده كنديسنه راجح اولان بر چوق اعظم موفق اولامامشدر . خواجه حكمت كزين سياست ادبيه نك مفتاحى بولمش و قلوب عامه يي تسخير ائمه نك يولنى پك رعنا بيلمشدر . هوسكاران ادب ايچون بو كتابك لزومى عامه يه روشندر . هله حياتده على الاكثر محتاج اولديغمز دفع اكدار وكشائش افكار ايچون طيب الفؤاد اولان خواجه معالى نژاديمزك تسليت مشفقانه وارشادات عارفانه سى بابتده تطويل مقالى زائد كورورم .

بر اثر ك بر قوم ايچنده حاصل ايلديكي تأثيرينه افكار عامه ورغبتموه تعيين ايلر . بز بو كتابي طبعه باشلا ديغمزده اصل كتاب ايله ملحقاتي بش آلتى فورما قدر تخمين ايله مشدك . آنجاق عرفاي مليه مزك شيخ وشابي ، مبالغه سز يدى ياشندن يتمش باشنه قدرى وزمره كزیده نسوانى بو بابده بزه او قدر امداد ايله ديلر ، او درجه چوق لطائف ارسال ايتديلر كه اكر بز تنقيح ائمه بوبده هپسنى يازمق لغمز لازم كلسه يدى ، جلد عظيملر وجود بولاجقدى . امر تنقيحده صوك درجه التزام بصيرت ايله مكه چاليشدق . فقط نوع انسان آلوده نقصان ونسيان اوله كلد يكسندن احتمال كه خيلى ده قصوريمز اولمشدر .

بر اثر ايلك ظهورنده قصواى كماله ايره مز . انشالله آتيده ، بعد ازين ممالك وسيعه اسلاميه دن جلب وجمع ايدهرك حاصل اولاجق علاوه ولاحقه لر وبر چوق رسملره نشر ايدهركمز طبع اخيره ده ازياده تنقيحات وتهذيبات اجرا ايلرز .

بو كتابده خواجه مرحومه اسناد ايديش بر چوق فقره واردر . بز اكثر يسنى محللر نده اثبات واعتراف ايله دك . فقط چه جاره كه جمله سى « خواجه مرحومكدر . ثقاتدن مسموعم اولدى » ديه بزه تأمين اتله كوندر يلدى . مکتوبلر محفوظمزددر . هله بر چوقلرينى بش اون دانه ذات بالاتفاق يازوب

کوندرديلر . بو کي لطائف علم اديده سرسريانه طولاشمقده و برر واسطه ايله عرفاي سلفدن برينه ياناشمقده اولمغله خواجهيه اسنادي ؛ عدم اسنادي درجه سنده موازي بولومغله خواجهدن سلب ايله مك ايچون الميزده بر دليل موجود اولماقده ناچار تحريراتلريله خواجهيه اسناد ايله ين ذواتك شهادتلريني ترجيح ايله دك . بو باده نفي اثبات معارض اولمغله اثباتي ترجيحده فائده زانده كوردك . والله يهدي الى سواء السبيل .

۱۲ صفر الحير سنه ۱۳۲۸ وفي ۱۰ شباط ۱۳۲۵

بهائي



اشبو کلیات لطائفدن منقح ومهذب اولوب چو چوقلره کوزل بر انیس
 نشئه بخشا اولمق اوزره بالاخره نشر ایده جکمز بر تحفه علمی به یازدیغمز
 (خاتمه) خواجه نك ترجمه حالى متمم ومشرب ومشوارینك تنویر وایضاحنه
 خادم اولدیغی جهتله بورایه الحاق ایله دك . بالاخره بو مقدمه ولاحقه لر جمع
 وتهذیب ایله دك ایسه سه شیمدیلک بورایه الحاقی تنسیب ایدلمشدر :

« خاتمه »

نصرالدین خواجه ؛ اصیل ، نجیب تورک عرقنددر . آقشهره ملحق
 سیوری حصار قریه سنك « خورتو » کوینده کوی امامی عبدالله افندینك
 صلبندن [۶۰۵] ده طوغدیغی سیوری حصار مفتیسندن نقلاً روایت اولونیور .
 خواجه ابتدائی تحصیلی کوینده یابدقندن صوکره باباسنك وفاتی حسیله امامانی
 باباسنك ملاسی محمد افندی به دور ایده رنك آقشهره هجرت ایتمش ، اوراده
 (سید محمود حیرانی) و (سید حاجی ابراهیم سلطان) کبی اجله دن تحصیل
 علوم وکالات ایله مشدر . اسکی لطائف نسخه لرینك متعدد یرلرنده کورولدیکی
 وجهله خواجه قونیهدده تحصیل علوم ایله مشدر . بعضلری خواجه بی سلطان
 علاءالدین سلجوقی معاصری یاپارلر . واقعا لطائفنده ده بونی تأیید ایدن فقره لر
 واردر . بعضلری ده ییلدیریم دوری رجالدن و تیمورلنك مصاحبلرندن صایارلر .
 (لطائف) ده بونی مؤید اوله جق حکایه لر دخی متعددر . بناء علیه بوبابده کی
 محاکمات ومطالعاتی - مأخذلریمزله ، دلائل وشواهدیمزله - باشقه بر زمانه
 بیراقه رق بوراده پک لزوملی بعض معلوماتی یازمقله اکتفا ایده جکمز . خواجه نك
 مزار طاشنده کی تاریخ وفاتی [۶۸۳] اولدیغی دست خطیله شهادت ایله دیکی
 بعض وقفنامه تاریخنه مطابقتیله ده قرین صحت اولویور . بوبابده کورولی زاده
 استادمزنك منظوم (نصرالدین خواجه) سی مقدمه ومؤخره سننده معلومات
 واردر .

خواجه‌نك حياتی سیوری حصارده آقشهرده تدریساتله ، بعضاً امامت و خطابت و مواعظه مرور ایله مشدر . خواجه ارباب فقر و قناعتدن ایدی . کندی تارلاسی کندی اکر ، چیفتی کندی سورردی . اودونی طاغدن کندی کسردی . حتی یارانیه قیشین آوه بيله کیتدیکی اولوردی . خلقله غایت اینی کچیردی . لمصلحه قونیه ، آنقره بروسه ولایاتيله بعض ملحقانده سیاحت ایله مشدر .

بر مدرسه‌ده اوزون اوزادی علی‌الترتیب نشر علوم ایتدیکنه دائر صراحة دسترس اولامادقه‌ده هر حالده کنديسـنـك طلبه‌لری بولوندينی ، علی‌الاكثر اونلره فقه حنفینك الك كوزل واك معتبر مختصراتندن اولان (قدوری) اوقوتدینی مصر حدرد .

« نصرالدین خواجه » بوتون خلقمزك روحنه نفوذ ایتش تام ملی بر بویوك آدامزدرد . همزك قلمزده خواجه کندی تصورمن درجه‌سنده برسیما ایله بر مشرب و مسلکله یاشار . فقط بالاتفاق بو اوصافك اجمالی شودر : ملیح سیالی ، کولر یوزلی ، خوش صحبتلی ، هر کسه‌ای کچیر ، هر کسه‌ای معامله‌ایدردی . چو جوقلری بيله صحبتيله مسخر ایله دیکندن رده کورورلرسه اطرافنی آلیرلر ایدی . خواجه‌نك قاریسی ، ملاسی ، اشکی صحنه حیاتك متمماتندرد .

خواجه ؛ عصرنده ملتك خوش صحبت ، خوش مشرب حاضر جواب ، نکته پرداز ، ایجابنده سوزینی صاقیناز ، حقك مدافعه‌سنده کیمسه‌دن پروا ایتمز مشهور بر آدمی اولدیغندن و قلبی غایت تمیز ، اخلاق اسلامیة اوزرینه تربیه کوره‌رك انسانلره حسن ظنی اساس اتخاذا ایله دیکندن یارادیلشنده کی بو اساسلر مقتضاسی اوزرینه برخیلی سرگذشتلره معروض اولمش ، باشند غریب حاللر کچمشدرد . فقط شوراسنی‌ده بيلمه‌لیدر که خواجه‌یه اسناد اولونان فقره‌لر - صحتلری اولدیغی تقدیرده - هپسی سن و سالی طولوب منهای کماله ایریشدیکی زمانلره عائد اولما یوب بالطبع بوتون ادوار حیاتنده ، اکثریسی کنج‌لک‌کنده وقوعه ککش شیردرد .

مع مافیه : فقره‌لرک مجموعندن همان مرتبه تحقیقه ایریشمش بر معلومات

اجمالی یازمقلغمز لازم کلیرسه دییه بیلیرزکه : خواجه : روحی خفیف ، طبعاً لطیفه میال ، زمانمژک بعض توخافلری کبی غریب تصادفلرک سوقله اکثر غرابتلر کانه خواجه بی آرار ، بولور . کولدریچی حاللر ؛ ایسته مه دن باشنه کلیر ، ذاتاً هر کس ده کندیسندن برغریبه بکلر ، مجلسلرک طوزی بوبری ، یاراننک محبوب القلوبی بذات ایدی . کنجکلنه عائد اولماسی لازم کلن بعض سربست وقایعدن قطع نظر ایدیلنجه سرگذشتنک اکثرینسک احکامی خواجه نك عادی ، مبتدل ، دالقاووق اولمادیغنی ، بلکه جمله عندنده محترم ، صلاح واستقامتی مسلم رجال ملکیتدن معدود بولندیغنی استنباط ایلرز . آنجاق بعض متأخرین صوفیه نك اسنادی وجهله بز خواجه ده تصوف شمه سی کوره مه یورز . حتی بعض مجامع وقیودده کورولدیکی اوزره خواجه نك احفاد کزین مولانادن شیخ جمال الدین اقسرای اولادندن اولدیغنه و مشهور (حضر بک) دخی خواجه نك اخفادندن بولندیغنه دائر فقره ده حیرتی موجبدر . کرچه آقشهر جهتنده بعض اولاد مولانا ساکن اولدیغنی و صوک عصرلره قادار اولاد مولانا جوار تربده ساکن اولمایوب اکثرینی طریق علمی به ، بعضلری مأموریت حکومت ، بر خیلیمی ده هر کس کبی کسب معیشته سالک اولاراق مملکتتمزک هر طرفنه یاییلمالرینه نظراً بوسبوتون باب امکان مسدود دیکلسده خواجه نك مولویلیکه علاقه سینه دائر کتابنده بر قید اولمادیغنی کبی نقیر وقطیر اصول وفروعی معلومز بولنان مولویلیکه او زمانه کوره مناسبت آلیز بر اشارت بیله یوقدر . هله آثار مولانایه وقوفنی آکدیریر بر سوز دخی کورولمز . آنجاق خواجه نك متعدد قونییه سیاحتلریله برده فارسی بیلدیکنه عائد :

رقم بجای سیوریلر کوردم طوقوز خرآمده

برقاچی پاتاقلام برقاچی تارلا میروود

و :

مور منکشه بوینن آکش اوپورست

کافر صوغان قات قات لباس کیپرست

بیت هزل آمیزلری واردرکه هم سحتلری مشکوک ، همده علماء دلیل

صایله جق طرزده قبولدن مستبعددر . بناءً علیه تصو فله خواجه آره سنده
مناسبت بزجه کوروله مز .

بالجمله مجامع و دواوین و آثار و تواریخ مولویه ده نصرالدین خواجه نك
حضرت مولانایه نسبت نسبییه سی اولدیغنه دائر برقید برایما دخی کورمه دیکمزدن
بوجهتده بزجه چوق شهیدر .

بعضی ارباب قلممزدده خواجه بی کندینه کورده - مثلاً عمر خیام کی -
مبالات دینه دن محروم ، صیره سی کلدکجه صافلغه و وره رق دین ایله رجال دین
ایله ا کله نیر بر فیلسوف کی کوستر مک ایستر . بوکاده (لطائف) کتابنک
قدیم نسخه لرده اولان حق کتاب خارچنده آغیزلرده طولاشان لطائفی دلیل
طومتغه قالدیشیر .

من القديم بشریتک معتدایددرکه ایشینه کلن اک چوروك دلیلی بر چوق
شواهد و نظائرله بسله یه رك نص قاطع درجه سنه اصعاده چالیشیر . اونک مخالفی
اولان دلیلاری ده ینه بر چوق سبیلری یامایب سوسله یه رك و علمینده استعمال
ایدرك هیچه چیقاریر . ایشته بو قیلدن اولارق ماهیتی ارباب علمه معلوم اولان
فقره لرده خواجه نك مبالاتسز بر مستهزی اولدیغی ادعا دخی بیغنادره . بیلیرزکه
خواجه ملی ادبیاتمزدده کی نکتیه پردازلوق ، بذله کولوق قسمنک اک بارز بر
سیماسیدر . بناءً علیه : هنوز آرادن بر عصر کچر کچمز هپ بو قبیل قیمتدار
فکرلر خواجه یه عزو ایدلمش ، قائلی بر باشقه سی بیله اولسه اوکا بدل خواجه یه
اسنادده اصلاً باس کورولمه مشدر . چوتکه خواجه او قسم ادینک محراب
یکتاسیدر . ناصلکه علما و مشایخکشان جلیله یا قیشمایان دینسزجه و مستهزیانه
فقره لر فقرای بکتاشیه اسناد اولونه کلمشدر . خواجه بکتاشی ولی حضرت تلی
خواجه احمد یسوی خلفاسندن واجله صلحای خواجه کاندن ایکن بر عصر
صوکره پیر اوینه قلندران حیدریه نك بعده اباحیه حروفیه نك التجاسی ،
یکیکچریلرک طریقت بکتاشیه منتسب اولسی حسیبله بابالرك قیدسز و مبالاتسز
یکیکچری طورلاقلی ایچنده کسب نفوذ ایله مه سی ، اونرله برابر عیش و نوشه ،
جنک و چغانه یه طالمه سی ، بابالر یکیکچری آغلرینک ندیم و همدی اولسی کی
سبیلر الجاسیله صکره کلن بکتاشیلرده مبالات دینه آلامش و جمله سی بو کی

اوصافله شهرت آمشدر . بالطبع او طریق جلیله و رجال بکتاشیه به او اوصافک
تعمیمی چیرکین بهتاندر . خواجهدده کوردیکمز بو کچی حاللراصلاح معروفرزجه
بر « مظهریت » در . آرتیق خواجهددن بو مظهرتی فک ایلهمکه کیمسه قادر
دکیلدر . صیره سی کلش ایکن شو مهمه بی عرض ایدلم که مؤلف اماندن
اولمالیدر . مثلاً (لطائف نصرالدین) ی جمع و تألیف ایلین ذات ؛ کتابی
مؤلفندن بری عنغه ایله نقل ایدنلردن اخذ ایلهمه لی . کتابک تواتر و شیوعی
بوکا حاجت بیراقاسه بیله هر حالده اک قدیم واک صحیح متعدد نسخه لره مراجعتله
تصحیح ایلهمه لیدر . آغیزدن ایشیتیلنلری علاوه ایدمک اولورسه اولو
راویلرینک نامنی تصریح ایتمه لی . ثانیاً او فقره مشهور و معروف درجه سندمه
خواجیه اسناد ایدلمش اولمالی . ثالثاً او فقره خواجهنک آغیزلرده مشهور
اولان و کتابنده کی دیگر فقره لر احکامنی اوخشیان اخلاق و اوصافنه مطابق
اولمالی . هله ضد اولمامه لی . رابعاً حکایه عیناً نقل ایدیلوب هیچ بر اساس
تحریف اولونمامه لی ، هله اوزمانک شیوه سیله اولان محاوره وبالخاصه خواجهنک
« ضرب مثل » اولوب قلش اولان سوزلری اصلاً دیکشیدیرلمه لی . مثلاً
(کچ بیکیم کچ) تعیری بر قیلده در . بو (کچ آصلانم کچ) دییه تحریف
ایدلمز . حتی (امام .. صورنجه جماعت .. چار) تعیر غلیظی بیله (امام آقصرنجه
جماعت او کسورور) دینیه مز . چونکه بو (لطائف) ده یکانه مقصد ؛ اکثریا
فقره نک صوکنده کی قوتلی سوزدر . او سوز ؛ او قدر قوتلیدر که لسان ملتدم
ضرب مثل اولمق شرفنی قازانمشدر . بلکه حکایه صوکرده دن اویدورولمشدر .
مقصده ده حکایه نک قبه سی اولمق اوزره صوک سوزی یرینه اوتورتمقدر . مثلاً
(بن صاغ ایکن شورادن کچردم) جمله سنی حاوی اولان حکایه اویدورمه
اولایلیر . فقط فرض ایدلم که : بویوک بر انقلاب اولمش ، بر حکومت کیتمش
یرینه بر حکومت کلش . اسکی حکومتدن قالمه بر وزیر بر وقت (افندم !
فلان مسئله خارجه ده زمان دولسکیزده نه یولده معامله اولوردی ؟) سؤالنه
او ذاتک : (بن صاغ ایکن شورادن کچردم .) دییه فیکرینی سویله مه سی نه
قدر بلیغ اولور . نه درجه جمعیتی دوشر .

(آنا) تعبیر ایتدیکمز بویه بر کتاب شو صایدیغ اوصاف امانت و صداقتی حائز اولدینی حالدہ مؤتمن و اهل بولنان ذات طرفندن جمع ایدلدکن صوکره بو اصلدن اقتباس ایدیلن فقره لرده بر ادیب — استادانه اولمق شرطیه — بعض تصرفات یاهر ق ایجاب حاله توفیق ایده بیلیر . بلکه بعضاً اصلندن داها طائلی دوشورور .

وقتیله بر (لطائف نصرالدین) ک اصل صحیحنه علاوه افواه ناسدن شرائط تصحیحه رعایت ایدرک جمع ایله دیکمز (کلیات) ی نشر ایله دیکمزده مجعول (ادبیات عثمانیه) ایله مألوف اولان آرقه داشلریمزدن بری استخفاف ایدیوردی . بوکبی آثار ملیه بی بایاغی و عامیانه بولیوردی . بوکون حکومتمزک کندی ملیتمز اساس اوزرینه تأسس ایله دیکمی کورمکله قریرالین اولویورز . معارف وکالتمزده رسماً ملی ادبیاتمزک احیاسنی اسالاساس اتخاذا ایله مشدر . بناء علیه : خواجه مزک اشبو یادکار عرفانی باشده بولونمق اوزره خلقمز آراسنده یاشایان نه قدر کتابلر ، شعرلر ، ماصالیر ، ضرب مثلر ، تعبیرات مخصوصه لر وارسه بونلر ملی ادبیاتمزک تملی اوله حق و حقیقی ادبیاتمز بوتون ملتیزی احاطه ایله مش اولدینی حالدہ بو اساسدن یوکسه له جکدر .



(اقبال کتب خانہ سندھ بولن ان کلیتی کتا بلر)

غروش

عشاق زاده خالد ضیا بك	۵۰	کنارده قالمش
» »	۵۰	بر حکایه سودا
» »	۱۰۰	قریق حیاتلر
» »	۱۰۰	عشق ممنوع

رشاد نوری بك	۵۰	کیزی آل
» »	۵۰	دامغا
» »	۵۰	سومش ییلدیزلر
» »	۷۵	دوداقدن قلبه
» »	۱۰۰	چالی قوشی

خالدہ ادیب خانم	۲۵	رائقك آنه سی
» »	۵۰	خراب معبدلر
» »	۵۰	یکی توران
» »	۵۰	سویه طالب
» »	۷۵	خندان

کزیده صبری خانم	۱۵	منور
» »	۵۰	اولمش برقادینك اوراق متروكه سی
» »	۵۰	ندرت
» »	۵۰	بیان کلی

۵۰ عشق حجاجی

اورخان مدحت بك

۵۰ مجهول قان

» »

۵۰ سیدلی کیجه لر

خالده نصرت خانم

۲۵ خانم مکتوبلری

» »

۷۵ چوبان یلدیزی

یساری زاده محمود اسعد بك

۱۰۰ ایلول

محمد رؤف بك

۲۵ صوك باصامق

كلثوم نیازی خانم

۵۰ قیصقانیچ کوزلر

سعاد معمر بك

۶۰ مهجوره ايله حكمت

مرحوم وجیهی

۲۰ احسن خانم

احمد نورالدین بك

۲۵ تراویحدن سحوره

ارجند اکرم بك

۲۵ کون باتارکن

» »

۲۵ عصریلر

» »

۲۵ صابر افندیك کلیفی

»

۲۵ قویوق

» »

۴۰	قان وایمان	ارجند اکرم بك
۲۰	اولیای جدید	" "

۱۵	ارنلرک باغندن	یعقوب قدری
----	---------------	------------

۲۵	فیسکدر	اورخان سیفی
----	--------	-------------

۱۰۰	روبنسون قروزوئ	محرری دانیل دیفونه مترجمی شکری قایا بك
۳۵۰	ایکی چوجوغك دور عالمی	محرری ژان دولاهیر مترجمی اسماعیل حکمت
۸۰	شارلو پولیس خفیه سی ۱-۱۶	نجی به قدر مترجمه سی بدیعہ ثروت
۳۰	سوکیلی آرقداشم	محرری ژان لهرمون مترجمی اسما ظافر
۱۵	اونودولان آدام	محرری پیر بنوا مترجمی احمد کامل
۵۰	آزاده	محرری پیرلوتی ناقلی خندان لطفی
۵۰	عصری قیز	محرری ت تریلی مترجمی زاغب رفقی
۵۰	بوشنونك سرکدشتی	محرری پول دوقوق مترجمی سلیمان توفیق
۷۵	شیطانك اوغلی	محرری پول فہوال ناقلی حسن بدرالدین
۱۲۵	پارس چیچکلری	محرری میشل زہ واقو مترجمی زاغب رفقی
۵۰	آتشلر ایچنده	مؤلفی غاستون لہرو ناقلی حسن بدرالدین
۷۵	کوزل ریتا	مترجمی بدیعہ ثروت وحسن بدرالدین
۱۰۰	تورک مصالیری ۱ — ۲۰	نجی به قدر محرری سلیمان توفیق

۵۰	جزا قانونی	۳ پرده وودویل ابن الرقی احمد نوری
۲۵	سکزنجی	۴ پرده قومہ دی ابن الرقی احمد نوری
۵۰	ایلك شاعر منظوم ماسال	۴ پرده خالد فخری

۵۰. قرقندن صوکره ۳ پرده لك قومديا خالد فخری

۲۵. برکیجه فاجعه سی پیس ۳ پرده رشاد نوری

۲۵. خانملر ترزخانه سی ۳ پرده لك وودویل یساری زاده محمود اسعد

۲۵. ارنلر ارچند اکرم

۳۰. فروزان عشاقی زاده خالد ضیا

۳۰. کابوس

۱۵. بال قاباغی اولنديرلم ۲ پرده قومدی م. طلعت

۱۰. عبدالرحمن افندی کبه ۲ پرده قومدی

۱۰. چالیشان قازانیر ۳ پرده لك ملی تمثیل ذلیخا عثمان

۱۰. کوچوک جمال ۵ پرده لك ملی تمثیل

۱۰. عصری خلیار قومدی ۱ پرده ابن الرقیق احمد نوری

۱۵. امیدک کونشی پیس ۲ پرده رشاد نوری

۱۰. { غزته جی دوشمنی
شمسیه خیرسزی
اختیار سرسری } بر آراده برر پرده لك قومدی رشاد نوری

۱۰. صوگ پری پیس ۳ پرده ذلیخا عثمان

۱۰. تحریر وظیفه سی سلیمان شوکت

۱۰. { شکرلی چوره ک
علاج شیشه سی
خیرسز وار
مونولوغ
چیچکجیلر و ملیکه نك ظفری } ذلیخا عثمان

۷۵. لطائف خواجه نصرالدین ولد چلبی

۲۵. کامل الکلام و بانوی جهان سلیمان توفیق

۵۰. طوطی نامه

سلیمان توفیق

کرم ایله صلی	۲۵
لایلا ایله مجنون	۲۵
طاهر ایله زهره	۱۵
عاشق عمر دیوانی	۲۰
غازی محمود	۱۰
خورشید ایله ماه مهری	۱۰
طیار زاده	۷۲۰
کل ایله ستمکار	۱۰
سیف الملوك	۱۵
عابق غریب	۱۰
رازنهان ایله ماه فیروز سلطان	۱۰
خنجرلی خانم	۱۵
برلانتہ مکتوبلر	۷۲۰
حکایه شاپور چلبی	۱۵

راغب رفقی

قهوه تلوه سیله کشف استقبال	۱۰
رؤیا تعبیری	۷۲۰
انسانلری یوزندن طانیماق صنعتی	۷
الدن استقبال نصل او قونور	
طلسم نه در ونه ایشه یارار	
نصل خبر آل نور	
استقبال	

له قویه لم

۵۰	زمانزده اصول انشا و مخابره	معلم . م . جودت
۵۰	آریلقلر	روشن اشرف
۷۵	ظلمتده نوره	م . شمس الدین
۵۰	تورك خلق ادبیاتی	مدرس دوكتور ايغنايس قونوس
۵۰	علم روح اجتماعى	دوكتور عبدالله جودت
۶۰	حيات ادبيه	رائف نجبت
۱۵	تشریفات و آداب معاشرت	لطفي سیمای
۲۰	جمهوریتده وطنداش	منعنى زاده اھم
۸۰	حاکمیت و حریت	» »
۲۵	ضیا کوك آلپ و مفكوره	صفوت عرفی
۵	ضرب مثلریمز حقنده تحلیلی تنقیدات	عمر تحسین
۲۵	علم احوال روح	علی عرفان
۲۵	سیاست خارجیہ	لطفي سیمای
۶۰	بوکونکی ادبیات	کوپریلی زاده محمد فؤاد
۵	حاجی بایرام ولی	بروسه لی محمد طاهر
۵۰	کلیستانلر خرابه لر	خالد فخری
۱۵۰	ندیم دیوانی	مصیحی خلیل نهاد
۵۰	آینه دوران	» »
۱۰۰	رباعیات خیام	دوكتور عبدالله جودت
۵۰	کاروان عمر	حسین دانش

۲۵	شیخ اکبری نیچین سوه رم	محمد عا
۷۵	یکرمنجی عصرده اسلامیت	
۲۰	دینی حسب حال	» »
۱۰	تعصب	ولد چلبی
۱۰	انحطاط اسلام	سلیمان توفیق
۲۰	بدره المعالی فی	» »

۵۰	چو جوق بسله مک	دوقتور	رفیق منیر
۱۵	دیاترمی حلب و شرق چییانلری	•	خلوصی بهجت
۱۰۰	فرنکی قرحه ابتدائیه سی و سریری	•	خرده بینی تشخیصی
۱۷۵	مختبر طب عدلی رهبری	•	خالد ناجی
۱۷۵	کیمیای غیر عضوی درسری	•	لیغور
۳۰۰	علم حیوانات درسری ۱ — ۲	•	اسماعیل حق
۲۰۰	چو جوق خسته لقلری	•	حامد عثمان
۲۵۰	علاجه تداوی	•	توفیق سالم
۶۰	تلخیص عملیات ولادیه	•	حسنی شا کر
۵۰	طبابت عدلیه رهبری	•	وصفی و بهالدین شا کر
۱۰	ارنست فون لایدن	•	سلیمان نعمان
۱۰	بتر و تثمیم مفصل	•	ندیم
۲۵	جراحی عمومی لکسردن	•	کمال
۲۵	آلبومینی تبولر	•	صائم علی
۱۵	حلقوم التهاباتی	•	بحری عصمت
۲۰	اون سکز یاشنه کیرن اوغوللری مزه برهکیمک نصیحتی		

